


# ছায়াত্ব বাহুল্য (ছাঃ)



মুহাম্মাদ আসাদুল্লাহ আল-গালিব



**ইসলামিক অনলাইন মিডিয়া**

পবিত্র কুরআন ও ছহীহ সুন্নাহর আলোকে জীবন গড়ার প্রত্যয়ে

[www.i-onlinemedia.net](http://www.i-onlinemedia.net)

পরিবেশনায়

**ইসলামিক অনলাইন মিডিয়া**

[www.i-onlinemedia.net](http://www.i-onlinemedia.net)



প্রকাশক : হাদীছ ফাউন্ডেশন বাংলাদেশ

কাজলা, রাজশাহী-৬২০৪

হা.ফা.বা. প্রকাশনা-৮

ফোন ও ফ্যাক্স (অনুঃ) : ০৭২১-৮৬১৩৬৫, ৭৬০৫২৫

صلاة الرسول (ص)

تأليف: د. محمد أسد الله الغالب

الناشر: حديث فاؤন্ডেশন بنغلاديش

(مؤسسة الحديث بنغلاديش للطباعة و النشر)

১ম প্রকাশ : ফেব্রুয়ারী ১৯৯৮ইং

২য় সংস্করণ : ফেব্রুয়ারী ২০০০ইং

৩য় সংস্করণ (বর্ধিত): ফেব্রুয়ারী ২০০১ইং

॥ সর্বস্বত্ব প্রকাশকের ॥

কম্পোজ : হাদীছ ফাউন্ডেশন কম্পিউটার্স  
কাজলা, রাজশাহী।

মুদ্রণ : সোনালী প্রিন্টিং এণ্ড প্যাকেজিং লিঃ, সপুরা, রাজশাহী, ফোন: ৭৬১৮৪২।

নির্ধারিত মূল্য : ৪০ (চল্লিশ) টাকা মাত্র।

---

**SALATUR RASUL (Sm) by Dr. Muhammad Asadullah Al-Ghalib,**  
Professor, Department of Arabic, University of Rajshahi, Bangladesh.  
Published by HADEETH FOUNDATION BANGLADESH, Kajla,  
Rajshahi, Bangladesh. Ph & Fax (Req): 88-0721-861365, 760525.  
Fixed price Tk. 40 only.

# ছালাতুর রাসূল (ছাঃ)



মুহাম্মাদ আসাদুল্লাহ আল-গালিব

www.i-onlinemedia.net

বিসমিল্লা-হির রহমা-নির রহীম

صَلُّوا كَمَا رَأَيْتُمُونِي أُصَلِّي

‘তোমরা ছালাত আদায় কর, যেমনভাবে আমাকে ছালাত আদায় করতে দেখছ’  
(বুখারী, ‘আযান’ অধ্যায় ১/৮৮ পৃঃ; মিশকাত ‘আযান’ অনুচ্ছেদ, হাদীছ সংখ্যা ৬৮৩)।

২য় সংস্করণের

## ভূমিকা

নাহমাদুহু ওয়া নুছাল্লী ‘আলা রাসূলিহিল কারীম। আন্মা বা‘দ-

প্রথম সংস্করণের ৫০০০ কপি ‘ছালাতুর রাসূল (ছাঃ) (সংক্ষিপ্ত)’ প্রকাশিত হওয়ার মাত্র দেড় মাসের মধ্যে শেষ হয়ে যায়। কিন্তু পাঠক সমাজের বাঁধভাঙ্গা চাহিদা মোতাবেক আমরা যথাসময়ে তা পুনঃ মুদ্রণ কিংবা ২য় সংস্করণ বের করতে পারিনি বলে দুঃখিত। সমাজের চাহিদার তুলনায় আমাদের সামর্থ্য নিতান্তই অপ্রতুল। তদুপরি মাননীয় লেখকের প্রচুর ব্যস্ততা ও সময়ের স্বল্পতার কারণে দ্বিতীয় সংস্করণ প্রকাশে দেরী হয়ে গেল। এতদসত্ত্বেও আমরা এই গুরুত্বপূর্ণ ও মূল্যবান বইটি প্রকাশ করতে পেরে মহান আল্লাহ তা‘আলার অশেষ শুকরিয়া আদায় করছি, আলহামদুলিল্লাহ। কঠোর অধ্যবসায় ও অমানুষিক পরিশ্রম করে মাননীয় লেখক সমাজের চাহিদা পূরণে যে অবদান রেখেছেন, এজন্য আমরা তাঁর নিকটে চিরকৃতজ্ঞ। আমাদের গবেষণা মাসিক আত-তাহরীকের মাধ্যমে বইটির মাসআলা-মাসায়েল সম্পর্কিত পরামর্শ আহ্বান করা হয়েছিল। ফলে স্বীকৃত পাঠক সমাজের নিকট থেকে আমরা যেসব পরামর্শ পেয়েছিলাম, সেগুলিকে সম্মান জানাতে গিয়ে বইটির কলেবর পূর্বের তুলনায় পূর্বের তুলনায় প্রায় দ্বিগুণ হয়েছে (৮০ পৃষ্ঠার স্থলে ১৪৪)। উন্নত সাহিত্যিক মান ও বিপুল তথ্য সমৃদ্ধ হওয়া ছাড়াও বইটির একটি অনন্য বৈশিষ্ট্য আমরা গর্বের সাথে বলতে পারি যে, মাননীয় লেখক ও দারুল ইফতা-র সম্মানিত সদস্য বৃন্দের সর্বোচ্চ প্রচেষ্টা অনুযায়ী বইটি সম্পূর্ণরূপে ছহীহ হাদীছের ভিত্তিতে রচিত হয়েছে। ফালিল্লা-হিল হাম্দ। এ বইয়ে নির্দিষ্টভাবে কোন বিদ্বান, মাযহাব বা তরীকার অঙ্ক অনুসরণ করা হয়নি। অবশ্য ইজতেহাদী বিষয়গুলি বিদ্বানদের জন্য চিরকাল উন্মুক্ত থাকবে। মানুষ ভুলের দাস। শত চেষ্টা সত্ত্বেও ভুল থাকা অসম্ভব নয়। তাছাড়া প্রেসের ছাপাও ভাল হয়নি। সহৃদয় পাঠক সমাজের অব্যাহত পরামর্শ ও সহযোগিতা সর্বোপরি আল্লাহ পাকের রহমত আমাদের সাথে থাকলে আগামীতে আরও সুন্দর করে বইটি পাঠক সমাজকে উপহার দেওয়ার আশা রইল। বইটির রচনায় ‘দারুল ইফতা’-র সম্মানিত ওলামায়ে কেলাম উদারভাবে যে সহযোগিতা প্রদান করেছেন, সেজন্য তাঁদের প্রতি আন্তরিকভাবে কৃতজ্ঞতা প্রকাশ করছি। বইটি আমাদের সকলের পরকালীন মুক্তির অসীলা হুকুম, মহান আল্লাহর দরবারে এই প্রার্থনা জানাই। আমীন!!

নিবেদক

অধ্যাপক মুহাম্মাদ আব্দুল লতীফ

সচিব

হাদীছ ফাউণ্ডেশন বাংলাদেশ

# সূচীপত্র

(محتویات)

পৃষ্ঠা নং

১. ছালাত

৭-২৯

ছালাতের সংক্ষিপ্ত নিয়ম-৭, সূরা সমূহ-৯, ছালাতের সংজ্ঞা, গুরুত্ব-১৭, ছালাত তরক কারীর হুকুম -১৮, ছালাতের ফযীলত সমূহ-২০, মসজিদে ছালাতের ফযীলত-২২, ছালাতের নিষিদ্ধ স্থান সমূহ, ছালাতের শর্তাবলী-২৩, ছালাতের রুকন সমূহ-২৪, ওয়াজিব সমূহ-২৬, সুন্নাত সমূহ, ছালাত বিনষ্টের কারণ, ওয়াজু সমূহ-২৭, ছালাতের নিষিদ্ধ সময়-২৯।

২. ত্বাহারৎ বা পবিত্রতা

৩০-৩৮

ওযু-৩০, ওযুর ফযীলত, বিবরণ-৩১, ওযুর তরীকা-৩২, অন্যান্য মাসায়েল-৩৩, ওযু ভঙ্গের কারণ সমূহ-৩৪, গোসলের বিবরণ-৩৫, তায়াম্মুমের বিবরণ-৩৬, পেশাব-পায়খানার আদব-৩৭।

৩. আযান

৩৮-৪৬

আযানের সংজ্ঞা, ঘটনা, ফযীলত-৩৮, আযানের কালেমা সমূহ-৩৯, এক্বামত-৪০, তারজী আযান, সাহারীর আযান -৪১, আযানের জওয়াব, আযানের দো'আ-৪২, দরুদ-এর ফযীলত-৪৩, আযানের জওয়াবে বাড়তি বিষয় সমূহ-৪৪, আযানের অন্যান্য পরিত্যাজ্য বিষয়-৪৫, আযানের অন্যান্য মাসায়েল-৪৬

৪. ছালাতুর রাসূল (ছাঃ)

৪৭-৭৭

ছালাতের বিবরণ, নিয়ত, তাকবীরে তাহরীমা-৪৭  
ছানা, বিসমিল্লাহ পাঠ-৪৯, ইমামের পিছনে সূরায়ে ফাতিহা পাঠ -৫০  
ইমামের পিছনে সূরায়ে ফাতিহা পাঠ না করা ৫৩, রুকু পেলো রাক'আত পাওয়া-৫৭, সশব্দে আমীন-৬০, রুকু-৬২, ক্বওমা-৬৩, রাফ'উল ইয়াদায়েন-৬৫, সিজদা-৬৮, শেষ বৈঠক-৭১, তাশাহুদ-৭২, নবীকে সম্বোধন-৭৩, দরুদ-৭৪, দো'আয়ে মাছুরাহ-৭৪, সালাম ও দো'আ-৭৫, সুন্নাত-নফলের বিবরণ-৭৬

৫. সালাম ফিরানোর পরের দো'আ সমূহ

৭৭-৯৪

মুনাজাত -৮১, দো'আর স্থান সমূহ-৮২, সম্মিলিত দো'আ-৮২  
সম্মিলিত দো'আর ক্ষতিকর দিক সমূহ-৮২, সিজদায়ে সহো-৮৩  
সিজদায়ে তেলাওয়াত-৮৪, সিজদায়ে শুকুর-৮৫, মাসবুকের ছালাত-৮৬  
ছালাতের বিবিধ জ্ঞাতব্য-৮৬

৬. বিভিন্ন ছালাতের পরিচয়

৯৫-১২০

বিতর ও কুনূত-৯৫, কুনূতে নাযেলার দো'আ-৯৮, তারাবীহ ও তাহাজ্জুদ-৯৯, সফরের ছালাত-১০৩ জুম'আর ছালাত -১০৫, ঈদায়নের ছালাত-১১১, জানাযার ছালাত-১১৪, ছালাতুয যুহা ১৩২, সূর্য ও চন্দ্র গ্রহণের ছালাত-১৩২, ইস্তিস্কা -১৩৩, ছালাতুল হাজত, তালাতুত তওবা-১৩৫, ইস্তেখা-রাহ ১৩৬, ছালাতুত তাসবীহ ১৩৮, যরুরী দো'আ সমূহ-১৩৯।

ছালা-তুর রাসূল (ছাঃ)-এর

বানান রীতি

| আরবী হরফ                         | বাংলা হরফ/চিহ্ন | উদাহরণ                                       |
|----------------------------------|-----------------|--|
| ء ا (হামযাহ)                     | ,               | মা'কূল                                       |
| ع (আয়েন)                        | ,               | না'বুদু                                      |
| ط (ত্বা)                         | ত্ব             | ত্বা-হা                                      |
| ث ص (ছা, ছোয়াদ)                 | ছ               | হাদীছ, ছালাত                                 |
| س (সীন)                          | স               | সালাম  |
| ذ ز ض ظ (যাল, ঝা, যোয়াদ, যোয়া) | য               | যা-লেকা, ঝাওজুন,<br>যা-ল্লীন, যামাউন         |
| ج (জীম)                          | জ               | রাজীম  |
| ق (বড় ক্বাফ)                    | ক্ব             | ফালাক্ব                                      |
| টেনে পড়ার জন্য                  | - ঙ, ী, উ, ্    | ছিরা-ত্বাল, নাস্তা'ঈন,<br>রহীম, মা-'উন, লাহু |

বাংলা উচ্চারণের সময় অধিকাংশ ক্ষেত্রে আরবী- উর্দু হরফের দিকে খেয়াল রাখা হয়েছে।- লেখক

সংশোধনী

| পৃষ্ঠা | লাইন                  | শুদ্ধ                      |
|--------|-----------------------|----------------------------|
| ২৪     | ১৯ টীকা নং ৫৪         | ৪৯                         |
| ৩৯     | ৭ যোগ,                | যোগ দিবে,                  |
| ৫১     | ৪ ইয়াক্বুরা' -এর পরে | বি ফা-তিহাতিল কিতা-বি      |
| ৬১     | ১১ *                  | ৫৪ নং টীকার অনুরূপ         |
| ৭৫     | ১৯ তাব'আদ্বু ইকা-দাকা | তাব'আছু ইবা-দাকা           |
| ৮৩     | ১৫৫ টীকার শেষে        | 'শেষ বৈঠকে' কথাটি বাদ যাবে |
| ৯০     | ৩ মুকায্বিবু          | নুকায্বিবু                 |
| ৯১     | ৫ 'হবে'               | কথাটি বাদ যাবে।            |
| ৯৪     | বস্তু প্রথম লাইন      | বাদ যাবে।                  |

# ছালাতুর রাসূল (ছাঃ)

## অনুধাবন করুন

সম্মানিত মুছল্লী!

অনুধাবন করুন আপনার প্রভুর বাণী-‘সফলকাম হবে সেই সব মুমিন যারা ছালাতে রত থাকে ভীত সন্ত্রস্ত ভাবে’।<sup>১</sup> অতএব গভীর ভাবে চিন্তা করুন। আপনার প্রভু আল্লাহ কিজন্য আপনাকে সৃষ্টি করেছেন? মনে রাখবেন তিনি আপনাকে বিনা প্রয়োজনে সৃষ্টি করেননি। তাঁর সৃষ্টি এ সুন্দর সৃষ্টি জগতকে সুন্দরভাবে আবাদ করার দূরদর্শী পরিকল্পনা নিয়েই তিনি আপনাকে এ পৃথিবীতে প্রেরণ করেছেন। কে এখানে সর্বাধিক সুন্দর আমল করবেন তা পরীক্ষার জন্য আল্লাহ হায়াত ও মউতকে সৃষ্টি করেছেন। আপনার হাত-পা, চক্ষু-কর্ণ, নাসিকা-জিহ্বা সর্বোপরি যে মূল্যবান জ্ঞান-সম্পদ এবং ভাষা ও চিন্তাশক্তির নে‘মত দান করে আপনাকে আপনার প্রভু এ দুনিয়াতে পাঠিয়েছেন, তার যথার্থ ব্যবহার আপনি করেছেন কি-না, তার কড়ায়-গণ্ডায় হিসাব আপনাকে আপনার সৃষ্টিকর্তার নিকটে দিতে হবে।<sup>২</sup>

কেউ আপনার উপকার করলে আপনি তার নিকটে চির কৃতজ্ঞ থাকেন। সর্বপ্রদাতা প্রভু আল্লাহর নিকটে আপনি কৃতজ্ঞতা প্রকাশ করেছেন কি? একবার ভেবে দেখুন দুনিয়ার সকল সম্পদের বিনিময়ে কি আপনি আপনার ঐ সুন্দর দু’টি চক্ষুর ঋণ শোধ করতে পারবেন? পারবেন কি আপনার দু’টি হাতের, পায়ের, কানের বা জিহ্বার যথাযথ মূল্য দিতে? আপনার হৃৎপিণ্ডে যে প্রাণবায়ুর অবস্থান, সেটি কার হুকুমে সেখানে রয়েছে? আবার কার হুকুমে সেখান থেকে বেরিয়ে আসবে? সেটির আকার-আকৃতিই বা কি, তা কি কখনও ভেবে দেখেছেন? শুধু কি তাই? আপনার পুরো দেহযন্ত্রটাই যে এক অলৌকিক সৃষ্টির অপরূপ সমাহার। যার কোন একটি তুচ্ছ অঙ্গের মূল্য দুনিয়ার সবকিছু দিয়েও কি সম্ভব?

অতএব আসুন! সেই মহান সৃষ্টিকর্তা আল্লাহর প্রতি মন খুলে কৃতজ্ঞতা প্রকাশ করি। তাঁর প্রেরিত মহান ফেরেশতা জিব্রীলের মাধ্যমে শিখানো ও শেষনবী মুহাম্মাদ (ছাঃ) প্রদর্শিত পদ্ধতিতে ‘ছালাত’ আদায়ে রত হই।<sup>৪</sup> স্বীয় প্রভুর নিকটে আনুগত্যের মস্তক অবনত করি।

১. قَدْ أَفْلَحَ الْمُؤْمِنُونَ ، الَّذِينَ هُمْ فِي صَلَاتِهِمْ خَاشِعُونَ ، = সূর্যে মু’মিনুন ১-২।
২. فَمَنْ يَعْمَلْ مِثْقَالَ ذَرَّةٍ خَيْرًا يَرَهُ وَمَنْ يَعْمَلْ مِثْقَالَ ذَرَّةٍ شَرًّا يَرَهُ = যিলযাল ৭ ও ৮
৩. وَ يَسْئَلُونَكَ عَنِ الرُّوحِ قُلِ الرُّوحُ مِنْ أَمْرِ رَبِّي وَمَا أُوتِيتُمْ مِنَ الْعِلْمِ إِلَّا قَلِيلًا = বনী ইসরাঈল ৮৫।
৪. صَلُّوا كَمَا رَأَيْتُمُونِي أُصَلِّيْ بُوখারী, ‘আযান’ অধ্যায় ১/৮৮ পৃঃ; মিশকাত ‘আযান’ অধ্যায় হাদীছ সংখ্যা ৬৮৩।



হে মুছল্লী!

ছালাতের নিরিবিলি আলাপের সময় আপনি আপনার সৃষ্টিকর্তা আল্লাহর নিকটে হৃদয়ের দুয়ার খুলে দিন।<sup>৫</sup> ছালাত শেষ করার আগেই আপনার সকল প্রার্থনা নিবেদন করুন। সিজদায় লুটিয়ে পড়ে চোখের পানি ফেলুন। আল্লাহ আপনার হৃদয়ের কথা জানেন। আপনার চোখের ভাষা বুঝেন। ঐ শুনুন পিতা ইবরাহীম (আঃ)-এর আকুল প্রার্থনা - 'প্রভু হে! নিশ্চয়ই আপনি জানেন যা কিছু আমরা হৃদয়ে লুকিয়ে রাখি ও যা কিছু আমরা মুখে প্রকাশ করি। আল্লাহর নিকটে যমীন ও আসমানের কোন কিছুই গোপন থাকেনা।<sup>৬</sup> অতএব ভীতিপূর্ণ শ্রদ্ধা ও গভীর আস্থা নিয়ে বুকে জোড়হাত বেঁধে বিনীতভাবে আপনার মনিবের সামনে দাঁড়িয়ে যান। দু'হাত উঁচু করে রাফ'উল ইয়াদায়েন-এর মাধ্যমে আল্লাহর নিকটে আত্মসমর্পণ করুন। অতঃপর তাকবীরের মাধ্যমে স্বীয় প্রভুর মহত্ত্ব ঘোষণা করুন। যাবতীয় গর্ব ও অহংকার চূর্ণ করে সৃষ্টিকর্তা আল্লাহর সম্মুখে রুকুতে মাথা ঝুঁকিয়ে দিন। তারপর সিজদায় গিয়ে মাটিতে মাথা লুটিয়ে দিন। সর্বদা স্মরণ রাখুন তাঁর অমোঘ বাণী- 'যদি তোমরা আমার কৃৎজতা স্বীকার কর, তবে আমি তোমাদেরকে অবশ্য অবশ্যই বেশী করে দেব। আর যদি অকৃৎজ হও, তবে জেনে রেখ আমার শাস্তি অত্যন্ত কঠোর'<sup>৭</sup>

অতএব আসুন! ইসলামের শ্রেষ্ঠতম ইবাদত ও প্রার্থনার অনুষ্ঠান 'ছালাতে' রত হই 'তাকবীরে তাহরীমা'-র মাধ্যমে দুনিয়ার সবকিছুকে হারাম করে একনিষ্ঠভাবে বিনম্রচিত্তে বিগলিত হৃদয়ে!!

৫. ...إِنْ أَحَدَكُمْ إِذَا صَلَّى يُنَاجِي رَبَّهُ .. 'নিশ্চয়ই তোমাদের কেউ যখন ছালাত আদায় করে, তখন সে তার প্রভুর সঙ্গে 'মুনাজাত' করে' অর্থাৎ গোপনে আলাপ করে। -বুখারী ১/৭৬ পৃঃ; মুত্তাফাকু আলাইহ মিশকাত 'মসজিদ ও ছালাতের স্থান' অধ্যায় হা/৭১০; আহমাদ, মিশকাত 'ছালাতে কিরাআত' অধ্যায় হা/৮৫৬।

৬. رَبَّنَا إِنَّكَ تَعْلَمُ مَا نُخْفِي وَمَا نُعْلِنُ وَمَا يَخْفَى عَلَى اللَّهِ مِنْ شَيْءٍ فِي الْأَرْضِ وَلَا فِي السَّمَاءِ، = ইবরাহীম ৩৮।

৭. ...لَنْ نَشْكُرَكَ لَأَزِيدَنَّكَمْ وَلَنْ نَكْفُرَنَّكُمْ إِنَّ عَذَابِي لَشَدِيدٌ... ইবরাহীম ৭।



## ছালাতের সংক্ষিপ্ত নিয়ম (مختصر صفة الصلوة)

(১) তাকবীরে তাহরীমাঃ ওযু করার পর ছালাতের সংকল্প করে কিবলামুখী দাঁড়িয়ে 'আল্লা-হু আকবর' বলে দু'হাত কাঁধ বরাবর উঠিয়ে তাকবীরে তাহরীমা শেষে বুকে বাঁধবে। এ সময় বাম হাতের উপরে ডান হাত কনুই বরাবর রাখবে অথবা বাম কজির উপরে ডান কজি রেখে বুকের উপরে হাত বাঁধবে।

(২) সূরায়ে ফাতিহা পাঠঃ অতঃপর দো'আয়ে ইস্তেফতা-হ বা 'ছানা' পড়ে আ'উযুবিল্লাহ ও বিসমিল্লাহ সহ সূরায়ে ফাতিহা পাঠ করবে এবং জেহরী ছালাত হ'লে সূরায়ে ফাতিহা শেষে সশব্দে 'আমীন' বলবে।

(৩) কিরাআতঃ ইমাম কিংবা একাকী মুছল্লী হ'লে সূরায়ে ফাতিহা পাঠ শেষে প্রথম দু'রাক'আতে কুরআনের অন্য কোন সূরা বা কিছু আয়াত তেলাওয়াত করবে। কিন্তু মুজাদী হ'লে জেহরী ছালাতে চুপে চুপে কেবল সূরায়ে ফাতিহা পড়বে ও ইমামের কিরাআত মনোযোগ দিয়ে শুনবে। তবে যোহর ও আছরের ছালাতে ইমাম ও মুজাদী সকলে সূরায়ে ফাতিহা সহ অন্য সূরা পড়বে এবং শেষের দু'রাক'আতে কেবল সূরায়ে ফাতিহা পাঠ করবে।

(৪) রুকুঃ কিরাআত শেষে 'আল্লা-হু আকবর' বলে দু'হাত কাঁধ পর্যন্ত উঠিয়ে 'রাফ'উল ইয়াদায়েন' করে রুকুতে যাবে। এ সময় হাঁটুর উপরে দু'হাতে ভর দিয়ে পা, হাত, পিঠ ও মাথা সোজা রাখবে এবং রুকুর দো'আ পড়বে।

(৫) ক্বওমাঃ অতঃপর রুকু থেকে উঠে সোজা ও সুস্থিরভাবে দাঁড়াবে। এ সময় দু'হাত কিবলামুখী খাড়া রেখে কাঁধ পর্যন্ত উঠাবে এবং ইমাম ও মুজাদী সকলে বলবে 'সামি'আল্লা-হু লিমান হামিদাহ'। অতঃপর 'ক্বওমা'র দো'আ পড়বে।

(৬) সিজদাঃ ক্বওমার দো'আ পাঠ শেষে 'আল্লা-হু আকবর' বলে প্রথমে দু'হাত ও পরে দু'হাঁটু মাটিতে রেখে সিজদায় যাবে ও বেশী বেশী দো'আ পড়বে। এ সময় হাত দু'খানা কিবলামুখী করে মাথার দু'পাশে কাঁধ বা কান বরাবর মাটিতে স্বাভাবিকভাবে রাখবে। কনুই ও বগল ফাঁকা থাকবে। হাঁটু বা মাটিতে ঠেস দিবে না। সিজদা লম্বা হবে ও পিঠ সোজা থাকবে। যেন নীচ দিয়ে বকরীর বাচ্চা যাওয়ার মত ফাঁকা থাকে।

সিজদা থেকে উঠে বাম পায়ের পাতার উপরে বসবে ও ডান পায়ের পাতা খাড়া রাখবে। এ সময় স্থিরভাবে বসে দো'আ পড়বে। অতঃপর 'আল্লা-হু আকবর' বলে দ্বিতীয় সিজদায় যাবে ও দো'আ পড়বে। রুকু ও সিজদায় কুরআনী দো'আ গুলো পড়বে না। ২য় ও ৪র্থ রাক'আতে দাঁড়াবার প্রাক্কালে সিজদা থেকে উঠে সামান্য সময়ের জন্য স্থির হয়ে বসবে। একে 'জালসায়ে ইস্তিরা-হাত' বলে। অতঃপর মাটিতে দু'হাতে ভর দিয়ে উঠে দাঁড়িয়ে যাবে।

(৭) বৈঠকঃ ২য় রাক'আত শেষে বৈঠকে বসবে। যদি ১ম বৈঠক হয়, তবে কেবল 'আত্তাহিইয়া-তু' পড়ে ৩য় রাক'আতের জন্য উঠে যাবে। আর যদি শেষ বৈঠক হয়, তবে 'আত্তাহিইয়া-তু' পড়ার পরে দরুদ, দো'আয়ে মাছুরাহ ও সম্ভব হ'লে বেশী বেশী

করে অন্য দো'আ পড়বে। ১ম বৈঠকে বাম পায়ের পাতার উপরে বসবে এবং শেষ বৈঠকে ডান পায়ের তলা দিয়ে বাম পায়ের অগ্রভাগ বের করে নিতম্বের উপরে বসবে ও ডান পা খাড়া রাখবে। এসময় ডান পায়ের আঙ্গুলগুলি ক্বিবলামুখী করবে।

বৈঠকের সময় বাম হাতের আঙ্গুল গুলো বাম হাঁটুর প্রান্ত বরাবর ক্বিবলামুখী ও স্বাভাবিক অবস্থায় থাকবে এবং ডান হাত ৫৩-এর ন্যায় মুষ্টিবদ্ধ রেখে সালাম ফিরানোর আগ পর্যন্ত শাহাদাত আঙ্গুল নাড়িয়ে ইশারা করতে থাকবে। মুছল্লীর নযর ইশারা বরাবর থাকবে। তার বাইরে যাবে না।

(৮) সালামঃ দো'আয়ে মাছুরাহ শেষে প্রথমে ডাইনে ও পরে বামে 'আস্‌সালামু আলায়কুম ওয়া রাহমাতুল্লাহ' বলে সালাম ফিরাবে। প্রথম সালামের শেষে 'ওয়া বারাকা-তুহু' যোগ করা যেতে পারে। এভাবে ছালাত সমাপ্ত করে প্রথমে সরবে একবার 'আল্লা-হু আকবর' ও তিনবার 'আস্তাগফিরুল্লা-হ' বলে বিভিন্ন দো'আ পাঠ করবে। ইমাম হ'লে ডাইনে অথবা বামে কিংবা সরাসরি মুক্তাদীগণের দিকে ফিরে বসবে এবং দো'আ ও তাসবীহ সমূহ পাঠ করবে। ফিরে বসার সময় রাসূল (ছাঃ) কখনো পড়েছেনঃ *রব্বے কির্নী আযা-বাকা ইয়াওমা তাব'আছু ইবা-দাকা* 'হে প্রভু! আমাকে তোমার আযাব থেকে বাঁচাও! যেদিন তোমার বান্দাদের তুমি পুণরুত্থান ঘটাবে' (মুসলিম)।

## ছালাতে পঠিতব্য দো'আ সমূহ এবং কয়েকটি সূরা

বুকে জোড় হাত বেঁধে সিজদার স্থানে দৃষ্টি রেখে বিনম্রচিত্তে নিম্নোক্ত দো'আর মাধ্যমে মুছল্লী তার সর্বোত্তম ইবাদতের শুভ সূচনা করবে-

১. দো'আয়ে ইস্তেফতা-হ (ছানা) বা ছালাত শুরু দো'আ :

اللَّهُمَّ بَاعِدْ بَيْنِي وَبَيْنَ خَطَايَايَ كَمَا بَاعَدْتَ بَيْنَ الْمَشْرِقِ وَالْمَغْرِبِ،  
اللَّهُمَّ نَقِّنِي مِنَ الْخَطَايَا كَمَا يُنْقَى الثُّوبُ الْأَبْيَضُ مِنَ الدَّنَسِ، اللَّهُمَّ  
اغْسِلْ خَطَايَايَ بِالْمَاءِ وَالْتَّلْجِ وَالْبَرْدِ، متفق عليه -

উচ্চারণঃ আল্লা-হুয়া বা-'এদ বায়নী ওয়া বায়না খাত্বা-য়া-য়া, কামা বা-'আদতা বায়নাল মাশরিক্বি ওয়াল মাগরিবি। আল্লা-হুয়া নাক্কিনী মিনাল খাত্বা-য়া, কামা ইউনাকক্বাহু ছাওবুল আব্বিয়ায়ু মিনাদ দানাসি। আল্লা-হুয়াগ্সিল খাত্বা-য়া-য়া বিল মা-য়ি ওয়াছ ছাল্জি ওয়াল বারাদি'।

অনুবাদঃ হে আল্লাহ! আপনি আমার ও আমার গোনাহ সমূহের মধ্যে এমন দূরত্ব সৃষ্টি করে দিন, যেমন দূরত্ব সৃষ্টি করেছেন পূর্ব ও পশ্চিমের মধ্যে। হে আল্লাহ! আপনি আমাকে পরিচ্ছন্ন করুন গোনাহ সমূহ হ'তে, যেমন পরিচ্ছন্ন করা হয় সাদা কাপড় ময়লা হ'তে। হে আল্লাহ! আপনি আমার গুনাহ সমূহকে ধুয়ে ছাফ করে দিন পানি দ্বারা, বরফ দ্বারা ও শিশির দ্বারা'।

২. সূরায়ে ফাতিহাঃ بِسْمِ اللّٰهِ الرَّحْمٰنِ الرَّحِیْمِ ، اَعُوْذُ بِاللّٰهِ مِنَ الشَّیْطٰنِ الرَّجِیْمِ ،

اَلْحَمْدُ لِلّٰهِ رَبِّ الْعٰلَمِیْنَ • الرَّحْمٰنِ الرَّحِیْمِ • مَلِكِ یَوْمِ الدِّیْنِ •  
 اِیَّاكَ نَعْبُدُ وَ اِیَّاكَ نَسْتَعِیْنُ • اِهْدِنَا الصِّرَاطَ الْمُسْتَقِیْمَ • صِرَاطَ  
 الَّذِیْنَ اَنْعَمْتَ عَلَیْهِمْ • غَیْرِ الْمَغضُوْبِ عَلَیْهِمْ وَ لَا الضَّالِّیْنَ • (আমিন)-

উচ্চারণঃ আ‘উযু বিল্লা-হি মিনাশ শায়ত্বা-নির রজীম । বিস্মিল্লা-হির রহমা-নির রহীম । আল-হামদু লিল্লা-হি রব্বিল ‘আ-লামীন (১) আর রহমা-নির রহীম (২) মা-লিকি ইয়াওমিদীন (৩) ইইয়া-কা না‘বুদু ওয়া ইইয়া-কা নাস্তাঈন (৪) ইহ্দিনাছ হিরা-ত্বাল মুস্তাক্বীম (৫) হিরা-ত্বাল্লাযীনা আন‘আমতা ‘আলাইহিম (৬) গায়রিল মাগয্ববি ‘আলাইহিম ওয়া লায্যা-ল্লীন (৭) ।

অনুবাদঃ আমি অভিশপ্ত শয়তান হ’তে আল্লাহর আশ্রয় প্রার্থনা করছি । করুণাময় কৃপানিধান আল্লাহর নামে (শুরু করছি) । যাবতীয় প্রশংসা আল্লাহর জন্য, যিনি জগত সমূহের প্রতিপালক (১) যিনি করুণাময় কৃপানিধান (২) যিনি বিচার দিবসের মালিক (৩) আমরা একমাত্র আপনারই ইবাদত করি এবং একমাত্র আপনারই সাহায্য প্রার্থনা করি (৪) আপনি আমাদেরকে সোজা-সুদৃঢ় পথ প্রদর্শন করুন! (৫) এমন লোকদের পথ, যাঁদেরকে আপনি পুরস্কৃত করেছেন (৬) তাদের পথ নয়, যারা অভিশপ্ত ও পথভ্রষ্ট হয়েছে’ (৭) । (আমীন)- আপনি কবুল করুন!

অতঃপর নিম্নোক্ত সূরা সমূহ হ’তে প্রথম দু’রাক‘আতে যেকোন দু’টি সূরা পরপর পাঠ করবে । -

৩. পরপর অন্যান্য সূরা সমূহঃ

(১) সূরা আছরঃ بِسْمِ اللّٰهِ الرَّحْمٰنِ الرَّحِیْمِ

وَالْعَصْرِ • اِنَّ الْاِنْسَانَ لَفِیْ خُسْرٍ • اِلَّا الَّذِیْنَ ءَامَنُوْا وَعَمِلُوْا  
 الصّٰلِحٰتِ وَتَوَاصَوْا بِالْحَقِّ وَتَوَاصَوْا بِالصَّبْرِ •

উচ্চারণঃ ওয়াল ‘আছর (১) ইন্নালা ইনসা-না লাফী খুসর (২) ইল্লাল্লাযীনা আ-মানু ওয়া ‘আমিলুছ ছা-লেহা-তে, ওয়া তাওয়াছাও বিল হাক্কে ওয়া তাওয়াছাও বিছ ছাবর (৩) ।

অনুবাদঃ কালের শপথ! (১) নিশ্চয়ই সকল মানুষ অবশ্যই ক্ষতির মধ্যে রয়েছে (২) তারা ব্যতীত যারা ঈমান এনেছে ও নেক আমল করেছে এবং পরস্পরকে ‘হক’-এর উপদেশ দিয়েছে ও পরস্পরকে ‘ছবর’-এর উপদেশ দিয়েছে (৩) ।

(২) সূরা হুমাযাহঃ بِسْمِ اللّٰهِ الرَّحْمٰنِ الرَّحِیْمِ

وَيْلٌ لِّكُلِّ هُمَزَةٍ لُّمَزَةٍ ۝ الَّذِي جَمَعَ مَالًا وَعَدَّدَهُ ۝ يَحْسَبُ أَنَّ مَالَهُ  
 أَخْلَدَهُ ۝ كَلَّا لَيُنْبَذَنَّ فِي الْحُطَمَةِ ۝ وَمَا أَدْرَاكَ مَا الْحُطَمَةُ ۝ نَارُ اللَّهِ  
 الْمَوْقُودَةُ ۝ الَّتِي تَطَّلِعُ عَلَى الْفَأْتِنَةِ ۝ إِنهَاعَلَيْهِمْ مَّوْصِدَةٌ ۝ فِي عَمَدٍ  
 مُمَدَّدَةٍ ۝

উচ্চারণঃ ওয়ায়লুল লেকুল্লে হুমাযাতিল লুমাযাতি (১) নিল্লাযী জামা'আ মা-লাওঁ ওয়া  
 'আদাদাহ (২) ইয়াহ্‌সাবু আন্না মা- লাহু আখলাদাহ (৩) কাল্লা লাইয়ুস্বাযান্না ফিল  
 হুত্বামাহ (৪) ওয়া মা আদরা-কা মাল হুত্বামাহ? (৫) না-রুল্লা-হিল মুক্বাদাহ (৬)  
 আল্লাতী তাভ্বালি'উ 'আলাল আফ্‌ইদাহ (৭) ইন্বাহা 'আলায়হিম মু'ছাদাহ (৮) ফী  
 'আমাদিম মুমাদাদাহ (৯)।

অনুবাদঃ দুর্ভোগ সেই সব ব্যক্তির জন্য যারা পশ্চাতে নিন্দা করে ও সম্মুখে নিন্দা করে  
 (২) এবং সম্পদ জমা করে ও গণনা করে (৩) সে ধারণা করে যে, তার মাল চিরকাল  
 তার সাথে থাকবে (৪) কখনোই নয়। সে অবশ্য অবশ্যই নিষ্কিণ্ত হবে পিষ্টকারীর  
 মধ্যে (৫) আপনি কি জানেন পিষ্টকারী কি? (৬) এটা আল্লাহর প্রজ্জ্বলিত অগ্নি (৭) যা  
 কলিজা পর্যন্ত পৌছে যাবে (৮) এটা তাদের উপরে পরিবেষ্টিত থাকবে (৯) দীর্ঘায়িত  
 স্তম্ভ সমূহে।

(৩) সূরায়ে ফীলঃ بِسْمِ اللّٰهِ الرَّحْمٰنِ الرَّحِیْمِ

أَلَمْ تَرَ كَيْفَ فَعَلَ رَبُّكَ بِأَصْحَابِ الْفِيلِ ۝ أَلَمْ يَجْعَلْ كَيْدَهُمْ فِي  
 تَضَلُّيلٍ ۝ وَ أَرْسَلَ عَلَيْهِمْ طَيْرًا أَبَابِيلَ ۝ تَرْمِيهِمْ بِحِجَارَةٍ مِّنْ  
 سِجِّيلٍ ۝ فَجَعَلَهُمْ كَعَصْفٍ مَّأْكُولٍ ۝

উচ্চারণঃ (ক) আলাম তারা কায়ফা ফা'আলা রাব্বুকা বে আছহা-বিল ফীল (খ)  
 আলাম ইয়াজ'আল কায়দাহুম ফী তাযলীল (গ) ওয়া আরসালা আলাইহিম ত্বায়রান  
 আবাবীল (ঘ) তারমীহিম বি হিজা-রাতিম মিন সিজ্জীল (ঙ) ফাজা'আলাহুম  
 কা'আছফিম মা'কুল।

অনুবাদঃ (ক) আপনি কি দেখেননি আপনার প্রভু হস্তীবাহিনীর সহিত কিরূপ আচরণ  
 করেছেন? (খ) তিনি কি তাদের চক্রান্ত নস্যাত করে দেননি? (গ) তিনি তাদের উপরে  
 প্রেরণ করেছিলেন ঝাঁকে ঝাঁকে পাখি (ঘ) যারা তাদের উপরে পাথরের কংকর

নিষ্ক্ষেপ করেছিল (ঙ) অতঃপর তিনি তাদেরকে ভক্ষিত তৃণসদৃশ করে দিলেন।

(৪) সূরা কুরাইশঃ بِسْمِ اللّٰهِ الرَّحْمٰنِ الرَّحِیْمِ

لَا يَلْفِ قُرَيْشٍ ۝ الْفِهِمْ رِحْلَةَ الشِّتَاءِ وَالصَّيْفِ ۝ فَلْيَعْبُدُوا رَبَّ هَذَا  
الْبَيْتِ ۝ الَّذِي أَطْعَمَهُمْ مِنْ جُوعٍ وَآمَنَهُمْ مِنْ خَوْفٍ ۝

উচ্চারণঃ (ক) লেঈলা-ফে কুরায়েশ (খ) ঈলা-ফিহিম রিহলাতাশ শিতা-ই ওয়াছ  
ছায়েফ (গ) ফাল ইয়া'বুদু রব্বা হা-যাল বায়েত (ঘ) আল্লাযী আত্ব'আমাহম মিন জু';  
ওয়া আ-মানাহম মিন খাওফ।

অনুবাদঃ (ক) কুরায়েশদের আসক্তির কারণে। (খ) তাদের আসক্তির কারণে শীত ও  
গ্রীষ্মকালীন সফরের (গ) অতএব তারা যেন ইবাদত করে এই ঘরের প্রভুর (ঘ) যিনি  
তাদেরকে ক্ষুধায় অন্ন দিয়েছেন ও ভীতি হ'তে নিরাপদ করেছেন।

(৫) সূরা মা-উনঃ بِسْمِ اللّٰهِ الرَّحْمٰنِ الرَّحِیْمِ

أَرَأَيْتَ الَّذِي يُكْذِبُ بِالذِّينِ ۝ فَذَكَ الَّذِي يَدْعُ الْيَتِيمَ ۝ وَ لَا يَحْضُ عَلَى  
طَعَامِ الْمَسْكِينِ ۝ فَوَيْلٌ لِّلْمُصَلِّينَ ۝ الَّذِينَ هُمْ عَنْ صَلَاتِهِمْ سَاهُونَ ۝  
الَّذِينَ هُمْ يُرَآءُونَ ۝ وَيَمْنَعُونَ الْمَاعُونَ ۝

উচ্চারণঃ (ক) আরাআয়তাল্লাযী ইয়ুকাযযিবু বিদ্দীন (খ) ফাযা-লিকাল্লাযী ইয়াদু'উল  
ইয়াতীম (গ) ওয়া লা ইয়াহযযু 'আলা ত্বা'আ-মিল মিসকীন (ঘ) ফাওয়ালুল লিল  
মুছাল্লীন (ঙ) আল্লাযীনা হম 'আন ছালা-তিহিম সা-হুন (চ) আল্লাযীনা হম ইয়ুরা-উনা,  
(ছ) ওয়া ইয়াম না'উনাল মা-উন।

অনুবাদঃ (ক) আপনি কি দেখেছেন তাকে, যে বিচারদিবসকে মিথ্যা বলে? (খ) সে  
সেই ব্যক্তি, যে ইয়াতীমকে গলা ধাক্কা দেয় (গ) এবং মিসকীনকে অন্ন দিতে  
উৎসাহিত করে না (ঘ) অতএব দুর্ভোগ সেই সব মুছল্লীর (ঙ) যারা তাদের ছালাত  
সম্বন্ধে বে-খবর (চ) যারা তা লোক দেখানোর জন্য করে (ছ) এবং নিত্য ব্যবহার্য বস্তু  
অন্যকে দেয় না।

(৬) সূরা কাওছারঃ بِسْمِ اللّٰهِ الرَّحْمٰنِ الرَّحِیْمِ

إِنَّا عَطَيْنَاكَ الْكُوفْرَ ۝ فَصَلْ لِرَبِّكَ وَأَنْحَرْ ۝ إِنَّ شَانِئَكَ هُوَ الْأَبْتَرُ ۝

উচ্চারণঃ (ক) ইন্বা আ'ত্বায়না কাল কাওছার (খ) ফাছাল্লে লে রব্বিকা ওয়ান্হার (গ)  
ইন্বা শা-নিআকা হযাল আবতার।

অনুবাদঃ (ক) নিশ্চয়ই আমি আপনাকে 'হাউয কাওছার' দান করেছি (খ) অতএব আপনি আপনার প্রভুর উদ্দেশ্যে ছালাত আদায় করুন ও কুরবানী করুন (গ) নিশ্চয়ই আপনার শত্রুরাই নির্বংশ।

(৭) সূরা কা-ফিরুণঃ

بِسْمِ اللّٰهِ الرَّحْمٰنِ الرَّحِیْمِ

قُلْ يَا أَيُّهَا الْكٰفِرُونَ ۝ لَا اَعْبُدُ مَا تَعْبُدُونَ ۝ وَلَا اَنْتُمْ عٰبِدُونَ مَا اَعْبُدُ ۝  
وَلَا اَنَا عٰبِدٌ مَّا عٰبَدْتُمْ ۝ وَلَا اَنْتُمْ عٰبِدُونَ مَا اَعْبُدُ ۝ لَكُمْ دِیْنُكُمْ وِلٰی دِیْنِ ۝

উচ্চারণঃ (ক) কুল ইয়া আইয়ুহাল কা-ফিরুণ (খ) লা আ'বুদু মা তা'বুদুন (গ) ওয়া লা আনতুম 'আ-বিদূনা মা আ'বুদ (ঘ) ওয়া লা আনা 'আ-বিদুম মা 'আবাদতুম (ঙ) ওয়া লা আনতুম 'আবিদূনা মা আ'বুদ (চ) লাকুম দীনুকুম ওয়া লিয়া দীন।

অনুবাদঃ (ক) বলুন! হে কাফেরগণ! (খ) আমি ইবাদত করিনা তোমরা যার ইবাদত কর (গ) এবং তোমরাও ইবাদতকারী নও আমি যার ইবাদত করি (ঘ) আমি ইবাদতকারী নই তোমরা যার ইবাদত কর (ঙ) এবং তোমরা ইবাদতকারী নও আমি যার ইবাদত করি (চ) তোমাদের কর্মফল তোমাদের জন্য এবং আমার কর্মফল আমার জন্য।

(৮) সূরা নহরঃ

بِسْمِ اللّٰهِ الرَّحْمٰنِ الرَّحِیْمِ

اِذَا جَآءَ نَصْرُ اللّٰهِ وَالْفَتْحُ ۝ وَرَآیْتَ النَّاسَ یَدْخُلُونَ فِیْ دِیْنِ اللّٰهِ  
اَفْوَاجًا ۝ فَسَبِّحْ بِحَمْدِ رَبِّكَ وَاسْتَغْفِرْهُ، اِنَّهٗ كَانَ تَوَّابًا ۝

উচ্চারণঃ (ক) এযা জা-আ নাহরুল্লা-হি ওয়াল ফাৎছ (খ) ওয়া রাআয়তান্না-সা ইয়াদখুলূনা ফী দী-নিল্লা-হি আফওয়া-জা (গ) ফাসাব্বিহ বিহাম্দি রব্বিকা ওয়াস্তাগফিরহ; ইন্নাহু কা-না তাউ ওয়া-বা।

অনুবাদঃ (ক) যখন আসবে আল্লাহর সাহায্য ও বিজয় (খ) এবং আপনি মানুষকে দলে দলে আল্লাহর দ্বীনে প্রবেশ করতে দেখবেন (গ) তখন আপনি আপনার পালনকর্তার প্রশংসা সহ পবিত্রতা বর্ণনা করুন এবং তাঁর নিকটে ক্ষমা প্রার্থনা করুন। নিশ্চয়ই তিনি তওবা কবুলকারী।

(৯) সূরা লাহাবঃ

بِسْمِ اللّٰهِ الرَّحْمٰنِ الرَّحِیْمِ

تَبَّتْ یَدَا اَبِیْ لَهَبٍ وَتَبَّ ۝ مَا اَغْنٰی عَنْهُ مَالُهُ وَمَا كَسَبَ ۝ سِیَصَلٰی

نَارًا ذَاتَ لَهَبٍ • وَأَمْرَأَتُهُ ، حَمَّالَةَ الْحَطَبِ • فِي جِيدِهَا حَبْلٌ مِّنْ مَّسَدٍ •

উচ্চারণঃ (ক) তাব্বাত ইয়াদা আবী লাহাবিউ ওয়া তাব্বা (খ) মা আগনা 'আনহু মা-লুহু ওয়া মা কাসাব (গ) সা ইয়াছলা না-রাণ যা-তা লাহাবিউ (ঘ) ওয়ামরাআহুহু, হাম্মা-লাতাল হাত্বাব (ঙ) ফী জীদিহা হাবলুম মিম মাসাদ ।

অনুবাদঃ (ক) আবু লাহাবের হস্তদ্বয় ধ্বংস হোক এবং ধ্বংস হোক সে নিজে (খ) কোন কাজে আসেনি তার ধন-সম্পদ ও যা কিছু সে উপার্জন করেছে (গ) শীঘ্রই সে প্রবেশ করবে লেলিহান অগ্নিতে (ঘ) এবং তার স্ত্রীও-যে ইন্ধন বহন করে (ঙ) স্বীয় গলদেশে খর্জুরের রশি নিয়ে ।

(১০) সূরা ইখলাছঃ بِسْمِ اللّٰهِ الرَّحْمٰنِ الرَّحِیْمِ

قُلْ هُوَ اللّٰهُ اَحَدٌ • اللّٰهُ الصَّمَدُ • لَمْ يَلِدْ وَلَمْ يُولَدْ • وَلَمْ يَكُنْ لَهٗ كُفُوًا اَحَدٌ •

উচ্চারণঃ (ক) কুল হুওয়াল্লা-হু আহাদ (খ) আল্লা-হুছ ছামাদ (গ) লাম ইয়ালিদ ওয়া লাম ইয়ুলাদ (ঘ) ওয়া লাম ইয়াকুল্লাহু কুফুওয়ান আহাদ ।

অনুবাদঃ (ক) আপনি বলুন যে, তিনি আল্লাহ এক (খ) আল্লাহ মুখাপেক্ষীহীন (গ) তিনি কাউকে জন্ম দেননি এবং তিনি কারও জন্মিত নন (ঘ) এবং তাঁর সমতুল্য কেউ নেই ।

(১১) সূরা ফালাক্বঃ بِسْمِ اللّٰهِ الرَّحْمٰنِ الرَّحِیْمِ

قُلْ اَعُوْذُ بِرَبِّ الْفَلَقِ • مِنْ شَرِّ مَا خَلَقَ • وَمِنْ شَرِّ غَاسِقٍ اِذَا وَقَبَ • وَمِنْ شَرِّ النَّفَّٰثِ فِي الْعُقَدِ • وَمِنْ شَرِّ حَاسِدٍ اِذَا حَسَدَ •

উচ্চারণঃ (ক) কুল আ'উযু বি রব্বিল ফালাক্ব (খ) মিন শার্বি মা খালাক্ব (গ) ওয়া মিন শার্বি গা-সিক্বিন ইয়া ওয়াক্বাব (ঘ) ওয়া মিন শার্বিন নাফ্ফা-ছা-তি ফিল 'উক্বাদ (ঙ) ওয়া মিন শার্বি হা-সিদিন ইয়া হাসাদ ।

অনুবাদঃ (ক) আপনি বলুন! আমি আশ্রয় প্রার্থনা করছি প্রভাতের পালনকর্তার নিকটে (খ) তিনি যা কিছু সৃষ্টি করেছেন তার অনিষ্ট হ'তে (গ) অন্ধকার রাত্রির অনিষ্ট হ'তে, যখন তা আচ্ছন্ন হয় (ঘ) গ্রন্থিতে ফুকদান কারিনীদের অনিষ্ট হ'তে (ঙ) এবং হিংসুকের অনিষ্ট হ'তে যখন সে হিংসা করে ।

(১২) সূরা নাসঃ بِسْمِ اللّٰهِ الرَّحْمٰنِ الرَّحِیْمِ

قُلْ اَعُوْذُ بِرَبِّ النَّاسِ • مَلِكِ النَّاسِ • اِلٰهِ النَّاسِ • مِنْ شَرِّ الْوَسْوَاسِ



الْخَنَاسِ ۝ الَّذِي يُوسُّوسُ فِي صُدُورِ النَّاسِ ۝ مِنَ الْجِنَّةِ وَالنَّاسِ ۝

উচ্চারণঃ (ক) কুল আ'উযু বি রক্বিন্না-স (খ) মালিকিন্না-স (গ) ইলা-হিন্না-স (ঘ) মিন শার্বিল ওয়াস্‌ওয়া-সিল খান্না-স (ঙ) আল্লাযী ইয়ুওয়াস্‌ভিসু ফী ছুদূরিন্নাস (চ) মিনাল জিন্নাতি ওয়ান্না-স।

অনুবাদঃ (ক) আপনি বলুন! আমি আশ্রয় প্রার্থনা করছি মানুষের পালনকর্তার (খ) মানুষের অধিপতির (গ) মানুষের হক মা'বুদের নিকটে; (ঘ) গোপন কুমন্ত্রণাদাতার অনিষ্ট হ'তে (ঙ) যে কুমন্ত্রণা দেয় মানুষের অন্তর সমূহে (চ) জিন-এর মধ্য হ'তে ও মানুষের মধ্য হ'তে।

সূরায়ে ফাতিহা ও কিরাআত শেষে 'আল্লা-হু আকবর' বলে কাঁধ বরাবর দু'হাত উঁচু করবে ও রুকুতে যাবে ও নিম্নের দো'আ পড়বে।-

৪. রুকুর দো'আঃ سُبْحَانَ رَبِّيَ الْعَظِيمِ (সুবহা-না রক্বিয়াল 'আযীম) অর্থঃ 'মহাপবিত্র আমার প্রতিপালক যিনি মহান'। কমপক্ষে তিনবার পড়বে।

৫. সিজদার দো'আঃ سُبْحَانَ رَبِّيَ الْأَعْلَى (সুবহা-না রক্বিয়াল আ'লা) অর্থঃ 'মহাপবিত্র আমার প্রতিপালক যিনি সর্বোচ্চ'। কমপক্ষে তিনবার পড়বে। রুকু ও সিজদার অন্য দো'আও রয়েছে।

৬. ক্বওমার দো'আঃ رَبَّنَا وَلَكَ الْحَمْدُ (রব্বানা ওয়া লাকাল হাম্দ) অর্থঃ 'হে আমাদের প্রতিপালক! আপনার জন্যই যাবতীয় প্রশংসা'। কমপক্ষে একবার এতটুকু পড়বে। অথবা নিম্নভাবে পড়বে। যেমন- رَبَّنَا وَلَكَ الْحَمْدُ حَمْدًا كَثِيرًا طَيِّبًا (রব্বানা ওয়া লাকাল হাম্দু হাম্দান কাছীরান ত্বাইয়েবাম মুবা-রাকান ফীহি) 'হে আমাদের প্রতিপালক! আপনার জন্য অগণিত প্রশংসা, যা পবিত্র ও বরকতময়'। ক্বওমার অন্য দো'আও রয়েছে।

৭. দুই সিজদার মধ্যবর্তী বৈঠকের দো'আঃ

اللَّهُمَّ اغْفِرْ لِيْ وَارْحَمْنِيْ وَاجْبُرْنِيْ وَاهْدِنِيْ وَعَافِنِيْ وَارْزُقْنِيْ

উচ্চারণঃ আল্লা-হুমাগ্‌ফিরলী ওয়ার হাম্নী ওয়াজ্বুরনী ওয়াহ্দিনী ওয়া 'আ-ফেনী ওয়ারযুক্বনী।

অনুবাদঃ 'হে আল্লাহ! আপনি আমাকে ক্ষমা করুন, আমার উপরে রহম করুন,

আমার অবস্থার সংশোধন করুন, আমাকে সৎপথ প্রদর্শন করুন, আমাকে সুস্থতা দান করুন ও আমাকে রুযী দান করুন'। অথবা কমপক্ষে একবার 'রবিগ্ফিরলী' 'হে আমার প্রভু! আমাকে ক্ষমা করুন' বলবে (মুসলিম)।

#### ৮. আতাহিইয়া-তু :

التَّحِيَّاتُ لِلَّهِ وَالصَّلَوَاتُ وَالطَّيِّبَاتُ ، السَّلَامُ عَلَيْكَ أَيُّهَا النَّبِيُّ وَرَحْمَةُ اللَّهِ وَبَرَكَاتُهُ ، السَّلَامُ عَلَيْنَا وَ عَلَى عِبَادِ اللَّهِ الصَّالِحِينَ ، أَشْهَدُ أَنْ لَا إِلَهَ إِلَّا اللَّهُ وَ أَشْهَدُ أَنَّ مُحَمَّدًا عَبْدُهُ وَ رَسُولُهُ -

উচ্চারণঃ আতাহিইয়া-তু লিল্লা-হি ওয়াছ হালাওয়া-তু ওয়াত্ তাইয়িবা-তু আসসা-লামু 'আলায়কা আইয়ুহান নাবিইয়ু ওয়া রাহমাতুল্লা-হি ওয়া বারাকা-তুহ্। আসসালা-মু 'আলায়না ওয়া 'আলা 'ইবা-দিল্লা-হিছ্ ছা-লেহীন। আশহাদু আন্ লা-ইলা-হা ইল্লাল্লা-হু ওয়া আশহাদু আন্না মুহাম্মাদান 'আবদুহু ওয়া রাসূলুহ্।

অনুবাদঃ 'সমস্ত সম্মান, সমস্ত উপাসনা ও সমস্ত পবিত্র বিষয় আল্লাহর জন্য। হে নবী! আপনার উপরে শান্তি এবং আল্লাহর রহমত ও বরকত সমূহ নাযিল হউক। শান্তি বর্ষিত হউক আমাদের উপরে ও আল্লাহর নেককার বান্দাদের উপরে। আমি সাক্ষ্য দিচ্ছি যে, আল্লাহ ব্যতীত কোন উপাস্য নেই এবং আমি সাক্ষ্য দিচ্ছি যে, মুহাম্মাদ (ছাঃ) তাঁর বান্দা ও রাসূল'।

#### ৯. দরুদ :

اللَّهُمَّ صَلِّ عَلَيَّ مُحَمَّدٍ وَ عَلَيَّ آلِ مُحَمَّدٍ كَمَا صَلَّيْتَ عَلَيَّ إِبْرَاهِيمَ وَ عَلَيَّ آلِ إِبْرَاهِيمَ إِنَّكَ حَمِيدٌ مَّجِيدٌ ، اللَّهُمَّ بَارِكْ عَلَيَّ مُحَمَّدٍ وَ عَلَيَّ آلِ مُحَمَّدٍ كَمَا بَارَكْتَ عَلَيَّ إِبْرَاهِيمَ وَ عَلَيَّ آلِ إِبْرَاهِيمَ إِنَّكَ حَمِيدٌ مَّجِيدٌ -

উচ্চারণঃ আল্লা-হুম্মা ছাল্লে 'আলা মুহাম্মাদিঁউ ওয়া 'আলা আ-লে মুহাম্মাদিন কামা ছাল্লায়তা 'আলা ইবরা-হীমা ওয়া 'আলা আ-লে ইবরা-হীমা ইন্বাকা হামীদুম মাজীদ। আল্লা-হুম্মা বা-রিক 'আলা মুহাম্মাদিঁউ ওয়া 'আলা আ-লে মুহাম্মাদিন কামা বা-রকতা 'আলা ইবরা-হীমা ওয়া 'আলা আ-লে ইবরা-হীমা ইন্বাকা হামীদুম মাজীদ।

অনুবাদঃ 'হে আল্লাহ! আপনি রহমত বর্ষণ করুন মুহাম্মাদ ও মুহাম্মাদের পরিবারের উপরে, যেমন আপনি রহমত বর্ষণ করেছেন ইবরাহীম ও ইবরাহীমের পরিবারের উপরে। নিশ্চয়ই আপনি প্রশংসিত ও সম্মানিত। হে আল্লাহ! আপনি বরকত নাযিল করুন মুহাম্মাদ ও মুহাম্মাদের পরিবারের উপরে, যেমন আপনি বরকত নাযিল

করেছেন ইবরাহীম ও ইবরাহীমের পরিবার বর্গের উপরে। নিশ্চয়ই আপনি প্রশংসিত ও সম্মানিত’।

### ১০. দো‘আয়ে মাছুরাহঃ

اللَّهُمَّ إِنِّي ظَلَمْتُ نَفْسِي ظُلْمًا كَثِيرًا وَ لَا يَغْفِرُ الذُّنُوبَ إِلَّا أَنْتَ فَاعْفِرْ لِي  
مَغْفِرَةً مِّنْ عِنْدِكَ وَ ارْحَمْنِي إِنَّكَ أَنْتَ الْغَفُورُ الرَّحِيمُ -

উচ্চারণঃ আল্লা-হুম্মা ইনী য়ালামতু নাফসী য়ুলমান কাছীরাঁও অলা ইয়াগ্ফিরুল্লি য়ুনূবা ইল্লা আন্তা, ফাগ্ফিরলী মাগ্ফিরাতাম মিন ইনদিকা ওয়ারহামনী ইন্বাকা আন্তাল গাফুরুর রাহীম।

অনুবাদঃ ‘হে আল্লাহ! আমি আমার নফসের উপরে অসংখ্য যুলুম করেছি। ঐ সব গুনাহ মাফ করার কেউ নেই আপনি ব্যতীত। অতএব আপনি আমাকে আপনার পক্ষ হ’তে বিশেষ ভাবে ক্ষমা করুন এবং আমার উপরে অনুগ্রহ করুন। নিশ্চয়ই আপনি ক্ষমাশীল ও দয়াবান’।

### ১১. সালাম ও দো‘আঃ

দো‘আয়ে মাছুরাহ শেষে অন্যান্য দো‘আও পড়বে। অতঃপর প্রথমে ডাইনে ও পরে বামে ‘আস্‌সালামু আলায়কুম ওয়া রাহমাতুল্লাহ’ বলবে।<sup>৯</sup>

অতঃপর একবার সরবে ‘আল্লা-ল্ আকবার’ (আল্লাহ সবচাইতে বড়) ও তিনবার ‘আসতাগ্ফিরুল্লা-হ’<sup>১০</sup> (আমি আল্লাহর নিকটে ক্ষমা প্রার্থনা করছি) বলবে। ইমাম হ’লে ডাইনে অথবা বামে কিংবা সরাসরি মুক্তাদীগণের দিকে ফিরে বসবেন।<sup>১১</sup> অতঃপর সকলে নিম্নের দো‘আ সহ অন্যান্য দো‘আ পাঠ করবে।-

اللَّهُمَّ أَنْتَ السَّلَامُ وَ مِنْكَ السَّلَامُ ، تَبَارَكْتَ يَا ذَا الْجَلَالِ وَالْإِكْرَامِ -

উচ্চারণঃ আল্লা-হুম্মা আন্তাস্ সালা-মু ওয়া মিন্‌কাস্ সালা-মু, তাবা-রক্‌তা ইয়া যাল জালা-লি ওয়াল ইক্রা-ম।

অনুবাদঃ ‘হে আল্লাহ আপনিই শান্তি, আপনার থেকেই শান্তি আসে। বরকতময় আপনি হে মর্যাদা ও সম্মানের মালিক’। এটুকু পড়েই উঠে যেতে পারেন।<sup>১২</sup>

৯. আবুদাউদ, তিরমিযী, মিশকাত হা/৯৫০।

১০. মুত্তাফাকু আলাইহ, মিশকাত হা/৯৫৯; মুসলিম, ঐ, হা/৯৬১।

১১. বুখারী, মুসলিম, মিশকাত হা/৯৪৪-৪৬; দ্রঃ মির‘আত ‘তাশাহহুদে দো‘আ’ অনুচ্ছেদ ১/৭০৯।

১২. মুসলিম, মিশকাত হা/৯৬০। উল্লেখ্য যে, এই সাথে ‘ইলায়কা ইয়ারজি‘উস সালাম, হাইয়েনা রক্বানা বিস সালা-ম, ওয়া আদখিলনা দা-রাকা দা-রাস সালাম..’ বৃদ্ধি করার কোন ভিত্তি নেই। -আলবানী, মিশকাত, ঐ টীকা দ্রষ্টব্য। সালাম ফিরানোর পরে অন্যান্য দো‘আ পৃষ্ঠায় দেখুন।

## ১. ছালাতের সংজ্ঞা (معنى الصلاة):

‘ছালাত’ -এর আভিধানিক অর্থ দো‘আ, রহমত, ক্ষমা প্রার্থনা ইত্যাদি।<sup>১</sup> পারিভাষিক অর্থে ‘শরীয়ত নির্দেশিত ক্রিয়া-পদ্ধতির মাধ্যমে আল্লাহর নিকটে বান্দার ক্ষমা ভিক্ষা ও প্রার্থনা নিবেদনের শ্রেষ্ঠতম ইবাদত অনুষ্ঠানকে ‘ছালাত’ বলা হয়, যা তাকবীরে তাহরীমা দ্বারা শুরু হয় ও সালামের দ্বারা শেষ হয়।<sup>২</sup>

## ২. ছালাতের গুরুত্ব (أهمية الصلاة):

- (১) কালেমায়ে শাহাদাত পাঠ করার পরেই ইসলামে ছালাতের স্থান।
- (২) ছালাত ইসলামের প্রথম ইবাদত, যা মি‘রাজের রাত্রিতে ফরয করা হয়।<sup>৩</sup>
- (৩) ছালাত ইসলামের মূল স্তম্ভ<sup>৪</sup> যা ব্যতীত ইসলাম টিকে থাকতে পারেনা।
- (৪) ছালাতের বিধিস্তি জাতির বিধিস্তি হিসাবে পবিত্র কুরআনে বর্ণিত হয়েছে।<sup>৫</sup>
- (৫) পবিত্র কুরআনে সর্বাধিকবার আলোচিত বিষয় হ’ল ছালাত।<sup>৬</sup>
- (৬) মুমিনের জন্য সর্বাবস্থায় পালনীয় ফরয হ’ল ছালাত, যা অন্য ইবাদতের বেলায় হয়নি।<sup>৭</sup>
- (৭) ইসলামের প্রথম যে রশি ছিল হবে, তাহ’ল তার শাসনব্যবস্থা এবং সর্বশেষ যে

১. الصلاة اى الدعاء والرحمة والاستغفار، صلى صلاة اى دعاء، عبادة فيها ركوع وسجود = আল-ক্বামুসুল মুহীত্ব পৃঃ ১৬৮১।

২. مِفْتَاحُ الصَّلَاةِ الطُّهُورُ تَحْرِيمُهَا التَّكْبِيرُ وَتَحْلِيلُهَا التَّسْلِيمُ - আবুদাউদ, তিরমিযী, দারেমী, আলবানী মিশকাত ‘ত্বাহারৎ’ অধ্যায়, হা/৩১২; এ, ‘ছালাত’ অধ্যায় হা/ ৭৯১।

৩. মুত্তাফাক্বু আলাইহ, মিশকাত হা/৫৮৬২ ‘মি‘রাজ’ অধ্যায়।

৪. আহমাদ, তিরমিযী, ইবনু মাজাহ, মিশকাত হা/২৯ (...عموده الصلوة...)

৫. মাদ্রিয়াম ৫৯।

৬. কুরআনে অনূন ৮২ জায়গায় ‘ছালাতের’ আলোচনা এসেছে। -আল-মু‘জাম (বৈরুত ছাপা ১৯৮৭)।

৭. বাক্বারাহ ২৩৮, ২৩৯; নিসা ১০১, ১০৩।

রশি ছিন্ন হবে তা হ'ল 'ছালাত'।<sup>৮</sup>

(৮) দুনিয়া থেকে 'ছালাত' বিদায় নেবার পরেই কিয়ামত হবে।<sup>৯</sup>

(৯) কিয়ামতের দিন মুমিনের সর্বপ্রথম হিসাব নেওয়া হবে তার ছালাতের। ছালাতের হিসাব সুষ্ঠু হ'লে বাকী আমল সমূহের হিসাব সুষ্ঠু হবে। নইলে সবকিছুই বেকার হবে।<sup>১০</sup>

(১০) দৈনিক পাঁচ ওয়াক্ত হিসাবে 'ছালাত'কে ফরয করা হয়েছে, যা অন্য কোন ফরয ইবাদতের বেলায় করা হয়নি।<sup>১১</sup>

(১১) মুমিন ও কাফির-মুশরিকের মধ্যে পার্থক্য হ'ল 'ছালাত'।<sup>১২</sup>

(১২) মৃত্যুকালে রাসূলুল্লাহ (ছাঃ) -এর সর্বশেষ অছিযাত ছিল 'ছালাত' ও নারীজাতি সম্পর্কে।<sup>১৩</sup>

### ৩. ছালাত তরক কারীর হুকুম (حکم تارك الصلاة)ঃ

ইচ্ছাকৃতভাবে ছালাত তরককারী অথবা ছালাত ফরয হ'ওয়াকে অস্বীকারকারী ব্যক্তি কাফির ও জাহান্নামী। ঐ ব্যক্তি ইসলাম হ'তে বহিস্কৃত। কিন্তু যে ব্যক্তি ঈমান রাখে, অথচ অলসতা ও ব্যস্ততার অজুহাতে ছালাত তরক করে কিংবা অলসভাবে ছালাত আদায় করে ও তার প্রকৃত হেফায়ত করে না, সে সম্পর্কে শরীয়তের বিধান নিম্নরূপঃ

(ক) রাসূলুল্লাহ (ছাঃ) এরশাদ করেন,... যে ব্যক্তি ছালাতের হেফায়ত করল না...সে ব্যক্তি কিয়ামতের দিন ক্বারুণ, ফেরাউন, হামান ও উবাই বিন খালাফের সঙ্গে

৮ ও ৯. عن ابى أمامة قال قال رسول الله (ص) لَتُنْقَضَنَّ عُرَى الْإِسْلَامِ عُرْوَةٌ عُرْوَةٌ فَكَلِمَاتٌ أَنْتَقَضَتْ عُرْوَةً تَثْبُتُ النَّاسُ بِهَا فَأُولَئِهِنَّ نَقَضْنَا الْحُكْمَ وَأَخْرَهُنَّ الصَّلَاةَ. =আহমাদ, ছহীহ ইবনু হিব্বান গৃহীতঃ আলবানী, ছহীহ আত-তারগীব ওয়াত তারহীব, হা/৫৬৯; ঐ, ছহীহ জামে' ছগীর হা/৫০৭৫, ৫৪৭৮।

১০. عن أنس بن حُكَيْمٍ عن أبى هريرة قال قال رسول الله (ص) أَوَّلُ مَا يُحَاسَبُ بِهِ الْعَبْدُ يَوْمَ الْقِيَامَةِ الصَّلَاةُ فَإِنْ صَلَحَتْ صَلَحَ سَائِرُ عَمَلِهِ وَإِنْ فَسَدَتْ فَسَدَ سَائِرُ عَمَلِهِ =তাবারাগী আওসাত্ত, আত-তারগীব ওয়াত তারহীব হা/৩৬৯, ১/২২২ পৃঃ; আলবানী, সিলসিলা ছহীহাহ হা/১৩৫৮; ঐ, ছহীহ জামে' ছগীর হা/২৫৭৩।

১১. নাসাঈ, তিরমিযী, আহমাদ, ফিকহুস সুন্নাহ 'ছালাত' অধ্যায় ১/৭০ পৃঃ।

১২. عن جابر قال قال رسول الله (ص) بَيْنَ الرَّجُلِ وَبَيْنَ الشُّرْكِ وَالْكَفْرِ تَرْكُ الصَّلَاةِ =মুসলিম হা/১৩৪, 'ঈমান' অধ্যায়; ঐ, হা/৫৬৯ 'ছালাত' অধ্যায়।

১৩. =নাসাঈ, ইবনু মাজাহ হা/১৬২৫ 'জানাযা' অধ্যায়; ঐ, হা/২৬৯৮; ঐ, ছহীহ হা/২১৮৪, 'অছিযাত' অধ্যায়।

থাকবে'।<sup>১৪</sup>

ছালাতের হেফায়ত করা অর্থ রুকু-সিজদা ইত্যাদি ফরয ও সুন্নাত সমূহ সঠিকভাবে ও গভীর মনোযোগ সহকারে আদায় করা।<sup>১৫</sup> উক্ত হাদীছের ব্যাখ্যায় হাফেয ইবনুল ক্বাইয়িম (৭০১-৭৭৩ হিঃ) বলেন, যে ব্যক্তি অর্থ-সম্পদের মোহে ছালাত হ'তে দূরে থাকে, তার হাশর হবে হযরত মূসা (আঃ)-এর চাচাতো ভাই বখীল ধনকুবের ক্বারুণ-এর সাথে। রাষ্ট্রীয় বা রাজনৈতিক ব্যস্ততার অজুহাতে যে ব্যক্তি ছালাত হ'তে গাফেল থাকে, তার হাশর হবে মিসরের শাসক ফেরাউনের সাথে। মন্ত্রীত্ব বা চাকুরীগত কারণে যে ব্যক্তি ছালাত হ'তে গাফেল থাকে, তার হাশর হবে ফেরাউনের মন্ত্রী হামান-এর সাথে। ব্যবসায়িক ব্যস্ততার অজুহাতে যে ব্যক্তি গাফেল থাকে, তার হাশর হবে মক্কার ব্যবসায়ী নেতা উবাই বিন খালাফের সাথে।<sup>১৬</sup> বলা বাহুল্য কিয়ামতের দিন কাফের নেতাদের সাথে হাশর হওয়ার অর্থই হ'ল জাহান্নামবাসী হওয়া। অতএব শুধু ছালাত তরক করা নয় বরং ছালাতের হেফায়ত বা রুকু-সিজদা সঠিকভাবে আদায় না হ'লেও জাহান্নামবাসী হ'তে হবে।

(খ) ইচ্ছাকৃতভাবে ছালাত তরককারীকে হাদীছে 'কাফির' হিসাবে বর্ণনা করা হয়েছে।<sup>১৭</sup> ছাহাবায়ে কেলামও তাদেরকে 'কাফির' হিসাবেই গণ্য করতেন।<sup>১৮</sup> তবে এই কাফিরগণ 'কালেমায়ে শাহাদাত'কে অস্বীকারকারী কাফিরগণের ন্যায় চিরস্থায়ী জাহান্নামী নয়। বরং কালেমার বরকতে ও নবীর (ছাঃ) শাফা'আতের ফলে শেষ পর্যায়ে তারা এক সময় জান্নাতে ফিরে আসবে।<sup>১৯</sup>

(গ) বিভিন্ন হাদীছের আলোকে আহলেসুন্নাত বিদ্বানগণের মধ্যে ইমাম মালেক (৯৩-১৭৯ হিঃ), ইমাম শাফেঈ (১৫০-২০৪) এবং প্রথম ও পরবর্তী যুগের প্রায় সকল বিদ্বান এই মর্মে একমত হয়েছেন যে, ঐ ব্যক্তি 'ফাসিক্ব' এবং তাকে তওবা করতে হবে। যদি সে তওবা করে ছালাত আদায় শুরু না করে, তবে তার শাস্তি হবে মৃত্যুদণ্ড। ইমাম আবু হানীফা (৮০-১৫০) বলেন, তাকে দৃষ্টান্তমূলক শাস্তি দিতে হবে এবং ছালাত আদায় না করা পর্যন্ত জেল খানায় আবদ্ধ রাখতে হবে।<sup>২০</sup> ইমাম আহমাদ বিন হাম্বল (১৬৪-২৪১) বলেন, ঐ ব্যক্তিকে ছালাতের জন্য ডাকার পরেও যদি সে ইনকার করে ও বলে যে 'আমি ছালাত আদায় করব না' এবং এইভাবে ওয়াক্ত শেষ

১৪. আহমাদ, দারেমী, মিশকাত হা/৫৭৮ 'ছালাত' অধ্যায়। শাওকানী (১১৭২-১২৫০ হিঃ) বলেন যে, 'মুসনাদে আহমাদ-এর সূত্র সমূহ বিশ্বস্ত'।- নায়লুল আওত্বার ২/১৬।

১৫. মোল্লা আলী ক্বারী, মিরক্বাত ২/১১৮ পৃঃ।

১৬. সাইয়িদ সাবিক্ব, ফিকহুস সুন্নাহ ১/৭২ পৃঃ।

১৭. মুসলিম, মিশকাত হা/ ৫৬৯; ইবনু মাজাহ, মিশকাত হা/৫৭৪, ৫৮০।

১৮. তিরমিযী, মিশকাত হা/৫৭৯।

১৯. মুত্তাফাক্ব আলাইহ, মিশকাত হা/৫৫৭৩, 'শাফা'আত' অধ্যায়।

২০. ফিকহুস সুন্নাহ ১/৭৩; শাওকানী, নায়লুল আওত্বার ২/১৩ পৃঃ।

হয়ে যায়, তখন তাকে কৃতল করা ওয়াজিব।<sup>২১</sup> সামাজিক অনুশাসনের স্বার্থে এ ব্যক্তির জানাযা মসজিদের ইমাম বা বড় কোন বুয়র্গ আলেম দিয়ে না পড়ানো উচিত। কেননা রাসূলুল্লাহ (ছাঃ) (সম্ভবতঃ উক্ত কারণেই) গণীমতের মালে খেয়ানতকারী এবং আত্মহত্যাকারীর জানাযা পড়েননি।<sup>২২</sup> এক্ষণে আল্লাহকৃত ফরয ছালাতের সঙ্গে খেয়ানতকারী ব্যক্তির সাথে মুমিন সমাজের আচরণ কেমন হওয়া উচিত, তা সহজেই অনুমেয়।

#### ৪. ছালাতের ফযীলত সমূহ (فضائل الصلاة):

(১) আল্লাহ পাক এরশাদ করেন, **إِنَّ الصَّلَاةَ تَنْهَى عَنِ الْفَحْشَاءِ وَالْمُنْكَرِ**, নিশ্চয়ই ছালাত মুমিনকে নির্লজ্জ ও অপসন্দনীয় কাজ সমূহ হ'তে বিরত রাখে' (আনকাবূত ৪৫)।

(২) রাসূলুল্লাহ (ছাঃ) এরশাদ করেন, 'পাঁচ ওয়াক্ত ছালাত, এক জুম'আ হ'তে পরবর্তী জুম'আ, এক রামাযান হ'তে পরবর্তী রামাযান এর মধ্যকার যাবতীয় (ছগীরা) গুনাহের কাফফারা স্বরূপ, যদি কি-না সে কবীরা গুনাহসমূহ হ'তে বিরত থাকে (যা তওবা করা ব্যতীত মাফ হয় না)'।<sup>২৩</sup>

(৩) তিনি আরও বলেন, তোমাদের কারও ঘরের সম্মুখ দিয়ে প্রবাহিত নদীতে দৈনিক পাঁচবার গোসল করলে তোমাদের দেহে কোন ময়লা বাকী থাকে কি? ... পাঁচ ওয়াক্ত ছালাতের তুলনা ঠিক অনুরূপ। আল্লাহ এর দ্বারা বান্দার গুনাহ সমূহ বিদূরিত করেন।<sup>২৪</sup>

(৪) অন্যত্র তিনি বলেন, যে ব্যক্তি ছালাতের হেফাযত করল, ছালাত তার জন্য ক্বিয়ামতের দিন নূর, দলীল ও নাজাতের কারণ হবে...।<sup>২৫</sup>

(৫) আব্দুল্লাহ বিন ওমর (রাঃ) হ'তে বর্ণিত রাসূলুল্লাহ (ছাঃ) এরশাদ করেন যে, 'বান্দা যখন ছালাতে দণ্ডায়মান হয়, তখন তার সমস্ত গুনাহ হাযির করা হয়। অতঃপর তা তার মাথায় ও দুই ঝক্কে রেখে দেওয়া হয়। এরপর সে ব্যক্তি যখনই রুকু বা সিজদায় গমন করে, তখনই গুনাহ সমূহ ঝরে পড়ে'।<sup>২৬</sup>

২১. নায়লুল আওত্বার ২/১৫; মিরক্বাত ২/১১৩-১৪ পৃঃ।

২২. ইমাম আহমাদ একথা বলেন। -নায়ল ৫/৪৯, 'জিহাদ' অধ্যায়, 'মৃত্যুদণ্ডে নিহত ব্যক্তির জানাযা' অনুচ্ছেদ; এতদ্ব্যতীত মুওয়াত্ত্বা, আবুদাউদ, নাসাঈ, মিশকাত 'গণীমতের মাল বন্টন ও খেয়ানত' অনুচ্ছেদ হা/৪০১১; মুসলিম ও সুনান 'খেয়ানতকারী ও আত্মহত্যাকারীর জানাযা' অনুচ্ছেদ; দ্রষ্টব্যঃ নায়ল ৫/৪৭-৪৮ পৃঃ।

২৩. মুসলিম, মিশকাত হা/৫৬৪ 'ছালাত' অধ্যায়।

২৪. মুত্তাফাকু আলাইহ, মিশকাত হা/৫৬৫।

২৫. আহমাদ, দারেমী, মিশকাত হা/৫৭৮।

২৬. ত্বাবারাগী, বায়হাক্বী; আলবানী 'ছহীহ' বলেছেন -মাজমূ'আ রাসা-ইল (রিয়ায ১৪০৫ হিঃ) ২০২ পৃঃ।

(৬) রাসূলুল্লাহ (ছাঃ) এরশাদ করেন, (ক) যে ব্যক্তি ফজর ও আছরের ছালাত নিয়মিত আদায় করে, সে জাহান্নামে যাবেনা'। 'সে জান্নাতে প্রবেশ করবে'।<sup>২৭</sup> (খ) দিবস ও রাতের ফেরেশতারা ফজর ও আছরের ছালাতের সময় একত্রিত হয়। রাতের ফেরেশতারা আসমানে উঠে গেলে আল্লাহ তাদের জিজ্ঞেস করেন, তোমরা আমার বান্দাদের কি অবস্থায় রেখে এলে? - যদিও তিনি সবকিছু অবগত। তখন ফেরেশতারা বলে যে, আমরা তাদেরকে পেয়েছিলাম (আছরের) ছালাত অবস্থায় এবং ছেড়ে এসেছি (ফজরের) ছালাত অবস্থায়'।<sup>২৮</sup> কুরআনে ফজরের ছালাতকে 'মাশহূদ' বলা হয়েছে (ইসরা ৭৮)। অর্থাৎ ঐ সময় রাতের ও দিনের ফেরেশতা একত্রিত হয়ে সাক্ষী হয়ে যায়।<sup>২৯</sup> (গ) যে ব্যক্তি ফজরের ছালাত আদায় করল, সে আল্লাহর যিম্মায় রইল। যদি কেউ সেই যিম্মা থেকে কাউকে ছাড়িয়ে নিতে চায়, তাকে উপড় অবস্থায় জাহান্নামে নিক্ষেপ করা হবে।<sup>৩০</sup>

(৭) রাসূলুল্লাহ (ছাঃ) বলেন, (ক) যদি লোকেরা জানত যে, আযান, প্রথম কাতার ও আউয়াল ওয়াক্তে ছালাত আদায়ে কি নেকী রয়েছে, তাহ'লে তারা পরস্পরে প্রতিযোগিতা করত। অনুরূপভাবে যদি তারা জানত এশা ও ফজরের ছালাতে কি নেকী রয়েছে, তবে তারা হামাগুড়ি দিয়ে হ'লেও ঐ দুই ছালাতে আসত'।<sup>৩১</sup> (খ) তিনি বলেন, যে ব্যক্তি এশার ছালাত জামা'আতে পড়ল, সে যেন অর্ধরাত্রি ছালাতে কাটাল এবং যে ব্যক্তি ফজরের ছালাত জামা'আতে পড়ল, সে যেন সমস্ত রাত্রি ছালাতে অতিবাহিত করল'।<sup>৩২</sup> (গ) তিনি বলেন, মুনাফিকদের উপরে ফজর ও এশার চাইতে কঠিন কোন ছালাত নেই।<sup>৩৩</sup>

(৮) তিনি বলেন, পাঁচ ওয়াক্ত ছালাত যেগুলিকে আল্লাহ স্বীয় বান্দাদের উপরে ফরয করেছেন যে ব্যক্তি এগুলির জন্য সুন্দর ভাবে ওয়ূ করবে, ওয়াক্ত মোতাবেক ছালাত আদায় করবে, রুকু ও খুশু'-খুযু' পূর্ণ করবে, তাকে ক্ষমা করার জন্য আল্লাহর অঙ্গীকার রয়েছে। আর যে ব্যক্তি এগুলি করবে না, তার জন্য আল্লাহর কোন অঙ্গীকার নেই। তিনি ইচ্ছা করলে তাকে ক্ষমা করতে পারেন, ইচ্ছা করলে আযাব দিতে পারেন'।<sup>৩৪</sup>

(৯) আবু হুরায়রা (রাঃ) হ'তে বর্ণিত রাসূলুল্লাহ (ছাঃ) এরশাদ করেন যে, আল্লাহ পাক বলেন, যে ব্যক্তি আমার কোন প্রিয় বান্দার সাথে দুশমনী করল, আমি তার

২৭. মুসলিম, মুত্তাফাকু আলাইহ, মিশকাত হা/৬২৪-২৫।

২৮. মুসলিম, মুত্তাফাকু আলাইহ, মিশকাত হা/৬২৪, ৬২৫-২৬।

২৯. তিরমিযী, মিশকাত হা/৬৩৫।

৩০. মুসলিম, মিশকাত হা/৬২৭।

৩১. মুত্তাফাকু আলাইহ, মিশকাত হা/৬২৮।

৩২. মুসলিম, মিশকাত হা/৬০০।

৩৩. মুত্তাফাকু আলাইহ, মিশকাত হা/৬২৯।

৩৪. আহমাদ, আবুদাউদ, মালেক, নাসাই, মিশকাত হা/৫৭০ 'ছালাত' অধ্যায়।



বিরুদ্ধে যুদ্ধের ঘোষণা দিলাম। আমি যেসব বিষয় ফরয করেছি, তার মাধ্যমে আমার নৈকট্য অনুসন্ধানের চাইতে প্রিয়তর আমার নিকটে আর কিছু নেই। বান্দা বিভিন্ন নফল ইবাদতের মাধ্যমে সর্বদা আমার নৈকট্য হাছিলের চেষ্টায় থাকে, যতক্ষণ না আমি তাকে ভালবাসি। অতঃপর যখন আমি তাকে ভালবাসি, তখন আমিই তার কান হয়ে যাই যা দিয়ে সে শ্রবণ করে, চোখ হয়ে যাই যা দিয়ে সে দর্শন করে, হাত হয়ে যাই যা দিয়ে সে ধারণ করে, পা হয়ে যাই যার সাহায্যে সে চলাফেরা করে। যদি সে আমার নিকটে কিছুর প্রার্থনা করে আমি তাকে দান করে থাকি। যদি সে আশ্রয় ভিক্ষা করে, আমি তাকে আশ্রয় দিয়ে থাকি'...।<sup>৩৫</sup>

### মসজিদে ছালাতের ফযীলতঃ

(১) রাসূলুল্লাহ (ছাঃ) এরশাদ করেন, আল্লাহর নিকটে প্রিয়তর স্থান হ'ল মসজিদ এবং নিকৃষ্টতর স্থান হ'ল বাজার'।<sup>৩৬</sup>

(২) 'যে ব্যক্তি সকালে-সন্ধ্যায় (অর্থাৎ পাঁচ ওয়াক্ত ছালাতে) মসজিদে যাত যাত করে, আল্লাহ পাক তার জন্য জান্নাতে মেহমানদারী তৈরী রাখেন'।<sup>৩৭</sup>

(৩) কিয়ামতের দিন আল্লাহর আরশের ছায়াতলে যে সাত শ্রেণীর লোক আশ্রয় পাবেন তাদের এক শ্রেণী হলেন ঐ সকল ব্যক্তি যাদের অন্তর মসজিদের সাথে লটকানো থাকে। যখনই বের হয়, পুনরায় ফিরে আসে।<sup>৩৮</sup>

(৪) ঘরে অথবা বাজারে একাকী ছালাতের চেয়ে মসজিদে জামা'আতে ছালাত আদায়ে ২৫ বা ২৭ গুণ ছওয়াব বেশী পাওয়া যায়। যখন কোন মুছল্লী সুন্দরভাবে ওয়ূ করে এবং স্রেফ ছালাতের উদ্দেশ্যে ঘর হ'তে বের হয়, তখন তার প্রতি পদক্ষেপে আল্লাহর নিকটে একটি করে নেকী হয় ও একটি করে মর্যাদার স্তর উন্নীত হয় ও একটি করে গোনাহ ঝরে পড়ে। যতক্ষণ ঐ ব্যক্তি ছালাতরত থাকে, ততক্ষণ ফেরেশতারা তার জন্য দো'আ করতে থাকে ও বলে যে, 'হে আল্লাহ তুমি তার উপরে শান্তি বর্ষণ কর'। 'তুমি তার উপরে অনুগ্রহ কর'। যতক্ষণ সে কথা না বলে ততক্ষণ পর্যন্ত ফেরেশতারা আরও বলতে থাকে, 'হে আল্লাহ তুমি তাকে ক্ষমা কর' তুমি তার তওবা কবুল কর'।<sup>৩৯</sup>

৩৫. বুখারী 'কিতাবুর রিক্বাক্ব' তাওয়াযু' অনুচ্ছেদ, ২/৯৬৩ পৃঃ।

৩৬. মুসলিম, মিশকাত হা/৬৯৭।

৩৭. মুত্তাফাক্ব আলাইহ, মিশকাত হা/৬৯৮।

৩৮. মুত্তাফাক্ব আলাইহ, মিশকাত হা/৭০১।

৩৯. মুত্তাফাক্ব আলাইহ, মিশকাত হা/৭০২, হা/১০৫২; মুসলিম, মিশকাত হা/১০৭২। অত্র হাদীছে মসজিদ, বাড়ী ও বাজারের তুলনামূলক গুরুত্ব বুঝানো হয়েছে। মসজিদ কেবল ছালাতের জন্যই নির্ধারিত। সে কারণে তার গুরুত্ব নিঃসন্দেহে বেশী। সেখানে একাকী ফরয ছালাত আদায় করলে অন্য স্থানে একাকী পড়ার তুলনায় নেকী বেশী হওয়া স্বাভাবিক। অনুরূপভাবে বাড়ীতে বা বাজারে জামা'আতে ছালাত আদায় করলে তাতে একাকী ছালাত আদায়ের চেয়ে নেকী অবশ্যই বেশী হবে ইনশাআল্লাহ। =ওবায়দুল্লাহ মুবারকপুরী, মির'আত ১/৫৬০।

## ছালাতের নিষিদ্ধ স্থানঃ

আবু সাঈদ খুদরী (রাঃ) হ'তে বর্ণিত রাসূলুল্লাহ (ছাঃ) এরশাদ করেন যে, সমগ্র পৃথিবীই সিজদার স্থান কেবল কবরস্থান ও গোসলখানা ব্যতীত'।<sup>৪০</sup> সাতটি স্থানে ছালাত নিষিদ্ধ হওয়ার হাদীছটি যঈফ।<sup>৪১</sup>

## ৫. ছালাতের শর্তাবলী (شروط الصلاة) :

ছালাতের বাইরের কিছু বিষয়, যা না হ'লে ছালাত সিদ্ধ হয় না, সেগুলিকে 'ছালাতের শর্তাবলী' বলা হয়। উহা ৯টি। যেমন-

- (১) মুসলিম হওয়া<sup>৪২</sup> (২) জ্ঞানসম্পন্ন হওয়া<sup>৪৩</sup> (৩) বয়ঃপ্রাপ্ত হওয়া ও সেজন্য সাত বছর বয়স থেকেই ছালাত আদায় শুরু করা<sup>৪৪</sup> (৪) দেহ, কাপড় ও স্থান পাক হওয়া<sup>৪৫</sup> (৫) সতর ঢাকা। ছালাতের সময় পুরুষের জন্য দুই কাঁধ ও নাভী হ'তে হাটু পর্যন্ত এবং মহিলাদের দুই হাতের তালু ও চেহারা ব্যতীত মাথা হ'তে পায়ের পাতা পর্যন্ত সর্বাঙ্গ সতর হিসাবে ঢাকা।<sup>৪৬</sup> (৬) ওয়াজু হওয়া<sup>৪৭</sup> (৭) ওয়ূ-গোসল বা তায়াম্মুমের মাধ্যমে পবিত্রতা অর্জন করা (মায়েদাহ ৬)। (৮) কিবলামুখী হওয়া<sup>৪৮</sup> (৯) ছালাতের নিয়ত বা

৪০. আবুদাউদ, তিরমিযী, দারেমী, মিশকাত হা/৭৩৭ 'মসজিদ ও ছালাতের স্থান' অনুচ্ছেদ।

৪১. তিরমিযী, ইবনু মাজাহ মিশকাত হা/৭৩৮ হাশিয়া; যঈফ তিরমিযী হা/১৪৬, যঈফ ইবনু মাজাহ হা/৭৪৬, ইরওয়া হা/২৮৭।

৪২. وَمَنْ يَبْتَغِ غَيْرَ الْإِسْلَامِ دِينًا فَلَنْ يُقْبَلَ مِنْهُ وَهُوَ فِي الْآخِرَةِ مِنَ الْخَاسِرِينَ -  
=আলে ইমরান ৮৫; তওবা ১৭।

৪৩. رُفِعَ الْقَلَمُ عَنْ ثَلَاثَةٍ: عَنِ النَّائِمِ حَتَّى يَسْتَيْقِظَ وَعَنِ الصَّبِيِّ حَتَّى يَحْتَلِمَ وَعَنِ الْمَجْنُونِ حَتَّى يَعْقِلَ,  
=আবুদাউদ হা/৪৪০৩; ঐ, ছহীহ হা/৩৭০৩ 'ইদুদ' অধ্যায়;  
নায়ল, 'ছালাত' অধ্যায় ২/২৩-২৪ পৃঃ।

৪৪. مَرُورًا أَوْلَادَكُمْ بِالصَّلَاةِ وَهُمْ أَبْنَاءُ سَبْعِ سِنِينَ، وَأَضْرِبُوهُمْ عَلَيْهَا وَهُمْ أَبْنَاءُ عَشْرِ سِنِينَ، وَفَرَّقُوا بَيْنَهُمْ فِي الْمَضَاجِعِ =আহমাদ, আবুদাউদ, তিরমিযী, মিশকাত হা/৫৭২;  
নায়লুল আওত্বার ২/২২ পৃঃ।

৪৫. মায়েদাহ ৬, আ'রাফ ৩১, মুদ্দাছছির ৪; মুসলিম 'যাকাত' অধ্যায় হা/১০১৫; আবুদাউদ, তিরমিযী, দারেমী, মিশকাত হা/৭৩৭, ৭৩৯।

৪৬. ফিকহুস সুন্নাহ ১/১২৫; নায়ল ২/১৩৬; মুত্তাফাকু আলাইহ, মিশকাত হা/৭৫৫ 'সতর' অধ্যায়;  
সূরা নূর ৩১; ছহীহ আবুদাউদ হা/৩৪৫৮; শামসুল হক আযীমাবাদী, আওনুল মা'বুদ (কায়রোঃ  
মাকতাবা ইবনে তায়মিয়াহ, ৩য় সংস্করণ ১৪০৭/১৯৮৭)। হা/৪০৮৬।

৪৭. - نِيسَا ১০৩।

৪৮. قَوْلٌ وَجْهَكَ شَطْرَ الْمَسْجِدِ الْحَرَامِ وَحَيْثُ مَا كُنْتُمْ فَوَلُّوا وُجُوهَكُمْ شَطْرَهُ ১৪৪।

সংকল্প করা।<sup>৪৯</sup>

সতর ও লেবাস সম্পর্কে চারটি শারঈ মূলনীতি অনুসরণ করা আবশ্যিকঃ

- (১) পোষাক পরিধানের উদ্দেশ্য থাকবে দেহকে আবৃত করা। যেন পোষাক পরা সত্ত্বেও লজ্জাস্থান সমূহ অন্যের চোখে প্রকট হ'য়ে না ওঠে।<sup>৫০</sup> (২) ভিতরে-বাইরে তাকুওয়াশীল হ'তে হবে। এজন্য টিলাঢালা, ভদ্র ও পরিচ্ছন্ন পোষাক পরিধান করতে হবে। হাদীছে সাদা পোষাক পরিধানের নির্দেশ এসেছে।<sup>৫১</sup> (৩) পোষাক যেন অমুসলিমদের সাদৃশ্য না হয়।<sup>৫২</sup> (৪) পোষাকে যেন অহংকার প্রকাশ না পায়। এজন্য পুরুষ যেন সোনা ও রেশম পরিধান না করে এবং টাখনুর নীচে কাপড় না রাখে।<sup>৫৩</sup>

## ৬. ছালাতের ফরয বা রুকন সমূহ (أركان الصلاة) :

‘রুকন’ অর্থ স্তম্ভ। অর্থাৎ যা ইচ্ছাকৃত বা ভুল ক্রমে পরিত্যাগ করলে ছালাত বাতিল হয়ে যায়। উহা ৭টি। যেমন-

- (১) ক্বিয়াম বা দাঁড়ানোঃ আল্লাহ বলেন, قَوْمُوا لِّلّٰهِ قَانِتِيْنَ ‘তোমরা আল্লাহর জন্য একনিষ্ঠচিত্তে দাঁড়িয়ে যাও’ (বাক্বারাহ ২৩৮)।

৫০. মুসলিম, মিশকাত হা/৩৫২৪ ‘ক্বিছাহ’ অধ্যায়।

৫১. আ'রাফ ২৬; মুসলিম, মিশকাত হা/৫১০৮ ‘আদাব’ অনুচ্ছেদ; তিরমিযী, মিশকাত হা/৪৩৫০ ‘লিবাস’ অধ্যায়; আহমাদ, নাসাঈ, তিরমিযী, মিশকাত হা/৪৩৩৭;।

৫২. আহমাদ, আবুদাউদ, মিশকাত হা/৪৩৪৭।

৫৩. মুত্তাফাকু আলাইহ, বুখারী, মিশকাত হা/৪৩১১-১৪, আবুদাউদ, মিশকাত হা/৪৩৪৬।

৫৪. মুত্তাফাকু আলাইহ; ছহীহ বুখারী ও মিশকাত শরীফের প্রথম হাদীছ। রাবী হযরত ওমর বিনুল খাত্তাব (রাঃ)। হজ্জ ও ওমরাহ-র জন্য উচ্চৈঃস্বরে ‘তাল্বিয়াহ’ পাঠ ব্যতীত অন্য কোন ইবাদতের জন্য মুখে নিয়ত পড়া ‘বিদ'আত’। রাসূলুল্লাহ (ছাঃ), ছাহাবায়ে কেলাম, তাবেঈনে এযাম এবং আহলে সুনাত ওয়াল জামা'আতের বিগত ইমামগণের কেউ মুখে নিয়ত পাঠ করেছেন বা করতে বলেছেন বলে জানা যায় না। হানাফী ফিকহের প্রসিদ্ধ গ্রন্থ ‘হেদায়া’-র খ্যাতনামা লেখক বুরহানুদ্দীন আবুল হাসান আলী বিন আবু বকর আল-ফারগানী আল-মারগীনানী (৫১১-৫৯৩ হিঃ) সহ পরবর্তী কালের কিছু ফক্বীহ বিদ্বান অন্তরে নিয়ত করার সাথে সাথে মুখে তা পাঠ করাকে ‘সুন্দর’ বলে গণ্য করেন। যেমন হেদায়া-তে বলা হয়েছে,

النّية هي الإرادة والشرط أن يعلم بقلبه أيّ صلاة يصلي ، أما الذكر باللسان فلا معتبر به ويحسن لاجتماع عزمته (أي القصد مع التلفظ)

অর্থাৎ নিয়ত অর্থ এরাদা করা। তবে শর্ত হ'ল এই যে, মুছল্লী কোন্ ছালাত আদায় করবে, সেটা অন্তর থেকে জানা। মুখে নিয়ত পাঠ করার কোন গুরুত্ব নেই। তবে হৃদয়ের সংকল্পকে একীভূত করার স্বার্থে মুখে নিয়ত পাঠকে সুন্দর গণ্য করা চলে'। =হেদায়া ‘ছালাতের শর্তাবলী’ অধ্যায় ১/৯৬ পৃঃ। মোল্লা আলী ক্বারী, ইবনুল হুমাম, আব্দুল হাই লাক্কোবী (রহঃ) প্রমুখ এ মতের বিরোধিতা করেছেন ও একে ‘বিদ'আত’ বলে আখ্যায়িত করেছেন। -মিরক্বাত শরহে মিশকাত (দিল্লী ছাপা, তাবি) ১/৪০-৪১ পৃঃ; হেদায়া (দেউবন্দ, ভারতঃ মাকতাবা থানবী ১৪১৬ হিঃ) ‘ছালাতের শর্তাবলী’ অধ্যায় ১/৯৬ পৃঃ টীকা-১৩ দ্রষ্টব্য।

(২) তাকবীরে তাহরীমাঃ অর্থাৎ ‘আল্লাহ্ আকবর’ বলে দুই হাত কাঁধ অথবা কান পর্যন্ত উঠানো। আল্লাহ বলেন, **وَلِرَبِّكَ فَكَبِّرُ** ‘তোমার প্রভুর জন্য তাকবীর দাও’ (মুদাছছির ৩)। অর্থাৎ তাঁর বড়ত্ব ঘোষণা কর। রাসূলুল্লাহ (ছাঃ) এরশাদ করেন, **تَحْرِيمُهَا التَّكْبِيرُ وَتَحْلِيلُهَا التَّسْلِيمُ** ‘ছালাতে সবকিছু হারাম হয় তাকবীরের মাধ্যমে এবং সবকিছু হালাল হয় সালাম ফিরানোর মাধ্যমে’।<sup>৫৪</sup>

(৩) সূরায়ে ফাতিহা পাঠ করাঃ রাসূলুল্লাহ (ছাঃ) এরশাদ করেন, **لَا صَلَاةَ لِمَنْ لَمْ يَقْرَأْ بِفَاتِحَةِ الْكِتَابِ** (লা ছালা-তা লেমান লাম ইয়াক্বারা) বেফা-তিহাতিল কিতা-বে) ‘ঐ ব্যক্তির ছালাত সিদ্ধ নয়, যে ব্যক্তি সূরায়ে ফাতিহা পাঠ করেনা’।<sup>৫৫</sup>

(৪ ও ৫) রুকু ও সিজদা করাঃ আল্লাহ বলেন, **وَارْكَعُوا وَاسْجُدُوا** ‘হে মুমিনগণ! তোমরা রুকু কর ও সিজদা কর’ (হজ্জ ৭৭)।

(৬) তা‘দীলে আরকান বা ধীর-স্থির ভাবে ছালাত আদায় করাঃ

عن أبي هريرة قال بينما نحن جلوس عند النبي صلى الله عليه وسلم إذ دخل رجل فصلي، فسلم على النبي (ص) فقال: إرجع فصل فإنك لم تصل، فعلمنا ثلاثاً فقال علمني يا رسول الله ...

‘জনৈক ব্যক্তি মসজিদে প্রবেশ করে ছালাত আদায় শেষে রাসূলুল্লাহ (ছাঃ)-কে সালাম

অন্যান্য স্থান সহ ভারতীয় উপমহাদেশের অধিকাংশ মুসলমানের মধ্যে ‘নাওয়াইতু ‘আন’ পাঠের মাধ্যমে মুখে নিয়ত পড়ার প্রথা চালু রয়েছে। অথচ এর কোন শারঈ ভিত্তি নেই। ছালাতের শুরু হতে শেষ পর্যন্ত পুরা অনুষ্ঠানটিই আল্লাহর ‘অহি’ দ্বারা নির্ধারিত। এখানে ‘রায়’ বা ‘ক্বিয়াস’-এর কোন অবকাশ নেই। অতএব মুখে নিয়ত পাঠ করা ‘সুন্দর’ নয় বরং ‘বিদ‘আত’- যা অবশ্যই ‘মন্দ’ ও পরিত্যাজ্য। বাস্তব কথা এই যে, মুখে নিয়ত পাঠের এই বাড়তি ঝামেলার জন্য অনেকে ছালাত আদায়ে ভয় পান। কারণ ভুল আরবী নিয়ত পাঠে ছালাত বরবাদ হওয়ার সম্ভাবনাই বেশী থাকে। অথচ যারা এই বিদ‘আতী নিয়ত পাঠে মুছল্লীকে বাধ্য করেন, তারাই আবার ইমামের পিছনে সূরায়ে ফাতেহা পাঠে মুক্তাদীর মুখে ‘মাটি ভরা উচিত বা পাথর মারা উচিত’ বলে ফৎওয়া দেন (মুফতী আব্দুল কুদ্দুস ও মুফতী সৈয়দ নজরুল ইসলাম, ‘সহীহ হাদীসের আলোকে হানাফীদের নামাজ’ পৃঃ ১৩-১৪; হাদীছটি যঈফ, ইরওয়া হা/৫০৩)। অথচ সূরায়ে ফাতেহা পাঠের জন্য রাসূল (ছাঃ) -এর স্পষ্ট নির্দেশ মওজুদ রয়েছে। অন্ধ তাকলীদ ও মাযহাবী গোঁড়ামী মুসলিম উম্মাহকে এভাবেই ছহীহ হাদীছের নিরপেক্ষ অনুসরণ থেকে বিরত রেখেছে।- লেখক।

৫৪. আবুদাউদ, তিরমিযী, মিশকাত হা/৩১২ ‘ত্বাহারৎ’ অধ্যায়; ঐ, ‘ছালাত’ অধ্যায় হা/৭৯১।

৫৫. মুত্তাফাকু আলাইহ, মিশকাত ‘ছালাতে ক্বিরাআত’ অধ্যায় হা/৮২২, রাবী ‘উবাদাহ বিন হামিত (রাঃ)। দ্রষ্টব্যঃ কুতুবে সিত্তাহ্‌সহ অন্যান্য হাদীছ গ্রন্থ।

দিলে তিনি বলেন, তুমি পুনরায় ছালাত আদায় কর। কেননা তুমি ছালাত আদায় করনি। এই ভাবে লোকটি তিনবার আদায় করল ও রাসূল (ছাঃ) তাকে তিনবার ফিরিয়ে দিলেন। তখন লোকটি বলল, হে রাসূল! আমাকে ছালাত শিখিয়ে দিন! ... (অতঃপর তিনি তাকে ধীরে সুস্থে ছালাত আদায় শিক্ষা দিলেন)।<sup>৫৬</sup> হাদীছটি

حديث مسيء الصلوة বা 'ছালাতে ভুলকারীর হাদীছ' হিসাবে প্রসিদ্ধ।

### (৭) ক্বা'দায়ে আখীরাহ বা শেষ বৈঠকঃ

হযরত উম্মে সালামাহ (রাঃ) বলেন, রাসূল (ছাঃ)-এর যামানায় মহিলাগণ জামা'আতে ফরয ছালাত শেষে সালাম ফিরানোর পরে উঠে দাঁড়াতেন এবং রাসূল (ছাঃ) ও পুরুষ মুছল্লীগণ কিছু সময় বসে থাকতেন। অতঃপর যখন রাসূল (ছাঃ) দাঁড়াতেন তখন তাঁরাও দাঁড়াতেন।<sup>৫৭</sup> এর দ্বারা প্রমাণিত হয় যে, শেষ বৈঠকে বসে সালাম ফিরানোটাই ছিল রাসূল (ছাঃ) ও ছাহাবায়ে কেরামের নিয়মিত অভ্যাস।

প্রকাশ থাকে যে, কঠিন অসুখ বা অন্য কোন বাস্তব কারণে অপারগ অবস্থায় উপরোক্ত শর্তাবলী ও রুকন সমূহ ঠিকমত আদায় করা সম্ভব না হ'লে বসে বা শুয়ে ইশারায় ছালাত আদায় করবে। কিন্তু কোন অবস্থায় ছালাত মাফ নেই।

### ৭. ছালাতের ওয়াজিব সমূহ (واجبات الصلاة) :

রুকন -এর পরেই ওয়াজিব -এর স্থান, যা ইচ্ছাকৃতভাবে তরক করলে ছালাত বাতিল হয়ে যায় এবং ভুলক্রমে তরক করলে 'সিজদায়ে সহো' দিতে হয়। উহা ৮টি।<sup>৫৮</sup> যেমন-

১. 'তাকবীরে তাহরীমা' ব্যতীত অন্যান্য সকল তাকবীর।<sup>৫৯</sup>
২. রুকূতে তাসবীহ পড়া। কমপক্ষে 'সুবহা-না রবিয়াল 'আযীম' বলা।<sup>৬০</sup>
৩. ক্বওমার সময় 'সামি'আল্লা-হু লেমান হামেদাহ' বলা।<sup>৬১</sup>
৪. ক্বওমার দো'আ কমপক্ষে 'রব্বানা ওয়া লাকাল হাম্দ' বলা।<sup>৬২</sup>
৫. সিজদায় গিয়ে তাসবীহ পড়া। কমপক্ষে 'সুবহা-না রবিয়াল আ'লা' বলা।<sup>৬৩</sup>

৫৬. মুত্তাফাকু আলাইহ, মিশকাত হা/৭৯০।

৫৭. বুখারী, মিশকাত হা/৯৪৮ 'তাশাহহুদে দো'আ' অধ্যায়।

৫৮. মুহাম্মাদ বিন আব্দুল ওয়াহ্‌হাব, 'ছালাতের আরকান ও ওয়াজিবাত' গৃহীতঃ মাজমূ'আ রাসা-ইল পৃঃ ৭৮।

৫৯. বুখারী, মুসলিম ও অন্যান্য, মিশকাত হা/৭৯৯, ৮০১; ফিকহুস্ সুন্নাহ ১/১২০।

৬০. নাসাঈ, আবুদাউদ, তিরমিযী, মিশকাত হা/৮৮১।

৬১. বুখারী, মুসলিম, মিশকাত হা/ ৮৭০, ৭৪, ৭৫, ৭৭।

৬২. মুত্তাফাকু আলাইহ, মিশকাত হা/ ৭৯৯।

৬৩. নাসাঈ, আবুদাউদ, তিরমিযী, মিশকাত হা/৮৮১।

৬. দুই সিজদার মাঝখানে স্থির হ'য়ে বসা ও কমপক্ষে একবার 'রবিগফিরলী' বলা।<sup>৬৪</sup>
৭. প্রথম বৈঠকে বসা ও 'তাশাহহুদ' পাঠ করা।<sup>৬৫</sup>
৮. সালামের মাধ্যমে ছালাত শেষ করা।<sup>৬৬</sup>

### ৮. ছালাতের সুন্নাত সমূহ (سنن الصلاة):

ফরয ও ওয়াজিব ব্যতীত ছালাতের বাকী সকল আমলই সুন্নাত। যেমন, (১) প্রথম রাক'আতে কিরাআতের পূর্বে 'আ'উযুবিল্লাহ...' চুপে চুপে পাঠ করা। (২) ছালাতে পঠিতব্য সকল দো'আ (৩) বুকে হাত বাঁধা (৪) রাফ'উল ইয়াদায়েন করা (৫) 'আমীন' বলা (৬) সিজদায় যাওয়ার সময় মাটিতে আগে হাত রাখা (৭) 'জালসায়ে ইস্তেরা-হাত' করা (৮) মাটিতে দু'হাতে ভর দিয়ে উঠে দাঁড়ানো (৯) ছালাতে দাঁড়িয়ে সিজদার স্থানে নযর রাখা (১০) তাশাহহুদের সময় ডান হাত ৫৩-এর ন্যায় মুষ্টিবদ্ধ করা ও শাহাদাত আঙ্গুল নাড়াতে থাকা ইত্যাদি।

### ৯. ছালাত বিনষ্টের কারণ সমূহ (مفسدات الصلاة):

১. ছালাতরত অবস্থায় ইচ্ছাকৃত ভাবে কিছু খাওয়া বা পান করা।
২. ছালাতের স্বার্থ ব্যতিরেকে অন্য কারণে ইচ্ছাকৃতভাবে কথা বলা।
৩. ইচ্ছাকৃতভাবে বাহুল্য কাজ বা 'আমলে কাহীর' করা। যা দেখলে ধারণা হয় যে, সে ছালাতের মধ্যে নয়।
৪. ইচ্ছাকৃত বা বিনা কারণে ছালাতের কোন রুকন ও শর্ত পরিত্যাগ করা।
৫. ছালাতের মধ্যে অধিক হাস্য করা।<sup>৬৭</sup>

### ১০. ছালাতের ওয়াক্ত সমূহ (مواقيت الصلاة):

আল্লাহ কর্তৃক নির্ধারিত সময়ে পাঁচ ওয়াক্ত 'ছালাত' আদায় করা ফরয। আল্লাহ বলেন, 'إِنَّ الصَّلَاةَ كَانَتْ عَلَى الْمُؤْمِنِينَ كِتَابًا مَّوْقُوتًا' - 'মুমিনদের উপরে ছালাত নির্দিষ্ট সময়ের জন্য নির্ধারিত করা হয়েছে' (নিসা ১০৩)। মি'রাজ রজনীতে ছালাত ফরয হওয়ার পরের দিন<sup>৬৮</sup> যোহরের সময় হযরত জিবরীল (আঃ) এসে প্রথম দিন আউয়াল ওয়াক্তে ও পরের দিন আখেরী ওয়াক্তে নিজ ইমামতিতে পবিত্র

৬৪. আবুদাউদ, তিরমিযী, নাসাঈ, দারেমী, মিশকাত হা/৯০০,৯০১; নায়ল ৩/১২৯; হুহীহ তিরমিযী হা/২৩৩; মজমু'আ রাসা-ইল পৃঃ ৭৮।

৬৫. আহমাদ, নাসাঈ, নায়ল ৩/১৪০; মুত্তাফাকু আলাইহ, মিশকাত হা/৯০৯।

৬৬. আবুদাউদ, তিরমিযী, মিশকাত হা/৩১২; আবুদাউদ, নাসাঈ, তিরমিযী, ইবনু মাজাহ, মিশকাত হা/৯৫০-৫১; ফিকহুস সুন্নাহ ১/১০৬।

৬৭. ফিকহুস সুন্নাহ ১/২০৩-৫। ৬৮. নায়লুল আওত্বার ২/২৮।

৬৯. (الوقت ما بين هذين الوقتين) আবুদাউদ, তিরমিযী, মিশকাত 'ছালাতের সময়কাল' অধ্যায় হা/৫৮৩; হুহীহ আবুদাউদ হা/৪১৬; রাবী ইবনু আব্বাস (রাঃ)। ইমাম বুখারী বলেন, ছালাতের ওয়াক্ত নির্ধারণের ব্যাপারে একই মর্মে জাবের (রাঃ) বর্ণিত হাদীছটিই সর্বাধিক বিশুদ্ধ'। -নায়লুল আওত্বার ২/২৬; আহমাদ, হুহীহ নাসাঈ হা/৫০০; হুহীহ আবুদাউদ হা/৪১৮; হুহীহ তিরমিযী হা/১২৮।

কা'বা চত্বরে মাক্কামে ইবরাহীমের পাশে দাঁড়িয়ে পাঁচ পাঁচ দশ ওয়াক্ত ছালাত আদায় করে রাসূলুল্লাহ (ছাঃ)-কে ছালাতের পসন্দনীয় 'সময়কাল ঐ দুই সময়ের মধ্যে' নির্দিষ্ট করে দিয়েছেন।<sup>৬৯</sup> তবে আউয়াল ওয়াক্তে ছালাত আদায় করাকে রাসূলুল্লাহ (ছাঃ) সর্বোত্তম আমল হিসাবে অভিহিত করেছেন।<sup>৭০</sup>

### ছালাতের ওয়াক্ত সমূহ নিম্নরূপঃ

(১) ফজরঃ 'ছুবহে ছাদিক' হ'তে সূর্যোদয়ের পূর্ব পর্যন্ত। রাসূলুল্লাহ (ছাঃ) সর্বদা 'গলস' বা খুব ভোরের অন্ধকারে ফজরের ছালাত আদায় করতেন এবং জীবনে একবার মাত্র 'ইসফার' বা চারিদিকে ফর্সা হওয়ার সময়ে ফজরের ছালাত আদায় করেছেন। মৃত্যুর আগ পর্যন্ত এটাই তাঁর নিয়মিত অভ্যাস ছিল।<sup>৭১</sup> অতএব 'গলস' বা খুব ভোরের অন্ধকারে ফজরের ছালাত আদায় করাই উত্তম।

(২) যোহরঃ সূর্য পশ্চিম দিকে ঢললেই যোহরের ওয়াক্ত শুরু হয় এবং বস্তুর নিজস্ব ছায়ার এক গুণ হ'লে শেষ হয়।<sup>৭২</sup>

(৩) আছরঃ বস্তুর মূল ছায়ার একগুণ হওয়ার পর হ'তে আছরের ওয়াক্ত শুরু হয় এবং দু'গুণ হ'লে শেষ হয়। তবে সূর্যাস্তের প্রাক্কালের রক্তিম সময় পর্যন্ত আছর পড়া জায়েয আছে।<sup>৭৩</sup>

৭০. سئل النبي (ص): أي الأعمال أفضل قال الصلاة لأوّل وقتها

আহমাদ, আবুদাউদ, তিরমিযী, মিশকাত 'ছালাত আগেভাগে পড়া' অধ্যায় হা/৬০৭।

৭১. আবুদাউদ, আবু মাসউদ আনছারী (রাঃ) হ'তে; নায়ল ২/৭৫ পৃঃ; রাসূলুল্লাহ (ছাঃ) এরশাদ করেন, 'أسفروا بالفجر فإنه أعظم للأجر' 'তোমরা ফজরের সময় ফর্সা কর। কেননা এটাই নেকীর জন্য উত্তম সময়'। -আহমাদ, ছহীহ তিরমিযী হা/১৩২; ছহীহ ইবনু মাজাহ হা/৬৭২ প্রভৃতি। সাইয়িদ সাবিক বলেন, এর অর্থ ফর্সা হওয়ার পরে ফজর পড়, সেটা নয়। বরং এর অর্থ হ'ল ফজরের কিরাআত দীর্ঘ কর এবং ফর্সা হ'লে ছালাত শেষে বের হও, যেমন রাসূলুল্লাহ (ছাঃ) করতেন। তিনি ফজরে ৬০ হ'তে ১০০টি আয়াত পড়তেন। অথবা এর অর্থ এটাও হ'তে পারে যে, 'তোমরা ফজর হওয়া সম্পর্কে নিশ্চিত হও। ধারণার ভিত্তিতে ছালাত আদায় করো না'। -ফিকহুস সুন্নাহ ১/৮০।

৭২. মুসলিম, মিশকাত হা/৫৮১; আবুদাউদ, তিরমিযী, মিশকাত হা/৫৮৩; ছহীহ আবুদাউদ হা/৪১৬; ইমাম আবু ইউসুফ, ইমাম মুহাম্মাদ ও ইমাম আবু হানীফা (রহঃ) একটি মতে (ছহীহ হাদীছে বর্ণিত) উক্ত সময়কালকে সমর্থন করেছেন। -হেদায়া ১/৮১ পৃঃ 'ছালাত' অধ্যায়, 'সময়' অনুচ্ছেদ।

৭৩. প্রাগুক্ত: নায়ল ২/৩৪-৩৫ পৃঃ 'আছরের পসন্দনীয় ও শেষ সময়' অধ্যায়। চার ইমাম সহ ইমাম আবু ইউসুফ ও ইমাম মুহাম্মাদ (রহঃ) এই মত পোষণ করেন। তবে ইমাম আবু হানীফা (রহঃ) অন্য মতে 'মূল ছায়ার দ্বিগুণ হওয়া' সমর্থন করেছেন এবং সেটার উপরেই হানীফা মাযহাবের ফৎওয়া জারি আছে। দলীলঃ হাদীছ- 'তোমরা যোহরকে ঠাণ্ডা কর। কেননা প্রচণ্ড গ্রীষ্মতাপ জাহান্নামের উত্তাপ মাত্র' (হেদায়া ১/৮১)। ঘটনা হ'ল এই যে, 'একদা এক সফরে প্রচণ্ড দুপুরে বেলাল (রাঃ) যোহরের আযান দেওয়ার পরে জামা'আতের জন্য একামত দিতে চাইলে রাসূলুল্লাহ (ছাঃ) বলেন, 'যোহরে একটু ঠাণ্ডা কর' অর্থাৎ দেৱী কর। অন্য বর্ণনায় এসেছে 'ছালাতকে ঠাণ্ডা কর। কেননা প্রচণ্ড দাবদাহ যেন জাহান্নামের উত্তাপ'। -ছহীহ তিরমিযী হা/১৩৫, ছহীহ আবুদাউদ হা/৩৮৮।

উক্ত হাদীছে দু'টি বিষয় রয়েছে। ১. সময়টি ছিল সফরের হালত। যেখানে খোলা ময়দানে কঠিন দাবদাহে যোহর আদায় করা বাস্তবিকই কঠিন। কিন্তু মুক্কীম অবস্থায় সাধারণ আবহাওয়ায় কিংবা ছাদ, ফ্যান ও এসি যুক্ত মসজিদের বেলায় এই হুকুম চলে কি? ২. এটি ছিল গ্রীষ্মের মওসুম। কিন্তু শীতকালে যখন দুপুরের রৌদ্র মজা লাগে, তখনকার হুকুম কেমন

(৪) মাগরিবঃ সূর্য অস্ত যাওয়ার পরেই মাগরিবের ওয়াক্ত শুরু হয় এবং সূর্যের লালিমা শেষ হওয়া পর্যন্ত বাকী থাকে।<sup>৭৪</sup>

(৫) এশাঃ মাগরিবের পর হ'তে এশার ওয়াক্ত শুরু হয় এবং মধ্যরাতে শেষ হয়।<sup>৭৫</sup> তবে যরুরী কারণ বশতঃ ফজরের পূর্ব পর্যন্ত এশার ছালাত আদায় করা জায়েয আছে।<sup>৭৬</sup>

প্রচণ্ড গ্রীষ্মে যোহরের ছালাত একটু দেরীতে এবং প্রচণ্ড শীতে এশার ছালাত একটু আগেভাগে পড়া ভাল। তবে কষ্টবোধ না হ'লে এশার ছালাত রাতের এক তৃতীয়াংশের পর আদায় করা উত্তম।<sup>৭৭</sup>

### নিষিদ্ধ সময়ঃ

সূর্যোদয়, মধ্যাহ্ন ও সূর্যাস্ত কালে ছালাত শুরু করা সিদ্ধ নয়।<sup>৭৮</sup> অনুরূপভাবে আছরের ছালাতের পর হ'তে সূর্যাস্ত পর্যন্ত এবং ফজরের ছালাতের পর হ'তে সূর্যোদয় পর্যন্ত কোন ছালাত নেই।<sup>৭৯</sup> ফজর ও আছর ছালাতের পরে ক্বাযা ছালাত আদায় করা জায়েয আছে।<sup>৮০</sup> বিভিন্ন হাদীছের আলোকে অনেক বিদ্বান নিষিদ্ধ সময়গুলিতে 'কারণ বিশিষ্ট' ছালাত সমূহ জায়েয বলেছেন। যেমন- তাহিইয়াতুল মাসজিদ, তাহিইয়াতুল ওয়ূ, সূর্য গ্রহণের ছালাত, জানাযার ছালাত ইত্যাদি।<sup>৮১</sup> জুম'আর ছালাত ঠিক দুপুরের সময় জায়েয আছে।<sup>৮২</sup> অমনিভাবে কা'বা শরীফে সকল সময় ছালাত ও ত্বাওয়াফ জায়েয।<sup>৮৩</sup>

হবে? এক্ষেপে ইবনু আক্বাস ও জাবের (রাঃ) বর্ণিত হাদীছে যেখানে 'মূল ছায়ার এক গুণ ও দু'গুণের মধ্যবর্তী সময়কে আছরের ওয়াক্ত হিসাবে সীমা নির্দেশ করা হয়েছে, সেখানে উক্ত সাময়িক সমস্যায়ুক্ত হাদীছের দোহাই দিয়ে আছরের পসন্দনীয় শেষ সময় অর্থাৎ 'মূল ছায়ার দ্বিগুণ' উত্তীর্ণ হওয়ার পরে আছর শুরু করা ঠিক হবে কি? বরং উক্ত হাদীছের সরলার্থ এটাই হ'তে পারে যে, অনুরূপ সাময়িক তাপদঙ্ক আবহাওয়ায় যোহরের ছালাত আউয়াল ওয়াক্তে না পড়ে একটু দেরী করে পড়বে। এক্ষেত্রে ইমাম আবু হানীফা (রহঃ)-এর অন্য মতটি গ্রহণ করলে এবং ছহীহ হাদীছ এবং তিন ইমাম ও ছাহেব্যয়নের মতামতকে শ্রদ্ধা জানিয়ে 'মূল ছায়ার এক গুণ' হওয়ার পর থেকে আছরের ওয়াক্ত নির্ধারণ করলে অন্ততঃ এই ক্ষেত্রে মুসলমানগণ এক হ'তে পারতেন।  
-লেখক।

৭৪ ও ৭৫. প্রাগুক্ত।

৭৬. মুসলিম, আবু ক্বাতাদাহ হ'তে -ফিক্হস সুন্নাহ ১/৭৯ পৃঃ।

৭৭. বুখারী, মিশকাত হা/৫৯০-৯১; আহমাদ, তিরমিযী, ইবনু মাজাহ, মিশকাত হা/৬১১; বুখারী ও মুসলিম, ফিক্হস সুন্নাহ 'যোহরের ওয়াক্ত' অনুচ্ছেদ ১/৭৬।

৭৮. মুত্তাফাকু আলাইহ, মুসলিম, মিশকাত হা/১০৩৯-৪০; ফিক্হস সুন্নাহ ১/৮১-৮৩ পৃঃ।

৭৯. বুখারী ও মুসলিম, মিশকাত হা/১০৪১।

৮০. মুত্তাফাকু আলাইহ, মিশকাত হা/১০৪৩।

৮১. ফিক্হস সুন্নাহ ১/৮২।

৮২. আবদুর রহমান মুবারকপুরী, তুহফাতুল আহওয়াযী ১/৫৪১; ফিক্হস সুন্নাহ ১/৮২।

৮৩. নাসাই, আবুদাউদ, তিরমিযী, মিশকাত হা/১০৪৫।



## ৯. ত্বাহারৎ বা পবিত্রতা (الطهارة) :

ছালাতের আবশ্যিক পূর্বশর্ত হ'ল ত্বাহারৎ বা পবিত্রতা অর্জন করা। উহা দু'প্রকারেরঃ অভ্যন্তরীণ ও বাহ্যিক। 'অভ্যন্তরীণ পবিত্রতা' বলতে বুঝায় হৃদয়কে যাবতীয় শিরকী আকীদা ও 'রিয়া' মুক্ত রাখা এবং আল্লাহর ভালবাসার উর্ধে অন্যের ভালবাসাকে হৃদয়ে স্থান না দেওয়া। 'বাহ্যিক পবিত্রতা' বলতে বুঝায় শারঙ্গ তরীকায় ওয়ূ, গোসল বা তায়াম্মুম ইত্যাদি সম্পন্ন করা। আল্লাহ বলেন, **إِنَّ اللَّهَ يُحِبُّ** 'নিশ্চয়ই আল্লাহ (অন্তর থেকে) তওবাকারী ও (বাহ্যিকভাবে) পবিত্রতা অর্জনকারীদের ভালবাসেন' (বাক্বারাহ ২২২)। রাসূলুল্লাহ (ছাঃ) এরশাদ করেন, **لَا تُقْبَلُ صَلَاةٌ بِغَيْرِ طَهْوَرٍ وَلَا صَدَقَةٌ مِنْ غُلُولٍ** 'পবিত্রতা অর্জন ব্যতীত কারু ছালাত কবুল হয় না এবং হারাম মালের ছাদকা কবুল হয় না'।<sup>১</sup>

মুছল্লীর জন্য দৈহিক পবিত্রতা অর্জন করা অত্যন্ত যকরী। কেননা এর ফলে বাহ্যিক পবিত্রতা হাছিলের সাথে সাথে মানসিক প্রশান্তি সৃষ্টি হয়, শয়তানী খেয়াল দূরীভূত হয় এবং মুমিনকে আল্লাহর আনুগত্যে উদ্বুদ্ধ করে। ইসলামে দৈহিক পবিত্রতা হাছিলের তিনটি পদ্ধতি রয়েছে- ওয়ূ, গোসল ও তায়াম্মুম।

(ক) ওয়ূ (الْوُضُوءُ) : আভিধানিক অর্থ স্বচ্ছতা (الْوَضَاءُ)। পারিভাষিক অর্থে

আল্লাহর নামে পবিত্র পানি দ্বারা শারঙ্গ পদ্ধতিতে হাত, মুখ, পা ধৌত করা ও মাথা মাসাহ করাকে 'ওয়ূ' বলে। ওয়ূর মধ্যে ফরয হ'ল চারটি। পুরা মুখ মগল এবং দুই হাত কনুই সমেত ধৌত করা, মাথা মাসাহ করা ও দুই পা টাখনু সমেত ধৌত করা। যেমন- আল্লাহ বলেন, **يَا أَيُّهَا الَّذِينَ آمَنُوا إِذَا قُمْتُمْ إِلَى الصَّلَاةِ فَاغْسِلُوا وُجُوهَكُمْ وَأَيْدِيَكُمْ إِلَى الْمَرَافِقِ وَامْسَحُوا بِرُءُوسِكُمْ وَأَرْجُلَكُمْ إِلَى الْكَعْبَيْنِ...**

অর্থঃ হে বিশ্বাসীগণ! যখন তোমরা ছালাতের জন্য প্রস্তুত হও, তখন তোমাদের মুখমগল ও হস্তদ্বয় কনুই সমেত ধৌত কর এবং তোমাদের মাথা মাসাহ কর ও পদযুগল টাখনু সমেত ধৌত কর...' (মায়েদাহ ৬)।<sup>২</sup>

১. মুসলিম, মিশকাত 'ত্বাহারৎ' অধ্যায় হা/৩০১; মুত্তাফাকু আলাইহ, মিশকাত হা/৩০০।

২. সূরায়ে মায়েদাহ মদীনায় অবতীর্ণ হয়। সেকারণ অনেকের ধারণা ওয়ূ প্রথম মদীনাতেই ফরয হয়। এটা ঠিক নয়। ইবনু আবদিল বার ব বলেন, মক্কী জীবনে রাসূলুল্লাহ (ছাঃ) বিনা ওয়ূতে কখনোই ছালাত আদায় করেননি। তবে মাদানী জীবনে অত্র আয়াত নাযিলের মাধ্যমে ওটার ফরযিয়াত ঘোষণা করা হয় মাত্র। -ফাৎহুল বারী 'ওয়ূ' অধ্যায় ১/১৩৪ পৃঃ। চারটি ফরয বাদে ওয়ূর বাকী সবই সুন্নাত। নওয়াব ছিদ্দীক হাসান খান ভূপালী (১২৪৮-১৩০৭ হিঃ) বলেন, হিজরতের একবছর পূর্বে ছালাত ফরয হওয়ার সাথে ওয়ূ ফরয হয়'। = আর-রওযাতুন নাদিইয়াহ ১/১১৭ পৃঃ 'ওয়ূ' অধ্যায়।

ওযূর ফযীলত (فضائل الوضوء) :

- (১) রাসূলুল্লাহ (ছাঃ) এরশাদ করেন, ... কালো ঘোড়া সমূহের মধ্যে কপাল চিতা ঘোড়া যেভাবে চেনা যায়... কিয়ামতের দিন আমার উম্মতের ওযূর অঙ্গগুলি জ্বলজ্বল করার কারণে আমি তাদেরকে অনুরূপভাবে চিনবো এবং তাদেরকে হাউয কাওছারের পানি পান করানোর জন্য আগেই পৌঁছে যাব' ৩ 'অতএব যে চায় সে যেন তার ওজ্জ্বল্য বাড়াতে চেষ্টা করে' ৪
- (২) তিনি বলেন, আমি কি তোমাদের বলব কোন্ বস্তু দ্বারা আল্লাহ তোমাদের গোনাহ সমূহ অধিকহারে দূর করেন ও সম্মানের স্তর বৃদ্ধি করেন?... সেটি হ'ল কষ্টের সময় ভালভাবে ওযূ করা, বেশী বেশী মসজিদে যাওয়া ও এক ছালাতের পরে আরেক ছালাতের জন্য অপেক্ষা করা' ৫
- (৩) তিনি আরও বলেন- 'ছালাতের চাবি হ'ল ওযূ' ৬
- (৪) তিনি বলেন, 'মুসলমান যখন ফরয ছালাত আদায়ের উদ্দেশ্যে সুন্দরভাবে ওযূ করে এবং পূর্ণ মনোনিবেশ ও ভীতি সহকারে সুষ্ঠুভাবে রুকূ-সিজদা আদায় করে, তখন ঐ ওযূ ও ছালাত তার বিগত সকল গুনাহের কাফফারা হিসাবে গৃহীত হয়। তবে গুনাহে কবীরাহ ব্যতীত' ৭

ওযূর বিবরণ (صفة الوضوء):

ওযূর পূর্বে ভালভাবে মিসওয়াক করা সুন্নাত। রাসূলুল্লাহ (ছাঃ) এরশাদ করেন,

لَوْلَا أَشَقُّ عَلَى أُمَّتِي لِأَمْرَتِهِمْ بِتَأْخِيرِ الْعِشَاءِ وَبِالسُّوَاكِ عِنْدَ كُلِّ صَلَاةٍ  
আমার উম্মতের উপর কষ্টকর মনে না হ'লে আমি তাদেরকে এশার ছালাত দেৱীতে এবং প্রতি ছালাতে মিসওয়াক করার নির্দেশ দিতাম' ৮ এখানে 'প্রতি ছালাতে' অর্থ 'প্রতি ছালাতের জন্য ওযূ করার সময়' ৯ অতএব ঘুম থেকে উঠে এবং প্রতি ওয়াক্ত ছালাতের জন্য ওযূর পূর্বে মিসওয়াক করা উত্তম।

এই সময় জিহ্বার উপরে ভালভাবে হাত ঘষে গরগরা করা উচিত।

৩. মুসলিম, মিশকাত, 'ত্বাহারৎ' অধ্যায় হা/২৯৮।

৪. মুত্তাফাকু আলাইহ, মিশকাত হা/২৯০।

৫. মুসলিম, মিশকাত হা/২৮২।

৬. আবু দাউদ, তিরমিযী, দারেমী, মিশকাত হা/৩১২।

৭. মুসলিম, মিশকাত হা/২৮৬।

৮. মুত্তাফাকু আলাইহ, মিশকাত হা/৩৭৬।

৯. কেননা উক্ত হাদীছের ব্যাখ্যা অন্য হাদীছে এসেছে (আহমাদ ও বুখারী- তা'লীক্ 'ছওম' অধ্যায় ২৭ অনুচ্ছেদ) مَعَ كُلِّ وُضُوءٍ وَ مَعَ كُلِّ وُضُوءٍ অর্থাৎ 'প্রত্যেক ওযূর সাথে বা সময়ে'।- আহমাদ, ইবনু মাজাহ, হাকেম; সনদ ছহীহ, আলবানী, ইরওয়াউল গালীল ১/১০৯; ছহীহ ইবনু খুযায়মা হা/১৪০, মুওয়াত্তা 'ওযূ' অধ্যায় হা/১১৫ হাশিয়া।

ওযূর তরীকাঃ (১) প্রথমে মনে মনে ওযূর নিয়ত করবে।<sup>১০</sup> অতঃপর (২) 'বিসমিল্লাহ' বলবে।<sup>১১</sup> অতঃপর (৩) ডান হাতে পানি নিয়ে<sup>১২</sup> দুই হাত কজি সমেত ধুবে<sup>১৩</sup> এবং আঙ্গুল সমূহ খিলাল করবে।<sup>১৪</sup> আঙ্গুলে আংটি থাকলে নাড়াচাড়া করে সেখানে পানি প্রবেশ করাবে।<sup>১৫</sup> এরপর (৪) ডান হাতে পানি নিয়ে ভালভাবে কুল্লি করবে ও নাকে পানি দিয়ে বাম হাতে ভাল ভাবে নাক ঝাড়বে।<sup>১৬</sup> তারপর (৫) কপালের গোড়া থেকে দুই কানের লতী হ'য়ে থুৎনীর নীচ পর্যন্ত পুরা মুখমণ্ডল ভালভাবে ধৌত করবে<sup>১৭</sup> ও দাড়ি খিলাল করবে।<sup>১৮</sup> অতঃপর (৬) প্রথমে ডান ও পরে বাম হাত কনুই সমেত ধুবে।<sup>১৯</sup> এরপর (৭) পানি নিয়ে<sup>২০</sup> দু'হাতের ভিজা আংগুলগুলি মাথার সম্মুখ হ'তে পশ্চাতে ও পশ্চাত হ'তে সম্মুখে বুলিয়ে একবার পুরা মাথা মাসাহ করবে।<sup>২১</sup> একই সাথে ভিজা শাহাদাত আংগুল দ্বারা কানের ভিতর অংশ ও বুড়ো আংগুল দ্বারা পিছন অংশে মাসাহ করবে।<sup>২২</sup> অতঃপর (৮) ডান ও বাম পায়ের টাখনু সমেত ভালভাবে ধুবে<sup>২৩</sup> ও বাম হাতের আংগুল দ্বারা<sup>২৪</sup> পায়ের আংগুল সমূহ খিলাল করবে। (৯) এভাবে ওযূ শেষে বাম হাতে<sup>২৫</sup> কিছু পানি নিয়ে নজ্জাস্থান বরাবর ছিটিয়ে দিবে<sup>২৬</sup> ও নিম্নোক্ত দো'আ পাঠ করবে-

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَ أَشْهَدُ أَنَّ مُحَمَّدًا عَبْدُهُ وَ رَسُولُهُ، اللَّهُمَّ اجْعَلْنِي مِنَ التَّوَّابِينَ وَ اجْعَلْنِي مِنَ الْمُتَطَهِّرِينَ -

১০. মুত্তাফাকু আলাইহ, মিশকাত হা/১।
১১. আহমাদ, তিরমিযী, ইবনু মাজাহ, মিশকাত হা/৪০২ 'ওযূর সুন্নাত সমূহ' অনুচ্ছেদ; ছহীহ আবু দাউদ হা/৯২-৯৩; সুবুলুস সালাম হা/৪৬৩; নওয়াব হিন্দীক হাসান খান একে 'ফরয' গণ্য করেছেন- রওয়াতুন নাদিইয়াহ ১/১১৭ পৃঃ।
১২. আবুদাউদ, নায়লুল আওত্বার ১/২০৬ পৃঃ 'কুল্লির পূর্বে দুই হাত ধোয়া' অনুচ্ছেদ।
১৩. মুত্তাফাকু আলাইহ, আহমাদ, নাসাঈ, নায়লুল আওত্বার ১/২০৬ ও ২১০ পৃঃ।
১৪. নাসাঈ, আবুদাউদ, তিরমিযী, ইবনু মাজাহ, মিশকাত হা/৪০৫ 'ওযূর সুন্নাত সমূহ' অনুচ্ছেদ।
১৫. বুখারী তা'লীক, মুহান্নাফ ইবনে আব্বী শায়বা, নায়লুল আওত্বার ১/২৩১ পৃঃ 'আংটি নাড়াচাড়া ও আঙ্গুল খিলাল করা' অনুচ্ছেদ।
১৬. আহমাদ, নাসাঈ, নায়লুল আওত্বার ১/২১৬ পৃঃ; মিশকাত হা/৪১১।
১৭. মুত্তাফাকু আলাইহ, নায়লুল আওত্বার ১/২১০ পৃঃ।
১৮. তিরমিযী, নায়লুল আওত্বার ১/২২৪ পৃঃ।
১৯. বুখারী, নায়লুল আওত্বার ১/২২৩ পৃঃ।
২০. তিরমিযী, মিশকাত হা/৪১৫; সুবুল হা/৩৯; আওনুল মা'বুদ শরহে আবুদাউদ হা/১৩০।
২১. মুত্তাফাকু আলাইহ, মিশকাত হা/৩৯৪ 'ওযূর সুন্নাত সমূহ' অনুচ্ছেদ।
২২. নাসাঈ, ইবনু মাজাহ, নায়ল ১/২৪২-৪৩ পৃঃ; আবুদাউদ, তিরমিযী, মিশকাত হা/৪১৪।
২৩. মুত্তাফাকু আলাইহ, মিশকাত হা/৩৯৪; মুসলিম, মিশকাত হা/৩৯৮।
২৪. আবুদাউদ, তিরমিযী, ইবনু মাজাহ, মিশকাত হা/৪০৬-৭।
২৫. মুসলিম, নাসাঈ, তিরমিযী, মিশকাত হা/৫১৭, ৫২০।
২৬. আহমাদ, দারাকুৎনী, মিশকাত হা/৩৬৬ 'পায়খানার আদব' অনুচ্ছেদ।

আশহাদু আন্ লা-ইলা-হা ইল্লাল্লা-হু ওয়াহুদাহু লা- শারীকা লাহু, ওয়া আশহাদু আন্না মুহাম্মাদান আব্দুহু ওয়া রাসুলুহু। আল্লা-হুম্মাজ্'আলনী মিনাত্ তাউয়াবীনা ওয়াজ্'আলনী মিনাল মুতাত্বাহুহিরীন।

অর্থঃ 'আমি সাক্ষ্য দিচ্ছি যে, আল্লাহ ব্যতীত কোন উপাস্য নেই। তিনি একক ও শরীক বিহীন। আমি সাক্ষ্য দিচ্ছি যে, মুহাম্মাদ (ছাঃ) তাঁর বান্দা ও রাসূল' (মুসলিম)। হে আল্লাহ! আপনি আমাকে তওবাকারীদের ও পবিত্রতা অর্জনকারীদের অন্তর্ভুক্ত করুন!! (তিরমিযী)।

ওমর ফারুক (রাঃ) হ'তে বর্ণিত উক্ত হাদীছে রাসূল (ছাঃ) এরশাদ করেন, যে ব্যক্তি পূর্ণভাবে ওযু করবে ও কালেমায়ে শাহাদাত পাঠ করবে, তার জন্য জান্নাতের আটটি দরজাই খুলে দেওয়া হবে। যেটা দিয়ে ইচ্ছা সে প্রবেশ করবে।<sup>২৭</sup> উল্লেখ্য যে, এই দো'আ পাঠের সময় আসমানের দিকে তাকানোর হাদীছটি 'মুনকার' বা যঈফ।<sup>২৮</sup>

ওযূর অন্যান্য মাসায়েল (مسائل أخرى في الوضوء):

- (১) ওযূর অঙ্গগুলি এক, দুই বা তিনবার করে ধোয়া যাবে।<sup>২৯</sup> তবে রাসূলুল্লাহ (ছাঃ) তিনবার করেই বেশী ধুতেন।<sup>৩০</sup> তিনের অধিকবার ধোয়া বাড়াবাড়ি।<sup>৩১</sup> ধোয়ার মধ্যে জোড়-বেজোড় করা যাবে।<sup>৩২</sup>
- (২) ওযূর মধ্যে 'তারতীব' বা ধারাবাহিকতা বজায় রাখা যরুরী।<sup>৩৩</sup>
- (৩) ওযূর অঙ্গগুলির নখ পরিমান স্থান শুষ্ক থাকলে পুনরায় ওযু করতে হবে।<sup>৩৪</sup> দাড়ির গোড়ায় পানি পৌঁছানোর চেষ্টা করতে হবে। তবে না পৌঁছলেও ওযু সিদ্ধ হবে।<sup>৩৫</sup>
- (৪) শীতে হৌক বা গ্রীষ্মে হৌক পূর্ণভাবে ওযু করতে হবে।<sup>৩৬</sup> কিন্তু পানির অপচয় করা যাবে না। আল্লাহর নবী (ছাঃ) সাধারণতঃ এক 'মুদ' বা ৬২৫ গ্রাম পানি দিয়ে ওযু করতেন।<sup>৩৭</sup>
- (৫) ওযূর জন্য ব্যবহৃত পানি বা ওযু শেষে পাত্রে অবশিষ্ট পানি নাপাক হয় না। বরং তা দিয়ে পুনরায় ওযু বা পবিত্রতা হাছিল করা চলে। রাসূল (ছাঃ) ও ছাহাবায়ে কেলাম একই ওযূর পাত্রে বারবার হাত ডুবিয়ে ওযু করেছেন।<sup>৩৮</sup>

২৭. মুসলিম, মিশকাত হা/ ২৮৯।

২৮. আলবানী, ইরওয়াউল গালীল ১/১৩৪ পৃঃ।।

২৯. মুত্তাফাকু আলাইহ, মিশকাত হা/৩৯৫-৯৭।

৩০. মুত্তাফাকু আলাইহ, মুসলিম, মিশকাত হা/২৮৭, ৩৯৭; নায়ল ১/২১৪ পৃঃ।

৩১. নাসাঈ, ইবনু মাজাহ, মিশকাত হা/৪১৭।

৩২. ছহীহ ইবনু খুযায়মা হা/১৭২-৭৩।

৩৩. সূরা মায়েদা ৬; নায়লুল আওত্বার ১/২১৪, ২১৮ পৃঃ।

৩৪. মুসলিম হা/২৪৩; সুবুলুস সালাম হা/৫০।

৩৫. বুখারী, নায়লুল আওত্বার ১/২২৩, ২২৬ পৃঃ।

৩৬. মুসলিম, মিশকাত হা/৩৯৮।

৩৭. মুত্তাফাকু আলাইহ, মিশকাত হা/৪৩৯ 'গোসল' অধ্যায়।

৩৮. মুত্তাফাকু আলাইহ, নাসাঈ, তিরমিযী, মিশকাত হা/৩৯৪, ৪১১।

- (৬) ওযূর অঙ্গে যখমপট্টি বাঁধা থাকলে এবং তাতে পানি লাগলে রোগ বৃদ্ধির আশংকা থাকলে তার উপর দিয়ে ভিজা হাতে মাসাহ করবে।<sup>৩৯</sup>
- (৭) পবিত্র জুতা বা যে কোন ধরনের পাক মোযার উপরে মাসাহ করা চলবে।<sup>৪০</sup> জুতার নীচে নাপাকী লাগলে তা ভাল ভাবে মুছে ঐ জুতার উপরে মাসাহ করা চলবে।<sup>৪১</sup>
- (৮) ওযূ শেষে পবিত্র তোয়ালে, গামছা বা অনুরূপ কিছু দ্বারা ভিজা অঙ্গ মোছা জায়েয আছে।<sup>৪২</sup>
- (৯) ওযূ সহ পায়ে মোযা পরা থাকলে<sup>৪৩</sup> নতুন ওযূর সময়ে মোযার উপরিভাগে<sup>৪৪</sup> দুই হাতের ভিজা আংগুল পায়ের পাতা হ'তে টাখনু পর্যন্ত টেনে এনে একবার মাসাহ করবে।<sup>৪৫</sup> মুক্দ্দীম অবস্থায় একদিন একরাত ও মুসাফির অবস্থায় তিনদিন তিনরাত একটানা মোযার উপরে মাসাহ করা চলবে।<sup>৪৬</sup>
- (১০) ওযূর অঙ্গ গুলি ডান দিক থেকে ধৌত করা সুন্নাত।<sup>৪৭</sup>
- (১১) গর্দান মাসাহ করার কোন ছহীহ দলীল নেই। ইমাম নবভী (রহঃ) একে 'বিদ'আত' বলেছেন।<sup>৪৮</sup>
- (১২) ওযূ থাক বা না থাক, রাসূলুল্লাহ (ছাঃ) প্রতি ওয়াক্ত ছালাতের পূর্বে ওযূ করায় অভ্যস্ত ছিলেন।<sup>৪৯</sup> তবে মক্কা বিজয়ের দিন তিনি এক ওযূতে পাঁচ ওয়াক্ত ছালাত আদায় করেন।<sup>৫০</sup>
- (১৩) মুখে ওযূর নিয়ত পড়ার কোন দলীল নেই। ওযূ করাকালীন সময়ে পৃথক কোন দো'আ আছে বলে জানা যায় না। অনুরূপভাবে ওযূর প্রত্যেক অঙ্গ ধোয়ার পৃথক পৃথক দো'আর কথাও ভিত্তিহীন। ওযূ শেষে সূরায়ে 'ক্বদর' পাঠ করারও কোন দলীল নেই।

### ওযূ ভঙ্গের কারণ সমূহ (نواقض الوضوء):

১. পেশাব পায়খানার রাস্তা দিয়ে দেহ থেকে কোন কিছু নির্গত হ'লে ওযূ ভঙ্গ হয়। বিভিন্ন ছহীহ হাদীছের আলোকে প্রমাণিত হয় যে, এটিই হ'ল ওযূ ভঙ্গের প্রধান কারণ। পেটের গণ্ডগোল, ঘুম, যৌন উত্তেজনা ইত্যাদি কারণের প্রেক্ষিতে যদি কেউ সন্দেহে পতিত হয় যে, ওযূ টুটে গেছে, তাহ'লে পুনরায় ওযূ করবে। আর যদি

৩৯. ছহীহ ইবনু খুযায়মা হা/২৭৩; ইবনু মাজাহ, নায়লুল আওত্বার ১/৩৮৬ পৃঃ 'তায়াম্মুম' অধ্যায়।  
 ৪০. আহমাদ, তিরমিযী, আবুদাউদ, ইবনু মাজাহ, মিশকাত হা/৫২৩।  
 ৪১. আবুদাউদ, মিশকাত হা/৫০৩; ইবনু খুযায়মা হা/৭৮৬; রওয়াতুন নাদিইয়াহ ১/৯১ পৃঃ।  
 ৪২. ইবনু মাজাহ, সালমান ফারসী (রাঃ) বর্ণিত, হা/৪৬৮; আলোচনা দ্রষ্টব্যঃ আওনুল মা'বুদ ১/৪১৭-১৮ পৃঃ; নায়ল ১/২৬৬ পৃঃ; মির'আতুল মাফাতীহ ১/২৮৩-৮৪ পৃঃ।  
 ৪৩. মুত্তাফাকু আলাইহ, আবুদাউদ, নায়লুল আওত্বার ১/২৭৩ পৃঃ।  
 ৪৪. আবুদাউদ, মিশকাত হা/৫২২, ৫২৫ 'মোযার উপরে মাসাহ' অনুচ্ছেদ।  
 ৪৫. মুসলিম, মিশকাত হা/৫১৮।  
 ৪৬. মুসলিম, নাসাঈ, তিরমিযী, মিশকাত হা/৫১৭, ৫২০।  
 ৪৭. মুত্তাফাকু আলাইহ, আহমাদ, আবুদাউদ, মিশকাত হা/৪০০, ৪০১; ফাৎহুল বারী ১/২৩৫ পৃঃ।  
 ৪৮. আহমাদ, আবুদাউদ, নায়লুল আওত্বার ১/২৪৫-৪৭ পৃঃ।  
 ৪৯. দারেমী, আহমাদ, মিশকাত হা/৪২৫-২৬।  
 ৫০. মুসলিম, নায়লুল আওত্বার ১/৩১৮; আবুদাউদ হা/১৭১।

কোন শব্দ, গন্ধ বা চিহ্ন না পান এবং নিজের ওয়ূর ব্যাপারে নিশ্চিত থাকেন, তাহলে পুনরায় ওয়ূর প্রয়োজন নেই। 'ইস্তেহাযা' ব্যতীত কম হৌক বা বেশী হৌক অন্য কোন রক্ত প্রবাহের কারণে ওয়ূ ভঙ্গ হওয়ার কোন ছহীহ দলীল নেই।<sup>৫১</sup>

### (খ) গোসলের বিবরণ (صفة الغسل)

সংজ্ঞাঃ 'গোসল' (الغسل) অর্থ ধৌত করা। শারঈ পরিভাষায় গোসল অর্থঃ পবিত্রতা অর্জনের নিয়তে ওয়ূ করে সর্বাঙ্গ ধৌত। গোসল দু'প্রকারঃ ফরয ও মুস্তাহাব।

(১) ফরযঃ ঐ গোসলকে বলা হয়, যা করা অপরিহার্য। বালেগ বয়সে নাপাক হলে গোসল ফরয হয়। যেমন- আল্লাহ বলেন, وَإِنْ كُنْتُمْ جُنُبًا فَاطَّهَّرُوا 'যদি তোমরা নাপাক হয়ে থাক, তবে গোসল কর'।<sup>৫২</sup>

(২) মুস্তাহাবঃ ঐ গোসলকে বলা হয়, যা অপরিহার্য নয়। কিন্তু করলে নেকী আছে। যেমন- জুম'আর দিনে বা দুই ঈদের দিনে গোসল করা।

গোসলের পদ্ধতিঃ ফরয গোসলের জন্য প্রথমে দু'হাতের কজি পর্যন্ত ধুবে ও পরে নাপাকী ছাফ করবে। অতঃপর 'বিস্মিল্লাহ' বলে ছালাতের ওয়ূর ন্যায় ওয়ূ করবে। অতঃপর প্রথমে মাথায় তিনবার পানি ঢেলে চুলের গোড়ায় খিলাল করে ভালভাবে পানি পৌছাবে। তারপর সারা দেহে পানি ঢালবে ও গোসল সম্পন্ন করবে।<sup>৫৩</sup>

জ্ঞাতব্যঃ গোসলের সময় মেয়েদের মাথার খোপা খোলার দরকার নেই। কেবল চুলের গোড়ায় তিনবার তিন চুল্লু পানি পৌছাতে হবে। অতঃপর সারা দেহে পানি ঢালবে।<sup>৫৪</sup>

(২) রাসূল (ছাঃ) এক মুদ (৬২৫ গ্রাম) পানি দিয়ে ওয়ূ এবং অনধিক পাঁচ মুদ (৩১২৫ গ্রাম) বা প্রায় সোয়া তিন কেজি পানি দিয়ে গোসল করতেন।<sup>৫৫</sup> অতএব প্রয়োজনের অতিরিক্ত পানি অপচয় করা ঠিক নয়।

(৩) নারী হৌক পুরুষ হৌক সকলকে রাসূলুল্লাহ (ছাঃ) পর্দার মধ্যে গোসল করতে নির্দেশ দিয়েছেন।<sup>৫৬</sup>

(৪) ওয়ূ সহ গোসল করার পরে ওয়ূ ভঙ্গ না হলে পুনরায় ওয়ূর প্রয়োজন নেই।<sup>৫৭</sup>

৫১. আলবানী, হাশিয়া, মিশকাত হা/৩৩৩ দারাকুৎনী বর্ণিত 'প্রত্যেক প্রবাহিত রক্তের জন্য ওয়ূ'

(الوضوء من كل دم سائل) এই হাদীছের টীকা দ্রষ্টব্য; 'কিসের দ্বারা ওয়ূ ওয়াজিব হয়' অনুচ্ছেদ।

৫২. মায়দাহ ৬।

৫৩. মুত্তাফাকু আলাইহ, মুসলিম, মিশকাত হা/৪৩৫।

৫৪. মুসলিম, মিশকাত হা/৪৩৮।

৫৫. মুত্তাফাকু আলাইহ, ইরওয়াউল গালীল হা/১৩৯; চার মুদে এক ছা' হয়। =ইরওয়া, উক্ত হাদীছের টীকা ১/১৭০ পৃঃ; ছহীহ আবুদাউদ হা/৮৭।

৫৬. আবুদাউদ, নাসাঈ, মিশকাত হা/৪৪৭।

৫৭. আবুদাউদ, তিরমিযী, নাসাঈ, মিশকাত হা/৪৪৫।

### মুস্তাহাব গোসল সমূহ :

- (১) জুম'আর ছালাতের পূর্বে গোসল করা।<sup>৫৮</sup>
- (২) মোর্দা গোসল দান কারীর জন্য গোসল করা।<sup>৫৯</sup>
- (৩) ইসলাম গ্রহণের সময় গোসল করা।<sup>৬০</sup>
- (৪) হজ্জ বা ওমরাহর জন্য ইহরাম বাঁধার পূর্বে গোসল করা।<sup>৬১</sup>
- (৫) আরাফার দিন গোসল করা।<sup>৬২</sup>
- (৬) দুই ঈদের দিন সকালে গোসল করা।<sup>৬৩</sup>

### (গ) তায়াম্মুমের বিবরণ (صفة التيمم):

সংজ্ঞাঃ তায়াম্মুম (التَّيْمُمُ) অর্থ 'সংকল্প করা'। পারিভাষিক অর্থেঃ 'পানি না পাওয়া গেলে ওয়ূ বা গোসলের পরিবর্তে পাক মাটি দ্বারা পবিত্রতা অর্জনের ইসলামী পদ্ধতিকে 'তায়াম্মুম' বলে'। আল্লাহ বলেন,

وَإِنْ كُنْتُمْ مَرْضَىٰ أَوْ عَلَىٰ سَفَرٍ أَوْ جَاءَ أَحَدُكُمْ مِنَ الْغَائِطِ أَوْ لَمَسْتُمُ النِّسَاءَ فَلَمْ تَجِدُوا مَاءً فَتَيَمَّمُوا صَعِيدًا طَيِّبًا فَامْسَحُوا بِوُجُوهِكُمْ وَأَيْدِيكُمْ مِنْهُ ...

'যদি তোমরা পীড়িত হও কিংবা সফরে থাক অথবা পায়খানা থেকে আস কিংবা স্ত্রী স্পর্শ করে থাক, অতঃপর পানি না পাও, তাহ'লে তোমরা পবিত্র মাটি দ্বারা 'তায়াম্মুম' কর ও তা দ্বারা তোমাদের মুখমণ্ডল ও হস্তদ্বয় মাসাহ কর'... (মায়েদাহ ৬)।

### পদ্ধতিঃ

পবিত্রতা অর্জনের নিয়তে 'বিস্মিল্লাহ' বলে পবিত্র মাটির উপরে দু'হাত মেঝে তাতে ফুঁক দিয়ে মুখমণ্ডল ও দু'হাতের কজ্জি পর্যন্ত একবার বুলাতে হবে।<sup>৬৪</sup>

### তায়াম্মুমের কারণ সমূহঃ

(১) যদি পাক পানি না পাওয়া যায় (২) পানি পেতে গেলে যদি ছালাত ক্বায়া হওয়ার ভয় থাকে (৩) পানি ব্যবহারে যদি রোগ বৃদ্ধির আশংকা থাকে (৪) যদি কোন বিপদ বা জীবনের ঝুঁকি থাকে ইত্যাদি।

৫৮. মুত্তাফাকু আলাইহ, মিশকাত হা/৫৩৭-৩৯।

৫৯. ইবনু মাজাহ, তিরমিযী, আবুদাউদ, মিশকাত হা/৫৪১ 'মাসনুন গোসল' অধ্যায়।

৬০. তিরমিযী, আবুদাউদ, নাসাঈ, মিশকাত হা/৫৪৩।

৬১. দারাকুৎনী, হাকেম, ইরওয়াউল গালীল হা/১৪৯, ১/১৭৯ পৃঃ।

৬২, ৬৩. বায়হাকী, ইরওয়া হা/১৪৬, ও 'ফায়েদা' দ্রষ্টব্য; নায়ল ১/৩৫৭ পৃঃ।

৬৪. মুত্তাফাকু আলাইহ, মিশকাত হা/১; তিরমিযী, ইবনু মাজাহ প্রভৃতি মিশকাত হা/৪০২; হযীহ আবুদাউদ হা/৯২, ৯৩; মুত্তাফাকু আলাইহ, মিশকাত হা/৫২৮ 'তায়াম্মুম' অধ্যায়।

উপরোক্ত কারণ সমূহের প্রেক্ষিতে ওয়ূ বা ফরয গোসলের পরিবর্তে প্রয়োজনে দীর্ঘদিন যাবত একটানা 'তায়াম্মুম' করা যাবে।<sup>৬৫</sup>

রাসূলুল্লাহ (ছাঃ) এরশাদ করেন,

إِنَّ الصَّعِيدَ الطَّيِّبَ وَضَوْءَ الْمَسْلَمِ وَإِنْ لَمْ يَجِدِ الْمَاءَ عَشْرَ سِنِينَ...-

'নিশ্চয়ই পবিত্র মাটি মুসলমানদের জন্য ওয়ূ স্বরূপ। যদিও ১০ বছর পর্যন্ত পানি না পাওয়া যায় ...'।<sup>৬৬</sup>

**পবিত্র মাটিঃ**

আরবী পরিভাষায় 'মাটি' বলতে ভূ-পৃষ্ঠকে বুঝায়।<sup>৬৭</sup> আরব দেশের মাটি অধিকাংশ পাথুরে ও বালুকাময়। বিভিন্ন সফরে আল্লাহর নবী (ছাঃ) ও ছাহাবীগণ বালুকাময় মরুভূমির মধ্য দিয়ে বহু দূরের রাস্তা অতিক্রম করতেন। বিশেষ করে তাবুক যুদ্ধের সফরে তাঁরা মরুভূমির মধ্যে দারুন পানির কষ্টে পড়েছিলেন। কিন্তু 'তায়াম্মুমের' জন্য দূর থেকে মাটি বহন করে নিয়ে গিয়েছিলেন বলে জানা যায় না। অতএব ভূ-পৃষ্ঠের মাটি, বালি বা পাথুরে মাটি ইত্যাদি দিয়ে 'তায়াম্মুম' করা যাবে। তবে ধূলা-মাটিহীন স্বচ্ছ পাথর, কাঠ, কয়লা, লোহা, মোজাইক, প্লাষ্টার, চুন ইত্যাদি দ্বারা 'তায়াম্মুম' জায়েয নয়।<sup>৬৮</sup>

**জ্ঞাতব্যঃ**

- (১) 'তায়াম্মুম' করে ছালাত আদায়ের পরে ওয়াক্তের মধ্যে পানি পাওয়া গেলে পুনরায় ঐ ছালাত আদায় করতে হবে না।<sup>৬৯</sup>
- (২) ওয়ূর মাধ্যমে যে সব কাজ করা যায়, তায়াম্মুমের দ্বারা সে সব কাজ করা যায়। অমনি ভাবে যেসব কারণে ওয়ূ ভঙ্গ হয়, সে সব কারণে 'তায়াম্মুম' ভঙ্গ হয়।
- (৩) যদি মাটি বা পানি কিছুই না পাওয়া যায়, তাহলে বিনা ওয়ূতেই ছালাত আদায় করতে হবে।<sup>৭০</sup>

**পেশাব-পায়খানার আদবঃ**

- (১) পায়খানায় প্রবেশকালে বলবে, আল্লা-হুমা ইন্নী আ'উযুবিকা মিনাল খুব্ছে ওয়াল খাবা-ইছি (হে আল্লাহ! আমি পুরুষ ও মহিলা জিন হ'তে আপনার আশ্রয় প্রার্থনা করছি) এবং বের হওয়ার সময় বলবে 'গুফরা-নাকা' ('হে আল্লাহ! আপনার ক্ষমা কামনা করছি')।

৬৫. মায়েদাহ ৬; মুত্তাফাকু আলাইহ, মিশকাত হা/৫২৭; বুখারী ১/৪৯ পৃঃ; আহমাদ, তিরমিযী ইত্যাদি মিশকাত হা/৫৩০।

৬৬. আহমাদ, তিরমিযী, আবুদাউদ, নাসাঈ, মিশকাত হা/৫৩০ 'তায়াম্মুম' অনুচ্ছেদ।

৬৭. যেমন বলা হয়েছে, الصَّعِيدَ وَجْهَ الْأَرْضِ تَرَابًا كَانَ أَوْ غَيْرَهُ. 'মাটি হ'ল ভূ-পৃষ্ঠ। চাই তা নিরেট মাটি হোক বা অন্য কিছু হোক' (আল-মিহ্বাবুল মুনীর)।

৬৮. আলোচনা দ্রষ্টব্যঃ ছাদেক শিয়ালকোটী, ছালাতুর রাসূল টীকা, পৃঃ ১৪৮-৪৯।

৬৯. আবু দাউদ, নাসাঈ, দারেমী, মিশকাত হা/৫৩৩।

৭০. বুখারী ১/৪৮ পৃঃ; মুত্তাফাকু আলাইহ ও অন্যান্য; নায়লুল আওত্বার ১/৪০০ পৃঃ 'পানি ও মাটি ব্যতীত ছালাত' অনুচ্ছেদ।



(২) খোলাস্থানে কিবলার দিকে মুখ করে বা পিঠ ফিরে পেশাব-পায়খানা করা নিষেধ। তবে কিবলার দিকে আড়াল থাকলে বা টয়লেটের মধ্যে হ'লে জায়েয আছে। (৩) অনিবার্য কারণ ব্যতীত দাঁড়িয়ে পায়খানা-পেশাব করা নিষেধ। (৪) পেশাব-পায়খানা হ'তে ভালভাবে পবিত্রতা হাছিল করা যরুরী। এজন্য পানি, ঢেলা, টিস্যু পেপার ইত্যাদি তিনবার ব্যবহার করবে। শুকনা গোবর ও হাড় ব্যবহার করা যাবে না। (৫) পেশাবে সন্দেহ দূর করার জন্য কাপড়ের উপর থেকে লজ্জাস্থান বরাবর সামান্য পানি ছিটিয়ে দেওয়ার কথা হাদীছে বর্ণিত হয়েছে। = (দ্রষ্টব্যঃ মিশকাত 'পেশাব-পায়খানার আদব' অধ্যায়)। এর বেশী কিছু করা বাড়াবাড়ি। যা বিদ'আতের পর্যায়ভুক্ত। অনুরূপভাবে ভালভাবে এস্তেঞ্জার নামে কাপড়ের টুকরা দিয়ে টয়লেটের নালা বন্ধ করা, সন্দেহ দূর করার নামে কুলুখ ধরে ৪০ কদম হাঁটা ও বিভিন্ন ভঙ্গিতে কসরৎ করা য়েমন ভিত্তিহীন, তেমনি চরম বেহায়াপনার শামিল। যা অবশ্যই পরিত্যাজ্য।

## আযান (باب الأذان)

সংজ্ঞাঃ 'আযান' অর্থ ঘোষণা ধ্বনি (الإعلام)। শারঈ পরিভাষায় শরীয়ত নির্ধারিত আরবী বাক্য সমূহের মাধ্যমে নির্ধারিত সময়ে উচ্চকণ্ঠে মুমিনকে ছালাতে আহ্বান করার নাম 'আযান'। ১ম হিজরী সনে আযানের প্রচলন হয়।

ঘটনাঃ হযরত ওমর ফারুক (রাঃ) সহ একদল ছাহাবী একই রাতে আযানের একই স্বপ্ন দেখেন ও পরদিন সকালে 'অহি' দ্বারা প্রত্যাদিষ্ট হ'লে রাসূলুল্লাহ (ছাঃ) তা সত্যায়ন করেন এবং বেলাল (রাঃ) -কে সেই মর্মে 'আযান' দিতে বলেন।<sup>১</sup>

ছাহাবী আবদুল্লাহ বিন যায়েদ (রাঃ) সর্বপ্রথম পূর্বরাতে স্বপ্নে দেখা আযানের কালেমা সমূহ সকালে এসে রাসূলুল্লাহ (ছাঃ)-এর নিকটে বর্ণনা করেন। পরে বেলালের কণ্ঠে একই আযান ধ্বনি শুনে হযরত ওমর ফারুক (রাঃ) বাড়ী থেকে চাদর ঘেষতে ঘেষতে ছুটে এসে বলেন, 'যিনি আপনাকে 'হক' সহকারে প্রেরণ করেছেন, তাঁর কুসম করে বলছি আমিও অনুরূপ স্বপ্ন দেখেছি'। একথা শুনে রাসূলুল্লাহ (ছাঃ) 'ফালিল্লাহিল হামদ' বলে আল্লাহর প্রশংসা করলেন।<sup>২</sup> একটি বর্ণনা মতে এরাতে ১১ জন ছাহাবী একই আযানের স্বপ্ন দেখেন।<sup>৩</sup> উল্লেখ্য যে, ওমর ফারুক (রাঃ) ২০ দিন পূর্বে উক্ত স্বপ্ন দেখেছিলেন। কিন্তু ভয়ে প্রকাশ করেননি।<sup>৪</sup>

## আযানের ফযীলত (فضائل الأذان):

(১) আবু সাঈদ খুদরী (রাঃ) হ'তে বর্ণিত রাসূলুল্লাহ (ছাঃ) এরশাদ করেন,

لَا يَسْمَعُ مَدَى صَوْتِ الْمُؤَذِّنِ جِنَّ وَلَا إِنْسٌ وَلَا شَيْءٌ إِلَّا شَهِدَ لَهُ يَوْمَ الْقِيَامَةِ رَوَاهُ الْبُخَارِيُّ -

১. আবুদাউদ, (আওনুল মা'বুদ সহ) হা/৪৯৫, ১/১৬৫-৭৫; মিশকাত হা/৬৫০।

২. আবুদাউদ (আওনুল মা'বুদ সহ) হা/৪৯৫।

৩. মিরক্বাত শরহে মিশকাত 'আযান' অধ্যায় ২/১৪৯ পৃঃ।

৪. আবুদাউদ (আওনুল মা'বুদ সহ) হা/৪৯৪।

‘মুওয়াযযিনের আযানের ধ্বনি জিন ও ইনসান সহ যত প্রাণী শুনবে, কিয়ামতের দিন সকলে তার জন্য সাক্ষ্য প্রদান করবে’।<sup>৫</sup>

(২) রাসূলুল্লাহ (ছাঃ) এরশাদ করেন যে, ‘কিয়ামতের দিন মুওয়াযযিনের গর্দান সবচেয়ে উঁচু হবে’।<sup>৬</sup>

(৩) মুওয়াযযিনের আযান ধ্বনির শেষ সীমা পর্যন্তকার সজীব ও নির্জীব সকল বস্তু তার জন্য ক্ষমা প্রার্থনা করে ও সাক্ষ্য প্রদান করে। ঐ আযান শুনে যে ব্যক্তি ছালাতে যোগ, সে ২৫গুণ ছালাতের সমপরিমান নেকী পাবে। মুওয়াযযিনও উক্ত মুছল্লীর সমপরিমান নেকী পাবে এবং তার দুই আযানের মধ্যবর্তী সকল (ছগীরা) গোনাহ মার্ফ করা হবে’।<sup>৭</sup>

(৪) ‘আযান ও এক্বামতের ধ্বনি শুনলে শয়তান ছুটে পালিয়ে যায় ও পরে ফিরে আসে’।<sup>৮</sup>

(৫) যে ব্যক্তি বার বছর যাবৎ আযান দিল, তার জন্য জান্নাত ওয়াজিব হয়ে গেল। তার প্রতি আযানের জন্য ৬০ নেকী ও এক্বামতের জন্য ৩০ নেকী লেখা হয়’।<sup>৯</sup>

(৬) ইমাম হ’লেন (মুছল্লীদের ছালাতের) যামিন ও মুওয়াযযিন হ’লেন (তাদের ছালাতের) আমানতদার। অতঃপর রাসূলুল্লাহ (ছাঃ) তাদের জন্য দো‘আ করে বলেন, হে আল্লাহ! আপনি ইমামদের সুপথ প্রদর্শন করুন ও মুওয়াযযিনদের ক্ষমা করুন।<sup>১০</sup>

আযানের কালেমা সমূহঃ উহা ১৫ টি :-

১. আল্লা-হু আকবর (অর্থঃ আল্লাহ সবার চেয়ে বড়)      اللَّهُ أَكْبَرُ      ৪ বার
২. আশহাদু আন্ লা-ইলা-হা ইল্লাল্লা-হ      أَشْهَدُ أَنْ لَا إِلَهَ إِلَّا اللَّهُ      ২ বার  
(অর্থঃ আমি সাক্ষ্য দিচ্ছি যে, আল্লাহ ব্যতীত কোন উপাস্য নেই)
৩. আশহাদু আন্না মুহাম্মাদার রাসূলুল্লাহ      أَشْهَدُ أَنْ مُحَمَّدًا رَسُولُ اللَّهِ      ..  
(অর্থঃ আমি সাক্ষ্য দিচ্ছি যে, মুহাম্মাদ আল্লাহর রাসূল)
৪. হাইয়া ‘আলাছ্ ছালা-হ (ছালাতের জন্য এসো)      حَيَّ عَلَى الصَّلَاةِ      ..
৫. হাইয়া ‘আলাল ফালা-হ (কল্যাণের জন্য এসো)      حَيَّ عَلَى الْفَلَاحِ      ..
৬. আল্লা-হু আকবর (আল্লাহ সবার চেয়ে বড়)      اللَّهُ أَكْبَرُ      ..

৫. বুখারী, মিশকাত হা/৬৫৬।

৬. মুসলিম, মিশকাত হা/৬৫৪।

৭. নাসাঈ, আহমাদ মিশকাত হা/৬৬৭।

৮. বুখারী, মুসলিম, মিশকাত হা/৬৫৫।

৯. ইবনু মাজাহ, মিশকাত হা/৬৭৮।

১০. আহমাদ, আবুদাউদ, তিরমিযী, মিশকাত হা/৬৬৩।

৭. লা-ইলা-হা ইল্লাল্লা-হ (আল্লাহ ব্যতীত কোন উপাস্য নেই)  $\text{لَا إِلَهَ إِلَّا اللَّهُ}$  ১ বার  
মোট = ১৫ বার

ফজরের আযানের সময় 'হাইয়া 'আলাল ফালা-হ'-এর পরে 'আহ ছালা-তু খায়রুম মিনান নাউম' (নিদ্রা হ'তে ছালাত উত্তম) ২ বার বলতে হবে।<sup>১১</sup>

(খ) 'এক্বামত' অর্থ দাঁড় করানো। উপস্থিত মুছল্লীদেরকে ছালাতে দাঁড়িয়ে যাওয়ার হুশিয়ারবাণী শুনানোর জন্য 'এক্বামত' দিতে হয়। জামা'আতে হউক বা একাকী হউক সকল অবস্থায় ফরয ছালাতে আযান ও এক্বামত দেওয়া সূনাত।<sup>১২</sup>

হযরত আবদুল্লাহ বিন যায়েদ (রাঃ) বর্ণিত পূর্বোক্ত হাদীছ অনুযায়ী এক্বামতের কালেমা ১১টি। যথাঃ- ১. আল্লা-হু আকবর (২ বার) ২. আশহাদু আন লা-ইলা-হা ইল্লাল্লা-হ, ৩. আশহাদু আন্বা মুহাম্মাদার রাসূলুল্লা-হ, ৪. হাইয়া 'আলাহু ছালা-হ, ৫. হাইয়া 'আলাল ফালা-হ, ৬. ক্বাদ ক্বা-মাতিছ ছালা-হ (২ বার), ৭. আল্লা-হু আকবর (২ বার), ৮. লা-ইলা-হা ইল্লাল্লা-হ = সর্বমোট ১১।<sup>১৩</sup>

গলার আওয়ায জোরালো থাকায় রাসূলুল্লাহ (ছাঃ) বেলাল (রাঃ)-কে 'আযান' দিতে বলেন এবং প্রথম স্বপ্ন বর্ণনাকারী আবদুল্লাহ বিন যায়েদ (রাঃ) -কে 'এক্বামত' দিতে বলেন। এইভাবে ইসলামের ইতিহাসে দু'বার করে আযান ও একবার করে এক্বামত -এর প্রচলন হয়। ৮ম হিজরী সনে মক্কা বিজয়ের পর মদীনা ফিরে এসে রাসূলুল্লাহ (ছাঃ) বেলালকে মসজিদে নববীতে স্থায়ী ভাবে মুওয়াযযিন নিযুক্ত করেন। ১১ হিজরী সনে রাসূলুল্লাহ (ছাঃ) -এর মৃত্যুর পরে হযরত বেলাল (রাঃ) সিরিয়ায় হিজরত করেন এবং নিজ শিষ্য সা'দ আল-কারযকে মদীনায় উক্ত দায়িত্বে রেখে যান। হযরত আবদুল্লাহ বিন ওমর (রাঃ) বলেন,

كَانَ الْأَذَانُ عَلَى عَهْدِ رَسُولِ اللَّهِ صَلَّى اللَّهُ عَلَيْهِ وَسَلَّمَ مَرَّتَيْنِ مَرَّتَيْنِ  
وَالْبِقَامَةُ مَرَّةً غَيْرَ أَنَّهُ كَانَ يَقُولُ قَدْ قَامَتِ الصَّلَاةُ قَدْ قَامَتِ الصَّلَاةُ ،

'রাসূলুল্লাহ (ছাঃ) -এর যামানায় আযান দু'বার ও এক্বামত একবার করে দেওয়ার রেওয়াজ ছিল, 'ক্বাদ ক্বা-মাতিছ ছালা-হ' দু'বার ব্যতীত।<sup>১৪</sup> প্রকাশ থাকে যে, এখানে দু'বার আল্লা-হু আকবর-কে একটি জোড় হিসাবে 'একবার' (মার্বাতান) গণ্য করা হয়েছে। তাছাড়া আল্লাহ শব্দের হামযাহ 'ওয়াছুলী' হওয়ার কারণে প্রথম 'আল্লা-হু আকবর'-এর সাথে পরের 'আল্লা-হু আকবর' মিলিয়ে পড়া যাবে।

ইমাম খাত্তাবী বলেন, মক্কা-মদীনা সহ সমগ্র হিজায, সিরিয়া, ইয়ামন, মিসর, মরক্কো এবং ইসলামী বিশ্বের প্রত্যন্ত অঞ্চলে একবার করে এক্বামত দেওয়ার নিয়ম চালু আছে এবং এটাই প্রায় সমস্ত ওলামায়ে ইসলামের মাযহাব। ইমাম বাগাভী বলেন, এটাই

১১. আবুদাউদ (আওনুল মা'বুদ সহ), আবু মাহযুরাহ হ'তে, হা/৪৯৬; মিশকাত হা/৬৪৫।

১২. নাসাঈ হা/৬৬৭, ৬৬৮।

১৩. আবুদাউদ (আওনুল মা'বুদ সহ) হা/৪৯৫।

১৪. আবুদাউদ, নাসাঈ, দারেমী, মিশকাত হা/৬৪৩।

অধিকাংশ বিদ্বানের মায়হাব।<sup>১৫</sup> দু'বার এক্লামত-এর রাবী হযরত আবু মাহযূরাহ (রাঃ) নিজে ও তাঁর পুত্র হযরত বেলাল (রাঃ)-এর অনুসরণে একবার করে 'এক্লামত' দিতেন।<sup>১৬</sup>

### তারজী' আযানঃ

আযানের মধ্যে দুই শাহাদাত কলেমাকে প্রথমে দু'বার করে মোট চারবার নিম্নস্বরে অতঃপর দু'বার করে মোট চারবার উচ্চঃস্বরে বলাকে 'তারজী' বা পুনরুক্তির আযান বলা হয়। 'তারজী' আযানের কালেমা সংখ্যা হবে মোট  $১৫+৪=১৯$ টি। তারজী' আযানের হাদীছটি হযরত আবু মাহযূরাহ (রাঃ) কর্তৃক আবুদাউদ শরীফে বর্ণিত হয়েছে।<sup>১৭</sup> ছহীহ মুসলিমে একই মর্মে একই রাবী হ'তে বর্ণিত অপর একটি রেওয়াজাতে আযানে প্রথম তাকবীরের সংখ্যা চার-এর স্থলে দুই বলা হয়েছে।<sup>১৮</sup> তখন কলেমার সংখ্যা দাঁড়াবে তারজীসহ ১৭টি। আবু মাহযূরাহ বর্ণিত সুনানের হাদীছে এক্লামতের কালেমা 'ক্বাদ ক্বা-মাতিছ ছালা-হ' সহ মোট ১৭টি বর্ণিত হয়েছে। এটি মূলতঃ তা'লীমের জন্য ছিল।<sup>১৯</sup>

এক্ষণে ছহীহ হাদীছ মতে আযানের পদ্ধতি দাঁড়ালো মোট তিনটি ও এক্লামতের পদ্ধতি দু'টি। প্রথমতঃ আবদুল্লাহ বিন যায়েদ (রাঃ) বর্ণিত বেলালী আযান ও এক্লামত যথাক্রমে ১৫টি ও ১১টি বাক্য সম্বলিত, যা রাসূলুল্লাহ (ছাঃ)-এর যুগে মক্কা-মদীনা সহ সর্বত্র চালু ছিল। দ্বিতীয়তঃ আবু মাহযূরাহ (রাঃ) বর্ণিত 'তারজী' আযানের ১৯টি ও ১৭টি এবং এক্লামতের ১৭টি। সবগুলিই জায়েয। তবে দু'বার করে আযান ও একবার করে এক্লামত বিশিষ্ট বেলালী আযান ও এক্লামত-এর পদ্ধতিটি নিঃসন্দেহে অগ্রগণ্য, যা মুসলিম উম্মাহ কর্তৃক গৃহীত।

### সাহারীর আযানঃ

সাহারীর আযান দেওয়া সুনাত। রাসূলুল্লাহ (ছাঃ) -এর যামানায় তাহাজ্জুদ ও সাহারীর আযান বেলাল (রাঃ) দিতেন এবং ফজরের আযান অন্ধ ছাহাবী আব্দুল্লাহ ইবনে উম্মে মাকতূম (রাঃ) দিতেন। তাই সাহারী প্রসঙ্গে রাসূলুল্লাহ (ছাঃ) বলেন, 'বেলাল রাত্রি থাকতে আযান দিলে তোমরা (সাহারীর জন্য) খানাপিনা কর, যতক্ষণ না ইবনে উম্মে মাকতূম আযান দেয়। কেননা সে ফজর না হওয়া পর্যন্ত আযান দেয় না।<sup>২০</sup> তিনি আরও বলেন, বেলালের আযান যেন তোমাদেরকে সাহারী খাওয়া থেকে বিরত না করে। কেননা সে রাত্রি থাকতে আযান দেয় এজন্য যে, যেন তোমাদের তাহাজ্জুদ গোয়ার মুছলীগণ (সাহারীর জন্য) ফিরে আসে ও তোমাদের ঘুমন্ত ব্যক্তিগণ (সাহারীর জন্য) জেগে ওঠে'।<sup>২১</sup>

১৫. নায়লুল আওত্বার 'ছিফাতুল আযান' অধ্যায়, ২/১০৬।

১৬. আওনুল মা'বুদ, 'কায়ফাল আযান' অধ্যায়ের ১ম হাদীছটির (নং ৪৯৫) ভাষ্য দ্রষ্টব্য।

১৭. আবুদাউদ (আওনুল মা'বুদ সহ) হা/৪৯৬; মিশকাত হা/৬৪৫।

১৮. মুসলিম হা/৩৭৯।

১৯. আহমাদ, তিরমিযী, আবুদাউদ, প্রভৃতি, মিশকাত হা/৬৪৪।

২০. মুত্তাফাকু আলাইহ, মিশকাত হা/ ৬৮০-৮১; নায়ল ২/১২০।

২১. কুতুবে সিত্তাহর সকল গ্রন্থ তিরমিযী ব্যতীত, নায়ল ২/১১৭।

সুরুজী প্রমুখ কিছু সংখ্যক হানাফী বিদ্বান রাসূলের (ছাঃ) যামানার উক্ত আযানকে সাহারীর জন্য লোকজনকে আহ্বান ও সরবে যিক্র বলে দাবী করেছেন। ছহীহ বুখারীর সর্বশেষ ভাষ্যকার হাফেয ইবনু হাজার আসক্বালানী বলেন, এই দাবী 'মারদুদ' বা প্রত্যাখ্যাত। কেননা লোকেরা ঘুম জাগানোর নামে আজকাল যা করে, তা সম্পূর্ণরূপে 'বিদ'আত' বা ধর্মের নামে নতুন সৃষ্টি। উক্ত আযান -এর অর্থ সকলেই 'আযান' বুঝেছেন। যদি ওটা আযান না হ'য়ে অন্যকিছু হ'ত, তাহ'লে লোকদের ধোকায় পড়ার প্রশ্নই উঠতো না। আর রাসূল (ছাঃ)-কেও সাবধান করার দরকার পড়তো না।<sup>২২</sup>

### আযানের জওয়াবঃ

রাসূলুল্লাহ (ছাঃ) বলেন, إِذَا سَمِعْتُمُ الْمُؤَذِّنَ فَقُولُوا مِثْلَ مَا يَقُولُ، 'যখন তোমরা আযান শুনবে, তখন মুওয়াযযিন যা বলে তদ্রূপ বল'...<sup>২৩</sup> অন্যত্র তিনি এরশাদ করেন, 'যে ব্যক্তি মুওয়াযযিনের পিছে পিছে আযানের বাক্যগুলি অন্তর থেকে পাঠ করে এবং 'হইয়া 'আলাছ ছালা-হ' ও 'ফালা-হ' শেষে লা-হাওলা অলা-ক্বুওয়াতা ইল্লা বিল্লা-হ' (নেই কোন ক্ষমতা, নেই কোন শক্তি আল্লাহ ব্যতীত) বলে, সে ব্যক্তি জান্নাতে প্রবেশ করবে।<sup>২৪</sup> ফজরের আযানে 'আছ-ছালা-তু খায়রুম মিনান নাউম'-এর জওয়াবে 'ছাদাক্বতা ওয়া বারারতা' বলার কোন ভিত্তি নেই। অমনিভাবে এক্বামত-এর সময় 'ক্বাদ ক্বা-মাতিছ ছালা-হ'-এর জওয়াবে 'আক্বা-মাহাল্লা-হু ওয়া আদা-মাহা' বলা সম্পর্কে আবুদাউদে বর্ণিত হাদীছটি 'যঈফ'।<sup>২৫</sup> অমনিভাবে 'আশহাদু আন্না মুহাম্মাদুর রাসূলুল্লাহ'-এর জওয়াবে স্বেফ 'ছাল্লাল্লা-হু আলাইহে ওয়া সাল্লাম' বলার কোন দলীল নেই। অতএব আযান ও এক্বামতে 'হইয়া 'আলাছ ছালা-হ' ও 'ফালা-হ' বাদে বাকী বাক্যগুলির জওয়াব মুওয়াযযিন যেমন বলবে, তেমনভাবেই দিতে হবে।

### আযানের দো'আঃ

আযানের জওয়াব দান শেষে প্রথমে দরুদ পড়তে হবে।<sup>২৬</sup>

#### (ক) দরুদঃ

اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ إِنَّكَ حَمِيدٌ مُّجِيدٌ، اللَّهُمَّ بَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ إِنَّكَ حَمِيدٌ مُّجِيدٌ-

২২. ফাৎহুল বারী শরহে বুখারী 'ফজরের পূর্বে আযান' অধ্যায় ২/১২৩-২৪।

২৩. মুসলিম, মিশকাত হা/৬৫৭ 'আযানের ফযীলত ও আযানের জওয়াব দান' অধ্যায়।

২৪. মুসলিম, মিশকাত হা/৬৫৮।

২৫. আলবানী, ইরওয়াউল গালীল ১/২৫৮-৫৯; মিশকাত হা/৬৭০।

২৬. মুসলিম, মিশকাত হা/৬৫৭।



মাক্কা-মাম মাহমূদানিল্লাযী ওয়া'আদতাহ'।<sup>৩০</sup> অন্য দো'আও রয়েছে।<sup>৩১</sup>

(খ) হে আল্লাহ! (তওহীদের) এই পরিপূর্ণ আহবান ও প্রতিষ্ঠিত ছালাতের তুমি প্রভু। মুহাম্মাদ (ছাঃ)-কে তুমি দান কর 'অসীলা' (নামক জান্নাতের বিশেষ সম্মানিত স্থান) ও মর্যাদা এবং পৌছে দাও তাঁকে (জান্নাতের) প্রশংসিত স্থান 'মাক্কামে মাহমূদে' -যার ওয়াদা তুমি করেছ।'

আযানের জওয়াবে বাড়তি বিষয় সমূহঃ আযানের জওয়াবে কয়েকটি বিষয় বাড়তিভাবে চালু হয়েছে, যা থেকে বিরত থাকা উচিত। কারণ রাসূলুল্লাহ (ছাঃ) কঠোরভাবে হুঁশিয়ারি উচ্চারণ করে বলেছেন, 'যে ব্যক্তি ইচ্ছাকৃতভাবে আমার নামে মিথ্যারোপ করল, সে জাহান্নামে তার ঠিকানা করে নিল'।<sup>৩২</sup> অন্য রেওয়াযাতে বলা হয়েছে, যে ব্যক্তি আমার নামে এমন হাদীছ বর্ণনা করল, যা সে মিথ্যা মনে করে, সে অন্যতম মিথ্যাবাদী।<sup>৩৩</sup> ছাহাবী বারা বিন আযেব (রাঃ) রাতে শয়নকালে রাসূল (ছাঃ)-এর শিখানো একটি দো'আয় 'আ-মানতু বে নাবিইয়েকাল্লাযী আরসালতা'-এর স্থলে 'বে রাসূলেকা' বলেছিলেন। তাতেই রাসূল (ছাঃ) রেগে ওঠেন ও 'বে নাবিইয়েকা' বলার তাকীদ করেন।<sup>৩৪</sup> অথচ সেখানে অর্থের কোন তারতম্য ছিল না।

প্রকাশ থাকে যে, আযান একটি ইবাদত। এতে কোনরূপ কমবেশী করা জায়েয নয়। তবুও বিভিন্ন সময়ে বিভিন্ন শব্দ ও বাক্য যোগ হয়েছে। আযানের জওয়াবে প্রচলিত বাড়তি বিষয়গুলো অবশ্যই পরিত্যাজ্য, যা নিম্নরূপঃ

(১) বায়হাক্বী শরীফে (১ম খণ্ড ৪১০ পৃঃ) বর্ণিত আযানের দো'আর শুরুতে 'আল্লা-হুম্মা ইন্নী আস-আলুকা বে হাক্কে হা-যিহিদ দাওয়াতে' (২) একই হাদীছের শেষে বর্ণিত 'ইন্বাকা লা তুখলিফুল মী'আ-দ' (৩) ইমাম ত্বাহাভীর 'শারহু মা'আনিল আছার-য়ে বর্ণিত 'আ-তে সাইয়িদানা মুহাম্মাদান' (৪) ইবনুস সুন্নীর 'ফী 'আমালিল ইয়াওমে ওয়াল লায়লাহ'-তে 'ওয়াদ দারাজাতার রাফী'আতা' (৫) রাফেঈ প্রণীত 'আল-মুহারির'-য়ে আযানের দো'আর শেষে বর্ণিত 'ইয়া আরহামার রা-হেমীন'।<sup>৩৫</sup> (৬) আযান বা ইক্বামতে 'আশহাদু আন্বা সাইয়েদানা মুহাম্মাদার রাসূলুল্লাহ' বলা।<sup>৩৬</sup>

৩০. বুখারী, মিশকাত হা/৬৫৯, রাবী জাবের বিন আবদুল্লাহ।

৩১. মুসলিম, মিশকাত হা/৬৬১।

৩২. مَنْ كَذَبَ عَلَىٰ مُتَعَمِّدًا فَلْيَتَّبِعُوا مَقْعَدَهُ مِنَ النَّارِ = বুখারী, মিশকাত হা/১৯৮ 'ইল্ম' অধ্যায়।

৩৩. মুসলিম, মিশকাত হা/১৯৯ 'ইল্ম' অধ্যায়।

৩৪. বুখারী 'ওয়' অধ্যায় ১/৩৮ পৃঃ টীকা-১১; মুসলিম 'যিক্র' অধ্যায়; তিরমিযী 'দো'আ' অধ্যায় ২/১৭৫ পৃঃ; কারণ যিকরের শব্দ সমূহ তাওক্বীফী। এ ছাড়া এর অন্য কারণও থাকতে পারে। ফাৎহুল বারী হা/২৪৭।

৩৫. দ্রষ্টব্যঃ মুহাদ্দিছ আলবানী, 'ইরওয়াউল গালীল' ১ম খণ্ড পৃঃ ২৬০-৬১ হা/২৪৩; মোল্লা আলী ক্বারী হানাফী, মিরক্বাত ২/১৬৩ পৃঃ।

৩৬. ফিকহুস সুন্নাহ ১/৯২।

## আযানের অন্যান্য পরিত্যাজ্য বিষয়ঃ

(১) বাড়তি বাক্য যোগ করাঃ বর্তমানে রেডিও বাংলাদেশ ও বাংলাদেশ টেলিভিশন থেকে প্রচারিত আযানের দো‘আয় ‘ওয়ারযুকুনা শাফা‘আতাহু ইয়াওমাল কিয়া-মাহ’ বাক্যটি যোগ করা হচ্ছে। যার কোন শারঈ ভিত্তি জানা যায় না।

(২) ‘তাকাল্লুফ’ করাঃ যেমন- আযানের উক্ত দো‘আটি রেডিও কথক এমন ভঙ্গিতে পড়েন, যাতে প্রার্থনার আকুতি থাকেনা। যা অবশ্যই পরিত্যাজ্য। কারণ নিজস্ব স্বাভাবিক সুরের বাইরে যাবতীয় তাকাল্লুফ বা ভাণ করা ইসলামে দারুনভাবে অপসন্দনীয়।<sup>৩৭</sup>

(৩) গানের সুরে আযান দেওয়াঃ গানের সুরে আযান দিলে একদা আবদুল্লাহ বিন ওমর (রাঃ) জনৈক মুওয়াযযিনকে তীষণভাবে ধমক দিয়ে বলেছিলেন **إِنِّي لَبُغِضُكَ فِي** (اللَّهُ) ‘আমি তোমার সাথে অবশ্যই বিদ্বেষ পোষণ করব আল্লাহর জন্য’।<sup>৩৮</sup>

(৪) আযানের আগে ও পরে উচ্চৈঃস্বরে যিকরঃ আজকাল জুম‘আর দিনে এবং অন্যান্য ছালাতে বিশেষ করে ফজরের আযানের আগে ও পরে বিভিন্ন মসজিদে মাইকে ‘আছ-ছালা-তু ওয়াসসালা-মু ‘আলা রাসূলিল্লা-হ’ বলা হয়। এতদ্ব্যতীত হামদ, না‘ত, তাসবীহ, দরুদ, কুরআন তেলাওয়াত, ওয়ায, গযল ইত্যাদি শোনা যায়। অথচ এগুলি বিদ‘আত এবং কেবলমাত্র ‘আযান’ ব্যতীত আর সবকিছুই পরিত্যাজ্য। এমনকি আযানের পরে পুনরায় ‘আছ-ছালাত, আছ-ছালাত’ বলে ডাকাও হযরত আব্দুল্লাহ বিন ওমর (রাঃ) প্রমুখ ‘বিদ‘আত’ বলেছেন।<sup>৩৯</sup> তবে ব্যক্তিগতভাবে যদি কেউ কাউকে ছালাতের জন্য ডাকেন বা জাগিয়ে দেন, তাতে তিনি অবশ্যই নেকী পাবেন।<sup>৪০</sup>

(৫) আঙ্গুলে চুমু দিয়ে চোখ রগড়ানোঃ আযান ও এক্বামতের সময় ‘মুহাম্মাদুর রাসূলুল্লাহ’ শুনে বিশেষ দো‘আ সহ আঙ্গুলে চুমু দিয়ে চোখে রগড়ানো, আযান শেষে দুই হাত তুলে আযানের দো‘আ পড়া কিংবা উচ্চৈঃস্বরে উহা পাঠ করা ও মুখে হাত মোছা ইত্যাদির কোন শারঈ ভিত্তি নেই।<sup>৪১</sup>

(৬) বিপদে আযান দেওয়াঃ বাল্য-মুছীবতের সময় বিশেষ ভাবে আযান দেওয়ারও কোন দলীল নেই। কেননা আযান কেবল ফরয ছালাতের জন্যই হ’য়ে থাকে, অন্য

৩৭. মিশকাত হা/১৯৩; الرِّيَاءُ هُوَ الشَّرْكُ الْأَصْفَرُ ‘রিয়া হ’ল ছোট শিরক’ আহমাদ, বায়হাক্বী,

মিশকাত হা/৫৩৩৪ ‘রিক্বাক্ব’ অধ্যায়।

৩৮. ফিক্হস সুন্নাহ ‘আযান’ অধ্যায় ১/৯২ পৃঃ; বুখারী, মুসলিম, মিশকাত হা/২১৯২, ২১৯৪ ‘তেলাওয়াতের আদব’ অনুচ্ছেদ।

৩৯. তিরমিযী, মিশকাত হা/৬৪৬-এর টীকা -আলবানী; ঐ, ইরওয়া হা/২৩৬ ১/২৫৫ পৃঃ; ফিক্হস সুন্নাহ ১/৯৩ পৃঃ।

৪০. বুখারী ১/৮৩, ‘ছালাতের সময়কাল’ অধ্যায়।

৪১. ফিক্হস সুন্নাহ ‘আযান’ অধ্যায় ২১তম মাসআলা, ১/৯২-৯৩ প্রভৃতি।



কিছুর জন্য নয়।<sup>৪২</sup>

আযানের অন্যান্য মাসায়েলঃ

(১) উচ্চকণ্ঠ ব্যক্তি কেবলামুখী হয়ে দাঁড়িয়ে আযান দিবেন। তিনি দুই কানে আংগুল প্রবেশ করাবেন, যাতে আযানে জোর হয়। 'হাইয়া 'আলাছ ছালা-হ ও ফালা-হ' বলার সময় যথাক্রমে ডাইনে ও বামে কেবল মুখ ঘুরাবেন, দেহ নয়।<sup>৪৩</sup> যখনই হ'লে বসেও আযান দেওয়া যাবে।<sup>৪৪</sup>

(২) যরুরী কোন ওয়র না থাকলে আযান শুনে মসজিদ থেকে বের হয়ে যাওয়া সুন্নাতে বরখেলাফ ও ঘোরতর অপরাধ।<sup>৪৫</sup>

(৩) যিনি আযান দিবেন, তিনিই এক্বামত দিবেন। তবে অন্যেও দিতে পারেন। অবশ্য কোন মসজিদে নির্দিষ্ট মুওয়ায্যিন থাকলে তার অনুমতি নিয়ে অন্যের আযান ও এক্বামত দেওয়া উচিত। তবে সময় চলে যাওয়ার উপক্রম হ'লে যে কেউ আযান দিতে পারেন।<sup>৪৬</sup>

(৪) বিনা চাওয়ায় 'সম্মানী' গ্রহণ করা চলবে। কেননা মজুরীর শর্তে আযান দেওয়া সম্পূর্ণ নিষেধ। তবে নির্দিষ্ট ও নিয়মিত ইমাম ও মুওয়ায্যিনের জীবিকার দায়িত্ব গ্রহণ করা সমাজ ও সরকারের উপরে অপরিহার্য।<sup>৪৭</sup>

(৫) ভূমিষ্ট সন্তানের কানে ছালাতের আযান শুনাতে হয়।<sup>৪৮</sup>

(৬) আযান ওয়ূ হালতে দেওয়া উচিত। তবে বে-ওয়ূ অবস্থায় দেওয়াও জায়েয আছে। আযানের জওয়াব বা অনুরূপ যেকোন তাসবীহ 'তাহলীল' ও দো'আ সমূহ নাপাক অবস্থায় পাঠ করা জায়েয আছে।

(৭) এক্বামতের পরে দীর্ঘ বিরতি হ'লেও পুনরায় এক্বামত দিতে হবে না।<sup>৪৯</sup>

(৮) আযান ও জামা'আত শেষে কেউ মসজিদে এলে কেবল এক্বামত দিয়েই জামা'আত ও ছালাত আদায় করা উচিত।<sup>৫০</sup>

৪২. ফিকহুস সুন্নাহ ১/৯৩।

৪৩. তিরমিযী প্রভৃতি, ইরওয়া, ১/২৪০, ৪৮, ৫১ পৃঃ; নায়লুল আওত্বার ২/১১৪-১৬।

৪৪. বায়হাক্বী, ইরওয়া ১/২৪২ পৃঃ। ৪৫. মুসলিম প্রভৃতি, ফিকহুস সুন্নাহ ১/৯০-৯১।

৪৬. ফিকহুস সুন্নাহ ১/৯০, ৯২।

৪৭. আহমাদ, আবুদাউদ, নাসাঈ, তিরমিযী, ইবনু মাজাহ; নায়লুল আওত্বার ২/১৩১-৩২; আবুদাউদ সনদ ছহীহ, হা/৩৫৮৮; মিশকাত 'দায়িত্বশীলদের ভাতা' অধ্যায় হা/৩৭৪৮।

৪৮. আবুদাউদ, তিরমিযী, নায়ল 'আকীকা' অধ্যায় ৬/২৬৫-৬৭; ইরওয়া হা/১১৭৩, ৪/৪০০ পৃঃ; তবে ডান কানে আযান ও বাম কানে এক্বামত শুনানোর হাদীছ যা হাসান বিন আলী (রাঃ) হ'তে মরফু হিসাবে বর্ণিত হয়েছে, উক্ত হাদীছটি 'মওয়ূ' বা জাল। -ঐ হা/১১৭৪ ও সিলসিলা যাদ্বিফাহ হা/৩২১।

৪৯. ফিকহুস সুন্নাহ ১/৮৯, ৯২ ছালাতুর রাসূল, তাখরীজঃ আব্দুর রউফ, পৃঃ ১৯৮।

৫০. ফিকহুস সুন্নাহ ১/৯১।

## ছালাতুর রাসূল (صلاة الرسول)

### ছালাতের বিবরণ (صفة الصلاة):

১. নিয়তঃ নিয়ত অর্থ এরাদা বা সংকল্প করা। রাসূলুল্লাহ (ছাঃ) এরশাদ করেন, 'إِنَّمَا الْأَعْمَالُ بِالنِّيَّاتِ وَإِنَّمَا لِكُلِّ امْرِئٍ مَّا نَوَىٰ' 'সকল কাজ নিয়তের উপরে নির্ভরশীল এবং প্রত্যেক ব্যক্তি তাই-ই পাবে যার সে নিয়ত করবে'...।<sup>১</sup> অতএব ছালাতের জন্য ওযু করে পবিত্র হয়ে পরিচ্ছন্ন পোষাক ও দেহমন নিয়ে কা'বা গৃহ পানে মুখ ফিরিয়ে মনে মনে ছালাতের সংকল্প করে স্বীয় প্রভুর সম্মুখে বিনম্রচিত্তে দাঁড়িয়ে যেতে হবে। মুখে নিয়ত পাঠের প্রচলিত রেওয়াজটি দ্বীনের মধ্যে নূতন সৃষ্টি। রাসূল (ছাঃ)-এর ছালাতে এর কোন স্থান নেই।

২. তাকবীরে তাহরীমাঃ দুই হাতের আংগুল সমূহ কেবলামুখী খাড়াভাবে কাঁধ অথবা কান পর্যন্ত উঠিয়ে দুনিয়াবী সবকিছুকে হারাম করে দিয়ে স্বীয় প্রভুর মহত্ত্ব ঘোষণা করে বলবে আল্লা-হু আকবার 'আল্লাহ সবার চেয়ে বড়'। অতঃপর বাম হাতের উপরে ডান হাত বুকের উপরে বেঁধে সৃষ্টিকর্তা আল্লাহর সম্মুখে নিবেদিত চিত্তে দণ্ডায়মান হবে। আল্লাহ বলেন, 'قَوْمُوا لِلَّهِ تَائِبِينَ' 'তোমরা আল্লাহর জন্য নিবিষ্ট চিত্তে দাঁড়িয়ে যাও' (বাক্বারাহ ২৩৮)। ছালাতে দাঁড়ানোর সময় তাকবীরে তাহরীমার পর বুকে হাত বাঁধা সম্পর্কে প্রসিদ্ধ হাদীছগুলির কয়েকটি নিম্নরূপঃ

১. সাহ্ল বিন সা'দ (রাঃ) বলেন,

كَانَ النَّاسُ يُؤْمَرُونَ أَنْ يَضَعَ الرَّجُلُ يَدَهُ الْيُمْنَى عَلَى ذِرَاعِهِ الْيُسْرَى فِي الصَّلَاةِ، قَالَ أَبُو حَازِمٍ: لَا أَعْلَمُ إِلَّا يَنْمِي ذَلِكَ إِلَى النَّبِيِّ (ص) رَوَاهُ الْبُخَارِيُّ -

'লোকদেরকে নির্দেশ দেওয়া হ'ত যেন তারা ছালাতের সময় ডান হাত বাম হাতের উপরে রাখে। আবু হাযেম বলেন যে, ছাহাবী সাহ্ল বিন সা'দ এই আদেশটিকে রাসূল (ছাঃ)-এর দিকে সম্পর্কিত করতেন বলেই জানি'।<sup>২</sup> 'যেরা' (ذِرَاعُ) অর্থ কনুই থেকে মধ্যমা আঙ্গুলের অগ্রভাগ পর্যন্ত দীর্ঘ হাত' (আল-মু'জামুল ওয়াসীত্ব)।

১. মুত্তাফাক্বু আলাইহ ছহীহ বুখারী ও মিশকাত শরীফের প্রথম হাদীছ।

২. বুখারী ১/১০২ পৃঃ। উল্লেখ্য যে, ইসলামিক ফাউন্ডেশন, আধুনিক প্রকাশনী প্রভৃতি বাংলাদেশের একাধিক সরকারী ও বেসরকারী প্রকাশনা সংস্থা কর্তৃক অনূদিত ও প্রকাশিত বঙ্গানুবাদ বুখারী শরীফে উপরোক্ত হাদীছটির অনুবাদে 'ডান হাত বাম হাতের কবজির উপরে' - লেখা হয়েছে। এখানে অনুবাদের মধ্যে 'কবজি' কথাটি যোগ করার পিছনে কি কারণ রয়েছে বিদগ্ধ অনুবাদক ও প্রকাশকগণই তা বলতে পারবেন। তবে হাদীছের অনুবাদে এভাবে কমবেশী করা ভয়ংকর গর্হিত কাজ বলেই সকলে জানেন।

একথা স্পষ্ট যে, বাম হাতের উপরে ডান হাত রাখলে তা বুকের উপরেই চলে আসে। নিম্নোক্ত রেওয়াজাত সমূহে পরিষ্কারভাবে যার ব্যাখ্যা এসেছে। যেমন-

২. ছাহাবী হুব আত-ত্বাঈ (রাঃ) বলেন,

رَأَيْتُ رَسُولَ اللَّهِ (ص) يَضَعُ الْيُمْنَى عَلَى الْيُسْرَى عَلَى صَدْرِهِ فَوْقَ الْمَفْصِلِ  
‘আমি রাসূলুল্লাহ (ছাঃ)-কে বাম হাতের জোড়ের (কজির) উপরে ডান হাতের জোড় বুকের উপরে রাখতে দেখেছি’।<sup>৭</sup>

৩. ওয়ায়েল বিন হুজর (রাঃ) বলেন,

صَلَّيْتُ مَعَ رَسُولِ اللَّهِ (ص) وَوَضَعَ يَدَهُ الْيُمْنَى عَلَى يَدِهِ الْيُسْرَى عَلَى صَدْرِهِ  
رواه ابن خزيمة وصححه -

‘আমি রাসূলুল্লাহ (ছাঃ) -এর সাথে ছালাত আদায় করলাম। এমতাবস্থায় দেখলাম যে, তিনি বাম হাতের উপরে ডান হাত স্বীয় বুকের উপরে রাখলেন।<sup>৮</sup>

উপরোক্ত ছহীহ হাদীছে ‘বুকের উপরে হাত বাঁধা’ সম্পর্কে স্পষ্ট বক্তব্য এসেছে। ইমাম শাওকানী বলেন, وَلَا شَيْءٌ فِي الْبَابِ أَصَحُّ مِنْ حَدِيثِ وَأَبِي بَنْ حُجْرٍ, অর্থাৎ ‘হাত বাঁধা বিষয়ে ছহীহ ইবনু খুযায়মাতে ওয়ায়েল বিন হুজর (রাঃ) বর্ণিত হাদীছের চাইতে বিশুদ্ধতম কোন হাদীছ আর নেই’।<sup>৯</sup> উল্লেখ্য যে, বাম হাতের উপরে ডান হাত রাখা সম্পর্কে ১৮ জন ছাহাবী ও ২ জন তাবেঈ থেকে মোট ২০টি হাদীছ বর্ণিত হয়েছে। ইবনু আদিল বার্ন বলেন, রাসূলুল্লাহ (ছাঃ) থেকে এর বিপরীত কিছু বর্ণিত হয়নি এবং এটাই জমহূর ছাহাবা ও তাবেঈনের অনুসৃত পদ্ধতি।<sup>১০</sup>

এক্ষণে ‘নাভীর নীচে হাত বাঁধা’ সম্পর্কে মুহান্নাফ ইবনু আবী শায়বাহ ও অন্যান্য হাদীছ গ্রন্থে চারজন ছাহাবী ও দু’জন তাবেঈ থেকে যে চারটি হাদীছ ও দু’টি ‘আছার’ বর্ণিত হয়েছে, সেগুলি সম্পর্কে মুহাদ্দেছীনের বক্তব্য হ’ল- لَا يَصْلُحُ وَاحِدٌ -  
‘(যঈফ হওয়ার কারণে) এগুলির একটিও দলীল হিসাবে গ্রহণযোগ্য নয়’।<sup>১১</sup>

৩. আহমাদ, তিরমিযী (তুহফাসহ) হা/২৫; ঐ, তুহফাতুল আহওয়াযী ১/৯০ পৃঃ।  
(৩. ফিকহুস সুন্নাহ ১/১০৯ পৃঃ।)

৪. ছহীহ ইবনু খুযায়মা হা/৪৭৯। ৫. নায়ল ৩/২৫। ৬. ফিকহুস সুন্নাহ ১/১০৯।

৭. মির‘আতুল মাফাতীহ ১/৫৫৭-৫৮; তুহফাতুল আহওয়াযী ২/৮৯।

প্রকাশ থাকে যে, ছালাতে দাঁড়িয়ে মেয়েদের জন্য বুকে হাত ও পুরুষের জন্য নাভীর নীচে হাত বাঁধার যে রেওয়াজ চালু আছে, হাদীছে বা আছারে এর কোন ভিত্তি নেই।<sup>৮</sup> বরং এটাই স্বতঃসিদ্ধ যে, ছালাতের মধ্যকার ফরয ও সুন্নাত সমূহ মুসলিম নারী ও পুরুষ সকলে একই নিয়মে আদায় করবে।<sup>৯</sup>

৩. ছানাঃ ‘ছানা’ অর্থ প্রশংসা। এটা মূলতঃ ‘দো‘আয়ে ইস্তেফতা-হ’ বা ছালাত শুরু করার দো‘আ। বুকে জোড় হাত বেঁধে সিজদার স্থানে দৃষ্টি রেখে বিনম্রচিত্তে নিম্নোক্ত দো‘আর মাধ্যমে মুছল্লী তার সর্বোত্তম ইবাদতের শুভ সূচনা করবে-

اللَّهُمَّ بَاعِدْ بَيْنِي وَبَيْنَ خَطَايَايَ كَمَا بَاعَدْتَ بَيْنَ الْمَشْرِقِ وَالْمَغْرِبِ،  
اللَّهُمَّ نَقِّنِي مِنَ الْخَطَايَا كَمَا يُنْقَى الثُّوبُ الْأَبْيَضُ مِنَ الدَّنَسِ، اللَّهُمَّ  
اغْسِلْ خَطَايَايَ بِالْمَاءِ وَالتَّلْجِ وَالْبَرْدِ، متفق عليه -

উচ্চারণঃ আল্লা-হুম্মা বা-‘এদ বায়নী ওয়া বায়না খাত্বা-য়া-য়া, কামা বা-‘আদতা বায়নাল মাশরিক্বি ওয়াল মাগরিবি। আল্লা-হুম্মা নাক্বিনী মিনাল খাত্বা-য়া, কামা ইউনাক্বিনী মিনা দানাদি। আল্লা-হুম্মাগ্বসিল খাত্বা-য়া-য়া বিল মা-য়ি ওয়াছছাল্জি ওয়াল বারাদি’।

অর্থঃ হে আল্লাহ! আপনি আমার ও আমার গোনাহ সমূহের মধ্যে এমন দূরত্ব সৃষ্টি করুন, যেমন দূরত্ব সৃষ্টি করেছেন পূর্ব ও পশ্চিমের মধ্যে। হে আল্লাহ! আপনি আমাকে পরিচ্ছন্ন করুন গোনাহ হ’তে, যেমন পরিচ্ছন্ন করা হয় সাদা কাপড় ময়লা হ’তে। হে আল্লাহ! আপনি আমার গুনাহ সমূহকে ধুয়ে ছাফ করে দিন পানি দ্বারা, বরফ দ্বারা ও শিশির দ্বারা’।<sup>১০</sup>

ছানার জন্য অন্য দো‘আও রয়েছে। তবে এই দো‘আটি সর্বাধিক বিশুদ্ধ। অনেকে ছালাত শুরুর আগেই জায়নামাযের দো‘আ মনে করে ‘ইন্নী ওয়াজ্জাহতু’ পড়েন। এই রেওয়াজটি সুন্নাতের বরখেলাফ। মূলতঃ জায়নামাযের দো‘আ বলে কিছু নেই।

৪. বিসমিল্লাহ পাঠঃ ছানা বা দো‘আয়ে ইস্তেফতাহ- পাঠ শেষে ‘আউযুবিল্লাহ’ ও ‘বিসমিল্লাহ’ নীরবে পড়বে। অতঃপর সূরায়ে ফাতিহা পাঠ করবে। প্রকাশ থাকে যে, ‘আউযু বিল্লাহ’ কেবল ১ম রাক‘আতে পড়বে, বাকী রাক‘আতগুলিতে নয়।<sup>১১</sup> অমনিভাবে ‘বিসমিল্লাহ’ সূরায়ে ফাতিহার অংশ হওয়ার পক্ষে যেমন কোন ছহীহ দলীল নেই,<sup>১২</sup>

৮. মির‘আত ১/৫৫৮; তুহফা ২/৮৩।

৯. ফিকহুস সুন্নাহ ১/১০৯; নায়ল ৩/১৯।

১০. মুত্তাফাক আলাইহ, মিশকাত হা/৮১২।

১১. ফিকহুস সুন্নাহ ১/১১২; নায়ল ৩/৩৬-৩৯ পৃঃ।

১২. নায়ল ৩/৫২ পৃঃ,

তেমনি 'জেহরী' ছালাতে 'বিসমিল্লাহ' জোরে বলার পক্ষে কোন নির্ভরযোগ্য ভিত্তি নেই।<sup>১৩</sup>

(১) আনাস বিন মালিক (রাঃ) বলেন,

عن انس قال صَلَّيْتُ مَعَ النَّبِيِّ (ص) وَأَبِي بَكْرٍ وَعُمَرُ وَعُثْمَانُ فَلَمْ أَسْمَعْ أَحَدًا مِنْهُمْ يَقْرَأُ بِسْمِ اللَّهِ الرَّحْمَنِ الرَّحِيمِ رواه أحمد و مسلم، و في رواية: لَا يَجْهَرُونَ بِسْمِ اللَّهِ الرَّحْمَنِ الرَّحِيمِ، و في لفظ لابن خزيمة: كَانُوا يُسْرُونَ-

অর্থঃ 'আমি রাসূলুল্লাহ (ছাঃ), আবুবকর, ওমর ও ওছমান (রাঃ) এর পিছনে ছালাত আদায় করেছি। কিন্তু তাঁদের কাউকে 'বিসমিল্লাহ' জোরে পড়তে শুনিনি'।<sup>১৪</sup> ইবনু খুযায়মার রেওয়াজাতে স্পষ্টভাবে এসেছে যে, 'তারা চুপে চুপে পড়তেন'।<sup>১৫</sup> (২) দারাকুত্নী বলেন, 'বিসমিল্লাহ' জোরে বলার বিষয়ে কোন হাদীছ 'ছহীহ' প্রমাণিত হয়নি (নায়ল ৩/৪৬)।<sup>১৬</sup> (৩) তবে ছহীহ হাদীছ সমূহের বিপরীতে সবল-দুর্বল প্রায় ১৪টি হাদীছের প্রতি লক্ষ্য রেখে হাফেয ইবনুল ক্বাইয়িম (রহঃ) বলেন, 'রাসূলুল্লাহ (ছাঃ) হয়তোবা কখনো কখনো 'বিসমিল্লাহ' জোরে বলে থাকবেন। তবে অধিকাংশ সময় তিনি চুপে চুপেই পড়তেন। এটা নিশ্চিত যে, তিনি সর্বদা জোরে পড়তেন না। যদি তাই পড়তেন, তাহলে খুলাফায়ে রাশেদীন, ছাহাবায়ে কেরাম ও শহরবাসী সাধারণ মুছল্লীদের নিকটে বিষয়টি গোপন থাকত না'।.... অতঃপর বর্ণিত হাদীছগুলি সম্পর্কে তিনি বলেন, فَصَحِيحُ تِلْكَ الْأَحَادِيثِ غَيْرُ صَرِيحٍ وَصَرِيحُهَا غَيْرُ صَحِيحٍ 'উক্ত মর্মে বর্ণিত হাদীছগুলির মধ্যে যেগুলি ছহীহ, সেগুলির বক্তব্য স্পষ্ট নয়। পক্ষান্তরে স্পষ্টগুলি ছহীহ নয়'।<sup>১৭</sup>

৫ (ক)ঃ সূরায়ে ফাতিহা পাঠ (قراءة سورة الفاتحة) :

ইমাম ও মুক্তাদী সকলের জন্য সকল প্রকার ছালাতে প্রতি রাক'আতে সূরায়ে ফাতিহা

১৩. নায়ল ৩/৪৬ পৃঃ।

১৪. আহমাদ, মুসলিম, নায়ল ৩/৩৯; দারাকুত্নী হা/১১৮৬-৯৫।

১৫. ছহীহ ইবনু খুযায়মা, হা/৪৯৪-৯৭, হাদীছ ছহীহ।

১৬. মুসলিম, আহমাদ, ছহীহ ইবনু খুযায়মা, নায়ল ৩/৩৯-৪৬।

১৭. নায়ল ৩/৪৭; ফিকহুস্ সুন্নাহ ১/১০২।

পাঠ করা ফরয। দলীল সমূহঃ

(১) হযরত উবাদাহ বিন ছামিত (রাঃ) হ'তে বর্ণিত রাসূলুল্লাহ (ছাঃ) এরশাদ করেন, 'لَا صَلَاةَ لِمَنْ لَمْ يَقْرَأْ بِفَاتِحَةِ الْكِتَابِ ، متفق عليه ، ইয়াক্বুরা' 'ঐ ব্যক্তির ছালাত সিদ্ধ নয়, যে ব্যক্তি সূরায়ে ফাতিহা পাঠ করেনা'।<sup>১৮</sup>

(২) আল্লাহ বলেন, 'فَاقْرَأُوا مَا تيسَّرَ مِنَ الْقُرْآنِ' 'ফাক্বরাউ মা তায়াস্‌সারা মিনাল কুরআন' 'অতঃপর তোমরা পড় কুরআন থেকে যা সহজ মনে কর' (মুযযাশ্বিল ২০)। উক্ত আয়াতের ব্যাখ্যা হিসাবে (ক) ছালাতে ভুলকারী (مسئ الصلاة) জনৈক ব্যক্তিকে প্রশিক্ষণ দিতে গিয়ে রাসূলুল্লাহ (ছাঃ) এরশাদ করেন, 'ثُمَّ اقْرَأْ ..

'অতঃপর তুমি 'উম্মুল কুরআন' বা সূরায়ে ফাতিহা পড়বে এবং যেটুকু আল্লাহ ইচ্ছা করেন কুরআন থেকে পাঠ করবে'...।<sup>১৯</sup> (খ)

আবু সাঈদ খুদরী (রাঃ) বলেন, 'أمرنا أن نقرأ بفاتحة الكتاب وما تيسر،' 'আমরা আদিষ্ট হয়েছিলাম যেন আমরা সূরায়ে ফাতিহা পড়ি এবং (কুরআন থেকে) যা সহজ মনে হয় (তা পড়ি)'।<sup>২০</sup> (গ) আবু হুরায়রা (রাঃ) বলেন, 'أمرني رسول الله

'রাসূলুল্লাহ (ছাঃ) আমাকে নির্দেশ দেন যেন আমি ঘোষণা করে দেই এই কথা যে, ছালাত সিদ্ধ নয় সূরায়ে ফাতিহা ব্যতীত। অতঃপর তার অতিরিক্ত কিছু'।<sup>২১</sup> এখানে প্রথমে সূরায়ে ফাতিহা, অতঃপর কুরআন থেকে সহজ মত কিছু অংশ পড়তে নির্দেশ দেওয়া হয়েছে।

(৩) আল্লাহ বলেন, 'وَإِذَا قُرِئَ الْقُرْآنُ فَاسْتَمِعُوا لَهُ وَأَنْصِتُوا...' 'ওয়া এয়া কুরিয়াল কুরআ-নু ফাসতামি'উ লাহু ওয়া আনছি'তু'। অর্থঃ 'যখন কুরআন পাঠ করা হয়, তখন তোমরা তা মনোযোগ দিয়ে শ্রবণ কর ও চুপ থাক'... (আ'রাফ ২০৪)। উক্ত আয়াতের ব্যাখ্যায় আনাস (রাঃ) বর্ণিত হাদীছে রাসূলুল্লাহ (ছাঃ) এরশাদ করেন,

أَتَقْرَءُونَ فِي صَلَاتِكُمْ خَلْفَ الْإِمَامِ وَالْإِمَامُ يَقْرَأُ؟ فَلَا تَفْعَلُوا وَلْيَقْرَأْ أَحَدُكُمْ بِفَاتِحَةِ الْكِتَابِ فِي نَفْسِهِ أَخْرَجَهُ ابْنُ حِبَّانٍ عَنْ أَنَسٍ

১৮. মুত্তাফাকু আলাইহ, মিশকাত 'ছালাতে কিরাআত' অনুচ্ছেদ হা/৮২২; কুতবে সিত্তাহসহ প্রায় সকল হাদীছ গ্রন্থে উক্ত হাদীছটি বর্ণিত হয়েছে।

১৯. আবুদাউদ হা/৮৫৯ 'রুকু-সিজদায় যে ব্যক্তি পিঠ সোজা রাখে না' অনুচ্ছেদ, বর্ণনা রিফা'আহ বিন রাফে' (রাঃ); হযীহ আবুদাউদ হা/৭৬৫।

২০. আবুদাউদ হা/৮১৮, ঐ হযীহ হা/৭৩২।

২১. আবুদাউদ হা/৮২০, ঐ হযীহ হা/৭৩৩।

‘তোমরা কি ইমামের কিরাআত অবস্থায় কিছু পাঠ করে থাক? এটা করবে না। বরং কেবলমাত্র সূরায়ে ফাতিহা চুপে চুপে পড়বে’।<sup>২২</sup>

(৪) হযরত আবু হুরায়রা (রাঃ) হ’তে বর্ণিত রাসূলুল্লাহ (ছাঃ) এরশাদ করেন,

مَنْ صَلَّى صَلَاةً لَمْ يَقْرَأْ فِيهَا بِأَمِّ الْقُرْآنِ فَهِيَ خِدَاجٌ ثَلَاثًا غَيْرُ تَمَامٍ  
‘যে ব্যক্তি ছালাত আদায় করল, যার মধ্যে ‘কুরআনের মা’ অর্থাৎ সূরায়ে ফাতিহা পাঠ করল না, তার ঐ ছালাত অপূর্ণাঙ্গ, অপূর্ণাঙ্গ, অপূর্ণাঙ্গ’...। রাবী হযরত আবু হুরায়রা (রাঃ)-কে বলা হ’ল, আমরা যখন ইমামের পিছনে থাকি, তখন কিভাবে পড়ব? তিনি বললেন, اِقْرَأْ بِهَا فِي نَفْسِكَ ‘ইকুরা’ বিহা ফী নাফসিকা ‘তুমি ওটা চুপে চুপে পড়’।<sup>২৩</sup>

‘খিদাজ’ (خِدَاجٌ) অর্থঃ সময় আসার পূর্বেই যে গর্ভস্থ সন্তান ভূমিষ্ট হয়, যদিও সে পূর্ণাঙ্গ হয় (আল-মু‘জামুল ওয়াসীত্ব)। খাত্তাবী বলেন, ‘আরবরা ঐ বাচ্চাকে ‘খিদাজ’ বলে যা রক্তপিণ্ড আকারে অসময়ে গর্ভচ্যুত হয় ও যার আকৃতি চেনা যায় না’। আবু ওবায়দ ব বলেন, ‘খিদাজ’ হ’ল গর্ভচ্যুত মৃত সন্তান, যা কাজে লাগে না’।<sup>২৪</sup> অতএব সূরায়ে ফাতিহা বিহীন ছালাত প্রাণহীন অপূর্ণাঙ্গ বাচ্চার ন্যায়, যা কোন কাজে লাগে না।

(৫) হযরত ওবাদাহ বিন ছামিত (রাঃ) বলেন, আমরা একদা ফজরের জামা‘আতে রাসূলুল্লাহ (ছাঃ)-এর পিছনে ছালাত রত ছিলাম। এমন সময় মুজাদীদের কেউ সরবে কিছু পাঠ করলে রাসূল (ছাঃ)-এর জন্য কিরাআত কঠিন হয়ে পড়ে। তখন সালাম ফিরানোর পরে তিনি বললেন, সম্ভবতঃ তোমরা তোমাদের ইমামের পিছনে কিছু পড়ে থাকবে? আমরা বললাম- হ্যাঁ। জবাবে রাসূলুল্লাহ (ছাঃ) বললেন,

‘اِعْرَضُوا عَنِ الْقُرْآنِ فَإِنَّهُ لَا صَلَاةَ لِمَنْ لَمْ يَقْرَأْ بِهَا  
‘এরূপ করোনা  
কেবল সূরায়ে ফাতিহা ব্যতীত। কেননা ছালাত সিদ্ধ হয় না যে ব্যক্তি ওটা পাঠ করে না’।<sup>২৫</sup>

২২. বুখারী জুযু‘ল কিরাআত, ছহীহ ইবনু হিব্বান, ত্বাবারানী আওসাত্ব, বায়হাক্বী; হাদীছ ছহীহ, তুহফাতুল আহওয়ামী, ‘ইমামের পিছনে কিরাআত’ অনুচ্ছেদ নং ২২৯, হা/৩১০ -এর ভাষ্য (فالتطريقان محفوظان), ২/২২৮ পৃঃ; নায়লুল আওত্বার ২/৬৭ পৃঃ ‘মুজাদীর কিরাআত ও চুপ থাকা’ অনুচ্ছেদ।

২৩. মুসলিম, মিশকাত হা/৮২৩।

২৪. তুহফা ২/৬১ পৃঃ, হা/২৪৭-এর ভাষ্য; আবুদাউদ, উক্ত হাদীছের টীকা হা/৮২১ তাহক্বীক, মুহাম্মাদ মুহিউদ্দীন আবদুল হামীদ।

২৫. ছহীহ আবুদাউদ, হা/৭৩৬-৩৭, ছহীহ তিরমিযী হা/২৫৭, মিশকাত হা/৮৫৪ ‘ছালাতে কিরাআত’ অনুচ্ছেদ।

ঘটনা এই যে, প্রথম দিকে রাসূলুল্লাহ (ছাঃ)-এর সাথে সাথে অনেকে ইমামের পিছনে সরবে কিরাআত করতেন। অনেকে প্রয়োজনীয় কথাও বলতেন। তাতে ইমামের কিরাআতে বিঘ্ন ঘটতো। তাছাড়া মুশরিকরাও রাসূল (ছাঃ)-এর কুরআন পাঠের সময় ইচ্ছাকৃতভাবে শিস ও হাততালি দিয়ে বিঘ্ন ঘটাতো। সেকারণে উপরোক্ত আয়াত (আ'রাফ ২০৪) নাযিলের মাধ্যমে সকলকে কুরআন পাঠের সময় চুপ থাকতে ও তা মনোযোগ দিয়ে শুনতে আদেশ করা হয়েছে।<sup>২৬</sup> এই নির্দেশ ছালাতের মধ্যে ও বাইরে সর্বাবস্থায় প্রযোজ্য। অতঃপর পূর্বোক্ত উবাদা, আবু হুরায়রা ও আনাস (রাঃ) প্রমুখ বর্ণিত হাদীছ সমূহের মাধ্যমে জেহরী ছালাতে ইমামের পিছনে কেবলমাত্র সূরায় ফাতিহা নীরবে পড়তে 'খাছ' ভাবে নির্দেশ দেওয়া হয়েছে, অন্য কোন সূরা নয়।

অতএব উক্ত ছহীহ হাদীছ সমূহ কুরআনী আয়াত দ্বয়ের ব্যাখ্যা হিসাবে এসেছে, বিরোধী হিসাবে নয়। রাসূলুল্লাহ (ছাঃ)-এর উক্ত ব্যাখ্যা নিঃসন্দেহে 'অহি' দ্বারা প্রত্যাদিষ্ট, তাঁর নিজের থেকে নয়। অতএব অহি-র বিধান অনুসরণে সর্বাবস্থায় ছালাতে সূরায় ফাতিহা পাঠ করা অবশ্য কর্তব্য।

(খ) ইমামের পিছনে সূরায় ফাতিহা পাঠ না করাঃ

ইমামের পিছনে জেহরী বা সেরী কোন প্রকার ছালাতে সূরায় ফাতিহা পাঠ করা যাবে না। এই মর্মে যাঁরা অভিমত পোষণ করেন, তাঁদের প্রধান দলীল সমূহ নিম্নরূপঃ

(১) পূর্বে বর্ণিত আয়াতদ্বয় (মুযাফিল ২০ ও আ'রাফ ২০৪) যেখানে কুরআন থেকে সহজমত পড়তে বলা হয়েছে ও কিরাআতের সময় চুপ থেকে মনোযোগ দিয়ে তা শুনতে বলা হয়েছে। সেখানে বিশেষ কোন সূরাকে 'খাছ' করা হয়নি। এক্ষণে হাদীছ দ্বারা সূরায় ফাতিহাকে খাছভাবে পড়ার নির্দেশ করলে তা কুরআনী আয়াতকে 'মনসূখ' করার শামিল হবে। অথচ 'হাদীছ দ্বারা কুরআনী হুকুমকে মনসূখ করা যায় না'।<sup>২৭</sup>

জবাবঃ এখানে 'মনসূখ' হবার প্রশ্নই ওঠে না। বরং হাদীছে ব্যাখ্যাকারে বর্ণিত হয়েছে এবং কুরআনের মধ্য থেকে উম্মুল কুরআনকে 'খাছ' করা হয়েছে। যেমন কুরআনে সকল উম্মতকে লক্ষ্য করে 'মীরাছ' বন্টনের সাধারণ নিয়ম-এর আদেশ দেওয়া হয়েছে (নিসা ৭,১১)। কিন্তু হাদীছে রাসূল (ছাঃ)-এর সম্পত্তি তাঁর উত্তরাধিকারী সন্তানগণ পাবেন না বলে 'খাছ' ভাবে নির্দেশ করা হয়েছে।<sup>২৮</sup>

মূলতঃ রাসূল (ছাঃ)-এর আগমন ঘটেছিল কুরআনের ব্যাখ্যাকারী হিসাবে এবং ঐ ব্যাখ্যাও ছিল সরাসরি আল্লাহ কর্তৃক প্রত্যাদিষ্ট। অতএব রাসূল (ছাঃ)-এর প্রদত্ত ব্যাখ্যাকে প্রত্যাখ্যান করা 'অহিয়ে গায়ের মাতলু' বা আল্লাহর অনাবৃত্ত অহি-কে প্রত্যাখ্যান করার শামিল হবে।

২৬. কুরতুবী, উক্ত আয়াতের তাফসীর দ্রষ্টব্য, ৭/৩৫৪ পৃঃ।

২৭. নায়লুল আওত্বার ৩/৬৭ পৃঃ; নূরুল আনওয়ার পৃঃ ২১৩-১৪।

২৮. মুত্তাফাকু আলাইহ, মিশকাত হা/৫৯৬৭, 'ফাযায়েল' অধ্যায়।



(২) হযরত আবু হুরায়রা (রাঃ) বলেন, একদা এক জেহরী ছালাতে সালাম ফিরিয়ে রাসূলুল্লাহ (ছাঃ) মুছল্লীদের জিজ্ঞেস করলেন, তোমাদের মধ্যে কেউকি এইমাত্র আমার সাথে কুরআন পাঠ করেছ? একজন বলল, জি-হাঁ। রাসূল (ছাঃ) বললেন, তাই ভাবছিলাম **مَالِي أَنْزَعُ الْقُرْآنَ** 'আমার কিরাআতে কেন বিঘ্ন সৃষ্টি হচ্ছে?' রাবী বলেন, **فَانْتَهَى النَّاسُ عَنِ الْقِرَاءَةِ مَعَ رَسُولِ اللَّهِ (ص) فِيمَا جَهَرَ فِيهِ -** থেকে লোকেরা জেহরী ছালাতে রাসূল (ছাঃ)-এর সাথে কিরাআত করা থেকে বিরত হ'ল'।<sup>২৯</sup>

জবাবঃ হাদীছের বক্তব্যে বুঝা যায় যে, মুজাদীগণের মধ্যে কেউ রাসূল (ছাঃ)-এর সাথে সাথে সরবে কিরাআত করেছিলেন। যার জন্য ইমাম হিসাবে রাসূল (ছাঃ)-এর কিরাআতে বিঘ্ন সৃষ্টি হয়েছিল। ইতিপূর্বে আনাস ও আবু হুরায়রা (রাঃ) বর্ণিত হাদীছ দু'টিতে নীরবে পড়ার কথা এসেছে, যাতে বিঘ্ন সৃষ্টি না হয়। শাহ অলিউল্লাহ দেহলভী (রহঃ) বলেন, **فَإِنْ قَرَأَ فَلْيَقْرَأِ الْفَاتِحَةَ قِرَاءَةً لَا يُشَوِّشُ عَلَى الْإِمَامِ** জেহরী ছালাতে মুজাদী এমনভাবে সূরায়ে ফাতিহা পাঠ করবে, যাতে ইমামের কিরাআতে বিঘ্ন সৃষ্টি না হয়'।<sup>৩০</sup> অতএব নীরবে ইমামের পিছনে সূরায়ে ফাতিহা পড়লে ইমামের কিরাআতে বিঘ্ন সৃষ্টির প্রশ্নই আসে না। উল্লেখ্য যে, হাদীছের শেষাংশে 'তঃপর লোকেরা কিরাআত থেকে বিরত হ'ল' কথাটি 'মুদরাজ' (مدرج), যা ইবনু শিহাব যুহরী কর্তৃক সংযুক্ত।<sup>৩১</sup>

(৩) হযরত আবু হুরায়রা (রাঃ) হ'তে বর্ণিত রাসূলুল্লাহ (ছাঃ) এরশাদ করেন,

**إِنَّمَا جُعِلَ الْإِمَامُ لِيُؤْتَمَّ بِهِ فَإِذَا كَبَّرَ فَكَبِّرُوا وَإِذَا قَرَأَ فَأَنْصِتُوا،** 'ইমাম নিযুক্ত হন তাকে অনুসরণ করার জন্য। তিনি যখন তাকবীর বলেন, তখন তোমরা তাকবীর বল। তিনি যখন কিরাআত করেন, তখন তোমরা চুপ থাক'।<sup>৩২</sup>

জবাবঃ উক্ত হাদীছে 'আম' ভাবে কিরাআতের সময় চুপ থাকতে বলা হয়েছে। কুরআনেও অনুরূপ নির্দেশ এসেছে (আ'রাফ ২০৪)। একই রাবীর ইতিপূর্বেকার বর্ণনায় এবং আনাস (রাঃ) বর্ণিত হাদীছে সূরায়ে ফাতিহাকে 'খাছ' ভাবে চুপে চুপে পড়তে নির্দেশ করা হয়েছে। অতএব ইমামের পিছনে চুপে চুপে সূরায়ে ফাতিহা পাঠ করলে উভয় ছহীহ হাদীছের উপরে আমল করা সম্ভব হয়।

২৯. ছহীহ আবুদাউদ হা/৭৩৬, নাসাঈ, তিরমিযী, মিশকাত হা/৮৫৫।

৩০. হুজ্জাতুল্লাহিল বালিগাহ ২য় খণ্ড ৯ পৃঃ।

৩১. ছহীহ আবুদাউদ হা/৭৩৭; নায়লুল আওত্বার ৩/৬৭।

৩২. ছহীহ নাসাঈ হা/৮৮২, আবুদাউদ, ইবনু মাজাহ, মিশকাত হা/৮৫৭।

(৪) হযরত জাবের (রাঃ) হ'তে বর্ণিত রাসূলুল্লাহ (ছাঃ) এরশাদ করেন, مَنْ كَانَ لَهُ 'যার ইমাম রয়েছে, ইমামের কিরাআত তার জন্য কিরাআত হবে'।<sup>৩৩</sup> ইবনু হাজার আসক্বালানী বলেন, যতগুলি সূত্র থেকে হাদীছটি বর্ণিত হয়েছে সকল সূত্রই দোষযুক্ত। সেকারণ 'হাদীছটি সকল বিদ্বানের নিকটে সর্বসম্মতভাবে যঈফ (إِنَّهُ ضَعِيفٌ عِنْدَ جَمِيعِ الْحُقَّاطِ)'।<sup>৩৪</sup>

জবাবঃ অত্র হাদীছে 'কিরাআত' কথাটি 'আম'। কিন্তু সূরায়ে ফাতিহা পাঠের নির্দেশটি 'খাছ'। অতএব অন্য সব সূরা বাদ দিয়ে কেবল সূরায়ে ফাতিহা পাঠ করতে হবে। দ্বিতীয়তঃ যদি অত্র হাদীছের অর্থ 'ইমামের কিরাআত মুক্তাদীর জন্য যথেষ্ট' বলে ধরা হয়, তবে হাদীছটি কেবল ছহীহ হাদীছ সমূহের বিরোধী হবে না, বরং কুরআনী নির্দেশেরও বিরোধী হবে। কেননা কুরআনে (মুযযাম্বিল ২০) ইমাম, মুক্তাদী বা একাকী সকল মুছল্লীর জন্য কুরআন থেকে যা সহজ মনে করা হয়, তা পড়তে নির্দেশ দেওয়া হয়েছে। অথচ উপরোক্ত যঈফ হাদীছ মানতে গেলে ইমামের পিছনে কুরআনের কিছুই পড়া চলে না। তৃতীয়তঃ উক্ত হাদীছে ইমামের কিরাআত ইমামের জন্য হবে বলা হয়েছে। মুক্তাদীর জন্য হবে, এমন কথা নেই। কেননা 'তার জন্য' (لَهُ) সর্বনামটির ইঙ্গিত নিকটতম বিশেষ্য 'ইমাম' (إِمَامًا)-এর দিকে হওয়াই ব্যাকরণের দৃষ্টিতে যুক্তিযুক্ত। অতএব ইমাম সূরায়ে ফাতিহা পড়লে তা কেবল ইমামের জন্যই হবে, মুক্তাদীর জন্য নয়।\*

(৫) 'লা ছালা-তা ইল্লা বি ফা-তিহাতিল কিতাব' বা 'সূরায়ে ফাতিহা ব্যতীত ছালাত হবে না' অর্থ 'ছালাত পূর্ণভাবে হবে না' (لا صلاة بآل كمال)। যেমন অন্য হাদীছে রয়েছে, 'লা ঈমা-না লিমান লা আমা-নাতা ৬. ওয়ালা দীনা লিমান লা 'আহুদা লাহু' অর্থঃ 'ঐ ব্যক্তির ঈমান নেই, যার আমানত নেই এবং ঐ ব্যক্তির দ্বীন নেই যার ওয়াদা ঠিক নেই'।<sup>৩৫</sup> এর অর্থ ঐ ব্যক্তির ঈমান পূর্ণ নয় বরং ত্রুটিপূর্ণ।

জবাবঃ (ক) কুতুবে সিত্তাহ সহ প্রায় সকল হাদীছ গ্রন্থে বর্ণিত উপরোক্ত প্রসিদ্ধ হাদীছটি একই রাবী হযরত উবাদাহ বিন ছামিত (রাঃ) হ'তে দারাকুত্বনীতে ছহীহ

৩৩. ইবনু মাজাহ হা/৮৫০, দারাকুত্বনী হা/১২২০, বায়হাক্বী ২/১৫৯-৬০ পৃঃ; হাদীছ যঈফ।

৩৪. ফাৎহুল বারী ২/৬৮৩ পৃঃ।

\* উদাহরণ স্বরূপ مَنْ كَانَ لَهُ إِمَامٌ فَزَوْجَةٌ لَهُ وَإِمَامٌ لَهُ زَوْجَةٌ অর্থাৎ 'যার ইমাম আছে, উক্ত ইমামের স্ত্রী তার জন্য স্ত্রী হবে'। কিন্তু এই বাক্যের অর্থ 'ইমামের স্ত্রী মুক্তাদীর জন্য হবে' এমনটা করা যাবে না। অনুরূপভাবে ইমামের কিরাআত ইমামের জন্য হবে। কিন্তু 'ইমামের কিরাআত মুক্তাদীর জন্য হবে' এমন অর্থ করা ঠিক হবে না।

৩৫. বায়হাক্বী, মিশকাত হা/৩৫।

সনদে বর্ণিত হয়েছে এভাবে, لَا تُجْزِيءُ صَلَاةٌ لَأَيُّقْرَأُ الرَّجُلُ فِيهَا بِفَاتِحَةِ الْكِتَابِ

‘ঐ ছালাত যথেষ্ট নয়, যার মধ্যে মুছল্লী সূরায় ফাতিহা পাঠ করেনা’।<sup>৩৬</sup> অতএব উক্ত হাদীছে ‘ছালাত হবে না’ অর্থ ‘ছালাত সিদ্ধ হবে না’।

(খ) অনুরূপভাবে ‘খিদাজ’ বা ক্রটিপূর্ণ-এর ব্যাখ্যায় হাফেয ইবনু খুযায়মা স্বীয় ‘ছহীহ’ গ্রন্থে ‘ছালাত’ অধ্যায়ে ৯৫ নং অনুচ্ছেদ রচনা করেন এভাবে- ‘ঐ ‘খিদাজ’ -এর আলোচনা যে সম্পর্কে রাসূল (ছাঃ) অত্র হাদীছে হুঁশিয়ার করেছেন যে, ঐ ক্রটি থাকলে ছালাত যথেষ্ট হবে না। কেননা ক্রটি দু’প্রকারেরঃ এক- যা থাকলে ছালাত যথেষ্ট হয় না। দুই- যা থাকলেও ছালাত সিদ্ধ হয়। পুনরায় পড়তে হয় না। এই ক্রটি হ’লে ‘সিজদায়ে সহো’ দিতে হয় না। অথচ ছালাত সিদ্ধ হয়ে যায়’। অতঃপর তিনি আবু হুরায়রা (রাঃ) বর্ণিত রাসূলুল্লাহ (ছাঃ)-এর হাদীছ উদ্ধৃত করেন যে, لَا تُجْزِيءُ صَلَاةٌ لَأَيُّقْرَأُ فِيهَا بِفَاتِحَةِ الْكِتَابِ ‘ঐ ছালাত যথেষ্ট নয়, যাতে সূরায় ফাতিহা পাঠ করা হয় না’...।<sup>৩৭</sup>

এক্ষণে ‘লা ছালা-তা’ বা ‘ছালাত হবে না’ -এর অর্থ যখন স্বয়ং রাসূলুল্লাহ (ছাঃ) ‘লা তুজযিউ’ অর্থাৎ ‘ছালাত যথেষ্ট হবে না’ বলে ব্যাখ্যা প্রদান করেছেন, তখন সেখানে আমাদের নিজস্ব ব্যাখ্যার কোন অবকাশ নেই। অতএব ‘খিদাজ’ অর্থ অসম্পূর্ণ করাটা অন্যায়। তাছাড়া ক্রটিপূর্ণ ছালাত প্রকৃত অর্থে কোন ছালাত নয়।

অতএব পবিত্র কুরআন, ছহীহ হাদীছ, অধিকাংশ ছাহাবা ও তাবেঈন এবং ইমাম মালেক, শাফেঈ ও আহমাদ সহ অধিকাংশ মুজতাহিদ ইমামগণের সিদ্ধান্ত ও নিয়মিত আমলের প্রতি সম্মান প্রদর্শন করে সর্বাবস্থায় সকল ছালাতে সূরায় ফাতিহা পাঠ করা অবশ্য কর্তব্য। নইলে অহেতুক যিদ কিংবা ব্যক্তি ও দলপূজার পরিণামে সারা জীবন ছালাত আদায় করেও কিয়ামতের দিন দীর্ঘ নিঃশ্বাস ছাড়া আর কিছুই জুটবেনা। যেমন আল্লাহ বলেন, ‘যেদিন অনুসরণীয় ব্যক্তিগণ তাদের অনুসারীদের সাথে সম্পর্ক ছিন্ন করবেন ও সকলে আযাবকে প্রত্যক্ষ করবে এবং তাদের মধ্যকার পারস্পরিক সকল সম্পর্ক ছিন্ন হবে। যেদিন অনুসারীগণ বলবে, যদি আমাদের আরেকবার ফিরে যাওয়ার সুযোগ হ’ত, তাহ’লে আমরা তাদের থেকে সম্পর্ক ছিন্ন করতাম, যেমন আজ তারা আমাদের সাথে সম্পর্ক ছিন্ন করেছেন। এমনিভাবে আল্লাহ সেদিন তাদের সকল আমলকে তাদের জন্য ‘আফসোস’ হিসাব দেখাবেন। অথচ তারা কখনোই জাহান্নাম থেকে বের হবে না’ (বাক্বারাহ ১৬৬-৬৭)।

৩৬. দারাকুতনী হা/১২১২, ১/৩১৯ পৃঃ।

৩৭. ছহীহ ইবনু খুযায়মা হা/৪৯০, ১/২৪৮ পৃঃ সনদ ছহীহ। টীকা..... অর্থাৎ ‘যথেষ্ট হয়েছে’ আল-মু’জামুল ওয়াসীত্ব পৃঃ ১১৯-২০।

(গ) রুকু পেলের রাক'আত পাওয়াঃ

জমহূর বিদ্বানগণের অভিমত হ'ল এই যে, 'রুকু পেলের রাক'আত পাবে। সূরায়ে ফাতিহা পড়তে পারুক বা না পারুক'। তাঁদের প্রধান দলীল সমূহ নিম্নরূপঃ

(১) হযরত আবু হুরায়রা (রাঃ) হ'তে বর্ণিত রাসূলুল্লাহ (ছাঃ) এরশাদ করেন, .....

مَنْ أَدْرَكَ مِنَ الصَّلَاةِ رُكْعَةً فَقَدْ أَدْرَكَ الصَّلَاةَ رَوَاهُ النَّسَائِيُّ وَابْنُ مَاجَةَ،

'যে ব্যক্তি ছালাতের এক রাক'আত পেল, সে ব্যক্তি ছালাত পেল'।<sup>৩৮</sup>

জবাবঃ জমহূর বিদ্বানগণ এখানে 'রাক'আত' অর্থ 'রুকু' করেছেন। ইমাম বুখারী বলেন যে, এখানে রাক'আত বলা হয়েছে। রুকু, সিজদা বা তাশাহুদ বলা হয়নি (অথচ সবগুলো মিলেই রাক'আত হয়।-আওনুল মা'বুদ ৩/১৫২)। শামসুল হক আযীমাবাদী বলেন, 'এখানে কোন কারণ ছাড়াই রাক'আত অর্থ রুকু করা হয়েছে যা ঠিক নয়'। যেমন মুসলিম শরীফে বারা (রাঃ) হ'তে বর্ণিত হাদীছে 'ক্বিয়াম ও হিসদার বিপরীতে রাক'আত শব্দ এসেছে। সেখানে রাক'আত অর্থ রুকু করা হয়েছে।<sup>৩৯</sup> 'আবদুর বহমান সা'দীও তাই বলেন' (আল-মুখতারাত পৃঃ ৪৪)।

(২) আবু হুরায়রা (রাঃ) হ'তে বর্ণিত রাসূলুল্লাহ (ছাঃ) এরশাদ করেন, যে ব্যক্তি জুম'আর ছালাতের শেষ রাক'আতে রুকু পেল, সে যেন আরেক রাক'আত যোগ করে নেয়। কিন্তু যে ব্যক্তি শেষ রাক'আতে রুকু পেল না, সে যেন যোহরের চার রাক'আত পড়ে।<sup>৪০</sup>

জবাবঃ দারাকুতনী বর্ণিত এই হাদীছটিও 'যঈফ' (৪০ নং টীকা দ্রষ্টব্য)।

(৩) আবু বাকরাহ (রাঃ) হ'তে একটি হাদীছ পেশ করা হয়ে থাকে। তিনি একাকী রুকু অবস্থায় পিছন থেকে বাতারে প্রবেশ করেন। রাসূল (ছাঃ) তাকে বলেন, আল্লাহ তোমার আগ্রহ বৃদ্ধি করুন। তবে আর কখনো এরূপ করো না'।<sup>৪১</sup>

জবাবঃ ইবনু হযম ও শাওকানী বলেন, এ হাদীছের মধ্যে জমহূরের মতের পক্ষে কোন দলীল নেই। কেননা রাসূল (ছাঃ) তাকে যেমন ঐ রাক'আত পুনরায় পড়তে বলেননি, তেমনি ঐ ছাহাবী ঐ রাক'আতটি গণনা করেছিলেন কি-না। সে কথাও বর্ণিত হয়নি।<sup>৪২</sup>

অন্যান্য বিদ্বানগণ জমহূরের মতের বিরোধিতা করেন এবং বলেন যে, শুধুমাত্র রুকু পেলেরই রাক'আত পাওয়া হবে না। কেননা সূরায়ে ফাতিহা পাঠ করা ফরয। যা পরিত্যাগ করলে ছালাত বাতিল হবে ও পুনরায় পড়তে হবে।<sup>৪৩</sup> যেমন ক্বিয়াম, রুকু,

৩৮. ছহীহ নাসাঈ হা/৫৩৯-৪২, ছহীহ ইবনু মাজাহ হা/১১২২।

৩৯. আবুদাউদ আওন সহ, অনুচ্ছেদ নং ১৫২, হা/৮৭৫, ৩/১৪৫ পৃঃ।

৪০. দারাকুতনী হা/১৫৮৭ 'যে ব্যক্তি জুম'আর এক রাক'আত পেল কিংবা পেল না' অনুচ্ছেদ; হাদীছ যঈফ।

৪১. আবুদাউদ আওন সহ হা/৬৬৯-৭০; ছহীহ আবু দাউদ ৬৩৪-৩৫।

৪২. আওনুল মা'বুদ ৩/১৪৬ পৃঃ।

৪৩. ইবনু খুযায়মা, 'ছালাত' অধ্যায়, ৯৩ ও ৯৪ অনুচ্ছেদ, ১/২৪৬-৪৭ পৃঃ।

সিজদা ইত্যাদি ফরয, যার কোন একটি বাদ দিলে ছালাত বাতিল হবে ও পুনরায় নতুনভাবে পড়তে হবে। এক্ষণে যে ব্যক্তি কেবল রুকু পেল, সে ব্যক্তি কিয়াম ও কিরাআতে ফাতিহার দু'টি ফরয তরক করল। অতএব তার ঐ রাক'আত গণ্য হবে না। বরং তাকে আরেক রাক'আত যোগ করে পড়তে হবে। অবশ্য ছালাতে যোগদান করার নেকী তিনি পুরোপুরি পেয়ে যাবেন। এঁদের দলীল সমূহ নিম্নরূপঃ

(১) হযরত আবু হুরায়রা (রাঃ) হ'তে বর্ণিত রাসূলুল্লাহ (ছাঃ) এরশাদ করেন, 'فَمَا أَدْرَكْتُمْ فَصَلُّوا وَمَا فَاتَكُمْ فَأَتِمُّوا' 'এক্বামত শুনে তোমরা দৌড়ে যেয়ো না। বরং স্বাভাবিকভাবে হেঁটে যাও। তোমাদের জন্য স্থিরতা অবলম্বন করা আবশ্যিক। অতঃপর তোমরা জামা'আতে ছালাতের যতটুকু পাও, ততটুকু আদায় কর এবং যেটুকু ছুটে যায় সেটুকু পূর্ণ কর'।<sup>৪৪</sup> ইমাম বুখারী বলেন, এখানে ঐ ব্যক্তি কেবল রুকু পেয়েছে। কিন্তু কিয়াম ও কিরাআতে ফাতিহার দু'টি ফরয পায়নি। অতএব তাকে শেষে এক রাক'আত যোগ করে ঐ ছুটে যাওয়া ফরয দু'টি পূর্ণ করতে হবে'।<sup>৪৫</sup>

(২) হযরত আবু হুরায়রা (রাঃ) কর্তৃক একটি 'মওকুফ' হাদীছে বর্ণিত হয়েছে যে,

'إِنْ أَدْرَكْتَ الْقَوْمَ رُكُوعًا لَمْ تَعْتَدْ بِتِلْكَ الرُّكْعَةِ،' 'যদি তুমি জামা'আতকে রুকু অবস্থায় পাও, তাহ'লে তুমি ওটাকে রাক'আত হিসাবে গণ্য কর না'। হাফেয ইবনু হাজার বলেন, আবু হুরায়রা (রাঃ) থেকে এটিই প্রসিদ্ধ। এর বিপরীতে ইবনু খুযায়মা-তে আবু হুরায়রা (রাঃ)-এর বরাতে যে মরফু হাদীছ এসেছে, তার কোন ভিত্তি নেই (لَا أُصَلِّ لَهُ)।<sup>৪৬</sup> তাবেঈ বিদ্বান মুজাহিদ বলেন, সূরায়ে ফাতিহা পড়তে ভুলে গেলে আমরা সে রাক'আত গণনা করতাম না (لَا نُعَدُّ تِلْكَ الرُّكْعَةَ)।<sup>৪৭</sup>

ইবনু হযম বলেন, রাক'আত পূর্ণ হওয়ার জন্য তার উপরে অবশ্য করণীয় হ'ল কিয়াম ও কিরাআত পাওয়া। তিনি দৃঢ়তার সাথে বলেন, রাক'আত ও অন্য কোন রুকন ছুটে যাওয়ার মধ্যে কোন পার্থক্য নেই। ফলে ইমামের সাথে যোগদানের সময় কোন রাক'আত ছুটে গেলে তা যেমন পরে আদায় করতে হয়, অনুরূপভাবে সূরায়ে ফাতিহা ছুটে গেলে সেটাও পরে আদায় করতে হবে। কেননা ওটাও অন্যতম রুকন, যা আদায় করা ফরয। এক্ষণে 'সূরায়ে ফাতিহা ছুটে গেলেও ছালাত হয়ে যাবে' বলে যদি দাবী করা হয়, তবে তার জন্য স্পষ্ট ও ছহীহ দলীল প্রয়োজন হবে। অথচ তা পাওয়া যায় না। তিনি বলেন, কেউ কেউ আগ বেড়ে এ বিষয়ে ইজমা-এর দাবী

৪৪. মুত্তাফাকু আলাইহ, মিশকাত হা/৬৮৬, 'আযান দেবীতে দেওয়া' অনুচ্ছেদ।

৪৫. জুয'উল কিরাআত, মাসআলা ১০৬ পৃঃ ৪৬।

৪৬. লায়লুল আওত্বার ৩/৬৮-৬৯।

৪৭. বুখারী, জুয'উল কিরাআত পৃঃ ১৩।

করেছেন। ঐ ব্যক্তি ঐ বিষয়ে মিথ্যাবাদী। কেননা আবু হুরায়রা (রাঃ) হ'তে বর্ণিত হয়েছে যে, তিনি সূরায়ে ফাতিহা পড়তে না পারলে ঐ রাক'আত গণনা করতেন না'। অমনিভাবে যায়েদ বিন ওয়াহাব থেকেও বর্ণিত হয়েছে।<sup>৪৮</sup>

ইমাম শাওকানী বলেন, ইমাম ও মুক্তাদী সকলের জন্য সর্বাবস্থায় প্রতি রাক'আতে সূরায়ে ফাতিহা পাঠ করা 'ফরয'। বরং এটি ছালাত সিদ্ধ হওয়ার অন্যতম শর্ত। অতএব যে ব্যক্তি ধারণা করে যে, এটা ছাড়াই ছালাত সিদ্ধ হবে, তাকে এমন স্পষ্ট দলীল পেশ করতে হবে, যা পূর্বে বর্ণিত না সূচক 'আম' দলীলগুলিকে 'খাছ' করতে পারে।<sup>৪৯</sup>

ক্বিরাআতের আদবঃ সূরায়ে ফাতিহার প্রতিটি আয়াতের শেষে ওয়াক্ফ করা সুন্নাত।<sup>৫০</sup> অমনিভাবে ক্বিরাআত সুন্দর আওয়াযে পড়ার নির্দেশ রয়েছে।<sup>৫১</sup> কিন্তু গানের সুরে পড়া যাবে না।<sup>৫২</sup> কোনরূপ 'তাকাল্লুফ' বা ভাণ করা যাবে না। বরং স্বাভাবিক সুন্দর কণ্ঠে কুরআন তেলাওয়াত করাই শরীয়তে পসন্দনীয়। সূরায়ে ফাতিহার প্রতিটি আয়াত থেমে থেমে পড়া সুন্নাত।<sup>৫৩</sup> অমনিভাবে ক্বিরাআতের শুরুতে ও শেষে 'সাক্তা' করা অর্থাৎ সামান্য বিরতি দেওয়া সুন্নাত।<sup>৫৪</sup> ১ম রাক'আতের ক্বিরাআত কিছুটা দীর্ঘ হওয়া বাঞ্ছনীয়।<sup>৫৫</sup> অমনিভাবে কুরআনের শুরুর দিক থেকে শেষের দিকে ক্বিরাআত করা ভাল। তবে আগপিছ হ'লে দোষ নেই। এমনকি একই সূরা দুই রাক'আতে পড়া চলে।<sup>৫৬</sup>

এইভাবে জেহরী ছালাতে সূরায়ে ফাতিহা পাঠের পর ইমাম হ'লে যেকোন সূরা পাঠ করবে। আর মুক্তাদী হ'লে কিছুই না পড়ে কেবল ইমামের ক্বিরাআত মনোযোগ দিয়ে শুনবে। তবে যোহর ও আছরের ছালাতে ইমাম মুক্তাদী সকলে সূরায়ে ফাতিহা সহ অন্য সূরা পড়বে এবং ৩য় ও ৪র্থ রাক'আতে কেবল সূরায়ে ফাতিহা পড়বে। যেমন আবু ক্বাতাদাহ (রাঃ) হ'তে বর্ণিত হয়েছে,

৪৮. নায়লুল আওত্বার ৩/৬৯।

৪৯. প্রাগুক্ত, ৩/৬৭-৬৮।

৫০. দারাকুত্বনী হা/১১৭৮, তিরমিযী, মিশকাত হা/২২০৫ 'ফাযায়েলে কুরআন' অধ্যায়।

৫১. আহমাদ, আবুদাউদ, ইবনু মাজাহ, দারেমী, মিশকাত হা/২১৯৯, ২২০৮।

৫২. মুত্তাফাকু আলাইহ, মিশকাত হা/২১৯২।

৫৩. আহমাদ, আবুদাউদ, নায়ল ৩/৪৯-৫০; তিরমিযী, মিশকাত হা/২২০৫ 'তেলাওয়াতের আদব' অনুচ্ছেদ।

৫৪. আবুদাউদ, তিরমিযী, ইবনু মাজাহ, নায়লুল আওত্বার ৩/৯৫ পৃঃ।

৫৫. মুত্তাফাকু আলাইহ, মিশকাত হা/৮২৮; 'ছালাতে ক্বিরাআত' অনুচ্ছেদ, নায়ল ৩/৭৬।

৫৬. বুখারী, মুসলিম প্রভৃতি; নায়ল ৩/৮০-৮২ পৃঃ 'প্রতি রাক'আতে দু'টি সূরা গড়া ও তারতীব' অনুচ্ছেদ।

كَانَ النَّبِيُّ (ص) يَقْرَأُ فِي الظُّهْرِ فِي الْأُولَيَيْنِ بِأَمِّ الْكِتَابِ وَسُورَتَيْنِ وَ فِي الرَّكْعَتَيْنِ الْأَخْرَيَيْنِ بِأَمِّ الْكِتَابِ ... وَ هَكَذَا فِي الْعَصْرِ مُتَّفَقٌ عَلَيْهِ -

‘রাসূল (ছাঃ) যোহরের প্রথম দু’রাক‘আতে সূরায়ে ফাতিহা ও অন্য দু’টি সূরা পড়তেন এবং শেষের দু’রাক‘আতে কেবল সূরায়ে ফাতিহা পড়তেন। কখনো কখনো আমরা আয়াত শুনতে পেতাম। তিনি প্রথম রাক‘আতে এতটুক দীর্ঘ করতেন, যা দ্বিতীয় রাক‘আতে করতেন না। অনুরূপ করতেন আছরে ও ফজরে’।<sup>৫৭</sup> শেষের দু’রাক‘আতেও কোন কোন ছাহাবী সূরা মিলাতেন বলে জানা যায়।<sup>৫৮</sup>

৬. সশব্দে আমীন (أَمِينَ بِالْجَهْرِ): অতঃপর জেহরী ছালাতে ইমামের সূরায়ে ফাতিহা পাঠ শেষে ইমাম-মুজাদী সকলে সরবে ‘আমীন’ বলবে। ইমামের আগে নয় বরং ইমামের ‘আমীন’ বলার সাথে সাথে মুজাদীর ‘আমীন’ বলা ভাল। তাতে ইমামের পিছে পিছে মুজাদীর সূরায়ে ফাতিহা পাঠ করা সম্ভব হয় এবং ইমাম, মুজাদী ও ফেরেশতাদের ‘আমীন’ সম্মিলিতভাবে হয়। যেমন এরশাদ হয়েছে,

عَنْ أَبِي هُرَيْرَةَ قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ إِذَا أَمَّنَ الْإِمَامُ فَأَمَّنُوا.. وَفِي رِوَايَةٍ: إِذَا قَالَ الْإِمَامُ وَلَا الضَّالِّينَ فَقُولُوا أَمِينَ فَإِنَّ الْمَلَائِكَةَ تَقُولُ أَمِينَ وَإِنَّ الْإِمَامَ يَقُولُ أَمِينَ، فَمَنْ وَافَقَ تَأْمِينَهُ تَأْمِينَ الْمَلَائِكَةِ غُفِرَ لَهُ مَا تَقَدَّمَ مِنْ ذَنْبِهِ رَوَاهُ الْجَمَاعَةُ وَأَحْمَدُ - وَفِي رِوَايَةٍ عَنْهُ قَالَ: كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ إِذَا قَالَ أَحَدُكُمْ: أَمِينَ، وَقَالَتِ الْمَلَائِكَةُ فِي السَّمَاءِ أَمِينَ، فَوَافَقَتْ إِحْدَاهُمَا الْأُخْرَى، غُفِرَ لَهُ مَا تَقَدَّمَ مِنْ ذَنْبِهِ، رَوَاهُ الشَّيْخَانُ وَالْمَوْطَأُ - وَعَنْ وَائِلِ بْنِ حُجْرٍ قَالَ: سَمِعْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ قَرَأَ غَيْرَ الْمَغْضُوبِ عَلَيْهِمْ وَلَا الضَّالِّينَ فَقَالَ أَمِينَ، وَ مَدَّ بِهَا صَوْتَهُ رَوَاهُ أَبُو دَاوُدَ وَالتِّرْمِذِيُّ وَابْنُ مَاجَةَ -

কুতুবে সিদ্দাহ সহ অন্যান্য হাদীছ গ্রন্থে বর্ণিত উপরোক্ত হাদীছগুলির সারকথা হ’ল এই যে, রাসূলুল্লাহ (ছাঃ) এরশাদ করেন, যখন ইমাম ‘আমীন’ বলেন কিংবা ‘ওয়াল্লায্ যা-ল্লীন’ পাঠ শেষ করেন, তখন তোমরা সকলে ‘আমীন’ বল। কেননা যার ‘আমীন’ আসমানে ফেরেশতাদের ‘আমীন’-এর সাথে মিলে যাবে, তার পূর্বকার সকল গুনাহ মাফ করা হবে’।<sup>৫৯</sup> ওয়ায়েল বিন হুজর (রাঃ) বলেন, আমি রাসূলুল্লাহ

৫৭. মুত্তাফাকু আলাইহ, মিশকাত হা/৮২৮ ‘ছালাতে কিরাআত’ অনুচ্ছেদ’ নায়ল ৩/৭৬, ৪/২৪ পৃঃ।

৫৮. মুওয়াত্তা, মির‘আত ১/৬০০।

৫৯. মুত্তাফাকু আলাইহ, মিশকাত হা/৮২৫ ‘ছালাতে কিরাআত’ অনুচ্ছেদ।

(ছাঃ)-কে ‘গায়রিল মাগযূবে...’ বলার পরে তাঁকে উচ্চৈঃস্বরে আমীন বলতে শুনলাম’ আবু হুরায়রা (রাঃ) থেকেও অনুরূপ বর্ণনা এসেছে।<sup>৬০</sup>

‘আমীন’ অর্থঃ **اَللّٰهُمَّ اسْتَجِبْ** ‘হে আল্লাহ! তুমি কবুল কর’। আলিফ -এর উপরে ‘মাদ্দ’ বা ‘খাড়া যবর’ দু’টিই পড়া জায়েয আছে।<sup>৬১</sup> ইমাম যুহরী বলেন, ‘রাসূলুল্লাহ (ছাঃ) নিজে সশব্দে ‘আমীন’ বলতেন। আত্মা বলেন, আবদুল্লাহ বিন যুবায়ের (রাঃ) সরবে ‘আমীন’ বলতেন। তাঁর সাথে মুক্তাদীদের ‘আমীন’ -এর আওয়াযে মসজিদ গুঞ্জরিত হ’য়ে উঠত’।<sup>৬২</sup> এক্ষণে যদি কোন ইমাম ‘আমীন’ না বলেন, কিংবা নীরবে বলেন, তবুও মুক্তাদী সরবে ‘আমীন’ বলবেন।<sup>৬৩</sup> অনুরূপভাবে যদি কেউ ‘আমীন’ বলার সময় জামা‘আতে যোগদান করেন, তবে তিনি প্রথমে ‘আমীন’ বলে নিবেন ও পরে চুপে চুপে সূরায়ে ফাতিহা পড়বেন। ইমামের ঐ সময় পরবর্তী কিরাআত শুরু করা থেকে কিছু সময় বিরতি দেওয়া বা ‘সাকতা’ করা সূনাত।\* ‘আমীন’ শুনে কারু গোস্বা হওয়া উচিৎ নয়। কেননা মা আয়েশা (রাঃ) হ’তে বর্ণিত রাসূলুল্লাহ (ছাঃ) এরশাদ করেন,

عن عائشة عن النبي (ص) قال: مَا حَسَدَتْكُمْ الْيَهُودُ عَلَيَّ شَيْءٍ مَّا حَسَدَتْكُمْ عَلَيَّ السَّلَامُ وَالتَّأْمِينُ رواه أحمد و ابن ماجه والطبراني و في رواية عنها بلفظ: مَا حَسَدَتْكُمْ الْيَهُودُ عَلَيَّ شَيْءٍ مَّا حَسَدَتْكُمْ عَلَيَّ قَوْلِ آمِينَ -

‘ইহুদীরা তোমাদের সবচেয়ে বেশী হিংসা করে তোমাদের ‘সালাম’ ও ‘আমীন’ -এর কারণে’।<sup>৬৪</sup>

উল্লেখ্য যে, ‘আমীন’ বলার পক্ষে ১৭টি হাদীছ এসেছে।<sup>৬৫</sup> যার মধ্যে ‘আমীন’ আস্তে বলার পক্ষে শো‘বা থেকে একটি রেওয়ায়াত আহমাদ ও দারাকুত্নীতে এসেছে

بِصَوْتِهِ **خَفِضَ** او **أَخْفَى** بِهَا صَوْتَهُ বলে। যার অর্থ ‘আমীন’ বলার সময় রাসূলের (ছাঃ)

৬০. দারাকুত্নী হা/১২৫৩-৫৫, ৫৭, ৫৯; আবুদাউদ, তিরমিযী, দারেমী, মিশকাত হা/৮৪৫।

৬১. মানযারী, আত-তারগীব হা/৫১১, হাশিয়া -আলবানী, পৃঃ ১/২৭৮।

৬২. বুখারী তা‘লীক্ব, ১/১০৭ পৃঃ; ফত্বুল বারী হা/৭৮০-৮১; মুসলিম হা/৪১০, ১/৩০৭ পৃঃ; মুওয়াত্তা ‘ছালাত’ অধ্যায় হা/৪৪, ১/৫২ পৃঃ।

৬৩. হুহীহ ইবনু খুযায়মা হা/৫৭৫, অনুচ্ছেদ সংখ্যা ১৩৯।

৬৪. আহমাদ, ইবনু মাজাহ হা/৮৫৬, হুহীহ ইবনু খুযায়মা হা/৫৭৪, আত-তারগীব হা/৫১২, রওয়াতুন নাদিইয়াহ ১/২৭১, তাবারানী, নায়ল ৩/৭৪।

৬৫. রওয়াতুন নাদিইয়াহ ১/২৭১।



আওয়ায নিম্নস্বরে হ'ত'। একই রেওয়ায়াত সুফিয়ান ছওরী (রাঃ) থেকে এসেছে رَفَعَ بِهَا صَوْتَهُ বলে। যার অর্থ- 'তাঁর আওয়ায উচ্চৈঃস্বরে হ'ত।' হাদীছ বিশারদ পণ্ডিতগণের নিকটে শো'বা থেকে বর্ণিত নিম্নস্বরে 'আমীন' বলার হাদীছটি (مضطرب) 'মুযত্বারাব'। অর্থাৎ যার সনদ ও মতনে নাম ও শব্দগত ভুল থাকার কারণে 'যঈফ'। পক্ষান্তরে সুফিয়ান ছওরী (রাঃ) বর্ণিত সরবে আমীন বলার হাদীছটি এসব ত্রুটি থেকে মুক্ত হওয়ার কারণে 'ছহীহ'।<sup>৬৬</sup> অতএব বুখারী ও মুসলিম সহ বিভিন্ন ছহীহ হাদীছে বর্ণিত জেহরী ছালাতে সশব্দে 'আমীন' বলার বিশুদ্ধ সুন্নাতের উপরে আমল করাই নিরপেক্ষ মুমিনের কর্তব্য। তাছাড়া ইমামের সশব্দে সূরায়ে ফতিহা পাঠ শেষে 'ছিরাতুল মুস্তাক্বীম'-এর হেদায়াত প্রার্থনার সাথে মুক্তাদীদের নীরবে সমর্থন দান কিছুটা বিসদৃশ বৈ-কি!

৭. রুকুঃ কিরাআত শেষে মহাপ্রভু আল্লাহর সম্মুখে সশব্দচিত্তে মাথা ও পিঠ ঝুঁকিয়ে রুকুতে যেতে হবে। রুকুতে যাওয়ার সময় 'আল্লা-হু আকবর' বলে তাকবীরের সাথে দুই হাত কাঁধ পর্যন্ত সোজাভাবে উঠাবে। অতঃপর দুই হাতের আঙ্গুল খোলা রেখে দুই হাঁটুর উপরে ভর দিয়ে রুকু করবে। রুকুর সময় পিঠ ও মাথা সোজা ও সমান্তরাল থাকবে। হাঁটু ও কনুই সোজা থাকবে। অতঃপর নযর স্থির রেখে সৃষ্টিকর্তা আল্লাহর মহত্ত্ব ঘোষণা ও নিজের ক্ষমা প্রার্থনায় মনোনিবেশ করে দো'আ পড়তে থাকবে।

রুকু ও সিজদার জন্য হাদীছে অনেকগুলি দো'আ এসেছে। তন্মধ্যে রুকুর জন্য سُبْحَانَ رَبِّيَ الْعَظِيمِ (সুবহা-না রক্বিয়াল 'আযীম) 'মহা পবিত্র আমার প্রতিপালক যিনি মহান' এবং সিজদার জন্য سُبْحَانَ رَبِّيَ الْأَعْلَى (সুবহা-না রক্বিয়াল আ'লা) 'মহা পবিত্র আমার প্রতিপালক যিনি সর্বোচ্চ'<sup>৬৭</sup> সর্বাধিক প্রচলিত। এ দু'টি দো'আ কমপক্ষে তিনবার পড়বে। বেশীর কোন সংখ্যা নির্দিষ্ট নেই।<sup>৬৮</sup> উর্ধে দশবার পড়ার হাদীছ 'যঈফ'।<sup>৬৯</sup> তবে রাসূলুল্লাহ (ছাঃ) জীবনের শেষদিকে এসে রুকু ও সিজদাতে অধিক সময় নিম্নোক্ত দো'আটি পড়তেন-

سُبْحَانَكَ اللَّهُمَّ رَبَّنَا وَبِحَمْدِكَ اللَّهُمَّ اغْفِرْ لِي رَوَاهُ الْجَمَاعَةُ إِلَّا الترمذی-

৬৬. দারাকুত্বনী হা/১২৫৬-এর ভাষ্য, রওয়াতুন নাদিইয়াহ ১/২৭২, নায়লুল আওত্বার ৩/৭৫।

৬৭. আবুদাউদ, তিরমিযী, মিশকাত হা/৮৮১।

৬৮. আলবানী, ছিফাতু ছালা-তিন নবী পৃঃ ১১৩ 'রুকুর দো'আ সমূহ' অনুচ্ছেদ, টীকা ২,৩।

৬৯. তিরমিযী আবুদাউদ, নাসাঈ, মিশকাত হা/৮৮০, ৮৮৩।

(সুবহা-নাকা আল্লা-হুমা রব্বানা ওয়া বিহাম্দিকা আল্লা-হুমাগ্ফিরলী) ‘হে আল্লাহ হে আমাদের প্রতিপালক! আপনার প্রশংসার সাথে আপনার পবিত্রতা ঘোষণা করছি। হে আল্লাহ! আপনি আমাকে ক্ষমা করুন! ৭০

এতদ্ব্যতীত রুকুর অন্যান্য দো‘আ সমূহ যেমন-

১- سُبْحَانَ رَبِّيَ الْعَظِيمِ وَبِحَمْدِهِ (ابوداود وغيره)

২- سُبُّوحٌ قُدُّوسٌ رَبُّ الْمَلَائِكَةِ وَالرُّوحِ (مسلم) ৩- سُبْحَانَ ذِي الْجَبَرُوتِ وَالْمَلَكُوتِ وَالْكِبْرِيَاءِ وَالْعَظْمَةِ (ابوداود و النسائي) ৪- اَللّٰهُمَّ لَكَ رَكَعْتُ وَبِكَ اَمَنْتُ وَلَكَ اَسَلْتُ خَشَعْتُ لَكَ سَمْعِي وَبَصَرِي وَمُخِي وَعَظْمِي وَعَصْبِي (مسلم وغيره), صفة صلاة النبي (ص) للالباني ص ۱۱۶-۱۱۹-

৮. ক্বওমাঃ রুকু থেকে উঠে সুস্থির হ’য়ে দাঁড়ানোকে ‘ক্বওমা’ বলে। ‘ক্বওমা’র সময় দু’হাত কাঁধ পর্যন্ত উঠাবে ও ইমাম-মুজাদী সকলে বলবে سَمِعَ اللَّهُ لِمَنْ حَمَدَهُ (সামি‘আল্লা-হু লিমান হামিদাহ) অর্থাৎ ‘আল্লাহ শোনেন তার কথা যে তাঁর প্রশংসা করে’। অতঃপর বলবে رَبَّنَا وَلَكَ الْحَمْدُ (রব্বানা ওয়া লাকাল হাম্দ) অথবা اَللّٰهُمَّ رَبَّنَا لَكَ الْحَمْدُ (আল্লা-হুমা রব্বানা লাকাল হাম্দ) ‘হে আল্লাহ হে আমাদের প্রভু! আপনার জন্যই বাবতীয় প্রশংসা’। ৭১ রাসূলুল্লাহ (ছাঃ) বলেন, যার কথা ফেরেশতাদের কথার সঙ্গে মিলে যাবে তার বিগতদিনের সকল গোনাহ মাফ করা হবে। ৭২ এই সময় অন্য দো‘আও রয়েছে। যেমন-

رَبَّنَا وَلَكَ الْحَمْدُ حَمْدًا كَثِيرًا طَيِّبًا مُّبَارَكًا فِيهِ (رَبَّنَا وَ لَكَ الْحَمْدُ) (হাম্দান কাছীরান ত্বাইয়েবাম মুবা-রাকান ফীহি) ‘হে আমাদের প্রতিপালক! আপনার জন্য অগণিত প্রশংসা, যা পবিত্র ও বরকতময়’। ৭৩ দো‘আটির ফযীলত বর্ণনা করে রাসূলে করীম (ছাঃ) এরশাদ করেন, ‘আমি ৩০-এর অধিক ফেরেশতাকে দেখলাম যে, তারা প্রতিযোগিতা করছে কে এই দো‘আ পাঠকারীর নেকী আগে লিখবে’। ৭৪

৭০. তিরমিযী ব্যতীত কুতুবে সিত্তাহর সকল গ্রন্থে সংকলিত; নায়লুল আওত্বার ৩/১০৬।

৭১. মুত্তাফাক আলাইহ, মিশকাত হা/ ৮৭৪, ৭৫, ৭৬।

৭২. বুখারী, মুসলিম, ছিফাতু ছালাতিন নবী পৃঃ ১১৮।

৭৩. আবুদাউদ, মালেক, আহমাদ, ফিকহ ১/১২২, মিশকাত হা/৮৭৭।

৭৪. বুখারী প্রভৃতি, মিশকাত হা/ ৮৭৭, ফিকহুস সুন্নাহ ১/১২২।

এতদ্ব্যতীত ক্বওমায় নিম্নোক্ত দো‘আ সমূহ পড়া যেতে পারে-

১- رَبَّنَا وَلَكَ الْحَمْدُ حَمْدًا كَثِيرًا طَيِّبًا مُبَارَكًا فِيهِ كَمَا يُحِبُّ رَبُّنَا وَيَرْضَى (مالك والبخارى وابوداود) ২- اللَّهُمَّ رَبَّنَا لَكَ الْحَمْدُ مِلءَ السَّمَوَاتِ وَمِلءَ الْأَرْضِ وَمِلءَ مَا شِئْتَ مِنْ شَيْءٍ بَعْدُ (مسلم)-

প্রকাশ থাকে যে, ক্বওমার সময় সুস্থির হয়ে না দাঁড়ালে এবং সিজদা থেকে উঠে সুস্থির ভাবে না বসলে ছালাত সিদ্ধ হবে না।<sup>৭৫</sup> হযরত আবু মাসউদ আনছারী (রাঃ) হ'তে বর্ণিত রাসূলুল্লাহ (ছাঃ) এরশাদ করেন,

لَا تُجْزِيءُ صَلَاةُ الرَّجُلِ حَتَّى يُقِيمَ ظَهْرَهُ فِي الرُّكُوعِ وَالسُّجُودِ رَوَاهُ أَبُو دَاوُدَ وَالتِّرْمِذِيُّ وَغَيْرُهُمَا-

‘ঐ ব্যক্তির ছালাত যথেষ্ট হবে না, যে ব্যক্তি রুকু ও সিজদাতে তার পিঠ সোজা রাখেনি’।<sup>৭৬</sup>

\* ক্বওমার সময় অনেকে হাত কিছুক্ষণ খাড়াভাবে ধরে রাখেন, কেউ পুনরায় বুকে হাত বাঁধেন। এ বিষয়ে ছহীহ হাদীছ সমূহ নিম্নরূপঃ

বিখ্যাত ছাহাবী আবু হুমায়েদ সা‘এদী (রাঃ) যিনি ১০ জন ছাহাবীর সম্মুখে রাসূলের (ছাঃ) ছালাতের নমুনা প্রদর্শন করে সত্যায়ন প্রাপ্ত হয়েছিলেন, সেখানে বলা হয়েছে-

فَإِذَا رَفَعَ رَأْسَهُ اسْتَوَى حَتَّى يَعُودَ كُلُّ فَقَارٍ مَكَانَهُ رَوَاهُ الْبَخَارِيُّ-

‘তিনি রুকু থেকে মাথা উঠিয়ে সোজা দাঁড়িয়ে গেলেন এমনভাবে যে, মেরুদণ্ডের জোড় সমূহ স্ব স্ব স্থানে ফিরে আসে’।<sup>৭৭</sup> ছালাতে ভুলকারী (مسيئ الصلاة) জনৈক ব্যক্তিকে রাসূল (ছাঃ) কর্তৃক হাতে-কলমে ছালাত শিখানোর প্রসিদ্ধ হাদীছে এসেছে

‘যতক্ষণ না অস্থি সমূহ স্ব স্ব জোড়ে ফিরে আসে’।<sup>৭৮</sup>

ওয়ালেদ বিন হুজর ও সাহল বিন সা‘দ (রাঃ) বর্ণিত ‘ছালাতে বাম হাতের উপরে ডান হাত রাখার ‘আম’ হাদীছের<sup>৭৯</sup> উপরে ভিত্তি করে রুকুর আগে ও পরে কিয়াম ও

৭৫. তিরমিযী প্রভৃতি, মিশকাত হা/৮৭৮, নায়ল ৩/১১৩-১৪।

৭৬. আবুদাউদ, তিরমিযী প্রভৃতি, মিশকাত ‘রুকু’ অধ্যায় হা/৮৭৮; নায়ল ৩/১১৩-১৪।

৭৭. বুখারী, মিশকাত হা/৭৯২।

৭৮. তিরমিযী, নাসাঈ, মিশকাত হা/৮০৪।

৭৯. মিশকাত হা/৭৯৭, ৭৯৮।

সর্বাবস্থায় বুকে হাত বাঁধার কথা বলা হয়েছে।<sup>৮০</sup> কিন্তু বর্তমান হাদীছগুলি রুকু পরবর্তী 'ক্বওমা'র অবস্থা সম্পর্কে 'খাছ' ভাবে বর্ণিত হয়েছে। তাছাড়া বুকে হাত বাঁধার বিষয়টি হাতের স্বাভাবিক অবস্থার পরিপন্থী। এক্ষেত্রে শিরদাঁড়া সহ দেহের অন্যান্য অঙ্গি সমূহকে স্ব স্ব জোড়ে ফিরে আসতে গেলে ক্বওমার সময় হাতকে তার স্বাভাবিক অবস্থায় ছেড়ে দেওয়াটাই ছহীহ হাদীছ সমূহের যথাযথ অনুসরণ বলে অনুমিত হয়।<sup>৮১</sup>

৯. রাফ'উল ইয়াদায়েনঃ অর্থ- দু'হাত উঁচু করা। রুকু থেকে উঠে ক্বওমাতে দাঁড়িয়ে দু'হাত কেবলামুখী স্বাভাবিকভাবে উঁচু করে তিন বা চার রাক'আত বিশিষ্ট ছালাতে মোট চারবার 'রাফ'উল ইয়াদায়েন' করতে হয়। (১) তাকবীরে তাহরীমার সময় (২) রুকুতে যাওয়ার সময় (৩) রুকু হ'তে উঠে সোজা হ'য়ে দাঁড়াবার সময় এবং (৪) ৩য় রাক'আতে দাঁড়িয়ে বুকে হাত বাঁধার সময়।

রুকুতে যাওয়া ও রুকু হ'তে ওঠার সময়ে 'রাফ'উল ইয়াদায়েন' করা সম্পর্কে চার খলীফা সহ প্রায় ২৫ জন ছাহাবী থেকে বর্ণিত ছহীহ হাদীছ সমূহ রয়েছে। একটি হিসাব মতে 'রাফ'উল ইয়াদায়েন'-এর হাদীছের রাবী সংখ্যা 'আশারায়ে মুবাশ্শারাহ'<sup>৮২</sup> সহ অন্যান্য ৫০ জন ছাহাবী<sup>৮৩</sup> এবং সর্বমোট ছহীহ হাদীছ ও আছারের সংখ্যা অন্যান্য ৪০০ শত।<sup>৮৪</sup> ইমাম সৈয়ত্বী 'রাফ'উল ইয়াদায়েন'-এর হাদীছকে 'মুতাওয়াতির' পর্যায়ের বলে মন্তব্য করেছেন।<sup>৮৫</sup> ইমাম বুখারী বলেন,

لَمْ يَثْبُتْ عَنْ أَحَدٍ مِنْهُمْ تَرْكُهُ وَقَالَ: لَا أَسَانِيدَ أَصَحُّ مِنْ أَسَانِيدِ الرَّفْعِ

৮০. দারুল ইফতা, মাজমু'আ রাসা-ইল ফিছ-ছালাতঃ ১৩৪-৩৯; বদীউদ্দীন শাহ সিন্দী, যিয়াদাতুল খুশু' পৃঃ ১-৩৮।

৮১. বিস্তারিত দেখুনঃ আলবানী, ছিফাতু ছালা-তিন নবী পৃঃ ১২০ টীকা, 'ক্বওমা দীর্ঘ করা' অনুচ্ছেদ; ঐ, মিশকাত হা/৮০৪ টীকা, 'ছালাতের বিবরণ' অনুচ্ছেদ; মুহিবুল্লাহ শাহ সিন্দী, নায়লুল আমানী পৃঃ ১-৪২; মাসিক আত-তাহরীক ডিসেম্বর' ৯৮ পৃঃ ৫০-৫১।

৮২. 'আশারায়ে মুবাশ্শারাহ' অর্থাৎ স্ব স্ব জীবদ্দশায় জান্নাতের সুসংবাদ প্রাপ্ত দশজন ছাহাবী। তাঁরা হলেনঃ ১. আবু বকর 'আবদুল্লাহ বিন 'উছমান (মৃঃ ১৩ হিঃ বয়স ৬৩ বৎসর) ২. 'উমার বিনুল খাত্তাব (মৃঃ ২৩ হিঃ বয়স ৬০) ৩. 'উছমান বিন 'আফফান (মৃঃ ৩৫ হিঃ বয়স অন্যান্য ৮৩) ৪. 'আলী ইবনু আবী ত্বালিব (মৃঃ ৪০ হিঃ বয়স ৬০) ৫. আবু 'উবায়দাহ 'আমের বিন 'আবদুল্লাহ বিনুল জাররাহ (মৃঃ ১৮ হিঃ বয়স ৫৮) ৬. 'আবদুর রহমান বিন 'আওফ (মৃঃ ৩২ হিঃ বয়স ৭৫) ৭. ত্বালহা বিন 'উবায়দুল্লাহ (মৃঃ ৩৬ হিঃ বয়স ৬২) ৮. যোবায়ের বিনুল 'আওয়াম (মৃঃ ৩৬ হিঃ বয়স ৭৫) ৯. সা'ঈদ বিন যায়েদ বিন 'আমর (মৃঃ ৫১ হিঃ বয়স ৭১) ১০. সা'দ বিন আবী ওয়াক্কাহ (মৃঃ ৫৫ হিঃ বয়স ৮২) রাযিয়াল্লা-হু আনহুম।

৮৩. ফিকহুস সুনাহ ১/১০৭; ফাৎহুল বারী ২/২৫৮।

৮৪. মাজদুদ্দীন ফীরোয়াবাদী, সফরুস সা'আদাত (ফার্সী থেকে উর্দু) পৃঃ ১৫।

৮৫. তুহফাতুল আহওয়াযী ২/১০০, ১০৬।

অর্থাৎ কোন ছাহাবী রাফ'উল ইয়াদায়েন তরক করেছেন বলে প্রমাণিত হয়নি। তিনি আরও বলেন, 'রাফ'উল ইয়াদায়েন'-এর হাদীছ সমূহের সনদের চেয়ে বিশুদ্ধতম সনদ আর নেই'।<sup>৮৬</sup> রাফ'উল ইয়াদায়েন সম্পর্কে প্রসিদ্ধতম হাদীছ সমূহের কয়েকটি নিম্নরূপঃ

(১) আব্দুল্লাহ ইবনে ওমর (রাঃ) বলেন,

أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ كَانَ يَرْفَعُ يَدَيْهِ حَذْوَ مَنْكَبَيْهِ إِذَا افْتَتَحَ الصَّلَاةَ وَإِذَا كَبَّرَ لِلرُّكُوعِ وَإِذَا رَفَعَ رَأْسَهُ مِنَ الرُّكُوعِ رَفَعَهُمَا كَذَلِكَ .. متفق عليه، و في رواية عنه: وَإِذَا قَامَ مِنَ الرُّكُعَتَيْنِ رَفَعَ يَدَيْهِ .. رواه البخاري -

'রাসূলুল্লাহ (ছাঃ) ছালাতের শুরুতে, রুকুতে যাওয়াকালীন ও রুকু হ'তে ওঠাকালীন সময়ে... এবং তৃতীয় রাক'আতে দাঁড়ানোর সময়ে 'রাফ'উল ইয়াদায়েন' করতেন'...।<sup>৮৭</sup> হাদীছটি বায়হাক্বীতে বর্ধিতভাবে বর্ণিত হয়েছে যে, فَمَا زَالَتْ تَلْكُ

এইভাবেই তাঁর ছালাত জারি ছিল, যতদিন না তিনি আল্লাহর সাথে মিলিত হন'। অর্থাৎ আমৃত্যু তিনি রাফ'উল ইয়াদায়েন সহ ছালাত আদায় করেছেন। ইমাম বুখারীর উস্তাদ আলী ইবনুল মাদীনী বলেন, এই হাদীছ আমার নিকটে সমস্ত উম্মতের উপরে 'হুজ্জাত' বা দলীল স্বরূপ (حُجَّةٌ عَلَى الْخَلْقِ)। যে ব্যক্তি এটা শুনবে, তার উপরেই এটা আমল করা কর্তব্য হবে। হাসান বছরী ও হামীদ বিন হেলাল বলেন, সকল ছাহাবী উক্ত তিন স্থানে রাফ'উল ইয়াদায়েন করতেন'।<sup>৮৮</sup>

(২) মালিক বিনুল হুওয়াইরিছ (রাঃ) বলেন,

أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ كَانَ إِذَا كَبَّرَ رَفَعَ يَدَيْهِ حَتَّى يُحَازِي بِهِمَا أُذُنَيْهِ وَإِذَا رَكَعَ رَفَعَ يَدَيْهِ حَتَّى يُحَازِي بِهِمَا أُذُنَيْهِ وَإِذَا رَفَعَ رَأْسَهُ مِنَ الرُّكُوعِ فَقَالَ سَمِعَ اللَّهُ لِمَنْ حَمِدَهُ فَعَلَّ مِثْلَ ذَلِكَ رَوَاهُ مُسْلِمٌ -

'রাসূলুল্লাহ (ছাঃ) যখন ছালাতের জন্য 'তাকবীরে তাহরীমা' দিতেন, তখন হাত দু'টি

৮৬. ফাৎহুল বারী ২/২৫৭।

৮৭. মুত্তাফাকু আলাইহ, বুখারী, মিশকাত হা/৭৯৪।

৮৮. নায়লুল আওত্বার ৩/১২-১৩; ফিকহুস সুন্নাহ ১/১০৮।

স্বীয় দুই কান পর্যন্ত হাত উঠাতেন। একইভাবে তিনি রুকুতে যাওয়ার সময় ও রুকু হ'তে উঠার সময় অনুরূপ করতেন এবং 'সামি'আল্লা-হু লিমান হামিদাহ' বলতেন'।<sup>৮৯</sup>

উল্লেখ্য যে, শত শত ছহীহ হাদীছের বিপরীতে তাকবীরে তাহরীমা ব্যতীত বাকী সময়ে 'রাফ'উল ইয়াদায়েন' না করার পক্ষে প্রধানতঃ যে চারটি হাদীছ পেশ করা হয়ে থাকে, তার সবগুলিই 'যঈফ'। তন্মধ্যে হযরত আবদুল্লাহ বিন মাস'উদ (রাঃ) বর্ণিত হাদীছটিই সর্বাধিক প্রসিদ্ধ। যেমন আলক্বামা বলেন যে, একদা ইবনু মাস'উদ (রাঃ) আমাদেরকে বলেন, **أَلَا أُصَلِّيْ بِكُمْ صَلَاةَ رَسُوْلِ اللّٰهِ صَلَّى اللّٰهُ عَلَيْهِ وَ** 'আমি কি তোমাদের নিকটে রাসূল (ছাঃ)-এর ছালাত আদায় করব? এই বলে তিনি ছালাত আদায় করেন। কিন্তু তাকবীরে তাহরীমার সময় একবার ব্যতীত অন্য সময় আর রাফ'উল ইয়াদায়েন করলেন না'।<sup>৯০</sup> উক্ত হাদীছ সম্পর্কে ইবনু হিব্বান বলেন, **هَذَا**

**أَحْسَنُ خَبَرٍ رَوَى أَهْلَ الْكُوفَةِ فِي نَفْيِ رَفْعِ الْيَدَيْنِ فِي الصَّلَاةِ عِنْدَ الرُّكُوعِ وَ** عند الرفع منه و هو في الحقيقة أضعف شيء يعول عليه لأن فيه عللاً تبطله 'রাফ'উল ইয়াদায়েন' না করার পক্ষে কূফাবাসীদের এটিই সবচেয়ে বড় দলীল হ'লেও এটিই সবচেয়ে দুর্বলতম দলীল। কেননা এর মধ্যে এমন সব বিষয় রয়েছে, যা একে বাতিল গণ্য করে'।<sup>৯১</sup> শায়খ আলবানী বলেন, হাদীছটিকে ছহীহ মেনে নিলেও তা 'রাফ'উল ইয়াদায়েন'-এর পক্ষে বর্ণিত ছহীহ হাদীছ সমূহের বিপরীতে পেশ করা যাবে না। কেননা **لأنه نافٍ و تلك مثبتة و من المقرر في علم الأصول أن المثبت مقدم على النافي** 'এটি না-বোধক এবং ঐগুলি হাঁ-বোধক। ইল্মে হাদীছ-এর মূলনীতি অনুযায়ী হাঁ-বোধক হাদীছ না-বোধক হাদীছের উপরে অগ্রাধিকার যোগ্য'।<sup>৯২</sup> শাহ অলিউল্লাহ মুহাদ্দিছ দেহলভী বলেন,

**والذي يَرْفَعُ أَحَبُّ إِلَيَّ مِمَّنْ لَا يَرْفَعُ فَإِنَّ أَحَادِيثَ الرُّفْعِ أَكْثَرُ وَ أَثْبَتُ**

অর্থাৎ যে মুছল্লী রাফ'উল ইয়াদায়েন করে, ঐ মুছল্লী আমার নিকটে অধিক প্রিয় ঐ মুছল্লীর চাইতে, যে রাফ'উল ইয়াদায়েন করে না। কেননা রাফ'উল ইয়াদায়েন-এর হাদীছ সংখ্যায় বেশী ও অধিকতর মযবুত'।<sup>৯৩</sup>

৮৯. মুসলিম হা/৩৯১, ১/২৯৩ পৃঃ।

৯০. তিরমিযী, আবু দাউদ, নাসাঈ, মিশকাত হা/৮০৯।

৯১. নায়লুল আওত্বার ৩/১৪; ফিকহুস সুন্নাহ ১/১০৮।

৯২. হাশিয়া মিশকাত (আলবানী) ১/২৫৪ পৃঃ।

৯৩. হুজ্জাতুল্লাহিল বালিগাহ ২/১০।

ফাযায়েলঃ হযরত আবদুল্লাহ বিন ওমর (রাঃ) বলেন, 'রাফ'উল ইয়াদায়েন হ'ল ছালাতের সৌন্দর্য (رفع اليدين من زينة الصلاة)।' রুকুতে যাওয়ার সময় ও রুকু হ'তে ওঠার সময় কেউ রাফ'উল ইয়াদায়েন না করলে তিনি তাকে ছোট পাথর ছুঁড়ে মারতেন।<sup>৯৪</sup> উকুবাহ বিন আমের (রাঃ) বলেন, প্রত্যেক রাফ'উল ইয়াদায়েন-এ ১০টি করে নেকী আছে।<sup>৯৫</sup> যদি কেউ রাসূলের সুন্নাতের মহব্বতে একটি নেকীর কাজ করেন, আল্লাহ বলেনঃ আমি তার নেকী ১০ থেকে ৭০০ গুণে বর্ধিত করি (বুখারী, মুসলিম হহীহ তারগীব হা/১৬)। শাহ অলিউল্লাহ মুহাদিছ দেহলভী (রহঃ) বলেন, 'রাফ'উল ইয়াদায়েন' হ'ল فعل تعظيمى বা সম্মান সূচক কর্ম, যা মুছল্লীকে আল্লাহর দিকে রুজু হওয়ার ব্যাপারে ও ছালাতে তন্ময় হওয়ার ব্যাপারে হুঁশিয়ার করে দেয়।<sup>৯৬</sup>

রাসূলুল্লাহ (ছাঃ) সিজদায় রাফ'উল ইয়াদায়েন করতেন না' (হহীহ ইবনু খুযায়মা হা/৬৯৪)। ইবনুল ক্বাইয়িম বলেন, ইমাম আহমাদ-এর অধিকাংশ বর্ণনাও একথা প্রমান করে যে, তিনি সিজদাকালে রাফ'উল ইয়াদায়েন-এর সমর্থক ছিলেন না' (মাসায়েলে ইমাম আহমাদ, মাসআলা নং ৩২০)। শায়খ আলবানী সিজদায় রাফ'উল ইয়াদায়েন সম্পর্কে যে হাদীছ বর্ণনা করেছেন (ছিফাত পৃঃ ১২১), তার অর্থ রুকুর ন্যায় রাফ'উল ইয়াদায়েন নয়। বরং সাধারণভাবে সিজদা থেকে হাত উঠানো বুঝানো হয়েছে বলে অনুমিত হয়।

রুকু-সিজদার আদবঃ বারা' বিন আবেব (রাঃ) বলেন যে, রাসূলুল্লাহ (ছাঃ)-এর রুকু, সিজদা, দুই সিজদার মধ্যকার বৈঠক এবং রুকু পরবর্তী ক্বওমা-র স্থিতিকাল প্রায় সমান হ'ত (মুত্তাফাকু আলাইহ, মিশকাত হা/৮৬৯ 'রুকু' অনুচ্ছেদ)। আনাস (রাঃ) বলেন, এগুলি এত দীর্ঘ হ'ত যে, মুক্তাদীগণের কেউ কেউ ধারণা করত যে, রাসূল (ছাঃ) হয়তোবা ছালাতের কথা ভুলে গেছেন' (মুত্তাফাকু আলাইহ, ইরওয়া হা/৩০৭)।

১০. সিজদাঃ রুকু হ'তে উঠে ক্বওমার দো'আ শেষে 'আল্লা-হু আকবর' বলে আল্লাহর নিকটে সিজদার লুটিয়ে পড়বে এবং 'রুকু' অধ্যায়ে বর্ণিত সিজদার দো'আ সমূহ পাঠ করবে। নাক সহ কপাল, দু'হাত, দু'হাঁটু ও দু'পায়ের আংগুল সমূহের অগ্রভাগ সহ মোট ৭টি অঙ্গ মাটিতে লাগিয়ে সিজদা করবে।<sup>৯৭</sup> সিজদায় যাওয়ার সময় প্রথমে মাটিতে দু'হাত রাখবে। কেননা এ বিষয়ে আবু হুরায়রা (রাঃ) হ'তে বর্ণিত وَلِيَضَعَ يَدَيْهِ قَبْلَ رُكْبَتَيْهِ হাদীছটি 'হহীহ'।<sup>৯৮</sup> কিন্তু ওয়ায়েল বিন হজ্র

(রাঃ) বর্ণিত আগে হাঁটু রাখার হাদীছটি 'যঈফ'।<sup>৯৯</sup> সিজদার সময় হাত দু'খানা

৯৪. নায়লুল আওত্বার ৩/১২; ফাৎহ ২/২৫৭।

৯৫. নায়লুল আওত্বার ৩/১২।

৯৬. হজ্জাতুল্লাহিল বালিগাহ ২/১০।

৯৭. মুত্তাফাকু আলাইহ, মিশকাত, হা/৮৮৭।

৯৮. আবু দাউদ, মিশকাত হা/৮৯৯।

৯৯. আবু দাউদ, মিশকাত হা/৮৯৮; হাশিয়া মিশকাত ১/২৮২ পৃঃ; নায়ল ৩/১১৬, মির'আত ১/৬৫৫-৫৬; ইরওয়া হা/৩৫৭।

কেবলামুখী করে<sup>১০০</sup> মাথার দু'পাশে কাঁধ বা কান বরাবর<sup>১০১</sup> মাটিতে স্বাভাবিকভাবে রাখবে<sup>১০২</sup> এবং কনুই ও বগল ফাঁকা রাখবে।<sup>১০৩</sup> হাঁটু বা মাটিতে ঠেস দিবে না।<sup>১০৪</sup> সিজদা এমন (লম্বা) হবে, যাতে বুকের নীচ দিয়ে বকরীর বাচ্চা যাওয়ার মত ফাঁকা থাকে।<sup>১০৫</sup> সহজ হিসাবে প্রত্যেক মুছল্লী নিজ হাঁটু হ'তে নিজ হাতের দেড় হাত দূরে সিজদা দিলে ঠিক হ'তে পারে। সিজদা হ'তে উঠে বাম পায়ের পাতার উপরে বসবে ও ডান পায়ের পাতা খাড়া রাখবে।<sup>১০৬</sup>

অতঃপর দো'আ পাঠ শেষে তাকবীর বলে দ্বিতীয় সিজদায় যাবে। অনেক মহিলা সিজদায় গিয়ে মাটিতে নিতম্ব রাখেন। এই মর্মে 'মারাসীলে আবুদাউদে' বর্ণিত হাদীছটি নিতান্তই 'যঈফ'।<sup>১০৭</sup> এর ফলে সিজদার সুন্নাতী তরীকা বিনষ্ট হয়। সিজদা হ'ল ছালাতের অন্যতম প্রধান 'রুকন'। সিজদা নষ্ট হ'লে ছালাত নষ্ট হওয়ার সমূহ সম্ভাবনা রয়েছে। অতএব এই বদভ্যাস এখুনি পরিত্যাজ্য।

সিজদা হ'ল দো'আ কবুলের সর্বোত্তম সময়। যেমন রাসূলুল্লাহ (ছাঃ) এরশাদ করেন,

أَقْرَبُ مَا يَكُونُ الْعَبْدُ مِنْ رَبِّهِ وَهُوَ سَاجِدٌ فَأَكْثَرُوا الدُّعَاءَ رَوَاهُ مُسْلِمٌ وَ فِي رِوَايَةٍ لَهُ عَنْ ابْنِ عَبَّاسٍ قَالَ: فَاجْتَهِدُوا فِي الدُّعَاءِ فَقَمِنَ أَنْ يُسْتَجَابَ لَكُمْ -

'বান্দা স্বীয় প্রভুর সর্বাধিক নিকটে পৌঁছে যায়, যখন সে সিজদায় রত হয়। অতএব তোমরা ঐ সময় বেশী বেশী প্রার্থনা কর'। অন্য বর্ণনায় এসেছে, 'তোমরা প্রার্থনায় সাধ্যমত চেষ্টা কর। আশা করা যায়, তোমাদের দো'আ কবুল করা হবে'।<sup>১০৮</sup> রুকু ও সিজদাতে কমপক্ষে তিনবার তাসবীহ পাঠ করতে হবে (আহমাদ, আবুদাউদ, ইবনু মাজাহ প্রভৃতি, হিফাত পৃঃ ১১৩, ১২৭)। তিন হ'তে দশবার দো'আ পাঠের যে হাদীছ এসেছে, তা যঈফ।<sup>১০৯</sup> দুই সিজদার মধ্যে সংক্ষিপ্ত বৈঠকে হাতের আঙ্গুলগুলি দুই হাঁটুর মাথার দিকে স্বাভাবিকভাবে কেবলামুখী ছড়ানো থাকবে।<sup>১১০</sup> এই সময়ে নিম্নোক্ত দো'আ পড়বে-

দুই সিজদার মধ্যকার দো'আঃ

اللَّهُمَّ اغْفِرْ لِيْ وَارْحَمْنِيْ وَاجْبُرْنِيْ وَاهْدِنِيْ وَعَافِنِيْ وَارْزُقْنِيْ

رواه الترمذي وأبو داود عن ابن عباس إلا أن أبا داود روي: وَعَافِنِيْ مَكَانَ وَاجْبُرْنِيْ

১০০. 'কেননা দুই হাতও সিজদা করে যেমন মুখমুগল সিজদা করে থাকে'। - মুওয়াত্তা, মিশকাত হা/৯০৫।

১০১. ফিকহুস্ সুন্নাহ ১/১২৩; আবুদাউদ, তিরমিযী, নায়ল ৩/১২১।

১০২. মুত্তাফাকু আলাইহ, বুখারী, মিশকাত হা/ ৭৯২, ৮৮৮।

১০৩. মুত্তাফাকু আলাইহ, মিশকাত হা/৮৯১।

১০৪. আবুদাউদ, মিশকাত হা/৮০১। ১০৫. মুসলিম, আবুদাউদ, মিশকাত হা/৮৯০।

১০৬. বুখারী, আবুদাউদ, মিশকাত হা/৭৯২, ৮০১।

১০৭. সুবুলুস্ সালাম শরহে বুলুগল মারাম 'সিজদার অঙ্গ সমূহ' অধ্যায়, ১/৩৭০।

১০৮. মুসলিম, মিশকাত হা/৮৯৪, ৮৭৩; নায়ল ৩/১০৯; মির'আত ১/৬৩৫।

১০৯. আবুদাউদ, তিরমিযী, মিশকাত হা/৮৮০, ৮৮৩। ১১০. নাসাই, ফিকহুস্ সুন্নাহ ১/১২৬।



উচ্চারণঃ আল্লা-হুমাগ্ফিরলী ওয়ার হাম্নী ওয়াজ্বুরনী ওয়াহ্দিনী ওয়া 'আ-ফেনী ওয়ারযুক্নী ।

অর্থঃ 'হে আল্লাহ! আপনি আমাকে ক্ষমা করুন, আমার উপরে রহম করুন, আমার অবস্থার সংশোধন করুন, আমাকে সৎপথ প্রদর্শন করুন, আমাকে সুস্থতা দান করুন ও আমাকে রুযী দান করুন' ।

অতঃপর ২য় সিজদা করবে ও দো'আ পড়বে । ২য় ও ৪র্থ রাক'আতে দাঁড়াবার প্রাক্কালে সিজদা থেকে উঠে সামান্য সময়ের জন্য স্থির হ'য়ে বসা সুন্নাত । একে 'জালসায়ে ইস্তেরা-হাত' বা স্থতির বৈঠক বলে । যেমন- হাদীছে এসেছে,

عن مَالِكِ بْنِ الْحُوَيْرِثِ أَنَّهُ رَأَى النَّبِيَّ صَلَّى اللَّهُ عَلَيْهِ وَسَلَّمَ يُصَلِّي، فَإِذَا كَانَ فِيهِ وَتَرٍ مِّنْ صَلَاتِهِ لَمْ يَنْهَضْ حَتَّى يَسْتَوِيَ قَاعِدًا رَوَاهُ الْجَمَاعَةُ إِلَّا مُسْلِمًا  
وابن ماجه -

অর্থাৎ 'ছালাতের মধ্যে যখন রাসূলুল্লাহ (ছাঃ) বেজোড় রাক'আতগুলিতে পৌছতেন, তখন দাঁড়াতেন না, যতক্ষণ না সুস্থির হ'য়ে বসতেন' ।<sup>১১১</sup> একই রাবীর অন্য বর্ণনায় এসেছে,

وإذا رَفَعَ رَأْسَهُ عَنِ السَّجْدَةِ الثَّانِيَةِ جَلَسَ وَأَعْتَمَدَ عَلَى الْأَرْضِ ثُمَّ قَامَ 'যখন রাসূলুল্লাহ (ছাঃ) দ্বিতীয় সিজদা হ'তে মাথা উঠাতেন, তখন বসতেন এবং মাটির উপরে (দু'হাতে) ভর দিতেন । অতঃপর দাঁড়াতেন' ।<sup>১১২</sup>

'হাতের উপরে ভর না দিয়ে তীরের মত সোজা দাঁড়িয়ে যেতেন' বলে ত্বাবারাণী কাবীরে বর্ণিত হাদীছটি 'মওয়ূ' বা জাল এবং উক্ত মর্মে বর্ণিত সকল হাদীছই 'যঈফ' ।<sup>১১৩</sup>

ইসহাক্ব বিন রাহুওয়াইহ বলেন, যুবক হোক বা বৃদ্ধ হোক রাসূল (ছাঃ) থেকে এ সুন্নাত জারি আছে যে, তিনি প্রথমে মাটিতে দু'হাতে ভর দিতেন । অতঃপর দাঁড়াতেন । দশজন ছাহাবী কর্তৃক প্রত্যক্ষভাবে সত্যায়ন প্রাপ্ত আবু হুমায়েদ (রাঃ) প্রদর্শিত ছালাতের প্রসিদ্ধ হাদীছেও এর স্পষ্ট দলীল রয়েছে ।<sup>১১৪</sup>

১১১. বুখারী, মিশকাত হা/৭৯৬; নায়ল ৩/১৩৮ ।

১১২. বুখারী ফত্বহসহ হা/৮২৪, 'ওঠার সময় কিভাবে মাটির উপরে ভর দেবে' অনুচ্ছেদ, 'আযান' অধ্যায় ২/৩৫৩-৫৪ ।

১১৩. ছিফাত পৃঃ ১৩৭; সিলসিলা যাঈফাহ হা/৫৬২, ৯২৯, ৯৬৮; নায়ল ৩/১৩৮-১৩৯ ।

১১৪. বুখারী, ছিফাত পৃঃ ১৩৬-৩৭ টীকা; তিরমিযী, আবুদাউদ, নাসাঈ, ইরওয়া হা/৩০৪, ৩৬২, ২/১৩, ৮২-৮৩ ।

### সিজদার ফযীলতঃ

(১) কিয়ামতের দিন রাসূলুল্লাহ (ছাঃ) ঈমানদারদের চিনে নিবেন তাদের সিজদার স্থান ও ওয়ূর অঙ্গ সমূহের ঔজ্জ্বল্য দেখে' (আহমাদ, ছিফাত পৃঃ ১৩১)।

(২) আল্লাহ জাহান্নামবাসীদের মধ্য থেকে কিছু লোকের উপরে অনুগ্রহ করবেন এবং ফেরেশতাদের বলবেন, যাও ঐসব লোকদের বের করে নিয়ে এসো, যারা আল্লাহর ইবাদত করেছে। অতঃপর ফেরেশতাগণ তাদের সিজদার চিহ্ন দেখে চিনে নিবেন ও বের করে আনবেন। বনু আদমের সর্বাঙ্গ আগুনে খেয়ে নিবে, সিজদার চিহ্ন ব্যতীত। কেননা আল্লাহ পাক জাহান্নামের উপরে হারাম করেছেন সিজদার চিহ্ন খেয়ে ফেলতে' (মুত্তাফাকু আলাইহ, ছিফাত পৃঃ ১৩১)।

### সিজদার অন্যান্য দো'আ সমূহঃ

১- اللَّهُمَّ اغْفِرْ لِي ذَنْبِي كُلَّهُ دِقَّةً وَ جَلَّةً وَ أَوْلَهُ وَ آخِرَهُ وَ عَلَانِيَتَهُ وَ سِرَّهُ  
 - (مسلم) ২- سُبْحَانَكَ اللَّهُمَّ وَ بِحَمْدِكَ لَا إِلَهَ إِلَّا أَنْتَ (مسلم) ৩- اللَّهُمَّ  
 اغْفِرْ لِي مَا أَسْرَرْتُ وَمَا أَعْلَنْتُ (مصنف ابن أبي شيبة والنسائي  
 والحاكم) ৪- اللَّهُمَّ إِنِّي أَعُوذُ بِرِضَاكَ مِنْ سَخَطِكَ وَأَعُوذُ بِمُعَافَاتِكَ مِنْ  
 عُقُوبَتِكَ وَأَعُوذُ بِكَ مِنْكَ، لَا أَحْصِي ثَنَاءً عَلَيْكَ، أَنْتَ كَمَا أَتْنَيْتَ عَلَى  
 نَفْسِكَ (مسلم) ৫- اللَّهُمَّ لَكَ سَجَدْتُ وَ بِكَ أَمَنْتُ وَ لَكَ أَسْلَمْتُ وَ أَنْتَ  
 رَبِّي، سَجَدَ وَجْهِي لِلَّذِي خَلَقَهُ وَ صَوَّرَهُ فَأَحْسَنَ صُورَهُ وَ شَقَّ سَمْعَهُ وَ  
 بَصَرَهُ، فَتَبَارَكَ اللَّهُ أَحْسَنُ الْخَالِقِينَ (مسلم)، صفة صلاة النبي ص ۱۲۷-۱۲۹

১১. শেষ বৈঠকঃ ২য় রাক'আত শেষ করে বৈঠকে বসবে। যদি ১ম বৈঠক হয়, তবে কেবল 'আত্তাহিইয়া-তু' পড়ে ৩য় রাক'আতের জন্য উঠে যাবে।<sup>১১৫</sup> আর যদি শেষ বৈঠক হয়, তবে 'আত্তাহিইয়া-তু' পড়ার পরে দরুদ, দো'আয়ে মাছুরাহ এবং সম্ভব হ'লে অন্য দো'আ পড়বে।<sup>১১৬</sup> ১ম বৈঠকে বাম পা পেতে তার উপরে বসবে ও শেষ বৈঠকে ডান পায়ের তলা দিয়ে বাম পায়ের অগ্রভাগ বের করে দিয়ে নিতম্বের উপরে বসবে ও ডান পা খাড়া রাখবে। এই সময় ডান পায়ের আঙ্গুলের অগ্রভাগ কেবলামুখী রাখার চেষ্টা করবে।<sup>১১৭</sup> বৈঠকের সময় বাম হাতের আঙ্গুলগুলো বাম

১১৫. ফিকহুস্ সুন্নাহ ১/১২৯; আবুদাউদ, তিরমিযী, নাসাঈ, মিশকাত হা/৯১৫।

১১৬. ফিকহুস্ সুন্নাহ ১/১২৯; মির'আত ১/৭০৪।

১১৭. বুখারী, আবুদাউদ, মিশকাত /৭৯২, ৮০১; নায়ল ৩/১৪৩-৪৫ 'তশাহুদে বসার নিয়ম' অনুচ্ছেদ।

হাঁটুর প্রান্ত বরাবর কেবলামুখী ও স্বাভাবিক অবস্থায় থাকবে<sup>১১৮</sup> এবং ডান হাত ৫৩-এর ন্যায় মুষ্টিবদ্ধ থাকবে ও শাহাদাত অঙ্গুলী দ্বারা ইশারা করবে।<sup>১১৯</sup> সালাম ফিরানোর আগ পর্যন্ত ইশারা করতে থাকবে।<sup>১২০</sup> ইশারার সময় আঙ্গুল সামান্য হেলিয়ে উঁচু রাখা যায় (নাসাঈ হা/১২৭৫)। একটানা নাড়াতে গেলে এমন দ্রুত নাড়ানো উচিত নয়, যা পাশের মুছল্লীর দৃষ্টি কেড়ে নেয়' (মুত্তাঃ মিশকাত হা/৭৫৭; মির'আত ১/৬৬৯)। 'আশহাদু' বলার সময় আঙ্গুল উঠাবে ও 'ইল্লাল্লা-হু' বলার পর আঙ্গুল নামাবে' বলে যে কথা চালু আছে তার কোন ভিত্তি নেই।<sup>১২১</sup> মুছল্লীর নয়র ইশারা বরাবর থাকবে। তার বাইরে যাবে না।<sup>১২২</sup> এই সময় নিম্নোক্ত দো'আসমূহ পড়বে-

(ক) তাশাহুদ (আত্তাহিইয়া-তু) :

التَّحِيَّاتُ لِلَّهِ وَالصَّلَوَاتُ وَالطَّيِّبَاتُ ، السَّلَامُ عَلَيْكَ أَيُّهَا النَّبِيُّ وَ  
رَحْمَةُ اللَّهِ وَبَرَكَاتُهُ ، السَّلَامُ عَلَيْنَا وَ عَلَى عِبَادِ اللَّهِ الصَّالِحِينَ أَشْهَدُ  
أَنْ لَا إِلَهَ إِلَّا اللَّهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ ، متفق عليه-

উচ্চারণঃ আত্তাহিইয়া-তু লিল্লা-হি ওয়াছু ছালাওয়া-তু ওয়াত্ ত্বাইয়িবা-তু আসসা-লামু 'আলায়কা আইয়ুহান নাবিইয়ু ওয়া বাহমাতুল্লা-হি ওয়া বারাকা-তুহু। আসসালা-মু 'আলায়না ওয়া 'আলা 'ইবা-দিল্লা-হিছু ছা-লেহীন, আশহাদু আন্ লা- ইলা-হা ইল্লাল্লা-হু ওয়া আশহাদু আন্না মুহাম্মাদান 'আবদুহু ওয়া রাসূলুহু।

অর্থঃ 'সমস্ত সম্মান, সমস্ত উপাসনা ও সমস্ত পবিত্র বিষয় আল্লাহর জন্য। হে নবী! আপনার উপরে শান্তি এবং আল্লাহর রহমত ও বরকত সমূহ নাযিল হউক। শান্তি বর্ষিত হউক আমাদের উপরে ও আল্লাহর নেককার বান্দাদের উপরে। আমি সাক্ষ্য দিচ্ছি যে, আল্লাহ ব্যতীত কোন উপাস্য নেই এবং আমি সাক্ষ্য দিচ্ছি যে, মুহাম্মাদ (ছাঃ) তাঁর বান্দা ও রাসূল'।<sup>১২৩</sup>

১১৮. মুসলিম, মিশকাত হা/৯০৭।

১১৯. মুসলিম, মিশকাত হা/৯০৬।

১২০. মুসলিম, মিশকাত হা/৯০৭-৮; আবুদাউদ, নাসাঈ, দারেমী, মিশকাত হা/৯১১; ঐ, হা/৯১২ -এর টীকা ৪ দ্রষ্টব্য।

১২১. আলবানী, মিশকাত 'তাশাহুদ' অনুচ্ছেদের ১ম হাদীছের (হা/৯০৬)-এর টীকা-২; ঐ, ছিফাতু ছালা-তিন নবী ১৪০ পৃঃ।

১২২. আহমাদ, আবুদাউদ, মিশকাত হা/৯১৭, ৯১১; আবুদাউদ, মিশকাত হা/৯১২।

১২৩. মুত্তাফাকু আলাইহ, মিশকাত হা/৯০৯।

## নবীকে সম্বোধনঃ

তাশাহহুদ সম্পর্কিত সকল ছহীহ মরফু হাদীছে রাসূল (ছাঃ)-কে সম্বোধন সূচক 'আইয়ুহান্নাবী' শব্দ বর্ণিত হয়েছে। কিন্তু রাসূলুল্লাহ (ছাঃ)-এর মৃত্যুর পরে আব্দুল্লাহ ইবনে মাসউদ (রাঃ) প্রমুখ কতিপয় ছাহাবী 'আইয়ুহান্নাবী'-এর পরিবর্তে 'আলান্নাবী' বলতে থাকেন। যেমন বুখারী 'ইস্তীযা-ন' অধ্যায়ে এবং অন্যান্য হাদীছ গ্রন্থে বর্ণিত হয়েছে। অথচ সকল ছাহাবী, তাবেঈন, মুহাদ্দেছীন, ফুকাহা পূর্বের ন্যায় 'আইয়ুহান্নাবী' পড়েছেন। এই মতবিরোধের কারণ হ'ল এই যে, রাসূলের জীবদ্দশায় তাঁকে সম্বোধন করে 'আইয়ুহান্নাবী' বলা গেলেও তাঁর মৃত্যুর পরে তো আর তাঁকে ঐভাবে সম্বোধন করা যায় না। কেননা সরাসরি এরূপ গায়েবী সম্বোধন কেবল আল্লাহকেই করা যায়। মৃত্যুর পরে রাসূলকে এভাবে সম্বোধন করলে তাঁকে আল্লাহ সাব্যস্ত করা হ'য়ে যায়। সে কারণে কিছু সংখ্যক ছাহাবী 'আলান্নাবী' অর্থাৎ নবীর উপরে বলতে থাকেন।

পক্ষান্তরে অন্য সকল ছাহাবী পূর্বের ন্যায় 'আইয়ুহান্নাবী' বলতে থাকেন। ত্বীবী বলেন, এটা এজন্য যে, রাসূলুল্লাহ (ছাঃ) তাঁদেরকে উক্ত শব্দেই তাশাহহুদ শিক্ষা দিয়েছিলেন। তার কোন অংশ তাঁর মৃত্যুর পরে পরিবর্তন করতে বলে যাননি। অতএব ছাহাবায়ে কেরাম উক্ত শব্দ পরিবর্তনে রাযী হননি। ছাহেবে মির'আত বলেন, জীবিত-মৃত কিংবা উপস্থিতি-অনুপস্থিতির বিষয়টি ধর্তব্য নয়। কেননা স্বীয় জীবদ্দশায়ও তিনি বহু সময় ছাহাবীদের থেকে দূরে সফরে বা জিহাদের ময়দানে থাকতেন। তবুও তারা তাশাহহুদে নবীকে সম্বোধন করে 'আইয়ুহান্নাবী' বলতেন। তারা তাঁর উপস্থিতি বা অনুপস্থিতিতে উক্ত সম্বোধনে কোন পরিবর্তন করতেন না। তাছাড়া বিষয়টি রাসূলুল্লাহ (ছাঃ)-এর জন্য খাছ বিষয়াবলীর অন্তর্ভুক্ত। এটা স্রেফ তাশাহহুদের মধ্যেই পড়া যাবে, অন্য সময় নয়।

উল্লেখ্য যে, এই সম্বোধনের মধ্যে কবর পুজারীদের জন্য কোন দলীল নেই। তারা এই হাদীছের দ্বারা রাসূল (ছাঃ)-কে সর্বত্র হাযির-নাযির প্রমাণ করতে চায় ও তাঁকে মনোবাসনা পূর্ণ করার জন্য 'অসীলা' হিসাবে গ্রহণ করতে চায়। এটা পরিষ্কারভাবে 'শিরকে আকবর' বা বড় শিরকের অন্তর্ভুক্ত।

মোল্লা আলী ক্বারী, ছিদ্দীক হাসান খান ভূপালী প্রমুখ ইবনুল মালিক হ'তে এটাকে মে'রাজে আল্লাহ, রাসূল ও জিব্রীলের মধ্যে কথোপকথন হিসাবে বর্ণনা করেছেন। যা ছালাতের বৈঠকে মুছল্লীকে স্মরণ করিয়ে দেওয়া হয়। অর্থাৎ 'আইয়ুহান্নাবী' আল্লাহর পক্ষ হ'তে নবীকে সম্বোধন ও সালাম। অতঃপর নবীর পক্ষ হ'তে সালাম এবং সবশেষে জিব্রীলের পক্ষ হ'তে তাওহীদ ও রিসালাতের সাক্ষ্য প্রদান। ছাহেবে মির'আত বলেন, এই বর্ণনাটির কোন সনদ আমি জানতে পারিনি। যদি পেতাম, তবে কতইনা সুন্দর হ'ত' (মির'আত ১/৬৬৪-৬৫)।

এরপর নিম্নোক্ত দরুদ পাঠ করবে-

(খ) দরুদঃ

اللَّهُمَّ صَلِّ عَلَيَّ مُحَمَّدٌ وَعَلَى آلِ مُحَمَّدٍ كَمَا صَلَّيْتَ عَلَيَّ إِبْرَاهِيمَ وَعَلَى آلِ إِبْرَاهِيمَ إِنَّكَ حَمِيدٌ مَّجِيدٌ ، اللَّهُمَّ بَارِكْ عَلَيَّ مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَيَّ إِبْرَاهِيمَ وَعَلَى آلِ إِبْرَاهِيمَ إِنَّكَ حَمِيدٌ مَّجِيدٌ -

উচ্চারণঃ আল্লা-হুম্মা ছাল্লে 'আলা মুহাম্মাদিউ ওয়া 'আলা আ-লে মুহাম্মাদিন কামা ছাল্লায়তা 'আলা ইবরা-হীমা ওয়া 'আলা আ-লে ইব্রা-হীমা ইন্নাকা হামীদুম মাজীদ । আল্লা-হুম্মা বা-রিক 'আলা মুহাম্মাদিউ ওয়া 'আলা আ-লে মুহাম্মাদিন কামা বা-রকতা 'আলা ইব্রা-হীমা ওয়া 'আলা আ-লে ইব্রা-হীমা ইন্নাকা হামীদুম মাজীদ ।

অর্থঃ 'হে আল্লাহ! আপনি রহমত বর্ষণ করুন মুহাম্মাদ ও মুহাম্মাদের পরিবারের উপরে, যেমন আপনি রহমত বর্ষণ করেছেন ইবরাহীম ও ইবরাহীমের পরিবারের উপরে । নিশ্চয়ই আপনি প্রশংসিত ও সম্মানিত । হে আল্লাহ! আপনি বরকত নাযিল করুন মুহাম্মাদ ও মুহাম্মাদের পরিবারের উপরে, যেমন আপনি বরকত নাযিল করেছেন ইবরাহীম ও ইবরাহীমের পরিবারের উপরে । নিশ্চয়ই আপনি প্রশংসিত ও সম্মানিত' ।<sup>১২৪</sup>

অতঃপর নিম্নের দো'আ পাঠ করবে, যা 'দো'আয়ে মাছুরাহ' নামে পরিচিত । এতদ্ব্যতীত জানা মত অন্যান্য দো'আ পড়বে ।-

(গ) দো'আয়ে মাছুরাহঃ\*

اللَّهُمَّ إِنِّي ظَلَمْتُ نَفْسِي ظُلْمًا كَثِيرًا وَ لَا يَغْفِرُ الذُّنُوبَ إِلَّا أَنْتَ فَاعْفِرْ لِي مَغْفِرَةً مِّنْ عِنْدِكَ وَ ارْحَمْنِي إِنَّكَ أَنْتَ الْغَفُورُ الرَّحِيمُ ، متفق عليه -

উচ্চারণঃ আল্লা-হুম্মা ইন্নী য়ালামতু নাফসী যুলমান কাছীরাঁও অলা ইয়াগ্ফিরল্লয় যুনূবা ইন্না আন্তা, ফাগ্ফিরলী মাগফিরাতাম মিন 'ইনদিকা ওয়ারহামনী ইন্নাকা আন্তাল গাফুরুর রাহীম ।

অর্থঃ 'হে আল্লাহ! আমি আমার নফসের উপরে অসংখ্য যুলুম করেছি । ঐ সব গুনাহ মাফ করার কেউ নেই আপনি ব্যতীত । অতএব আপনি আমাকে আপনার পক্ষ হ'তে বিশেষ ভাবে ক্ষমা করুন এবং আমার উপরে অনুগ্রহ করুন । নিশ্চয়ই আপনি

১২৪. মুত্তাফাকু আলাইহ, মিশকাত হা/৯১৯ ।

\* 'মাছুরাহ' অর্থ 'হাদীছে বর্ণিত' । সেই হিসাবে হাদীছে বর্ণিত সকল দো'আই মাছুরাহ । কেবলমাত্র অত্র দো'আটি নয় । তবে এ দো'আটিই এদেশে 'দো'আয়ে মাছুরাহ' হিসাবে প্রসিদ্ধি লাভ করেছে ।- লেখক ।

ক্ষমাশীল ও দয়াবান' ১২৫

এই সময় নিম্নোক্ত দো'আটি পাঠ করার জন্য বিশেষভাবে তাকীদ এসেছে -

اللَّهُمَّ إِنِّي أَعُوذُ بِكَ مِنْ عَذَابِ جَهَنَّمَ وَ أَعُوذُ بِكَ مِنْ عَذَابِ الْقَبْرِ وَ أَعُوذُ بِكَ مِنْ فِتْنَةِ الْمَسِيحِ الدَّجَالِ وَ أَعُوذُ بِكَ مِنْ فِتْنَةِ الْمَحْيَا وَ الْمَمَاتِ

উচ্চারণঃ আল্লা-হুম্মা ইন্নী আ'উযুবিকা মিন্ 'আযা-বি জাহান্নামা ওয়া আ'উযুবিকা মিন্ 'আযা-বিল ক্বাবরে, ওয়া আ'উযুবিকা মিন্ ফিৎনাতিল মাসীহিদু দাজ্জালি, ওয়া আ'উযুবিকা মিন্ ফিৎনাতিল মাহ্ইয়া ওয়াল মামা-তি ।

অর্থঃ হে আল্লাহ! আমি আপনার আশ্রয় ভিক্ষা করছি জ্বাহান্নামের আযাব হ'তে, কবরের আযাব হ'তে, দাজ্জালের ফিৎনা হ'তে এবং জীবন ও মৃত্যুকালীন ফিৎনা হ'তে' ১২৬ রাসূলুল্লাহ (ছাঃ) তাশাহুদ ও সালামের মধ্যবর্তী সময়ে বিভিন্ন দো'আ পড়তেন ১২৭

সালাম ও দো'আঃ দো'আয়ে মাছুরাহ ও অন্যান্য দো'আ শেষে ডাইনে ও বামে 'আসসালা-মু আলায়কুম ওয়া রাহমাতুল্লা-হ' বলে ১২৮ প্রথম সালামের শেষদিকে 'ওয়া বারাকা-তুহু' বৃদ্ধি করা যাবে (আবুদাউদ, ইবনু খুযায়মা, ছিফাত পৃঃ ১৬৮)। অতঃপর একবার সরবে 'আল্লা-হু আকবার' ১২৯ এবং তিনবার 'আসতাগ্ফিরুল্লা-হ' ও একবার 'আল্লা-হুম্মা আনতাস সালা-মু ওয়া মিনকাস সালা-মু, তাবা-রকতা ইয়া যাল জালা-লে ওয়াল ইকরা-ম' বলে ১৩০ ডাইনে অথবা বামে কিংবা সরাসরি মুক্তাদীগণের দিকে ফিরে বসবে ১৩১ এই সময় রাসূলুল্লাহ (ছাঃ) কখনো পড়েছেন, 'আল্লাহ-হুম্মা ক্বিনী আযা-বাকা ইয়াওমা তাব'আদু ইকা-দাকা'

হে আল্লাহ! আপনার আযাব হ'তে আমাকে রক্ষা করুন। যেদিন আপনি আপনার সকল বান্দাকে উত্থিত করবেন' (মুসলিম, মিশকাত হা/৯৪৭)।

জ্ঞাতব্যঃ দরুদ শরীফে মুহাম্মাদ (ছাঃ) ও তাঁর পরিবারকে ইবরাহীম (আঃ) ও তাঁর পরিবারের সাথে তুলনা করা হয়েছে। এর ফলে মুহাম্মাদ (ছাঃ) ও তাঁর পরিবারের মর্যাদা স্কুন করা হয়েছে বলে মনে হ'লেও প্রকৃত অর্থে তাঁদের মর্যাদা বৃদ্ধি করা

১২৫. মুত্তাফাকু আলাইহ, মিশকাত হা/৯৪২।

১২৬. মুত্তাফাকু আলাইহ, মিশকাত হা/৯৪১।

১২৭. মুসলিম, মিশকাত হা/৮১৩; রিয়াযুছ ছালেহীন 'যিকর' অধ্যায় হা/১৪২৪।

১২৮. আবুদাউদ, তিরমিযী, মিশকাত হা/৯৫০।

১২৯. মুত্তাফাকু আলাইহ, মিশকাত হা/৯৫৯; বুখারী ফৎহসহ হা/৮৪১-৪২।

১৩০. মুসলিম, মিশকাত হা/৯৬১।

১৩১. বুখারী, মুসলিম, মিশকাত হা/৯৪৪-৪৬।

হয়েছে। কেননা মুহাম্মাদ (ছাঃ) স্বয়ং ইবরাহীম (আঃ)-এর পরিবারের একজন সদস্য এবং মানব জাতির শ্রেষ্ঠ সন্তান ও সর্বশেষ রাসূল। পিতা ইবরাহীমের সাথে সন্তান হিসাবে তাঁর তুলনা অমর্যাদাকর নয়। দ্বিতীয়তঃ ইবরাহীম (আঃ)-এর বংশে হাজার হাজার নবী ছিলেন। কিন্তু মুহাম্মাদ (ছাঃ)-এর পরিবারবর্গের মধ্যে কোন নবী না থাকা সত্ত্বেও তাঁদেরকে অগণিত নবী-রাসূল সমৃদ্ধ মহা সম্মানিত ইবরাহীমী বংশের সাথে তুলনা করার মাধ্যমে মুহাম্মাদ (ছাঃ) -এর পরিবারের মর্যাদা নিঃসন্দেহে বৃদ্ধি করা হয়েছে।<sup>১৩২</sup>

### সুন্নাত-নফলের বিবরণঃ

ফরয ব্যতীত সকল ছালাতই নফল বা অতিরিক্ত। তবে যেসব নফল রাসূলুল্লাহ (ছাঃ) নিয়মিত পড়তেন বা পড়তে তাকীদ করতেন, সেগুলিকে ফেকহী পরিভাষায় 'সুন্নাতে মুওয়াক্কাদাহ' বলা হয়। যেমন ফরয ছালাত সমূহের আগে-পিছের সুন্নাত সমূহ। এই সুন্নাতগুলি ক্বাযা হ'লে তা আদায় করতে হয়। ২য় প্রকার সুন্নাত হ'ল 'গায়ের মুওয়াক্কাদাহ', যা আদায় করা সুন্নাত, কিন্তু তাকীদ নেই। যেমন আছরের পূর্বে দুই বা চার রাক'আত সুন্নাত, মাগরিব ও এশার পূর্বে দু' রাক'আত সুন্নাত। ফরয ও সুন্নাতের জন্য স্থান পরিবর্তন ও কিছুক্ষণ দেরী করে উভয় ছালাতের মাঝে পার্থক্য করা উচিত। সুন্নাত বা নফল ছালাত সমূহ মসজিদের চেয়ে বাড়ীতে পড়া উত্তম। রাসূল (ছাঃ) বলেন, বাড়ীতে নফল ছালাত অধিক উত্তম আমার এই মসজিদে ছালাত আদায়ের চাইতে; ফরয ছালাত ব্যতীত' (আবুদাউদ)। অন্য হাদীছে বলা হয়েছে, 'তোমরা তোমাদের বাড়ীতে কিছু ছালাত (অর্থাৎ সুন্নাত-নফল) আদায় কর এবং ওটাকে কবরে পরিণত করো না' (আহমাদ, আবুদাউদ)।

ইমাম নববী বলেন, বাড়ীতে নফল ছালাত আদায়ে উৎসাহ দানের উদ্দেশ্যে এটা হ'তে পারে যে, সেটা 'রিয়া' মুক্ত হয়, বাড়ীতে বরকত হয়, আল্লাহর রহমত এবং ফেরেশতা মণ্ডলী নাযিল হয় ও শয়তান পালিয়ে যায়। সাধারণ নফল ছালাতের জন্য কোন রাক'আত নির্দিষ্ট নেই; যত খুশী পড়া যায়। শক্তি থাকা সত্ত্বেও একই নফল ছালাত কিছু অংশ দাঁড়িয়ে ও কিছু অংশ বসে পড়া যায় (ফিকহুস সুন্নাহ ১/১৩৬-৩৭)।

ফযীলতঃ রাসূলুল্লাহ (ছাঃ) এরশাদ করেন **مَنْ صَلَّى فِي يَوْمٍ وَلَيْلَةٍ اِثْنَتَيْ عَشْرَةَ رَكْعَةً بَنِي لَهُ بَيْتٌ فِي الْجَنَّةِ، اَرْبَعًا قَبْلَ الظُّهْرِ وَرَكْعَتَيْنِ بَعْدَهَا وَرَكْعَتَيْنِ بَعْدَ الْمَغْرِبِ وَرَكْعَتَيْنِ بَعْدَ الْعِشَاءِ وَرَكْعَتَيْنِ قَبْلَ صَلَاةِ الْفَجْرِ،** 'যে ব্যক্তি দিবারাতে ১২ রাক'আত ছালাত আদায় করল, তার জন্য জান্নাতে একটি ঘর তৈরী করা হবে। যোহরের পূর্বে চার, পরে দুই, মাগরিবের পরে দুই, এশার পরে দুই ও ফজরের পূর্বে দুই' (তিরমিযী, মুসলিম)। বুখারীর বর্ণনায় ইবনে ওমর (রাঃ)

-এর বর্ণনায় রাসূলুল্লাহ (ছাঃ) থেকে যোহরের পূর্বে দু'রাক'আত সহ সর্বমোট দশ রাক'আতের নিয়মিত আমলের কথা এসেছে (ফিকহুস সুন্নাহ ১/৪০-৪১)।

সালাম ফিরানোর পরে নিম্নোক্ত দো'আ সমূহ পাঠ করবে-

১- اللَّهُ أَكْبَرُ، اسْتَغْفِرُ اللَّهَ، اسْتَغْفِرُ اللَّهَ، اسْتَغْفِرُ اللَّهَ -

উচ্চারণঃ ১. 'আল্লা-হু আকবার' (একবার)। 'আস্তাগ্ফিরুল্লা-হা' 'আস্তাগ্ফিরুল্লা-হা' 'আস্তাগ্ফিরুল্লা-হ' (তিনবার)।

অর্থঃ আল্লাহ সবচাইতে বড়। আমি আল্লাহর নিকটে ক্ষমা প্রার্থনা করছি।<sup>১৩৩</sup>

২- اللَّهُمَّ أَنْتَ السَّلَامُ وَ مِنْكَ السَّلَامُ، تَبَارَكْتَ يَا ذَا الْجَلَالِ وَالْإِكْرَامِ -

২. আল্লা-হুম্মা আন্তাস্ সালা-মু ওয়া মিন্কাস্ সালা-মু, তাবা-রাক্তা ইয়া যাল জালা-লি ওয়াল ইক্রা-ম।

অর্থঃ 'হে আল্লাহ আপনিই শান্তি, আপনার থেকেই শান্তি আসে। বরকতময় আপনি, হে মর্যাদা ও সম্মানের মালিক'। 'এটুকু পড়েই ইমাম উঠে যেতে পারেন'।<sup>১৩৪</sup>

৩- لَا إِلَهَ إِلَّا اللَّهُ وَحْدَهُ لَا شَرِيكَ لَهُ، لَهُ الْمُلْكُ وَ لَهُ الْحَمْدُ وَ هُوَ عَلِي كُلِّ شَيْءٍ قَدِيرٌ، اللَّهُمَّ لَا مَانِعَ لِمَا أَعْطَيْتَ وَ لَا مُعْطِي لِمَا مَنَعْتَ وَ لَا يَنْفَعُ ذَا الْجَدِّ مِنْكَ الْجَدُّ -

৩. লা ইলা-হা ইল্লাল্লা-হু ওয়াহ্দাহু লা শারীকা লাহু, লাহুল মুল্কু ওয়া লাহুল হাম্দু ওয়া হুয়া 'আলা কুল্লে শাইয়িন ক্বাদীর। আল্লা-হুম্মা লা মা-নে'আ লেমা আ'ত্বায়তা ওয়ালা মু'ত্বিয়া লেমা মানা'তা ওয়ালা ইয়ান্ফা'উ যাল জাদ্দে মিন্কালা জাদ্দু।

অর্থঃ নেই কোন উপাস্য আল্লাহ ব্যতীত, যিনি একক ও শরীকবিহীন। তাঁরই জন্য সকল রাজত্ব ও তাঁরই জন্য যাবতীয় প্রশংসা। তিনি সকল কিছুর উপরে ক্ষমতামালী। হে আল্লাহ আপনি যা দিতে চান, তা রোধ করার কেউ নেই এবং আপনি যা রোধ করেন, তা দেওয়ার কেউ নেই। আপনাকে ছাড়া কোন সম্পদশালী ব্যক্তির সম্পদ তার কোন উপকার করতে পারে না।<sup>১৩৫</sup>

৪. اللَّهُمَّ أَعِنِّي عَلَى ذِكْرِكَ وَ شُكْرِكَ وَ حُسْنِ عِبَادَتِكَ -

৪. আল্লা-হুম্মা আ'ইনী 'আলা যিকরিকা ওয়া শুক্রিকা ওয়া হুসনে ইবা-দাতিকা।

১৩৩. মুত্তাফাকু আলাইহ, মিশকাত হা/৯৫৯; মুসলিম, ঐ হা/৯৬১।

১৩৪. মুসলিম, মিশকাত হা/৯৬০।

১৩৫. মুত্তাফাকু আলাইহ, মিশকাত হা/৯৬২।



অর্থঃ হে আল্লাহ! আপনাকে স্মরণ করার জন্য, আপনার শুকরিয়া আদায় করার জন্য এবং আপনার সুন্দর ইবাদত করার জন্য আমাকে সাহায্য করুন। ১৩৬

৫. اللَّهُمَّ إِنِّي أَعُوذُ بِكَ مِنَ الْجُبْنِ وَ أَعُوذُ بِكَ مِنَ الْبُخْلِ وَ أَعُوذُ بِكَ مِنْ أَرْدَائِ الْعُمَرِ وَأَعُوذُ بِكَ مِنْ فِتْنَةِ الدُّنْيَا وَ عَذَابِ الْقَبْرِ -

৫. আল্লা-হুম্মা ইন্নী আ'উযুবিকা মিনাল জুবনে ওয়া আ'উযুবিকা মিনাল বুখলে ওয়া আ'উযুবিকা মিন আরযালিল 'ওমরে ওয়া আ'উযুবিকা মিন্ ফিৎনাতিদ দুন্ইয়া ওয়া 'আযা-বিল ক্বাবরে।

অর্থঃ 'হে আল্লাহ আমি আপনার নিকটে আশ্রয় প্রার্থনা করছি কাপুরুষতা হ'তে, কৃপণতা হ'তে, অতি বার্ষক্যে পৌছে যাওয়া হ'তে। আমি আপনার আশ্রয় প্রার্থনা করছি দুনিয়ার ফিৎনা হ'তে ও কবরের আযাব হ'তে'। ১৩৭

৬. سُبْحَانَ اللَّهِ وَبِحَمْدِهِ عَدَدَ خَلْقِهِ وَ رِضَا نَفْسِهِ وَ زِينَةَ عَرْشِهِ وَ مِدَادَ كَلِمَاتِهِ -

৬. সুবহা-নাল্লা-হে ওয়া বেহাম্দিহী 'আদাদা খাল্ক্বিহী ওয়া রিযা নাফ্‌সিহী ওয়া যিনাতা 'আর্শিহী ওয়া মিদা-দা কালেমা-তিহী।

অর্থঃ আমি আল্লাহর মহত্ত্ব ও প্রশংসা জ্ঞাপন করছি তাঁর সৃষ্টিকুলের সংখ্যার সমপরিমাণ, তাঁর সত্তার সন্তুষ্টির সমতুল্য এবং তাঁর আরশের ওয়ন ও কালেমা সমূহের ব্যাপ্তি সমপরিমাণ। ১৩৮

৭- رَضِيتُ بِاللَّهِ رَبًّا وَ بِالْإِسْلَامِ دِينًا وَ بِمُحَمَّدٍ نَبِيًّا -

৭. রায়ীতু বিল্লা-হে রাব্বা'ও ওয়া বিল ইসলা-মে দীনা'ও ওয়া বিমুহাম্মাদিন্ নাবিইয়া (৩ বার)।

অর্থঃ আমি সন্তুষ্ট হ'য়ে গেলাম আল্লাহর উপরে প্রতিপালক হিসাবে, ইসলামের উপরে দীন হিসাবে এবং মুহাম্মাদের উপরে নবী হিসাবে। ১৩৯

৮. اللَّهُمَّ أَجِرْنِي مِنَ النَّارِ -

৮. আল্লা-হুম্মা আজিরনী মিনান্ না-রে (৭ বার)।

অর্থঃ হে আল্লাহ তুমি আমাকে জাহান্নাম থেকে পানাহ দাও! ১৪০

১৩৬. আহমাদ, আবুদাউদ, নাসাঈ, মিশকাত হা/ ৯৪৯।

১৩৭. বুখারী, মিশকাত হা/৯৬৪।

১৩৮. মুসলিম, মিশকাত হা/২৩০১।

১৩৯. আহমাদ, তিরমিযী, মিশকাত হা/২৩৯৯।

১৪০. আহমাদ, নাসাঈ; ইবনে হিব্বান, তানক্বীহ শরহে মিশকাত ২/৯২, সনদ (لا بأس به)।

৯. লা হাওলা ওয়া লা কুওয়াতা ইল্লা বিল্লা-হ - ۹. لَا حَوْلَ وَلَا قُوَّةَ إِلَّا بِاللَّهِ-

অর্থঃ নেই কোন ক্ষমতা নেই কোন শক্তি, আল্লাহ ব্যতীত। ১৪১

۱. سُبْحَانَ اللَّهِ ، الْحَمْدُ لِلَّهِ ، اللَّهُ أَكْبَرُ ، لَا إِلَهَ إِلَّا اللَّهُ وَحْدَهُ لَا شَرِيكَ لَهُ ، لَهُ الْمُلْكُ وَلَهُ الْحَمْدُ وَهُوَ عَلَى كُلِّ شَيْءٍ قَدِيرٌ -

১০. সুবহা-নাল্লা-হি (৩৩ বার)। আলহাম্দুলিল্লা-হি (৩৩ বার)। আল্লা-হু আকবার (৩৩ বার)। লা ইলা-হা ইল্লাল্লা-হু ওয়াহ্দাহু লা শারীকা লাহু লাহুল মুলুকু ওয়া লাহুল হাম্দু ওয়া হুয়া 'আলা কুল্লে শাইয়িন ক্বাদীর (১ বার)। অথবা আল্লা-হু আকবার (৩৪ বার)।

অর্থঃ পবিত্রতাময় আল্লাহ, যাবতীয় প্রশংসা আল্লাহর জন্য, আল্লাহ সবচাইতে বড়। নেই কোন উপাস্য একক আল্লাহ ব্যতীত; তাঁর কোন শরীক নেই। তাঁরই জন্য সমস্ত রাজত্ব ও তাঁরই জন্য যাবতীয় প্রশংসা। তিনি সকল বিষয়ের উপরে ক্ষমতাময়। ১৪২

۱۱- سُبْحَانَ اللَّهِ وَبِحَمْدِهِ وَ سُبْحَانَ اللَّهِ الْعَظِيمِ -

১১. সুবহা-নাল্লা-হে ওয়া বিহাম্দিহী ওয়া সুবহানাল্লা-হিল 'আযীম। অথবা সকালে ও সন্ধ্যায় ১০০ বার করে 'সুবহা-নাল্লা-হে ওয়া বেহাম্দিহী' পড়বে। অর্থঃ পবিত্রতা ও প্রশংসাময় আল্লাহ এবং মহান আল্লাহ পবিত্রতাময়'। এই দো'আ পাঠের ফলে তার সকল গোনাহ ঝরে যাবে। যদিও তা সাগরের ফেনা সমতুল্য হয়। এই দো'আ মীযানের পাল্লায় সবচেয়ে ভারী হবে। ১৪৩

۱۲. اللَّهُ لَا إِلَهَ إِلَّا هُوَ الْحَيُّ الْقَيُّومُ ، لَا تَأْخُذُهُ سَنَةٌ وَلَا نَوْمٌ ، لَهُ مَا فِي السَّمَاوَاتِ وَمَا فِي الْأَرْضِ ، مَنْ ذَا الَّذِي يَشْفَعُ عِنْدَهُ إِلَّا بِإِذْنِهِ ، يَعْلَمُ مَا بَيْنَ أَيْدِيهِمْ وَمَا خَلْفَهُمْ وَلَا يُحِيطُونَ بِشَيْءٍ مِّنْ عِلْمِهِ إِلَّا بِمَا شَاءَ ، وَسِعَ كُرْسِيُّهُ السَّمَاوَاتِ وَالْأَرْضَ ، وَلَا يَئُودُهُ حِفْظُهُمَا ، وَهُوَ الْعَلِيُّ الْعَظِيمُ -

১২. আয়াতুল কুরসীঃ আল্লা-হু লা ইলা-হা ইল্লা হুওয়াল হাইয়ুল ক্বাইয়ুম। লা তা'খুযুহু সেনাতু ওয়ালা নাউম। লাহু মা ফিস্ সামা-ওয়াতে ওয়ামা ফিল আরযে।

১৪১. মুত্তাফাকু আলাইহ, মিশকাত হা/২৩০৩।

১৪২. মুসলিম, মিশকাত হা/৯৬৬, ৯৬৭।

১৪৩. মুত্তাফাকু আলাইহ, মিশকাত হা/২২৯৬-৯৮।

মান যাল্লাযী ইয়াশ্ফা'উ 'ইন্দাহু ইল্লা বি ইয়নিহী, ইয়া'লামু মা বায়না আয়দীহিম ওয়া মা খাল্ফাহুম, ওয়া লা ইউহীতুনা বিশাইয়িম্ মিন 'ইলমিহী ইল্লা বিমা শা-আ ওয়াসে'আ কুরসিইয়ুহুস্ সামা-ওয়া-তে ওয়াল আরযা, ওয়া লা ইয়াউদুহু হিফযুহুমা, ওয়া হুয়াল 'আলিইয়ুল 'আযীম (বাক্বারাহ ২৫৫)।

অর্থঃ আল্লাহ তিনি যিনি ব্যতীত কোন (প্রকৃত) উপাস্য নেই। যিনি চিরঞ্জীব ও সবকিছুর ধারক। কোনরূপ তন্দ্রা বা নিদ্রা তাঁকে স্পর্শ করে না। আসমান ও যমীনে যা কিছু আছে সবকিছু তাঁরই মালিকানাধীন। তাঁর হুকুম ব্যতীত এমন কে আছে যে তাঁর নিকটে সুপারিশ করতে পারে? তাদের সম্মুখে ও পিছনে যা কিছু আছে সবকিছুই তিনি জানেন। তাঁর জ্ঞানসমুদ্র হ'তে তারা কিছুই আয়ত্ত্ব করতে পারে না, কেবল যতটুকু তিনি ইচ্ছা করেন। তাঁর আরাশ সমস্ত আসমান ও যমীনকে পরিবেষ্টিত করে আছে। আর সেগুলোর রক্ষণাবেক্ষণ তাঁকে মোটেই শ্রান্ত করে না। তিনি সর্বোচ্চ ও সর্বাপেক্ষা মহান'।

রাসূল (ছাঃ) বলেন, প্রত্যেক ফরয ছালাত শেষে আয়াতুল কুরসী পাঠ কারীর জান্নাতে প্রবেশ করার জন্য আর কোন বাধা থাকে না মৃত্যু ব্যতীত' (নাসাঈ)। শয়নকালে পাঠ করলে সকাল পর্যন্ত তার হেফায়তের জন্য একজন ফেরেশতা পাহারায় নিযুক্ত থাকে। যাতে শয়তান তার নিকটবর্তী হ'তে না পারে' (বুখারী)।<sup>১৪৪</sup>

১৩- أَللَّهُمَّ اكْفِنِي بِحَلَالِكَ عَنْ حَرَامِكَ وَأَغْنِنِي بِفَضْلِكَ عَمَّنْ سِوَاكَ-

১৩. আল্লা-হুম্মাক্ফিনী বেহালা-লেকা 'আন হারা-মেকা ওয়া আগ্নিনী বেফায়লেকা 'আম্মান সেওয়া-কা।

অর্থঃ হে আল্লাহ! আপনি আমাকে হারাম ছাড়া হালাল দ্বারা যথেষ্ট করুন এবং আপনার অনুগ্রহ দ্বারা আমাকে অন্যদের হ'তে মুখাপেক্ষীহীন করুন! রাসূল (ছাঃ) বলেন, পাহাড় পরিমাণ ঋণ থাকলেও আল্লাহ তার ঋণ মুক্তির ব্যবস্থা করে দেন'।<sup>১৪৫</sup>

১৪- أَسْتَغْفِرُ اللَّهَ الَّذِي لَا إِلَهَ إِلَّا هُوَ الْحَيُّ الْقَيُّومُ وَأَتُوبُ إِلَيْهِ -

১৪. আস্তাগফিরুল্লা-হাল্লাযী লা ইলা-হা ইল্লা হুয়াল হাইয়ুল ক্বাইয়ুমু ওয়া আতুবু ইলাইহে'।

অর্থঃ আমি আল্লাহর নিকটে ক্ষমা প্রার্থনা করছি। যিনি ব্যতীত কোন উপাস্য নেই। যিনি চিরঞ্জীব ও সবকিছুর ধারক। আমি তাঁর দিকে ফিরে যাচ্ছি বা তওবা করছি। এই দো'আ পড়লে আল্লাহ তাকে ক্ষমা করেন, যদিও সে জিহাদের ময়দান থেকে পলাতক আসামী হয়। রাসূল (ছাঃ) দৈনিক ১০০ বার তওবা করতেন (হযীহ তিরমিযী, হা/২৮৩১; মিশকাত হা/২৩৫৩; হযীহ আবুদাউদ হা/১৩৪৩; মুসলিম, মিশকাত হা/২৩২৫)।

১৪৪. নাসাঈ, সিলসিলা ছাহীহাহ হা/৯৭২; মুসলিম, বুখারী, মিশকাত হা/২১২২-২৩।

১৪৫. তিরমিযী, বায়হাক্বী, মিশকাত হা/ ২৪৪৯।

১৫. রাসূলুল্লাহ (ছাঃ) প্রত্যেক ছালাতের শেষে সূরায়ে 'ফালাক্ব' ও 'নাস' পড়ার নির্দেশ দিতেন (আহমাদ, আবুদাউদ, নাসাঈ, মিশকাত হা/৯৬৯)।

মুনাজাত (المناجاة) :

'মুনাজাত' অর্থ 'পরস্পরে গোপনে কথা বলা' (আল-মুনজিদ প্রভৃতি)। রাসূলুল্লাহ (ছাঃ) বলেন, 'إِنَّ أَحَدَكُمْ إِذَا صَلَّى يُنَاجِي رَبَّهُ' 'তোমাদের কেউ যখন ছালাতে রত থাকে, তখন সে তার প্রভুর সাথে 'মুনাজাত' করে অর্থাৎ গোপনে কথা বলে'।<sup>১৪৬</sup> দুনিয়ার কাউকে যা বলা যায় না, সৃষ্টিকর্তা আল্লাহর সাথে সে তাই-ই বলে। আল্লাহ স্বীয় বান্দার চোখের ভাষা বুঝেন ও হৃদয়ের কান্না শোনেন।

আল্লাহ বলেন, 'أَدْعُونِي أَسْتَجِبْ لَكُمْ' 'তোমরা আমাকে ডাক। আমি সাড়া দেব' (মুমিন ৬০)। রাসূলুল্লাহ (ছাঃ) বলেন, 'الدُّعَاءُ هُوَ الْعِبَادَةُ' 'দো'আ হ'ল ইবাদত'।<sup>১৪৭</sup> অতএব দো'আর পদ্ধতি সূনাত মোতাবেক হ'তে হবে। রাসূল (ছাঃ) কোন্ পদ্ধতিতে দো'আ করেছেন, আমাদেরকে সেটা দেখতে হবে। তিনি যেভাবে প্রার্থনা করেছেন, আমাদেরকে সেভাবেই প্রার্থনা করতে হবে। তাঁর রেখে যাওয়া পদ্ধতি ছেড়ে অন্য পদ্ধতিতে দো'আ করলে তা কবুল হওয়ার বদলে গোনাহ হওয়ারই সম্ভাবনা বেশী থাকবে।

রাসূলুল্লাহ (ছাঃ) ছালাতের মধ্যেই দো'আ করেছেন, বাইরে নয়। তাকবীরে তাহরীমার পর থেকে সালাম ফিরানো পর্যন্ত সময়কাল হ'ল ছালাতের সময়কাল।<sup>১৪৮</sup> ছালাতের নিরিবিলি সময়ে বান্দা স্বীয় প্রভুর সাথে 'মুনাজাত' করে। 'ছালাত' অর্থ দো'আ, ক্ষমা প্রার্থনা ইত্যাদি। ছানা হ'তে সালাম ফিরানোর পূর্বে দো'আয়ে মাছুরাহ পর্যন্ত ছালাতের সর্বত্র কেবল দো'আ আর দো'আ। অর্থ বুঝে পড়লে উক্ত দো'আ গুলির বাইরে বান্দার আর তেমন কিছুই চাওয়ার থাকে না। তবুও সালাম ফিরানোর পরে একাকী দো'আ করার প্রশস্ত সুযোগ রয়েছে। তখন ইচ্ছামত যেকোন দো'আ করা যায়। হাফেয ইবনুল ক্বাইয়িম বলেন, এই দো'আ دبر الصلوة বা ছালাত শেষের দো'আ নয়, বরং তাসবীহ-তাহলীলের মাধ্যমে عِبَادَةٌ ثَانِيَةٌ বা দ্বিতীয় ইবাদত শেষের দো'আ হিসাবে গণ্য হবে। কেননা মুছল্লী যতক্ষণ ছালাতের মধ্যে থাকে, ততক্ষণ সে তার প্রভুর সাথে গোপনে কথা বলে বা মুনাজাত করে। কিন্তু যখনই সালাম ফিরায়, তখনই সে সম্পর্ক ছিন্ন হ'য়ে যায়।<sup>১৪৯</sup>

১৪৬. বুখারী ১/৭৬ পৃঃ; মুত্তাফাক্ব আলাইহ, মিশকাত হা/ ৭১০; আহমাদ, মিশকাত হা/৮৫৬।

১৪৭. আহমাদ, আবুদাউদ, প্রভৃতি, মিশকাত হা/২২৩০ 'দো'আ' অধ্যায়।

১৪৮. আবুদাউদ, তিরমিযী, মিশকাত হা/৩১২।

১৪৯. যা-দুল মা'আ-দ (বৈরুতঃ মুওয়াসসাসাতুর রিসালাহ ২৯তম সংস্করণ ১৯৯৬) ১/২৫০ পৃঃ।

দো'আর স্থান সমূহঃ (১) ছানা বা দো'আয়ে ইস্তেফতা-হ, যা 'আল্লা-হুমা বা-'এদ বায়নী' দিয়ে শুরু হয়। (২) শ্রেষ্ঠ দো'আ হ'ল সূরায়ে ফাতিহার মধ্যে 'আলহামদুলিল্লাহ' ও 'ইহুদিনাছ ছিরা-ত্বাল মুস্তাক্বীম'। (৩) রুকুতে 'সুবহা-নাকা আল্লা-হুমা ..."। (৪) সিজদাতে একই দো'আ বা অন্য দো'আ সমূহ। (৫) দুই সিজদার মাঝে বসে 'আল্লা-হুমাগ্ফিরলী....." বলে ৬টি বিষয়ে প্রার্থনা। (৬) শেষ বৈঠকে তাশাহুদদের পরে ও সালাম ফিরানোর পূর্বে দো'আয়ে মাছুরাহ সহ বিভিন্ন দো'আ। এ ছাড়াও রয়েছে (৭) ক্বওমাতে দাঁড়িয়ে দো'আয়ে কুনূতের মাধ্যমে দীর্ঘ দো'আ করার সুযোগ। রাসূলুল্লাহ (ছাঃ) বলেন, সিজদার সময় বান্দা তার প্রভুর সর্বাধিক নিকটে পৌঁছে যায়। অতএব ঐ সময় তোমরা সাধ্যমত বেশী বেশী দো'আ কর।<sup>১৫০</sup> অন্য হাদীছে এসেছে যে, তিনি শেষ বৈঠকে তাশাহুদদের ও সালামের মধ্যবর্তী সময়ে বেশী বেশী দো'আ করতেন।<sup>১৫১</sup> সালাম ফিরানোর পরে আল্লাহর সঙ্গে বান্দার 'মুনাজাত' বা গোপন আলাপের সুযোগ নষ্ট হয়ে যায়। অতএব সালাম ফিরানোর আগেই যাবতীয় দো'আ শেষ করা উচিত, সালাম ফিরানোর পরে নয়। এক্ষেত্রে যদি কেউ মুছল্লীদের নিকটে কোন ব্যাপারে বিশেষভাবে দো'আ চান, তবে তিনি আগেই সেটা নিজে অথবা ইমামের মাধ্যমে সকলকে অবহিত করবেন। যাতে মুছল্লীগণ স্ব স্ব দো'আর নিয়তের মধ্যে তাকেও शामिल করতে পারেন।

### ফরয ছালাত বাদে সম্মিলিত দো'আঃ

ফরয ছালাত শেষে সালাম ফিরানোর পরে ইমাম ও মুক্তাদী সম্মিলিতভাবে হাত উঠিয়ে ইমামের সরবে দো'আ পাঠ ও মুক্তাদীদের সশব্দে 'আমীন' 'আমীন' বলার প্রচলিত প্রথাটি দ্বীনের মধ্যে একটি নতুন সৃষ্টি। রাসূলুল্লাহ (ছাঃ) ও ছাহাবায়ে কেলাম হ'তে এর পক্ষে ছহীহ বা যঈফ সনদে কোন দলীল নেই। এমনকি ফরয বা নফল ছালাত শেষে একাকী হাত উঠিয়ে দো'আ করা সম্পর্কেও কোন ছহীহ হাদীছ নেই।\* অমনিভাবে দো'আ শেষে মুখে দু'হাত মোছা সম্পর্কে একটি বা দু'টি 'যঈফ' হাদীছ রয়েছে, যা দ্বারা দলীল গ্রহণ করা চলেনা।<sup>১৫২</sup> মসজিদে নববীতে দৈনিক অসংখ্য ছাহাবী জমায়েত হ'তেন। যদি বর্তমান কালের প্রচলিত ফরয ছালাত শেষে সম্মিলিত দো'আর অস্তিত্ব সেযুগে থাকত, তাহ'লে অবশ্যই সেই মর্মে হাদীছ পাওয়া যেত। কিন্তু তা না পাওয়াটাই সেযুগে ওটার প্রচলন না থাকার বড় দলীল।<sup>১৫৩</sup> বলা আবশ্যিক যে, আজও মক্কা-মদীনার দুই হারাম শরীফে উক্ত প্রথার কোন অস্তিত্ব নেই।

প্রচলিত সম্মিলিত দো'আর ক্ষতিকর দিক সমূহঃ (১) এটি সুনাত বিরোধী আমল।

১৫০. মুসলিম মিশকাত হা/৮৯৪; নায়ল ৩/১০৯।

১৫১. মুসলিম, মিশকাত হা/৮১৩।

\* ওবায়দুল্লাহ মুবারকপুরী, মাসিক 'মুহাদ্দিহ' (বেনারসঃ জুন '৮২) পৃঃ ১৯-২৯।

১৫২. মিশকাত হা/২২৪৩-৪৫, ২২৫৫ দো'আ' অধ্যায়; আলবানী বলেন, দো'আর পরে দু'হাত মুখে মোছা সম্পর্কে কোন ছহীহ হাদীছ নেই' মিশকাত, হাশিয়া ২/৬৯৬ পৃঃ; ইরওয়া হা/৪৩২, ২/১৭৮।

১৫৩. মাসিক মুহাদ্দিহ জুন '৮২।

অতএব তা যত মিষ্ট ও সুন্দর মনে হোক না কেন সুরায়ে কাহুফ-এর ১০৩-৪ নং আয়াতের মর্ম অনুযায়ী ঐ ব্যক্তির ক্ষতিগ্রস্ত আমলকারীদের অন্তর্ভুক্ত হবার সমূহ সম্ভাবনা রয়েছে। (২) এর ফলে মুছল্লী স্বীয় ছালাতের চাইতে ছালাতের বাইরের বিষয় অর্থাৎ প্রচলিত 'মুনাজাত'-কেই বেশী গুরুত্ব দেয়। আর এজন্যেই বর্তমানে মানুষ ফরয ছালাতের চাইতে মুনাজাতকে বেশী গুরুত্ব দিচ্ছে এবং 'আখেরী মুনাজাত' নামক বিদ'আতী অনুষ্ঠানে যোগ দিতে বেশী আগ্রহ বোধ করছে ও দলে দলে সেখানে ভিড় জমাচ্ছে। (৩) এর ফলে একজন মুছল্লী সারা জীবন ছালাত আদায় করেও কোন কিছুই অর্থ শিখে না। বরং ছালাত শেষে ইমামের মুনাজাতের মুখাপেক্ষী থাকে। (৪) ইমাম আরবী মুনাজাতে কি বললেন সে কিছুই বুঝতে পারে না। ওদিকে নিজেও কিছু বলতে পারে না। এর পূর্বে ছালাতের মধ্যে সে যে দো'আগুলো পড়েছে, অর্থ না জানার কারণে সেখানেও সে অন্তর ঢেলে দিতে পারেনি। ফলে জীবনভর ঐ মুছল্লীর অবস্থা থাকে 'না ঘরকা না ঘাটকা'। (৫) মুছল্লীর মনের কথা ইমাম ছাহেবের অজানা থাকার ফলে মুছল্লীর কেবল 'আমীন' 'আমীন' বলাই সার হয়। (৬) ইমাম ছাহেবের দীর্ঘক্ষণ ধরে আরবী-উর্দু-বাংলায় করুণ সুরের মুনাজাতের মাধ্যমে শ্রোতা ও মুছল্লীদের মন জয় করা অন্যতম উদ্দেশ্য থাকতে পারে। ফলে 'রিয়া' ও 'শ্রুতি'-র কবীরা গোনাহ হওয়ার সম্ভাবনা থাকে। রিয়া-কে হাদীছে **الشرك الأصغر** বা 'ছোট শিরক' বলা হয়েছে (আহমাদ, মিশকাত হা/৫৩৩৪)। যার ফলে ইমাম ছাহেবের সমস্ত নেকী বরবাদ হয়ে যাওয়ার নিশ্চিত সম্ভাবনা সৃষ্টি হ'তে পারে।

### কুরআনী দো'আঃ

রুকু ও সিজদাতে কুরআন পড়া নিষেধ আছে।<sup>১৫৪</sup> তবে সিজদা অবস্থায় কুরআন বাদে যেকোন দো'আ পড়া যায়। বিশেষ করে শেষ বৈঠকে তাশাহুদদের পরে সালাম ফিরানোর পূর্বে কুরআনী দো'আ সহ সকল প্রকারের দো'আ করা যাবে। এমনকি জুতার ফিতা হারিয়ে গেলে তাও চাওয়ার হুকুম এসেছে।<sup>১৫৫</sup>

### সিজদায়ে সহোঃ

ছালাতে ভুলক্রমে কোন ওয়াজিব তরক হ'য়ে গেলে শেষ বৈঠকের তাশাহুদ শেষে সালাম ফিরানোর পূর্বে 'সিজদায়ে সহো' দিতে হয়। রাক'আতের গণনায় ভুল হ'লে বা সন্দেহ হ'লে বা কম বেশী হ'য়ে গেলে বা ১ম বৈঠকে না বসে দাঁড়িয়ে গেলে ইত্যাদি কারণে এবং মুক্তাদীগণের মাধ্যমে ভুল সংশোধিত হ'লে 'সিজদায়ে সহো' আবশ্যিক হয়। শাওকানী বলেন, ওয়াজিব তরক হ'লে 'সিজদায়ে সহো' ওয়াজিব হবে এবং সুন্নাত তরক হ'লে 'সিজদায়ে সহো' সুন্নাত হবে (আস-সায়নুল জারার ১/২৭৪)।

নিয়মঃ (১) যদি ইমাম ছালাতরত অবস্থায় নিজের ভুল সম্পর্কে নিশ্চিত হন কিংবা লোকমা দিয়ে মুক্তাদীগণ ভুল ধরিয়ে দেন, তবে তাশাহুদ শেষে তাকবীর দিয়ে

১৫৪. নায়ল ৩/১০৯; মুসলিম, মিশকাত হা/৮৭৩।

১৫৫. তিরমিযী, মিশকাত হা/২২৫১; হাদীছ হাসান শেষ বৈঠকে।

পরপর দু'টি 'সিজদায়ে সহো' দিবেন। অতঃপর সালাম ফিরাবেন।<sup>১৫৬</sup>

(২) যদি রাক'আত বেশী পড়ে সালাম ফিরিয়ে দেন, অতঃপর ভুল ধরা পড়ে। তখন (পূর্বের ন্যায়) তাকবীর দিয়ে 'সিজদায়ে সহো' করে সালাম ফিরাবেন।<sup>১৫৭</sup>

(৩) যদি রাক'আত কম করে সালাম ফিরিয়ে দেন। তখন তাকবীর দিয়ে বাকী ছালাত আদায় করবেন ও সালাম ফিরাবেন। অতঃপর (তাকবীর দিয়ে) দু'টি 'সিজদায়ে সহো' আদায় করে পুনরায় সালাম ফিরাবেন।<sup>১৫৮</sup>

(৪) ছালাতে কমবেশী যাই-ই হোক সালামের আগে বা পরে দু'টি 'সিজদায়ে সহো' দিবেন।<sup>১৫৯</sup> মোট কথা 'সিজদায়ে সহো' সালামের পূর্বে ও পরে দু'ভাবেই জায়েয আছে। তবে কেবল ডাইনে একটি সালাম দিয়ে 'সিজদায়ে সহো' করার প্রচলিত প্রথার কোন ভিত্তি নেই।<sup>১৬০</sup> অমনিভাবে সিজদায়ে সহো-র পরে 'তাশাহহুদ' পড়ার কোন ছহীহ হাদীছ নেই। উক্ত মর্মে ইমরান বিন হুছাইন (রাঃ) হ'তে যে হাদীছটি এসেছে, সেটি 'যঈফ' (তিরমিযী, আবুদাউদ, ইরওয়াউল গালীল হা/৪০৩, ২/১২৮-২৯ পৃঃ)। তাছাড়া একই রাবী কর্তৃক বর্ণিত বুখারী ও মুসলিমের ছহীহ হাদীছের বিরোধী। সেখানে তাশাহহুদের কথা নেই (মুত্তাফাকু আলাইহ, মিশকাত হা/১০১৭)।

ইমামের ভুল হ'লে পুরুষ মুক্তাদী 'সুবহা-নাল্লা-হ' বলে এবং মহিলা মুক্তাদী হাতে হাত মেরে 'লোকমা' দিবে। অর্থাৎ স্মরণ করিয়ে দিবে (মুত্তাফাকু আলাইহ, মিশকাত হা/৯৮৮ 'ছালাত অবস্থায় নাজায়েয ও জায়েয আমল সমূহ' অনুচ্ছেদ)।

### সিজদায়ে তেলাওয়াতঃ

পবিত্র কুরআনে এমন কতকগুলি আয়াত রয়েছে, যেগুলি তেলাওয়াত করলে বা শুনলে মুমিন পাঠক ও শ্রোতা সকলকে একটি সিজদা করতে হয়। এই সিজদা যেহেতু ছালাত নয়, সেকারণে এর জন্য ওয়ূ বা কিবলা শর্ত নয়। রাসূলুল্লাহ (ছাঃ)-এর সাথে মুশরিকরাও সিজদা দিত। এক স্থানে দীর্ঘক্ষণ থাকলে এ সিজদা সঙ্গে সঙ্গে না করে কিছু পরেও করা যায়। স্থান পরিবর্তন হ'লে আর সিজদা করতে হয় না, ক্বাযাও আদায় করতে হয় না। জেহরী বা সেরী ছালাতে তেলাওয়াত করলেও এ সিজদা দিতে হয়। একই আয়াত বারবার পড়লে তেলাওয়াত শেষে একবার সিজদা দিলেই যথেষ্ট হবে। গাড়ীতে চলা অবস্থায় সিজদার আয়াত শুনলে ইশারায় বা নিজের হাতের উপরে সিজদা করবে। এই সিজদা ফরয নয়। করলে নেকী আছে, না করলে গোনাহ নেই।

১৫৬. মুসলিম, মিশকাত হা/১০১৫; মুত্তাফাকু আলাইহ, মিশকাত হা/১০১৮; 'ছালাত' অধ্যায়, 'সহো' অনুচ্ছেদ।

১৫৭. মুত্তাফাকু আলাইহ, মিশকাত হা/১০১৬।

১৫৮. মুত্তাফাকু আলাইহ, মিশকাত হা/১০১৭; মুসলিম, মিশকাত হা/১০২১।

১৫৯. মুসলিম, নায়লুল আওত্বার ৩/৪১১।

১৬০. মির'আতুল মাফাতীহ ২/৩২-৩৩ পৃঃ।

নিয়মঃ সিজদাকারী তাকবীর দিয়ে সিজদায় যাবেন। অতঃপর দো‘আ পড়বেন এবং পুনরায় তাকবীর দিয়ে মাথা উঠাবেন। সিজদা মাত্র একটি হবে। এতে তাশাহুদ নেই, সালামও নেই।

ফযীলতঃ সিজদার আয়াত শুনে বনী আদম সিজদায় চলে গেলে শয়তান কাঁদতে থাকে আর বলে যে, হায়! বনী আদমকে সিজদার আদেশ দিলে সে সিজদা করল ও জান্নাতী হ’ল। আর আমাকে সিজদার আদেশ দিলে আমি অবাধ্যতা করলাম ও জাহান্নামী হ’লাম।<sup>১৬১</sup> একবার রাসূল (ছাঃ) সূরায়ে নাজম-এর সিজদার আয়াত পড়ে লোকজন সহ সিজদা করলে জনৈক কুরায়েশ নেতা একমুঠ মাটি কপালে ঠেকিয়ে বলে যে, আমার জন্য এটুকুই যথেষ্ট। রাবী ইবনু মাসউদ (রাঃ) বলেন, আমি তাকে পরে কাফের অবস্থায় নিহত হ’তে দেখেছি (বুখারী, মুসলিম, ফিকহুস সুনাই ১/১৬৫)।

সিজদায়ে তেলাওয়াতের দো‘আঃ অন্যান্য সিজদার ন্যায় ‘সুবহা-না রক্বিয়াল আ‘লা’ বলা যাবে। তবে রাসূল (ছাঃ) থেকে একটি খাছ দো‘আ বর্ণিত আছে। যেমন-

سَجَّدَ وَجْهِي لِلَّذِي خَلَقَهُ وَسَقَى سَمْعَهُ وَبَصَرَهُ بِحَوْلِهِ وَقُوَّتِهِ فَتَبَارَكَ اللَّهُ  
‘সাজাদা ওয়াজ্জিয়া লিল্লাযী খালাক্বাহু ওয়া শাক্ব্বাহু সাম‘আহু  
ওয়া বাছারাহু বেহাওলিহী ওয়া কুওয়াতিহী, ফাতাবা-রাকাল্লা-হু আহসানুল খা-  
লেক্বীন।

অর্থঃ আমার চেহারা সিজদা করছে সেই মহান সত্তার জন্য যিনি একে সৃষ্টি করেছেন এবং স্বীয় ক্ষমতা ও শক্তি বলে এতে কর্ণ ও চক্ষু সন্নিবেশ করেছেন।<sup>১৬২</sup> অতএব মহাপবিত্র আল্লাহ যিনি সুন্দরতম সৃষ্টিকর্তা।

পবিত্র কুরআনে সিজদার আয়াত সমূহ ১৫টি।<sup>১৬৩</sup> উহা নিম্নরূপঃ<sup>১৬৪</sup>

আ‘রাফ ২০৬, রা‘দ ১৫, নাহুল ৪৯, মারিয়াম ১০৭, ইস্রা ৫৮, হজ্জ ১৮, ৭৭, ফুরক্বান ৬০, নমল ২৫, সাজদাহ ১৫, ছোয়াদ ২৪, হামীম সাজদাহ ৩৭, নাজম ৬২, ইনশিক্বাক্ব ২১, আলাক্ব ১৯।

সিজদায়ে শুক্বরঃ

কোন খুশীর ব্যাপার ঘটলে রাসূলুল্লাহ (ছাঃ) আল্লাহর প্রতি কৃতজ্ঞতা প্রকাশের জন্য সিজদায় পড়ে যেতেন।<sup>১৬৫</sup> সিজদায়ে তেলাওয়াতের ন্যায় এখানে একটি সিজদা হবে

১৬১. আহমাদ মুসলিম, ইবনু মাজাহ, ফিকহুস সুনাই ১/১৬৪।

১৬২. আহমাদ, আবুদাউদ, নাসাঈ, তিরমিযী, ফিকহুস সুনাই ১/১৬৭; নায়ল ৩/৩৯৮।

১৬৩. আবুদাউদ, ইবনু মাজাহ, দারাকুত্বনী ঐজতি, নায়ল ৩/৩৮৬-৯১; ফিকহুস সুনাই ১/১৬৫।

১৬৪. ফিকহুস সুনাই ১/১৬৭।

১৬৫. আবুদাউদ, তিরমিযী, মিশকাত হা/১৪৯৪।



এবং এই সিজদাতেও ওয়ূ বা ক্বিবলা শর্ত নয়। হাদীছে তাকবীর দেওয়ার স্পষ্ট বক্তব্য নেই। তবে সম্ভবতঃ অন্যান্য সিজদার উপরে ভিত্তি করে ছাহেবে 'বাহর' তাকবীর দেওয়ার কথা বলেছেন।<sup>১৬৬</sup>

### মাসবূকের ছালাতঃ

কেউ ইমামের সাথে ছালাতের কিছু অংশ পেলে তাকে 'মাসবুক' বলে। মুছল্লী ইমামকে যে অবস্থায় পাবে, সে অবস্থায় ছালাতে যোগদান করবে। ইমামের সাথে যে অংশটুকু পাবে, ওটুকুই তার ছালাতের প্রথম অংশ হিসাবে গণ্য হবে। রুকূ অবস্থায় পেলে স্রেফ সূরায়ে ফাতিহা পড়ে রুকূতে শরীক হবে। ছানা পড়তে হবে না। সূরায়ে ফাতিহা পড়তে না পারলে রাক'আত গণনা করা হবে না। অতএব রুকূ, সিজদা, বৈঠক যে অবস্থায় ইমামকে পাওয়া যাবে, সেই অবস্থায় জামা'আতে যোগদান করবে। তাতে সে জামা'আতের নেকী পেয়ে যাবে। রাসূলুল্লাহ (ছাঃ) এরশাদ করেন,

فَمَا أَدْرَكْتُمْ فَصَلُّوا، وَمَا فَاتَكُمْ فَأَتِمُّوا، متفق عليه (ছালাতের যে অংশ টুকু) তোমরা পাও সেটুকু আদায় কর এবং যেটুকু তোমাদের বাদ পড়ে যায় সেটুকু পূর্ণ কর'।<sup>১৬৭</sup>

### ছালাতের বিবিধ জ্ঞাতব্য (مسائل متفرقة للصلوة)

১. পরিবহনে ছালাতঃ ভীতিকর অবস্থায় কিংবা পরিবহনে ক্বিবলামুখী না হ'লেও চলবে (বাক্বারাহ ২৩৮, বুঃ মুঃ)। অবশ্য পরিবহনে ক্বিবলামুখী হ'য়ে ছালাত শুরু করা বাঞ্ছনীয় (আবুদাউদ, ইবনু হিব্বান)। যখন পরিবহনে রুকূ-সিজদা করা অসুবিধা মনে হবে, তখন কেবল তাকবীর দিয়ে ও মাথা দ্বারা ইশারায় ছালাত আদায় করবে। সিজদার সময় মাথা রুকূর চেয়ে কিছু বেশী নীচু করবে (বায়হাক্বী, আহমাদ, তিরমিযী)। যখন ক্বিবলা ঠিক করা অসম্ভব বিবেচিত হবে, কিংবা সন্দেহে পতিত হবে, তখন নিশ্চিত ধারণার ভিত্তিতে ক্বিবলার নিয়তে একদিকে ফিরে সামনে সুতরা রেখে ছালাত আদায় করবে (দারাকুত্বনী, হাকেম, বায়হাক্বী, তিরমিযী, ইবনু মাজাহ, ইরওয়া হা/২৯৬)। নৌকায় দাঁড়িয়ে ছালাত আদায় করবে, যদি না ডুবে যাওয়ার আশংকা থাকে (বায়হার, দারাকুত্বনী, হাকেম)। এ সময় দাঁড়ানোর জন্য কিছুতে ঠেস দেওয়া যাবে (আবুদাউদ, হাকেম, সিলসিলা ছাহীহাহ হা/৩১৯, ইরওয়া হা/৩৮৩)।

২. রোগীর ছালাতঃ পীড়িতাবস্থায় দাঁড়াতে অক্ষম হ'লে কিংবা রোগবৃদ্ধির আশংকা

১৬৬. ফিকহুস সুনাহ ১/১৬৮ পৃঃ।

১৬৭. মুত্তাফাকু আলাইহ, মিশকাত হা/৬৮৬; নায়ল ৪/৪৪-৪৬।

থাকলে বসে, শুয়ে বা কাত হয়ে ছালাত আদায় করবে (বুখারী, আবুদাউদ, আহমাদ)। সিজদার জন্য সামনে বালিশ বা উঁচু অন্য কিছু নেওয়া যাবে না। যদি মাটিতে সিজদা করা অসম্ভব হয়, তাহলে ইশারায় ছালাত আদায় করবে। সিজদার সময় রুকুর চেয়ে মাথা কিছুটা বেশী ঝুঁকাবে (তবারাগী, বায়হাকী, সিলসিলা ছাহীহাহ হা/৩২৩)।

৩. সুত্রার বিবরণঃ মুছল্লীর সম্মুখ দিয়ে যাওয়া নিষেধ। এজন্য কিবলার দিকে লাঠি, দেওয়াল, মানুষ বা যেকোন বস্তু দ্বারা মুছল্লীর সম্মুখে সুত্রা বা আড়াল করতে হয় (বুখারী, মুসলিম, মিশকাত হা/৭৭৩, ৭৭৯, ৭৭৭ 'সুত্রা' অনুচ্ছেদ)। ইমাম ও সুত্রার মধ্য দিয়ে যাওয়া সম্পূর্ণরূপে নিষিদ্ধ। তবে জামা'আত চলা অবস্থায় অনিবার্য কারণে মুক্তাদীদের কাতারের মধ্য দিয়ে অতিক্রম করা জায়েয আছে (বুখারী, মুসলিম, মিশকাত হা/৭৮০)। সিজদার স্থান থেকে সুত্রার মধ্যে একটি বকরী যাওয়ার মত ফাঁকা রাখা আবশ্যিক (বুখারী ও মুসলিম, ছিফাত পৃঃ ৬২)।

### মহিলাদের ছালাত ও ইমামতঃ

পুরুষ ও মহিলাদের ছালাতের মধ্যে পদ্ধতিগত কোন পার্থক্য নেই (ফিকহুস সুন্নাহ ১/১০৯)। তবে মসজিদে পুরুষের জামা'আতের সাথে পাঁচ ওয়াক্ত ছালাত ও জুম'আ আদায় করা তাদের জন্য ফরয নয় (ফিকহুস সুন্নাহ ১/১১১)। অবশ্য মসজিদে যেতে তাদেরকে বাধা দেওয়াও যাবে না। মহিলাগণ বাড়ীতে গৃহকোণে নিভূতে একাকী বা জামা'আতের সাথে ছালাত আদায় করবেন। মহিলাগণ (নিম্নস্বরে) আযান ও ইকামত দিবেন এবং মহিলা জামা'আতের প্রথম কাতারের মধ্যস্থলে সমান্তরালভাবে দাঁড়িয়ে ইমামতি করবেন। ফরয ও তারাবীহুর জামা'আতে তাদের ইমামতি করার স্পষ্ট দলীল পাওয়া যায় (আবুদাউদ, দারাকুতনী ওভূত ইরওয়া হা/৪৯৩)। মা আয়েশা (রাঃ), উম্মে সালামাহ (রাঃ) প্রমুখ মহিলাদের ইমামতি করতেন (বায়হাকী ১/৪০৮; ফিকহুস সুন্নাহ ১/৯১, ১৭৭)। বদর যুদ্ধের সময় উম্মে ওয়ারাক্বাহ (রাঃ)-কে তার পরিবারের ইমামতি করার জন্য রাসূলুল্লাহ (ছাঃ) নির্দেশ দিয়েছিলেন এবং তার জন্য একজন মুওয়যযিন নির্ধারণ করে দিয়েছিলেন (আবুদাউদ, ছহীহ ইবনু খুযায়মা, নায়ল ৪৬৩)।

### অন্ধ, গোলাম ও বালকদের ইমামতঃ

(ক) রাসূলুল্লাহ (ছাঃ) অন্ধ ছাহাবী আব্দুল্লাহ ইবনে উম্মে মাকতূম (রাঃ)-কে দু'বার মদীনার ইমামতির দায়িত্ব দেন (আহমাদ, আবুদাউদ, মিশকাত হা/১১২১) অন্ধ ছাহাবী উৎবান বিন মালেক (রাঃ) তার কওমের ইমামতি করতেন (বুখারী, নাসাঈ)। (খ) আবু হুযায়ফা (রাঃ)-এর গোলাম সালাম ক্বোবা-র আহবাহ নামক স্থানে হিজরতের পূর্বে

মুসলমানদের ইমামতি করতেন। হযরত ওমর ও আবু সালমা (রাঃ) প্রমুখ তার মুক্তাদী হ'তেন (বুখারী, মিশকাত হা/১১২৭)। হযরত আয়েশা (রাঃ)-এর গোলাম আবু আমর মুক্ত হওয়ার পূর্বে লোকদের ইমামতি করতেন (মুসনাদে শাফেঈ)। (গ) সালামাহ বিন আকওয়া (রাঃ) ৬, ৭ বা ৮ বছর বয়সে ইমামতি করেছেন (আহমাদ, বুখারী প্রভৃতি; নায়ল ৪/৫৭, ৫৯, ৬৩; মিশকাত হা/১১২৬)।

### ফাসিক ও বিদ'আতীর ইমামতঃ

১. ফাসিক ও বিদ'আতীর পিছনে ছালাত মকরুহ। তবে জায়েয আছে। এ বিষয়ে খলীফা ওহমান (রাঃ)-কে জিজ্ঞেস করা হ'লে তিনি বলেন, الصلاة أحسن ما يعمل الناس... وإذ أساؤا فاجتنب إساءاتهم 'মানুষের শ্রেষ্ঠ আমল হ'ল ছালাত। .. তবে যখন সে অন্যায় করে, তখন তোমরা সে অন্যায় কাজ থেকে দূরে থাক'। হাসান বছরীকে জিজ্ঞেস করা হ'লে তিনি বলেন, صل وعليه بدعة 'তুমি তার পিছনে ছালাত আদায় কর। বিদ'আতের গোনাহ বিদ'আতীর উপরে বর্তাবে'।<sup>১৬৮</sup> আল্লাহ বলেন, وَارْكُؤُوا مَعَ الرَّكْعَيْنِ 'রুকুকারীর পিছনে রুকু কর' (বাক্বারাহ ৪৩)।

২. ইমামতের হকদারঃ বালক বা কিশোর হ'লেও কিরাআতে পারদর্শী ব্যক্তিই ইমামতির প্রথম হকদার। সেদিকে সমান হ'লে ইলমে হাদীছে অভিজ্ঞ ও সূন্নাতের পাবন্দ ব্যক্তি ইমামতি করবেন। ... সেদিকে সমান হ'লে বয়সে যিনি বড় তিনিই ইমাম হবেন।<sup>১৬৯</sup>

৩. মুসাফিরের ইমামতঃ কেউ কোথাও গেলে সেই এলাকার লোকই ইমামতি করবেন।<sup>১৭০</sup> তবে তাদের অনুমতিক্রমে তিনি ইমামতি করতে পারবেন।<sup>১৭১</sup>

৪. দু'জন মুছল্লী হ'লে ইমাম বামে ও মুক্তাদী ডাইনে দাঁড়াবে।<sup>১৭২</sup>

৫. দু'জন বয়স্ক পুরুষ, একটি বালক ও একজন মহিলা মুছল্লী হ'লে একজন ইমাম হবেন। তাঁর পিছনে উক্ত পুরুষ ও বালকটি এবং সকলের পিছনে মহিলা একাকী দাঁড়াবেন। আর যদি দু'জন পুরুষ ও একজন মহিলা হন, তাহ'লে ইমামের ডাইনে পুরুষ মুক্তাদী দাঁড়াবেন এবং পিছনে মহিলা একাকী দাঁড়াবেন।<sup>১৭৩</sup> একজন পুরুষ ও একজন মহিলা হ'লেও সামনে ও পিছনে উক্ত নিয়মে দাঁড়াবেন।

১৬৮. বুখারী, ফত্বুলবারী সহ 'বিদ'আতী ও ফিৎনা গ্রন্থের ইমামতি' অধ্যায় ২/২২০।

১৬৯. মুসলিম, মিশকাত হা/১১১৭; বুখারী, মিশকাত হা/১১২৬।

১৭০. বুখারী, মিশকাত হা/১১২৭।

১৭১. আবুদাউদ, মিশকাত/১১২১।

১৭২. মুত্তাফাক আলাইহ, মিশকাত হা/১১০৬।

১৭৩. মুসলিম, মিশকাত হা/১১০৮, ১১০৯।

৬. কাতার সোজা করতে হবে এবং কাঁধে কাঁধে ও কদমে কদমে মিলাতে হবে। আনাস (রাঃ) বলেন, **وَكَانَ أَحَدُنَا يُلْزِقُ مَنكَبَهُ بِمَنكَبِ صَاحِبِهِ وَقَدَمَهُ بِقَدَمِهِ** 'আমাদের মধ্য থেকে একজন একে অপরের কাঁধে কাঁধ ও পায়ে পা মিলিয়ে দিতেন'। ছাহাবী নু'মান বিন বাশীর (রাঃ) অনুরূপ বলেন। যার ভিত্তিতে ইমাম বুখারী অধ্যায় রচনা করেছেন এভাবে- **بَابُ الزَّاقِ الْمَنكَبِ بِالْمَنكَبِ وَالْقَدَمِ بِالْقَدَمِ فِي الصَّفِّ** 'ছালাতের কাতারে কাঁধে কাঁধ ও পায়ে পা মিলানোর অধ্যায়' এখানে পা মিলানো অর্থ পায়ের সাথে পা লাগিয়ে দেওয়া। যাতে কোনরূপ ফাঁক না থাকে এবং কাতারও সোজা হয়। বুখারীর অন্য বর্ণনায় পরিষ্কারভাবে এসেছে **تَرَاصُّوا وَسُدُّوا** 'ভালভাবে মিলাও ও ফাঁক বন্ধ কর'।<sup>১৭৪</sup>

৭. ১ম কাতারে নেকী বেশী। কেননা রাসূলুল্লাহ (ছাঃ) বলেন, যদি লোকেরা জানতো ১ম কাতারে কি নেকী আছে, তাহ'লে তারা লটারী করত।<sup>১৭৫</sup> অবশ্য ১ম কাতারে জ্ঞানী-গুণী ব্যক্তিগণ থাকবেন, অন্য হাদীছে যার প্রমাণ এসেছে।<sup>১৭৬</sup>

৮. কাতারের পিছনে একাকী দাঁড়াবে না। কেননা অনুরূপভাবে ছালাত আদায় করার কারণে রাসূলুল্লাহ (ছাঃ) এক ব্যক্তিকে পুনরায় ছালাত আদায় করতে বলেন।<sup>১৭৭</sup> অতএব সামনের কাতার থেকে একজনকে টেনে এনে দু'জনে দাঁড়াতে হবে। তবে বাধ্যগত অবস্থায় জায়েয আছে।

৯. জামা'আতে ছালাত দীর্ঘায়িত করা উচিত নয়। একাকী যত খুশী দীর্ঘ করা যাবে।<sup>১৭৮</sup>

১০. ছালাত শেষে তাসবীহ সমূহ আংগুলে গণনা করা উচিত। কেননা আংগুল সমূহ কিয়ামতের দিন জিজ্ঞাসিত হবে।<sup>১৭৯</sup>

**আয়াতে সমূহের জওয়াবঃ**

(১) 'সাব্বিহিসমা রব্বিকাল আ'লা'-এর জওয়াবে 'সুবহানা রব্বিয়াল আ'লা'। =আহমদ প্রভৃতি মিশকাত হা/৮৫৯, হাদীছ ছহীহ।

১৭৪. বুখারী, ফত্বুল বারী 'কাঁধে কাঁধ ও পায়ে পায়ে মিলানো' অধ্যায় ২/২৪৭ পৃঃ; আবুদাউদ, নাসাঈ ১০৮৫, ১০৮৭, ১১০২।

১৭৫. বুখারী হা/৭২১ ফত্বহ সহ।

১৭৬. মুসলিম, মিশকাত হা/১০৮৮।

১৭৭. আহমাদ, তিরমিযী আবুদাউদ ১১০৫।

১৭৮. মুত্তাফাকু আলাইহ, মিশকাত হা/১১৩১।

১৭৯. আবুদাউদ, তিরমিযী হা/২৩১৬।

(২) সূরায়ে কিয়ামাহ-এর শেষে 'সুবহানাকা ফা বালা' =(আবুদাউদ, বায়হাক্বী হহীহ)।

(৩) 'ফাবে আইয়ে আ-লা-য়ে রাব্বিকুমা তুকায্বিবান'-এর জওয়াবে 'লা বেশাইইম মিন নি'আমিকা রব্বানা মুকায্বিবু ফালাকাল হাম্দ'। =(তফসীরে ত্বাবারী, আলবানী, হাশিয়া, মিশকাত হা/৮৬১, ১/২৭৩ পৃঃ) হাদীছ 'হাসান'।

(৪) সূরায়ে গাশিয়া-র শেষে 'আল্লাহুমা হাসিবনী হিসা-বাঁই ইয়াসীরা' =(আহমাদ প্রভৃতি মিশকাত 'হিসাব ও মীযান' অধ্যায় হা/৫৫৬২) হাদীছ 'হাসান'।

(৫) (ক) সূরা ত্বীন-এর শেষে 'বালা ওয়া আনা 'আলা যালিকা মিনাশ শা-হেদীন'  
(খ) সূরায়ে মুরসালাত-এর শেষে 'আমান্না বিল্লাহ'। =(তিরমিযী প্রভৃতি মিশকাত 'ছালাতে কিরাআত' অধ্যায় হা/৮৬০) হাদীছ যঈফ।

প্রথম চারটি হাদীছ দ্বারা কেবল পাঠকারী বা ইমামের কিরাআত ও জওয়াব প্রমাণিত হয়, মুক্তাদীর জন্য নয়। সেকারণ এ বিষয়ে বিদ্বানগণ মতভেদ করেছেন।

তিরমিযী-র ভাষ্যকার আল্লামা আব্দুর রহমান মুবারকপুরী বলেন, তেলাওয়াত কারীর জন্য এইসব আয়াতের উত্তর দেওয়া পসন্দনীয়। তবে শ্রোতা বা মুক্তাদীর উত্তর দেওয়ার ব্যাপারে আমি কোন হাদীছ অবগত নই =(তুহফাতুল আহওয়ামী ১/১৯৪)।

মিশকাত-এর ভাষ্যকার আল্লামা ওবায়দুল্লাহ মুবারকপুরী বলেন, শ্রোতা বা মুক্তাদীর জন্য উপরোক্ত আয়াত সমূহের জওয়াব দেওয়ার প্রমাণে স্পষ্ট কোন মরফু হাদীছ আমি অবগত নই। তবে আয়াত গুলিতে প্রশ্ন রয়েছে। সে কারণ জওয়াবের মুখাপেক্ষী। কাজেই পাঠকারী ও শ্রোতা উভয়ের জন্য উত্তর দেওয়া বাঞ্ছনীয় =(মির'আত ৩/১৭৫)। মুসলিম শরীফের ভাষ্যকার ইমাম নববী (রহঃ) ইমাম ও মুক্তাদী সকলের জন্য জওয়াব দান পসন্দনীয় বলেন =(মুসলিম ১/২৬৪ পৃঃ)। শায়খ আলবানী বলেন, উহা ছালাত ও ছালাতের বাইরে এবং ফরয ও নফল ছালাত সব অবস্থাকে শামিল করে। তিনি 'মুছান্নাফ ইবনে আবী শায়বা'র বরাতে একটি 'আছার' উদ্ধৃত করেন এই মর্মে যে, ছাহাবী আবু মূসা আশ'আরী ও মুগীরা বিন শো'বা (রাঃ) ফরয ছালাতে উক্ত জওয়াব দিতেন। = ছিফাতু ছালাতিন নবী পৃঃ ৮৬ হাশিয়া।

## অন্যান্য জ্ঞাতব্যঃ

১১. একাকী ছালাতের চেয়ে জামা'আতে ছালাত আদায় করায় ২৫ বা ২৭ গুণ বেশী ছওয়াব রয়েছে। যেমন বলা হয়েছে-<sup>১৮০</sup>

صَلَاةُ الْجَمَاعَةِ تَفْضُلُ صَلَاةِ الْفَذِّ بِسَبْعٍ وَعِشْرِينَ دَرَجَةً، متفق عليه

১২. যখন খাদ্য হাযির হবে, ওদিকে জামা'আতের এক্কামত হবে, তখন প্রথমে খাওয়া সেরে নিতে পারবে।<sup>১৮১</sup>
১৩. যখন ছালাতের এক্কামত হ'বে, তখন ঐ ফরয ছালাত ব্যতীত আর কোন ছালাত নেই।<sup>১৮২</sup>
১৪. মসজিদে মেয়েরা গেলে তাদের জন্য 'সুগন্ধি' মাখা নিষেধ হবে।<sup>১৮৩</sup>
১৫. যদি কেউ ওযু করে মসজিদে ছালাতের জন্য রওয়ানা হয়, আল্লাহ তার প্রতি পদক্ষেপের জন্য একটি করে নেকী লিখেন, তার মর্যাদার স্তর একটি করে উন্নীত হয় ও তার একটি করে গোনাহ ঝরে পড়ে।<sup>১৮৪</sup>
১৬. যে ব্যক্তি আযান হওয়ার সঙ্গে সঙ্গে (কোন যরুরী প্রয়োজন ছাড়াই) মসজিদ থেকে বের হয়ে গেল, সে রাসূলুল্লাহ (ছাঃ) -এর অবাধ্যতা করল।<sup>১৮৫</sup>
১৭. ছালাত অবস্থায় কোমরে হাত দিয়ে দাঁড়ানো যাবে না'। আসমানের দিকে তাকানো যাবে না।<sup>১৮৬</sup>
১৮. সিজদার স্থান একবার ছাফ করা যাবে।<sup>১৮৭</sup>
১৯. হাই উঠলে 'হা' করে শব্দ করা যাবে না। তাতে শয়তান হাসে। অতএব সাধ্যমত চেপে রাখতে হবে।<sup>১৮৮</sup>
২০. ছালাত রত অবস্থায় সাপ, বিচ্ছু ইত্যাদি ক্ষতিকর প্রাণী মারা যাবে।<sup>১৮৯</sup>
২১. হাঁচি এলে 'আলহাম্দুলিল্লা-হ' বলা যাবে।<sup>১৯০</sup> তবে হাঁচির জওয়াব দেওয়া যাবে না।<sup>১৯১</sup> মুখে সালামের জওয়াব দেওয়া যাবেনা। তবে আঙ্গুল দিয়ে ইশারা করা যাবে।<sup>১৯২</sup>

১৮১. মুত্তাফাক আলাইহ, মিশকাত হা/১০৫৬।

১৮২. মুসলিম, মিশকাত হা/১০৫৮।

১৮৩. বায়হাক্বী ৩/১২৩; মুসলিম, মিশকাত হা/১০৬০।

১৮৪. মুসলিম, মিশকাত হা/১০৭২।

১৮৫. মুসলিম, মিশকাত হা/১০৭৫।

১৮৬. মুসলিম, মিশকাত হা/৯৮১, ৯৮৩।

১৮৭. মুত্তাফাকু আলাইহ, মিশকাত হা/৯৮০।

১৮৮. বুখারী, মিশকাত হা/৯৮৬।

১৮৯. আহমাদ, আবুদাউদ, তিরমিযী, মিশকাত হা/১০০৪।

১৯০. তিরমিযী, আবুদাউদ, মিশকাত হা/৯৯২।

১৯১. মুসলিম, মিশকাত হা/৯৭৮।

১৯২. তিরমিযী, মিশকাত হা/৯৯১; মুওয়াত্তা, মিশকাত হা/১০১৩।

২২. বাচ্চা কোলে নিয়েও ছালাত আদায় করা যাবে।<sup>১৯৩</sup>

২৩. কবরের দিকে ফিরে ছালাত আদায় করা এবং কবরের উপরে বসা নিষেধ।<sup>১৯৪</sup>

২৪. মুছল্লীদের নিকটে আওয়ায পৌছানোর উদ্দেশ্যে ইমামের তাকবীরের পিছে পিছে মুকাব্বির উচ্চৈঃস্বরে তাকবীর দিতে পারবে।<sup>১৯৫</sup>

২৫. মসজিদের মেম্বর তিন স্তর বিশিষ্ট হওয়া সুন্নাত। এর বেশী উমাইয়াদের সৃষ্ট বিদ'আত।<sup>১৯৬</sup>

২৬. 'আল্লা-হু আকবর' বলে ছালাত শুরু করতে হবে (মুসলিম, ইবনু মাজাহ, ছিফাত ৬৬)। 'নাওয়াইতু আন উছাল্লিয়া' বলে ছালাত শুরু করা বিদ'আত। যারা একে 'বিদ'আতে হাসানাহ' বলেন, তাদের জবাবে এতটুকু বলাই যথেষ্ট যে, ইবাদতের ক্ষেত্রে সৃষ্ট সকল বিদ'আতই ভ্রষ্টতা। যেমন রাসূলুল্লাহ (ছাঃ) এরশাদ করেছেন যে, 'সকল বিদ'আতই ভ্রষ্টতা এবং সকল ভ্রষ্টতার পরিণাম জাহান্নাম'।<sup>১৯৭</sup>

২৭. তাকবীর ব্যতীত যেমন ছালাতে প্রবেশ করা যায় না, তেমনি সালাম ব্যতীত ছালাত শেষ করা যায় না।<sup>১৯৮</sup>

২৮. বুকে হাত বাঁধা ব্যতীত অন্যভাবে ছালাত আদায় করা হয় ভিত্তিহীন, না হয় যঈফ।<sup>১৯৯</sup>

২৯. ছালাত অবস্থায় আসমানের দিকে বা ডানে-বাঁয়ে তাকানো নিষেধ। যতক্ষণ বান্দা এক দৃষ্টে ছালাতরত থাকে ও অন্যদিকে না তাকায়, ততক্ষণ আল্লাহ তার দিকে তাকিয়ে থাকেন। কিন্তু যেমনি সে মুখ ফিরায়ে, তেমনি আল্লাহ মুখ ফিরিয়ে নেন।<sup>২০০</sup>

৩০. রাসূলুল্লাহ (ছাঃ) ছালাতের মধ্যে তিনটি বিষয়ে নিষেধ করেছেনঃ (১) মোরগের মত ঠোকর দিয়ে দ্রুত ছালাত আদায় করা (২) কুকুরের মত চার হাত-পা একত্র করে বসা (৩) শৃগালের মত এদিক-ওদিক তাকানো।<sup>২০১</sup>

১৯৩. মুত্তাফাকু আলাইহ, মিশকাত হা/৯৮৪।

১৯৪. মুসলিম, আবুদাউদ, ইবনু খুযায়মা; ছিফাতু ছালা-তিন নবী পৃঃ ৬৫।

১৯৫. আহমাদ, হাকেম, মুসলিম, নাসাঈ; ছিফাত পৃঃ ৬৭।

১৯৬. আলবানী, হাশিয়া ছিফাতু ছালা-তিন নবী পৃঃ ৬২।

১৯৭. মুসলিম, মিশকাত হা/১৪১, নাসাঈ হা/১৫৭৯।

১৯৮. আবুদাউদ, তিরমিযী, ইরওয়া হা/৩০১, মিশকাত হা/৩১২।

১৯৯. আলবানী, হাশিয়া ছিফাতু ছালা-তিন নবী পৃঃ ৬৯।

২০০. আবুদাউদ, ছহীহ তারগীব হা/৫৫৫।

২০১. আহমাদ, ছহীহ তারগীব হা/৫৫৩।

৩১. ছালাতের সময় নকশা করা পোষাক পরিধান করা উচিত নয়, যাতে নিজের বা অন্য মুছল্লীর দৃষ্টি কেড়ে নেয়।<sup>২০২</sup> মুছাল্লা বা জায় নামাযের ব্যাপারেও একই কথা বলা যেতে পারে। ডান, বাম বা সম্মুখ থেকে ছবিযুক্ত সবকিছু দৃষ্টির বাইরে সরিয়ে ফেলতে হবে।<sup>২০৩</sup>

৩২. 'বাচ্চাদের মসজিদ থেকে দূরে সরিয়ে রাখো' বলে যে হাদীছ প্রচলিত আছে, তা সর্বসম্মতভাবে যঈফ।<sup>২০৪</sup>

৩৩. 'যে ব্যক্তি ইমামের পিছনে সূরায়ে ফাতিহা পাঠ করবে, তার মুখ আগুন দ্বারা ভরে দেওয়া হবে' বলে যে হাদীছ প্রচলিত আছে, সেটা 'মওযু' বা জাল<sup>২০৫</sup> এবং মাটি দিয়ে ভরে দেওয়ার হাদীছ 'মওকূফ' ও যঈফ (ইরওয়া হা/৫০৩)।

৩৪. রাসূলুল্লাহ (ছাঃ) বলেন, সবচেয়ে বড় চোর হ'ল 'ছালাত চোর'। সে হ'ল ঐ ব্যক্তি যে ছালাতে রুকু ও সিজদা পূর্ণ করে না।<sup>২০৬</sup>

৩৫. ফরয ও নফলের মধ্যে কথা বলা বা বের হয়ে যাওয়ার মাধ্যমে পার্থক্য করা উচিত।<sup>২০৭</sup> অমনিভাবে ফরয ছালাত আদায়ের স্থান হ'তে কিছুটা সরে গিয়ে সুন্নাত-নফল ছালাত আদায় করা মুস্তাহাব।<sup>২০৮</sup> ইমাম বুখারী ও ইমাম বাগাভী বলেন, এর দ্বারা ইবাদতের স্থানের সংখ্যা বেশী হয় এবং সিজদার স্থান সমূহ আল্লাহর নিকটে সাক্ষী হয়। যেমন সূরায়ে যিলযালের ৪নং আয়াতে বলা হয়েছে যে, 'ক্বিয়ামতের দিন, যমীন নিজেই (বান্দার আমল সম্পর্কে) খবর দিবে।' তাছাড়া সূরায়ে দুখানের ২৯ আয়াতের তাফসীরে বলা হয়েছে যে, 'কোন মুমিন যখন মৃত্যুবরণ করে, তখন যমীনে তার সিজদার স্থানগুলি তার জন্য ক্রন্দন করতে থাকে এবং তার আমলসমূহ আসমানে উঠানো হয়'।<sup>২০৯</sup>

৩৬. চোখে দেখা বা কানে শোনার মাধ্যমে যদি ইমামের ইকতেদা করা সম্ভব হয়, তবে তাঁর ইকতেদা করা জায়েয। যদিও সেটা মসজিদের বাইরে হয় কিংবা উভয়ের

২০২. বুখারী, মুসলিম, ইরওয়া হা/৩৭৬।

২০৩. বুখারী, মুসলিম, ফৎহুল বারী ১০/৩২১।

২০৪. ছিফাতু ছালা-তিন নবী হাশিয়া পৃঃ ৮৫।

২০৫. সিলসিলা যঈফাহ হা/৫৬৯।

২০৬. মুছাল্লাফ ইবনু আবী শায়বা, তাবারাণী, হাকেম, মিশকাত হা/৮৮৫ ছিফাত পৃঃ ১১২।

২০৭. মুসলিম, আবুদাউদ, নায়লুল আওত্বার ৪/১১০; ছহীহুল জামে' হা/৭৪৭৮।

২০৮. আবুদাউদ, ইবনু মাজাহ, মিশকাত হা/৯৫৩; ছহীহুল জামে' হা/৭৭২৭।

২০৯. নায়ল ৪/১১০ 'ফরয ব্যতীত অন্যস্থানে নফল ছালাত আদায়' অনুচ্ছেদ)।



मध्ये কোন রাস্তা বা অনুরূপ কোন প্রতিবন্ধক থাকে।<sup>১১০</sup>

৩৭. ছালাতের মধ্যে আরবী ব্যতীত অন্য ভাষায় কিরাআত ও তাসবীহ পাঠ করা যাবে না।<sup>১১১</sup>

৩৮. ক্বাযা ছালাতঃ উহা আদায়ের নিয়মে স্পষ্ট কোন হাদীছ পাওয়া যায় না। তবে ধারাবাহিক ভাবে আদায় করা ব্যঞ্জনীয়। ঘুমিয়ে গেলে বা ভুলে গেলে ঘুম ভাঙলে, অথবা স্মরণে আসার সাথে সাথে ক্বাযা ছালাত আদায় করতে হবে।<sup>১১২</sup> 'উমরী ক্বাযা' আদায় সম্পূর্ণ একটি বিদ'আতী প্রথা'।<sup>১১৩</sup>

টাকনুর উপরে কাপড় সর্বদা থাকতে হবে। শুধু ছালাতের সময় নয়।<sup>১১৪</sup>

---

১১০. আব্দুর রহমান নাহের সাদী, আল-মুখতারাতুল জালিইয়াহ, (রিয়াযঃ দারুল ইফতা ২য় সংস্করণ ১৪০৫ হিঃ) পৃঃ ৬৮।

১১১. মুসলিম, বুলুগুল মারাম হা/২১৭।

১১২. ফিকহস সুন্নাহ ১/২০৫।

১১৩. মুসলিম, মিশকাত হা/২৮।

১১৪. বুখারী, মিশকাত হা/৪৩১৪।

## বিভিন্ন ছালাতের পরিচয়

### ১. বিতর ও কুনূত

বিতর অর্থ বেজোড়। এশা, তারাবীহ, তাহাজ্জুদ ইত্যাদি রাত্রির ছালাত শেষে বিতর পড়া সূনাত।<sup>১</sup> বিতর মূলতঃ এক রাক'আত। কেননা এক রাক'আত যোগ না করলে কোন ছালাতই বেজোড় হয় না। রাসূলুল্লাহ (ছাঃ) এরশাদ করেন-

الْوَيْتْرُ رَكْعَةٌ مِنْ آخِرِ اللَّيْلِ رَوَاهُ مُسْلِمٌ عَنْ ابْنِ عُمَرَ -

'বিতর রাত্রির শেষে এক রাক'আত মাত্র'।<sup>২</sup> আয়েশা (রাঃ) বলেন, وَكَانَ يُوْتِرُ 'বিতর করতেন'।<sup>৩</sup> রাসূলুল্লাহ (ছাঃ) এক রাক'আত দ্বারা বিতর করতেন'।<sup>৪</sup>

বিতর ১, ৩, ৫, ৬, ৯ রাক'আত পড়া যায় এবং তা প্রথম রাত্রি, মধ্য রাত্রি, ও শেষ রাত্রি সকল সময় পড়া জাযেয়।<sup>৫</sup> যদি কেউ বিতর পড়তে ভুলে যায় অথবা বিতর না পড়ে ঘুমিয়ে যায়, তবে স্মরণ হ'লে কিংবা ঘুম হ'তে জেগে উঠার পরেই তা আদায় করবে।<sup>৬</sup> এক হ'তে পাঁচ রাক'আত পর্যন্ত এক বৈঠকে ও সালাম সহ বিতর শেষ করবে।<sup>৭</sup> সাত ও নয় রাক'আত বিতরে ছয় ও আট রাক'আতে প্রথম বৈঠক করবে। অতঃপর সপ্তম ও নবম রাক'আতে শেষ বৈঠক করে সালাম ফিরাবে।<sup>৮</sup> চার খলীফাসহ অধিকাংশ ছাহাবী তাবেঈ ও মুজতাহিদ ইমাম এক রাক'আত বিতরে অভ্যস্ত ছিলেন।<sup>৯</sup>

কুনূতঃ দুর্ভিক্ষ, মহামারী, শত্রুর আক্রমণ অথবা কারো বিশেষ কল্যাণ ইত্যাদি গুরুত্বপূর্ণ কারণে সময় বিশেষে পাঁচ ওয়াক্ত ছালাতেই রুকু'র পরে দাঁড়িয়ে কুনূত পড়া সূনাত।<sup>১০</sup> এই কুনূতের জন্য কোন নির্দিষ্ট দো'আ নেই।<sup>১১</sup> অবস্থা বিবেচনা করে ইমাম আরবীতে সরবে দো'আ পড়বেন ও মুক্তাদীগণ 'আমীন' 'আমীন' বলবেন।<sup>১২</sup> বিতরের কুনূতের জন্য হাদীছে বিশেষ দো'আ বর্ণিত হয়েছে।<sup>১৩</sup> বিতরের কুনূত সারা বছর পড়া

১. নায়ল ৩/২৯১; মির'আত ২/২০৭; হুজ্জাতুল্লাহিল বালিগাহ ২/১৭ পৃঃ।

২. মুসলিম, মিশকাত হা/ ১২৫৫।

৩. ইবনু মাজাহ, মিশকাত হা/১২৮৫

৪. মুত্তাফাক আলাইহ, মিশকাত হা/১২৬১।

৫. আবুদাউদ, মিশকাত, নায়ল ৩/২৯৪-৩০২, মির'আত ২/২০২।

৬. মুত্তাদরাকে হাকেম ১/৩০৪; বায়হাকী ৩/৩১; মির'আত ২/২০১-২; মুত্তাফাক আলাইহ, মিশকাত হা/১২৫৪ ও ৫৬।

৭. মুত্তাফাক আলাইহ, মিশকাত হা/১২৫৭, বায়হাকী ৩/৩০, মির'আত ২/২০৩-৪।

৮. নায়ল ৩/২৯৬।

৯. মুত্তাফাক আলাইহ, মিশকাত ১২৮৮-৮৯।

১০. মির'আত ২/২২০।

১১. আবুদাউদ, মিশকাত হা/১২৯০; মাসায়েলে ইমাম আহমাদ, মাসআলা নং ৪৫৯।

১২. তিরমিযী, আবুদাউদ, নাসাঈ, ইবনু মাজাহ, মিশকাত হা/১২৭৩।

চলে।<sup>১৩</sup> তবে মাঝে মধ্যে ছেড়ে দেওয়া ভাল। কেননা বিতরের জন্য কুনূত শর্ত নয়।<sup>১৪</sup> হযরত আনাস (রাঃ) বর্ণিত হাদীছে যেহেতু রুকুর আগে ও পরে উভয় প্রকার কুনূতের বর্ণনা এসেছে<sup>১৫</sup> সেহেতু দু'টি পদ্ধতিই জায়েয আছে। আবু হুরায়রা (রাঃ) হ'তে স্পষ্ট ভাবে বর্ণিত হয়েছে যে, **أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ كَانَ إِذَا أَرَادَ أَنْ يَدْعُوَ عَلَيَّ أَحَدٍ أَوْ لِأَحَدٍ قَبْلَ بَعْدِ الرُّكُوعِ، مَتَّفِقٌ عَلَيْهِ-** 'রাসূলুল্লাহ (ছাঃ) যখন কারো বিরুদ্ধে বা কারো পক্ষে দো'আ করতেন, তখন রুকুর পড়ে কুনূত পড়তেন...।<sup>১৬</sup> একই মর্মে হাদীছ বর্ণিত হয়েছে হযরত আব্দুল্লাহ বিন আব্বাস (রাঃ) হ'তে।<sup>১৭</sup> ইমাম বায়হাক্বী বলেন,

**رَوَاةُ الْقُنُوتِ بَعْدَ الرَّفْعِ أَكْثَرُ وَأَحْفَظُ وَعَلَيْهِ دَرَجَةُ الْخُلَفَاءِ الرَّاشِدُونَ-**

'রুকুর পরে কুনূতের রাবীগণ সংখ্যায় অধিক ও অধিকতর স্মৃতিসম্পন্ন এবং এর উপরেই খুলাফায়ে রাশেদীন আমল করেছেন'।<sup>১৮</sup> যেমন হযরত ওমর, আব্দুল্লাহ ইবনে মাসউদ, আনাস আবু হুরায়রা (রাঃ) প্রমুখ ছাহাবী থেকে বিতরের কুনূতে বুক বরাবর হাত উঠিয়ে দো'আ করা প্রমাণিত আছে।<sup>১৯</sup> ইমাম আহমাদ বিন হাম্বলকে জিজ্ঞেস করা হ'ল যে, বিতরের কুনূত রুকুর পরে হবে, না পূর্বে হবে এবং এই সময় দো'আ করার জন্য হাত উঠানো যাবে কি-না। তিনি বললেন, বিতরের কুনূত হ'বে রুকুর পরে এবং এই সময় হাত উঠিয়ে দো'আ করা যাবে।<sup>২০</sup> ইমাম আবু ইউসুফ (রহঃ) বলেন, বিতরের কুনূতের সময় দু'হাতের তালু আসমানের দিকে বুক বরাবর উঁচু থাকবে। ইমাম ত্বাহাবী ও ইমাম কারখীও এটাকে পসন্দ করেছেন।<sup>২১</sup>

## দো'আয়ে কুনূত

হযরত হাসান বিন আলী (রাঃ) বলেন যে, বিতরের কুনূতে বলার জন্য রাসূলুল্লাহ (ছাঃ) আমাকে নিম্নোক্ত দো'আ শিখিয়েছেন।-

**اللَّهُمَّ اهْدِنِي فِيمَنْ هَدَيْتَ ، وَعَافِنِي فِيمَنْ عَافَيْتَ ، وَتَوَلَّنِي فِيمَنْ تَوَلَّيْتَ ، وَبَارِكْ لِي فِيمَا أَعْطَيْتَ ، وَقِنِي شَرَّ مَا قَضَيْتَ ، فَإِنَّكَ**

১৩. প্রাণ্ডক্ত, মিশকাত হা/১২৭৩-৭৬

১৪. আবুদাউদ, নাসাঈ, তিরমিযী, মিশকাত হা/১২৯১-৯২; মির'আত ২/২২৩।

১৫. মুত্তাফাক আলাইহ, মিশকাত হা/১২৮৯; ইবনু মাজাহ, মিশকাত হা/১২৯৪।

১৬. মুত্তাফাক আলাইহ, মিশকাত হা/১২৮৮।

১৭. আবুদাউদ, মিশকাত হা/১২৯০।

১৮. তুহফা কাররো; ১৯৮৭, ২/৫৬৬।

১৯. মির'আত ২/২১৯, তুহফা ২/৫৬৭; বায়হাক্বী ১/২১১।

২০. তুহফা ২/৫৬৬; মাসায়েলে ইমাম আহমাদ, মাসআলা নং ৪১৭-২১।

২১. মির'আত।

تَقْضِي وَلَا يُقْضَى عَلَيْكَ ، إِنَّهُ لَا يَذِلُّ مَنْ وَأَلَيْتَ ، وَلَا يَعْزُزُّ مَنْ عَادَيْتَ ، تَبَارَكْتَ رَبَّنَا وَتَعَالَيْتَ ، وَنَسْتَغْفِرُكَ وَنَتُوبُ إِلَيْكَ وَصَلَّى اللَّهُ عَلَي النَّبِيِّ -

উচ্চারণঃ ‘আল্লা-হুম্মাহ্‌দিনী ফীমান হাদায়তা, ওয়া ‘আ-ফিনী ফীমান ‘আ-ফায়তা, ওয়া তাওয়াল্লানী ফীমান তাওয়াল্লায়তা, ওয়া বা-রিকলী ফীমা আ‘ত্বায়তা, ওয়া কিনী শারুরা মা ক্বায়য়তা; ফাইন্বাকা তাক্বযী ওয়া লা ইয়ুক্বযা ‘আলায়কা, ইন্বাহু লা ইয়াযিল্লু মাও ওয়া-লায়তা, ওয়া লা ইয়া‘ইয়ু মান্ ‘আ-দায়তা, তাবা-রক্বতা রক্বানা ওয়া তা‘আ-লায়তা, ওয়া নাস্তাগ্‌ফিরুক্বা ওয়া নাত্বুবু এলায়কা, ওয়া ছাল্লাল্লা-হু ‘আলান্ন নাবী’।

জামা‘আতে ইমাম ছাহেব ক্রিয়াপদের শেষে একবচন...নী-এর স্থলে বহুবচন...না বলতে পারেন (শায়খ বিন বায, মাজমূ‘আ ফাতাওয়া ৪/২৯৫)।

অনুবাদঃ হে আল্লাহ! তুমি যাদেরকে সুপথ দেখিয়েছ, আমাকেও তাদের মধ্যে গণ্য করে সুপথ দেখাও। যাদেরকে তুমি মাফ করেছ, আমাকেও তাদের মধ্যে গণ্য করে মাফ করে দাও। তুমি যাদের অভিভাবক হয়েছ, তাদের মধ্যে গণ্য করে আমারও অভিভাবক হয়ে যাও। তুমি আমাকে যা দান করেছ, তাতে বরকত দাও। তুমি যে ফায়ছালা করে রেখেছ, তার অনিষ্ট হ’তে আমাকে বাঁচাও। কেননা তুমি সিদ্ধান্ত দিয়ে থাক, তোমার বিরুদ্ধে কেউ সিদ্ধান্ত দিতে পারে না। তুমি যার সাথে বন্ধুত্ব রাখ, সে কোনদিন অপমানিত হয় না। আর তুমি যার সাথে দুশমনী কর, সে কোনদিন সম্মানিত হ’তে পারে না। হে আমাদের প্রতিপালক! তুমি বরকতময় ও সর্বোচ্চ। আমরা তোমার নিকট ক্ষমা প্রার্থনা করছি ও তওবা করছি। আল্লাহ তাঁর নবীর উপরে রহমত নাযিল করুন’।<sup>২২</sup>

ইমাম তিরমিযী বলেন, لَا نَعْرِفُ عَنِ النَّبِيِّ (ص) فِي الْقُنُوتِ شَيْئًا أَحْسَنَ مِنْ هَذَا - ‘নবী করীম (ছাঃ) থেকে কুনূতের জন্য এর চেয়ে কোন উত্তম দো‘আ আমরা জানতে পারিনি’।<sup>২৩</sup>

শায়খ আলবানী বলেন, এই দো‘আটি বিতরের জন্য। কেননা এটি ফজরের কুনূতে পড়া আমার নিকটে ছহীহ প্রমাণিত নয় (ইরওয়া হা/৪২৯, ২/১৭৪-৭৫)।

উল্লেখ্য যে, বায়হাক্বী ও ত্বাবারাণীতে وَلَا يَعْزُزُّ مَنْ عَادَيْتَ وَ ছহীহ ইবনু হিব্বানের রেওয়য়াতে وَنَسْتَغْفِرُكَ وَنَتُوبُ إِلَيْكَ এবং নাসাঈ ও ত্বাবারাণীর রেওয়য়াতে وَصَلَّى اللَّهُ عَلَي النَّبِيِّ وَ ছহীহ বা হাসান সনদে বর্ণিত হয়েছে। যেগুলিকে তিরমিযী বর্ণিত উপরোক্ত দো‘আয়ে কুনূত -এর সাথে যুক্ত করে এখানে বলা হয়েছে।<sup>২৪</sup> দো‘আয়ে কুনূত শেষে ‘আল্লাহ্ আকবার’ বলে সিজদায় যেতে হবে।<sup>২৫</sup> কুনূত বা যেকোন দো‘আ শেষে মুখে হাত বুলানোর কোন ছহীহ হাদীছ নেই।<sup>২৬</sup> বিতর শেষে

২২. সুনানু আরবা‘আহ, দারেমী, মিশকাত হা/১২৭৩।

২৩. তুহফাতুল আহওয়যী ২/৫৬৪; বায়হাক্বী ২/২১০-১১।

২৪. নায়ল ৩/৩১১-১৩; মির‘আত ২/২১২ পৃঃ।

২৫. দারাকুৎনী, সনদ ছহীহ; আলবানী, ছিফাতু ছালাতিন্বী’ পৃঃ ১৬০।

২৬. মিশকাত হা/২২৫৫ -এর টীকা; ইরওয়াউল গালীল হা/৪৩৩-৩৪ ১/৭৮-৮২ পৃঃ।

ইচ্ছা করলে বসেই দু'রাক'আত নফল ছালাত আদায় করবে।\* উল্লেখ্য যে, اللَّهُمَّ إِنَّا نَسْتَغْفِرُكَ وَنَسْتَغْفِرُكَ... আল্লাহুমা ইন্না নাস্তাগ্ফিরুকা ওয়া নাস্তাগ্ফিরুকা... বলে বিতরে যে কুনূত এদেশে পড়া হয়, সেটা মুরসাল বা 'যঈফ' (বায়হাক্বী ২/২১১)। বিতরের কুনূতের জন্য উপরে বর্ণিত দো'আটিই সর্বোত্তম।<sup>২৭</sup>

### কুনূতে নাযেলার দো'আঃ (قنوت النازلة)

যুদ্ধ, শত্রুর আক্রমণ প্রভৃতি বিপদের সময় শত্রুপক্ষের বিরুদ্ধে আল্লাহর সাহায্য কামনা করে বিশেষভাবে এই দো'আ পড়তে হয়। 'কুনূতে না-যেলাহ' সব ওয়াক্ত ফরয ছালাতে বিশেষ করে ফজরের শেষ রাক'আতে রুকুর পরে দাঁড়িয়ে সরবে পাঠ করা যায় (ফিকহুস সুন্নাহ ১/১৪৮)। কুনূতে নাযেলাহর জন্য রাসূলুল্লাহ (ছাঃ) থেকে নির্দিষ্ট কোন দো'আ বর্ণিত হয়নি। তিনি বিভিন্ন সময় বিভিন্ন ব্যক্তি বা শক্তির বিরুদ্ধে বিভিন্নভাবে দো'আ করেছেন। তবে হযরত ওমর (রাঃ) থেকে এ বিষয়ে একটি দো'আ বর্ণিত হয়েছে, যা তিনি ফজরের ছালাতে পাঠ করতেন এবং যা ইসলাম বিরোধী শক্তির বিরুদ্ধে সবসময় পাঠ করা যেতে পারে। যেমন-

اللَّهُمَّ اغْفِرْ لَنَا وَلِلْمُؤْمِنِينَ وَالْمُؤْمِنَاتِ وَالْمُسْلِمِينَ وَالْمُسْلِمَاتِ وَالْأَفْ  
بَيْنَ قُلُوبِهِمْ وَأَصْلِحْ ذَاتَ بَيْنِهِمْ وَأَنْصِرْهُمْ عَلَى عَدُوِّكَ وَعَدُوِّهِمْ، اللَّهُمَّ  
الْعَنِ الْكُفْرَةَ الَّذِينَ يَصُدُّونَ عَنْ سَبِيلِكَ وَيُكَذِّبُونَ رُسُلَكَ وَيُقَاتِلُونَ  
أَوْلِيَاءَكَ، اللَّهُمَّ خَالَفْ بَيْنَ كَلِمَتِهِمْ وَزَلْزِلْ أَقْدَامَهُمْ وَأَنْزِلْ بِهِمْ بِأَسْكَ  
الَّذِي لَا تَرُدُّهُ عَنِ الْقَوْمِ الْمُجْرِمِينَ -

উচ্চারণঃ আল্লা-হুমাগফির লানা ওয়া লিল মু'মিনীনা ওয়াল মু'মিনা-তি ওয়াল মুসলিমীনা ওয়াল মুসলিমা-তি, ওয়া আল্লিফ বায়না কুলূবিহিম ওয়া আছলিহ যা-তা বায়নিহিম, ওয়ান্ছুরহম 'আলা 'আদুউবিকা ওয়া 'আদুউবিহিম। আল্লা-হুমা'আনিল কাফারাতাল্লাযীনা ইয়াছুদ্ধূনা 'আন সাবীলিকা ওয়া ইয়ুকাযযিবূনা রুসুলাকা ওয়া ইয়ুকা-তিলূনা আউলিয়া-আকা। আল্লা-হুমা খা-লিফ বায়না কালিমাতিহিম ওয়া বালঝিল আক্কা-মাহম ওয়া আনঝিল বিহিম বা'সাকাল্লাযী লা তারুদুহু 'আনিল কাউমিল মুজরিমীনা।

অনুবাদঃ হে আল্লাহ! আপনি আমাদেরকে এবং সকল মুমিন-মুসলিম নর-নারীকে ক্ষমা করুন। আপনি তাদের অন্তর সমূহে মহব্বত পয়দা করে দিন ও তাদের

\* দারেমী, ছহীহ ইবনু খুযায়মা, ছহীহ ইবনু হিব্বান, সিলসিলা ছহীহাহ হা/১৯৯৩।

২৭. ইরওয়া হা/৪২৮; ছালাতুর রাসূল (মুহাক্কাক্ব) পৃঃ ৩৯৭-৯৮।

মধ্যেকার বিবাদ মীমাংসা করে দিন। আপনি তাদেরকে আপনার ও তাদের শত্রুদের বিরুদ্ধে সাহায্য করুন। হে আল্লাহ! আপনি কাফেরদের উপরে লা'নত করুন। যারা আপনার রাস্তা বন্ধ করে, আপনার প্রেরিত রাসূলদের অবিশ্বাস করে ও আপনার বন্ধুদের সাথে লড়াই করে। হে আল্লাহ! আপনি তাদের দলের মধ্যে ভাঙ্গন সৃষ্টি করে দিন ও তাদের পদসমূহ টলিয়ে দিন এবং আপনি তাদের মধ্যে আপনার প্রতিশোধকে নামিয়ে দিন, যা পাপাচারী সম্প্রদায় থেকে আপনি ফিরিয়ে নেন না' (বায়হক্বী ২/২১০-১১)।

অতঃপর প্রথম বিসমিল্লাহ... সহ ইন্না নাস্তা ঈনুকা... এবং দ্বিতীয়বার বিসমিল্লাহ... সহ ইন্না না'বুদুকা... বর্ণিত আছে (বায়হক্বী ২/২১০-১১)। উক্ত 'কুনূতে নাযেলাহ্' থেকে মধ্যম অংশটুকু নিয়ে সেটাকে এদেশে 'কুনূতে বিতর' হিসাবে চালু করা হয়েছে। আলবানী বলেন, এই দো'আটি ওমর (রাঃ) ফজরের ছালাতে কুনূতে নাযেলাহ হিসাবে পড়তেন। এটাকে তিনি বিতরের কুনূতে পড়েছেন বলে জানা যায়নি (ইরওয়া হা/৪২৮, ২/১৭২)।

## ২. তারাবীহ ও তাহাজ্জুদ (صلاة اللیل)

তারাবীহঃ মূল ধাতু رَا حَ (রা-হাতুন) অর্থঃ প্রশান্তি। অন্যতম ধাতু رَوْح (রাওহন) অর্থঃ সন্ধ্যারাতে কোন কাজ করা। সেখান থেকে ترويح (তারবীহাতুন) অর্থঃ বিশেষ প্রশান্তি বা প্রশান্তির বৈঠক; যা রামাযান মাসে তারাবীহর ছালাতে প্রতি চার রাক'আত শেষে করা হয়ে থাকে। বহুবচনে (التراويح) 'তারা-বীহ' অর্থঃ প্রশান্তির বৈঠকসমূহ (আল-মুনজিদ)।

তাহাজ্জুদঃ মূল ধাতু هَجَدُ (হজ্জুদুন) অর্থঃ রাতে ঘুমানো বা ঘুম থেকে জাগা। সেখান থেকে تَهَجَّدُ (তাহাজ্জুদুন) পারিভাষিক অর্থে রাত্রিতে ঘুম থেকে জেগে বা রাত্রি জেগে ছালাত আদায় করা (ঐ)। রাতের শেষ অংশে পড়লে তাকে 'তাহাজ্জুদ' বলা হয় এবং প্রথম অংশে পড়লে তাকে 'তারাবীহ' বলা হয়।

তারাবীহ ও তাহাজ্জুদ মূলতঃ রাতের ছালাত বা 'ছালাতুল লায়ল'। রাতের ছালাত নফল হ'লেও তা খুবই গুরুত্বপূর্ণ। যেমন এরশাদ হয়েছে-

أَفْضَلُ الصَّلَاةِ بَعْدَ الْفَرِيضَةِ صَلَاةُ اللَّيْلِ رَوَاهُ مُسْلِمٌ عَنْ أَبِي هُرَيْرَةَ -  
অর্থাৎ 'ফরয ছালাতের পরে সর্বোত্তম ছালাত হ'ল রাতের ছালাত'।<sup>২৮</sup> রাতের ছালাত শেষে বিতর পড়তে হয়।<sup>২৯</sup> তারাবীহ ও তাহাজ্জুদ দু'টিই রাতের ছালাতের অন্তর্ভুক্ত। রামাযান মাসে প্রথম রাতে 'তারাবীহ' পড়লে শেষ রাতে 'তাহাজ্জুদ' পড়তে হয়

২৮. মুসলিম, মিশকাত হা/২০৩৯।

২৯. মুসলিম, মিশকাত হা/১২৪৮।

না।<sup>৩০</sup> তারা বীহ বা তাহাজ্জুদে রাসূলুল্লাহ (ছাঃ) লম্বা কিরাআতসহ দীর্ঘ কিয়াম, কু'উদ, রুকু, সুজুদ ও তাসবীহ-তেলাওয়াতে মশগুল থাকতেন। রামাযান মাসের ২৩, ২৫ ও ২৭ যে তিনদিন তিনি মসজিদে নববীতে জামা'আত সহকারে তারা বীহ পড়েছিলেন, সে তিনদিনের প্রথমদিন রাতের এক তৃতীয়াংশ পর্যন্ত, ২য় দিন মধ্যরাত্রি পর্যন্ত ও ৩য় দিন স্ত্রী-কন্যাসহ সাহারীর পূর্ব পর্যন্ত দীর্ঘ ছালাত আদায় করেন (ঐ)। মুছল্লীদের দারুন আগ্রহ দেখে তারা বীহ ফরয হয়ে যাওয়ার ভয়ে তিনি আর জামা'আতে পড়েননি।<sup>৩১</sup>

রাক'আত সংখ্যাঃ রামাযান বা রামাযানের বাইরে রাসূলুল্লাহ (ছাঃ) হ'তে রাত্রির ছালাত তিন রাক'আত বিতরসহ ১১ রাক'আত ছহীহ সূত্রে প্রমাণিত হয়েছে। যেমন মা আয়েশা (রাঃ) বলেন,

مَا كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ يَزِيدُ فِي رَمَضَانَ وَلَا فِي غَيْرِهِ عَلَى إِحْدَى عَشْرَةَ رَكْعَةً، يُصَلِّيُ أَرْبَعًا فَلَا تَسْأَلُ عَنْ حُسْنِهِنَّ وَطَوْلِهِنَّ ثُمَّ يُصَلِّيُ أَرْبَعًا فَلَا تَسْأَلُ عَنْ حُسْنِهِنَّ وَطَوْلِهِنَّ ثُمَّ يُصَلِّيُ ثَلَاثًا،

অর্থঃ রামাযান বা রামাযানের বাইরে রাসূলুল্লাহ (ছাঃ) রাতের ছালাত এগার রাক'আতের বেশী আদায় করেননি। তিনি প্রথমে (২+২) চার রাক'আত পড়েন। তুমি তার সৌন্দর্য ও দীর্ঘতা সম্পর্কে জিজ্ঞেস কর না। অতঃপর তিনি চার রাক'আত পড়েন। তুমি তার সৌন্দর্য ও দীর্ঘতা সম্পর্কে জিজ্ঞেস কর না। অতঃপর তিন রাক'আত পড়েন।<sup>৩২</sup>

সম্ভবতঃ শেষ রাতে একাকী তাহাজ্জুদ পড়াকে উত্তম মনে করার কারণে অথবা নব প্রতিষ্ঠিত ইসলামী রাষ্ট্রের উপরে আপতিত যুদ্ধ-বিগ্রহ ও অন্যান্য ব্যস্ততার কারণে ১ম খলীফা হযরত আবুবকর (রাঃ) -এর সংক্ষিপ্ত খেলাফতকালে তারা বীহর জামা'আত পুনরায় চালু করা সম্ভব হয়নি (মির'আৎ ২/২৩২)। ২য় খলীফা হযরত ওমর (রাঃ)-স্বীয় যুগে রাজনৈতিক স্থিতিশীলতার কারণে এবং বহু সংখ্যক মুছল্লীকে মসজিদে বিক্ষিপ্ত ভাবে উজ্জ ছালাত আদায় করতে দেখে রাসূলের সুনাত অনুসরণ করে মসজিদে নববীতে ১১ রাক'আতে তারা বীহর জামা'আত পুনরায় চালু করেন। যেমন সায়েব বিন ইয়াযীদ (রাঃ) বলেন,

أَمْرُ عُمَرَ بْنِ الْخَطَّابِ أَبِي بَنْ كَعْبٍ وَ تَمِيمًا الدَّارِيُّ أَنْ يَقُومًا لِلنَّاسِ فِي رَمَضَانَ بِإِحْدَى عَشْرَةَ رَكْعَةً... رواه في الموطأ بإسنادٍ صحيحٍ -

অর্থাৎ খলীফা ওমর বিনুল খাত্তাব (রাঃ) হযরত উবাই বিন কা'ব ও তামীম দারী

৩০. আবুদাউদ, তিরমিযী, মিশকাত হা/১২৯৮।

৩১. মির'আৎ হা/১৩১১ -এর ভাষা, ২/২৩২।

৩২. বুখারী ১/১৫৪ পৃঃ, মুসলিম ১/২৫৪ পৃঃ, তিরমিযী তুহফা সহ হা/৪৩৭, 'রাতের ছালাত' অধ্যায় ২/৫১৮ পৃঃ; বুলুগল মারাম হা/৩৬৭, ছহীহ ইবনু খুযায়মা হা/১১৬৬।

(রাঃ) -কে রামাযানের রাত্রিতে ১১ রাক'আত ছালাত জামা'আত সহকারে আদায়ের নির্দেশ প্রদান করেন। এই ছালাত **إِلَى فُرُوعِ الْفَجْرِ** অর্থাৎ ফজরের প্রাক্কালে (সাহারীর পূর্ব) পর্যন্ত দীর্ঘ হ'ত'।<sup>৩৩</sup>

প্রকাশ থাকে যে, উক্ত রেওয়াজাতের শেষে ইয়াযীদ বিন রুমান থেকে 'ওমরের যামানায় ২০ রাক'আত তারাবীহ পড়া হ'ত' বলে যে বর্ণনা এসেছে, তা 'যঈফ' এবং ২০ রাক'আত সম্পর্কে ইবনু আব্বাস (রাঃ) থেকে 'মরফু' সূত্রে যে বর্ণনা এসেছে, তা 'মওযু' বা জাল।<sup>৩৪</sup> এতদ্ব্যতীত ২০ রাক'আত তারাবীহ সম্পর্কে কয়েকটি 'মরফু' হাদীছ এসেছে, যার সবগুলিই 'যঈফ'।<sup>৩৫</sup>

রাসূলুল্লাহ (ছাঃ) প্রতি দু'রাক'আত অন্তর সালাম ফিরিয়ে আট রাক'আত তারাবীহ শেষে কখনও এক, কখনও তিন, কখনও পাঁচ রাক'আত বিতর এক সালামে পড়তেন।<sup>৩৬</sup> জেনে রাখা ভাল যে, রাক'আত গণনার চেয়ে ছালাতের খুশু-খুযু ও দীর্ঘ সময় কিয়াম, কুউদ, রুকু, সুজুদ অধিক যরুরী। যা আজকের মুসলিম সমাজে প্রায় লোপ পেতে বসেছে। ফলে রাত্রির নিভৃত ছালাতের মূল উদ্দেশ্য ব্যাহত হচ্ছে।

উল্লেখ্য যে, রামাযানের প্রতি রাতে নিয়মিত জামা'আতে তারাবীহ পড়াকে অনেকে বিদ'আত মনে করেন। কেননা রাসূলুল্লাহ (ছাঃ) মাত্র তিনদিন জামা'আতে তারাবীহ পড়েছিলেন এবং ওমর ফারুক (রাঃ) নিয়মিত জামা'আতে তারাবীহ চালু করার পরে একে 'সুন্দর বিদ'আত' (**نِعْمَتِ الْبِدْعَةِ هَذِهِ**) বলেছিলেন (বুখারী, মিশকাত হা/১৩০১)। এর জবাব এই যে, ওমর ফারুক (রাঃ) এটিকে আভিধানিক অর্থে বিদ'আত বলেছিলেন, শারঈ অর্থে নয়। কেননা শারঈ বিদ'আত সর্বতোভাবেই ভ্রষ্টতা। যার পরিণাম জাহান্নাম। আভিধানিক অর্থে তিনি এজন্য বিদ'আত বলেন যে, এটিকে রাসূল (ছাঃ) কায়েম করার পরে ফরয হওয়ার আশংকায় পরিত্যাগ করেন। আবুবকর (রাঃ) পুনরায় চালু করেননি। অতঃপর দীর্ঘ বিরতির পরে চালু হওয়ায় বাহ্যিক কারণে তিনি এটাকে বিদ'আত বা নতুন সৃষ্টি বলেন (মির'আৎ ২/২৩২)।

এক নযরে রাতের নফল ছালাতের নিয়ম সমূহঃ

১. ১১ রাক'আতঃ দুই দুই করে ৮ রাক'আত। অতঃপর একটানা তিন রাক'আত পড়ে শেষ বৈঠক করবে (বুখারী, মুসলিম প্রভৃতি)। রামাযান ও অন্য সময়ে এটা ছিল রাসূলুল্লাহ (ছাঃ)-এর অধিকাংশ রাতের আমল।

২. ১১ রাক'আতঃ দুই দুই করে মোট ১০ রাক'আত। অতঃপর এক রাক'আত বিতর অথবা একটানা ৮ রাক'আত পড়ে প্রথম বৈঠক ও নবম রাক'আতে শেষ বৈঠক। এভাবে বিতর শেষে দু'রাক'আত, মোট ১১ রাক'আত (মুসলিম প্রভৃতি)।

৩৩. মুওয়াত্তা, মিশকাত হা/১৩০২, 'রামাযানের রাত্রি জাগরণ' অনুচ্ছেদ।

৩৪. আলবানী, হাশিয়া মিশকাত হা/১৩০২, ১/৪০৮ পৃঃ; ইরওয়া হা/৪৪৬, ৪৪৫।

৩৫. মির'আত হা/১৩০৮ ও ১২, ২/২২৯, ২৩৩; ইরওয়া হা/৪৪৬-এর আলোচনা ২/১৯৩ পৃঃ।

৩৬. মুত্তা, মুসলিম ১/২৫৪ পৃঃ; ঐ, (বৈরুত ছাপা) হা/৭৩৬-৩৮; মুসলিম, মিশকাত হা/১১৮৮, ১১৯৬-৯৭।



৩. ১৩ রাক'আতঃ দুই দুই করে ৮ রাক'আত। অতঃপর একটানা পাঁচ রাক'আত (মুসলিম প্রভৃতি)। অথবা দুই দুই করে ১২ রাক'আত, অতঃপর ১ রাক'আত বিতর (মুসলিম, মিশকাত হা/১১৯৭)।

৪. ৯ রাক'আতঃ দুই দুই করে ৬ রাক'আত। অতঃপর তিন রাক'আত বিতর। অথবা একটানা সাত রাক'আত বিতর পড়ে সালাম ফিরাবে। অতঃপর দু'রাক'আত সহ মোট ৯ রাক'আত (ছহীহ ইবনু খুযায়মা হা/১০৭৮, মুসলিম হা/১৩৯ 'মুসাফিরের ছালাত' অধ্যায়)।

৫. ৭ রাক'আতঃ দুই দুই করে ৬ রাক'আত। অতঃপর এক রাক'আত বিতর। অথবা দুই দুই ৪ রাক'আত। অতঃপর তিন রাক'আত বিতর (বুখারী প্রভৃতি)।

৬. ৫ রাক'আতঃ দুই দুই করে ৪ রাক'আত। অতঃপর এক রাক'আত বিতর। অথবা একটানা ৫ রাক'আত বিতর (মুসলিম প্রভৃতি)। ইমাম মুহাম্মাদ বিন নহর আল-মারওয়াযী বলেন, রাসূল (ছাঃ) থেকে একটানা একাধিক রাক'আত বিতর পড়ার প্রমাণ রয়েছে। কিন্তু দুই দুই রাক'আত পড়ে সালাম ফিরানো ও শেষে এক রাক'আত-এর মাধ্যমে বিতর করাকেই আমরা উত্তম মনে করি। কেননা রাসূলুল্লাহ (ছাঃ) জনৈক প্রশ্নকারীকে এধরনের জবাবই দিয়েছিলেন যে, 'রাতের ছালাত দুঃ দুই' (বুখারী, মুসলিম, ছালাতুর রাসূল (মুহাক্কাক্ব) পৃঃ ৩৯২)।

এগুলির মধ্যে প্রথমটি কেবল তিনি তারাবীহ ও তাহাজ্জুদে পড়েছেন। বা গীগুলি বিভিন্ন সময় তাহাজ্জুদে পড়েছেন। বৃদ্ধাবস্থায় কিংবা সময় কম থাকলে রাসূলুল্লাহ (ছাঃ) কখনো কখনো কমসংখ্যক রাক'আতে তাহাজ্জুদ পড়তেন। উম্মতের জন্য এটি বিশেষ অনুগ্রহ বটে। বৃদ্ধাবস্থায় ভারী হয়ে গেলে তিনি অধিকাংশ (রাতের ছালাত) বসে বসে পড়তেন (মুত্তাঃ মিশকাত হা/১১৯৮)।

এক্ষণে ২৩, ২৫ ও ২৭শে রামাযানের যে তিন রাত রাসূলুল্লাহ (ছাঃ) জামা'আত সহ তারাবীহ পড়েছিলেন, সে তিন রাত কত রাক'আত পড়েছিলেন? জবাব এই যে, সেটা ছিল আট রাক'আত তারাবীহ ও বাকীটা বিতর। যেমন হযরত জাবির (রাঃ) বর্ণিত হাদীছে এসেছে, صَلَّى بِنَا رَسُولُ اللَّهِ صَلَّى اللَّهُ عَلَيْهِ وَسَلَّمَ فِي رَمَضَانَ ثَمَانٍ رَكَعَاتٍ ثُمَّ أَوْتَرَ 'রাসূলুল্লাহ (ছাঃ) আমাদের নিয়ে রামাযানে ছালাত আদায় করলেন

আট রাক'আত। অতঃপর বিতর পড়লেন।<sup>৩৭</sup> জাবের (রাঃ) বর্ণিত উক্ত হাদীছে বিতরের রাক'আত সংখ্যা বলা হয়নি। কিন্তু আয়েশা (রাঃ) বর্ণিত হাদীছের শেষে স্পষ্টভাবে তিন রাক'আত বিতরের কথা এসেছে, যা ইতিপূর্বে বর্ণিত হয়েছে (বুখারী, মুসলিম)। অতএব ৮+৩=১১ রাক'আত তারাবীহ জামা'আত সহকারে রাসূলুল্লাহ (ছাঃ)-এর সুনাত হিসাবে সাব্যস্ত হয়। হযরত ওমর (রাঃ) সেটাই পুনরায় চালু করেছিলেন। তিনি মোর্দা সুনাতকে যেন্দা করেছিলেন। 'বিদ'আতে হাসানাহ' করেননি। কেননা শারঈ বিদ'আত সবটুকু ভ্রষ্টতা। সেখানে ভাল-মন্দ ভাগ নেই।

এক্ষণে যদি কেউ নফল মনে করে রাতভর ছালাতে রত থাকেন। তাহলে তিনি তা করতে পারেন। যেমন রাসূলুল্লাহ (ছাঃ) খায়বার যুদ্ধ থেকে ফেরার পথে এক স্থানে রাত্রি যাপন করেন। তিনি বেলাল (রাঃ)-কে রাত্রিতে পাহারা নিযুক্ত করলেন। যাতে ফজরের ছালাত ক্বাযা না হয়। বেলাল (রাঃ) রাতভর সাধ্যমত নফল ছালাতে রত থাকলেন... (মুসলিম, মিশকাত হা/৬৮৪ 'দেৱীতে আযান' অনুচ্ছেদ)। এতে রাত জেগে পাহারা দেওয়াও হ'ল

নফল ছালাত আদায়ের নেকীও পাওয়া গেল। অত্র হাদীছে 'مَا قَدَّرَ لَهُ' 'যা তার সাধ্যে কুলিয়েছিল' বলা হয়েছে। রাক'আতের সীমা নির্দেশ করা হয়নি। এটি হ'ল অনিয়মিত ও সাধারণ নফল ছালাতের বিষয়। এর কোন বাধ্যবাধকতা নেই। উল্লেখ্য যে, হাদীছে বিতর সম্পর্কে বলা হয়েছে যে, 'যখন তুমি ফজর হয়ে যাবার আশংকা করবে, তখন এক রাক'আত পড়ে নাও। তাহলে পিছনের ছালাত গুলি বিতরে পরিণত হবে' (বুখারী, মুসলিম, ছহীহ ইবনু খুযায়মা হা/১০৭২)। বুঝা গেল যে, একটানা বা দুই দুই করে পড়লেও সেটা শেষের এক রাক'আতের মাধ্যমে বিতরে পরিণত হবে (ফিকহস সুন্নাহ ১/১৪৫-৪৬)। আর একারণেই ইমাম হাকেম (রহঃ) বলেন, রাসূলুল্লাহ (ছাঃ) থেকে ১৩, ১১, ৯, ৭, ৫, ৩ ও ১ রাক'আত বিতর প্রমাণিত আছে। তবে সবচেয়ে বিশুদ্ধতর হ'ল এক রাক'আত (মুস্তাদরাক ১/৩০৬)। অর্থাৎ তারাযীহ ও বিতর পৃথক নয়। বরং শেষে এক রাক'আত যোগ করলে সবটাকেই বিতর বলা যায় ও সবটাকেই 'ছালাতুল লায়ল' বা রাতের ছালাত বলা যায়।

জ্ঞাতব্যঃ যদি কেউ প্রথম রাতে এশার পরে বিতর পড়ে ঘুমিয়ে যায়, তবে শেষ রাতে তাহাজ্জুদ-এর শেষে পুনরায় বিতর পড়তে হবে না। কেননা এক রাতে দুই বিতর পড়া চলে না।<sup>৩৮</sup> তারাযীহর জন্য নির্দিষ্ট কোন দো'আ নেই। বিতরের ১ম রাক'আতে সূরায় 'আ'লা', ২য় রাক'আতে 'কাফেরূণ' ও ৩য় রাক'আতে সূরায় 'ইখলাছ' পড়া সুন্নাত।<sup>৩৯</sup>

ছালাত শেষে তিনবার সববে 'সুবহা-নাল মালিকিল কুদ্দূস' পড়া উচিত।<sup>৪০</sup> অতঃপর ইচ্ছা করলে বসেই হাল্কা ভাবে দু'রাক'আত নফল পড়বে। সেখানে সূরায় 'যিল্‌যাল' ও সূরায় 'কাফেরূণ' পাঠ করবে।<sup>৪১</sup> অন্য সূরাও পড়া যায় (মুযযায্বিল ২০)।

### ৩. সফরের ছালাত (الصلوة في السفر)

সফর অথবা ভীতির সময়ে ছালাতে 'ক্বছর' করার হুকুম রয়েছে। যেমন আল্লাহ বলেন- وَإِذَا ضَرَبْتُمْ فِي الْأَرْضِ فَلَيْسَ عَلَيْكُمْ جُنَاحٌ أَنْ تَقْصُرُوا مِنْ الصَّلَاةِ إِنْ خِفْتُمْ أَنْ يَفْتِنَكُمُ الَّذِينَ كَفَرُوا، إِنَّ الْكَافِرِينَ كَانُوا لَكُمْ عَدُوًّا مُّبِينًا-

৩৮. (لا وتران في ليلة رواه الخمسة الا ابن ماجه) নায়ল, 'বিতর' অধ্যায় ৩/৩১৪-১৭।

৩৯. হাকেম ১/৩০৫, আবুদাউদ, দারেমী, মিশকাত হা/১২৬৯, ১২৭২।

৪০. নাসাঈ, নায়ল ৩/৩০৯-১০; আবুদাউদ, নাসাঈ, মিশকাত হা/১২৭৪।

৪১. আহমাদ, মিশকাত হা/১২৮৭, মুসলিম, মিশকাত হা/১২৫৭; ইবনু মাজাহ, মিশকাত হা/১২৮৫।

অর্থঃ ‘যখন তোমরা সফর কর, তখন তোমাদের ছালাতে ‘কুছর’ করায় কোন দোষ নেই। যদি তোমরা আশংকা কর যে, কাফেররা তোমাদেরকে উত্যক্ত করবে। নিশ্চয়ই কাফেররা তোমাদের প্রকাশ্য শত্রু’ (নিসা ১০১)।

‘কুছর’ অর্থ কমানো। পারিভাষিক অর্থেঃ চার রাক‘আত বিশিষ্ট ছালাত দু‘রাক‘আত করে পড়াকে ‘কুছর’ বলে। মক্কা বিজয়ের সফরে রাসূলুল্লাহ (ছাঃ) কুছরের সাথে ছালাত আদায় করেন।<sup>৪২</sup> শান্তির অবস্থায় কুছর করতে হবে কি-না এ সম্পর্কে ওমর ফারুক (রাঃ)-এর এক প্রশ্নের জবাবে রাসূলুল্লাহ (ছাঃ) বলেন, **صَدَقَةٌ تَصَدَّقَ اللَّهُ بِهَا عَلَيْكُمْ فَاقْبَلُوا صَدَقَتَهُ** - ‘আল্লাহ এটিকে তোমাদের জন্য ছাদাক্বা হিসাবে প্রদান করেছেন। অতএব তোমরা তা গ্রহণ কর’ (মুসলিম, মিশকাত হা/১৩৩৫)।

### সফরের দূরত্বঃ

সফরের দূরত্বের ব্যাপারে বিদ্বানগণের মধ্যে এক থেকে ৪৮ মাইলের বিশ প্রকার বক্তব্য রয়েছে (নায়ল ৪/১২২)। পবিত্র কুরআনে দূরত্বের কোন ব্যাখ্যা নেই। কেবল সফরের কথা আছে। রাসূলুল্লাহ (ছাঃ) থেকেও এর কোন সীমা নির্দেশ করা হয়নি (যাদুল মা‘আদ ১/৪৬৩)। অতএব সফর হিসাবে গণ্য করা যায়, এরূপ সফরে বের হ’লে নিজ বাসস্থান থেকে বেরিয়ে কিছুদূর গেলেই ‘কুছর’ করা যায়। কোন কোন বিদ্বানের নিকটে সফরের নিয়ত করলে বর থেকেই কুছর শুরু করা যায়। তবে ইবনুল মুনিয়ির বলেন যে, সফরের উদ্দেশ্যে রাসূলুল্লাহ (ছাঃ) মদীনা শহর ছেড়ে বের হ’য়ে যাওয়ার পূর্বে কুছর করেছেন বলে আমি জানতে পারিনি’।<sup>৪৩</sup> হযরত আবদুল্লাহ বিন আব্বাস (রাঃ) বলেন, রাসূলুল্লাহ (ছাঃ) ১৯ দিন সফরে অবস্থানকালে ‘কুছর’ করেছেন। আমরাও তাই করি। তার বেশী হ’লে পুরা করি।<sup>৪৪</sup> যদি কারু সফরের মেয়াদ নির্দিষ্ট থাকে, তথাপি তিনি কুছর করবেন (ফিকহুস সুন্নাহ ১/২১৩)। সিদ্ধান্তহীন অবস্থায় ১৯ দিনের বেশী হ’লেও ‘কুছর’ করা যায়। রাসূলুল্লাহ (ছাঃ) তাবুক যুদ্ধের সময় সেখানে ২০ দিন যাবৎ কুছর করেন। আবদুল্লাহ বিন ওমর (রাঃ) আযারবাইজান সফরে এলে পুরা বরফের মৌসুম সেখানে আটকে যান ও ছ’মাস যাবৎ কুছরের সাথে ছালাত আদায় করেন। অনুরূপভাবে হযরত আনাস (রাঃ) শাম বা সিরিয়া সফরে এসে দু’বছর সেখানে থাকেন ও কুছর করেন।<sup>৪৫</sup> স্থায়ী মুসাফির যেমন জাহাজ, বিমান, ট্রেন, বাস ইত্যাদির চালক ও কর্মচারীগণ সফর অবস্থায় সর্বদা ছালাতে কুছর করতে পারেন (ঐ)।

মোটকথা ভীতি ও সফর অবস্থায় ‘কুছর’ করা উত্তম। রাসূলুল্লাহ (ছাঃ) সফরে সর্বদা

৪২. মুত্তাফাকু আলাইহ, মিশকাত ‘সফরের ছালাত’ অধ্যায় হা/১৩৩৬।

৪৩. নায়লুল আওত্বার ৪/১২৪; ফিকহুস সুন্নাহ ১/২১৩।

৪৪. বুখারী ১/১৪৭; ঐ, মিশকাত হা/১৩৩৭।

৪৫. মিরক্বাত ৩/২২১; ফিকহুস সুন্নাহ ১/২১৩-১৪।

কুছর করতেন। হযরত ওমর, আলী, ইবনু মাসউদ, ইবনু আব্বাস (রাঃ) সফরে কুছর করাকেই অগ্রাধিকার দিতেন।<sup>৪৬</sup> হযরত ওহমান ও হযরত আয়েশা (রাঃ) প্রথম দিকে কুছর করতেন ও পরে পুরা পড়তেন। আবদুল্লাহ বিন ওমর (রাঃ) জামা'আতে পুরা পড়তেন ও একাকী কুছর করতেন।<sup>৪৭</sup> আল্লাহ বলেন, 'সফর অবস্থায় ছালাতে 'কুছর' করলে তোমাদের জন্য কোন গোনাহ নেই' (নিসা ১০১)।

ছালাত জমা করাঃ সফরে থাকাকালীন অবস্থায় যোহর-আছর (২+২=৪ রাক'আত) ও মাগরিব-এশা (৩+২=৫ রাক'আত) পৃথক এক্কা'মতের মাধ্যমে জমা ও কুছর করে পড়ার নিয়ম রয়েছে।<sup>৪৮</sup> ভীতি ও সফর ব্যতীত মুক্কীম অবস্থায়ও কোন বিশেষ শারঈ ওযর বশতঃ দু'ওয়াক্তের ছালাত কুছর ও সুনাত ছাড়াই একত্রে জমা করে পড়া যায়। যেমন যোহর ও আছর পৃথক এক্কা'মতের মাধ্যমে ৪+৪ এবং মাগরিব ও এশা অনুরূপভাবে ৩+৪ রাক'আত। ইবনু আব্বাস (রাঃ)-কে জিজ্ঞেস করা হ'ল, এটা কেন? তিনি বললেন, যাতে উম্মতের কষ্ট না হয়।<sup>৪৯</sup> এই সুযোগ ইস্তেহাযা বা প্রদর রোগগ্রস্ত মহিলা ও বহুমূত্রের রোগী বা অন্যান্য কঠিন রোগী এবং কর্মব্যস্ত ভাই-বোনেরা মাঝে-মধ্যে বিশেষ ওযর বশতঃ অনিয়মিতভাবে গ্রহণ করতে পারেন।<sup>৫০</sup>

হজ্জের সফরে আরাফাতের ময়দানে যোহর ও আছর একত্রে ২+২ যোহরের সময় এবং মুযদালিফায় মাগরিব ও এশা একত্রে ৩+২ এশার সময় পৃথক এক্কা'মতে জমা করে জামা'আতের সাথে অথবা একাকী পড়তে হয়।<sup>৫১</sup> সফরে রাসূল (ছাঃ) সুনাত সমূহ পড়তেন না।<sup>৫২</sup> অবশ্য বিতর ও ফজরের দু'রাক'আত সুনাত ছাড়তেন না।<sup>৫৩</sup>

## ৪. জুম'আর ছালাত (صلاة الجمعة)

হুকুমঃ ১ম হিজরীতে জুম'আ ফরয হয় এবং হিজরতকালে কোবা ও মদীনার মধ্যবর্তী বনু সালেম গোত্রে সর্বপ্রথম রাসূলুল্লাহ (ছাঃ) জুম'আর ছালাত আদায় করেন (মির'আত ২/২৮৮)। শহরে হৌক বা গ্রামে হৌক জুম'আর ছালাত প্রত্যেক বয়স্ক পুরুষ ও জ্ঞান সম্পন্ন মুসলমানের উপরে জামা'আত সহ আদায় করা 'ফরযে আয়েন' (জুম'আ ৯)। গোলাম, রোগী, মুসাফির, শিশু ও মহিলাদের উপরে জুম'আ ফরয নয়।<sup>৫৪</sup> এতদ্ব্যতীত

৪৬. ইবনু তায়মিয়াহ, মাজমূ'আ ফাতাওয়া ২৪/৯৮; ফিকহুস সুনাই ১/২১২।

৪৭. বুখারী ও মুসলিম, মিশকাত হা/১৩৪৭, ১৩৪৮।

৪৮. বুখারী, মিশকাত হা/১৩৩৯; আবুদাউদ, তিরমিযী, মিশকাত হা/১৩৪৪ 'সফরের ছালাত' অনুচ্ছেদ।

৪৯. মুত্তাফাকু আলাইহ, নায়লুল আওত্বার ৪/১৩৬।

৫০. নায়লুল আওত্বার ৪/১৩৬-৪০; ফিকহুস সুনাই ১/২১৭-১৮।

৫১. আহমাদ, মুসলিম, নাসাঈ, নায়ল ৪/১৪০; বুখারী, মিশকাত হা/২৬০৭ 'মানাসিক' অধ্যায়।

৫২. মুত্তাফাকু আলাইহ, মিশকাত হা/১৩৩৮; তিরমিযী, মিশকাত হা/১৩৪৩; ফিকহুস সুনাই ১/২১৬।

৫৩. মুত্তাফাকু আলাইহ, মিশকাত হা/১৩৪০; যাদুল মা'আদ (বৈরুতঃ ১৪১৬/১৯৯৬) ১/৪৫৬ পৃঃ।

৫৪. আবুদাউদ, মিশকাত হা/১৩৭৭; দারাকুত্বনী, ইরওয়া হা/৫৯২।

দু'জন মুসলমান কোন স্থানে থাকলেও তারা একত্রে জুম'আ আদায় করবে (নায়ল ৪/১৫৯-৬১; মির'আত ২/২৮৮-৮৯)। একজনে খুৎবা দিবে। যদি খুৎবা দিতে অপারগ হয়, তাহ'লে দু'জনে একত্রে জুম'আর দু'রাক'আত ছালাত আদায় করবে (আর-রওয়াতুন নাদিইয়াহ ১/৩৪২)।

**গুরুত্বঃ** জুম'আর দিন সুন্দরভাবে গোসল করে সাধ্যমত উত্তম পোষাক ও সুগন্ধি লাগিয়ে আগেভাগে মসজিদে যাবে (বুখারী, মিশকাত হা/১৩৮১)। মসজিদে প্রবেশ করে প্রথমে দু'রাক'আত 'তাহ্ইয়াতুল মাসজিদ' আদায় করবে (মুত্তাফাকু আলাইহ, মিশকাত হা/৭০৪)। খুৎবা অবস্থায় প্রবেশ করলে 'তাহ্ইয়াতুল মাসজিদ' সংক্ষেপে আদায় করে বসে পড়বে (মুসলিম, মিশকাত হা/১৪১১)। আল্লাহর রাসূল (ছাঃ) জুম'আ থেকে অলসতাকারীদের ঘর জ্বালিয়ে দিতে চেয়েছিলেন (মুসলিম, মিশকাত হা/১৩৭৮)। তিনি বলেন, জুম'আ পরিত্যাগকারীদের হৃদয়ে আল্লাহ মোহর মেরে দেন। অতঃপর তারা গাফেলদের অন্তর্ভুক্ত হয়ে যায় (মুসলিম, মিশকাত হা/১৩৭০)। এ বিষয়ে পরপর তিন জুম'আর কথাও এসেছে (আবুদাউদ, তিরমিধী, মিশকাত হা/১৩৭১)।

**জুম'আর আযানঃ** খতীব ছাহেব মিশরে বসার পরে মুওয়ায্বিন জুম'আর আযান দিবে। রাসূলুল্লাহ (ছাঃ), আবুবকর ও ওমর (রাঃ)-এর যুগে এবং ওছমান (রাঃ)-এর খেলাফতের প্রথমার্ধে এই নিয়ম চালু ছিল। অতঃপর মুসলমানের সংখ্যা ও নগরীর ব্যস্ততা বেড়ে গেলে হযরত ওছমান (রাঃ) জুম'আর পূর্বে মসজিদে নববী থেকে দূরে 'যাওরা' (زوراء) বাজারে গিয়ে লোকদের হুঁশিয়ার করার জন্য পৃথক একটি আযানের

নির্দেশ দেন।<sup>৫৫</sup> খলীফার এই হুকুম ছিল স্থানিক প্রয়োজনের কারণে একটি সাময়িক রাষ্ট্রীয় ফরমান মাত্র। সেকারণ মক্কা, কূফা ও বছরা সহ ইসলামী খেলাফতের বহু গুরুত্বপূর্ণ শহরে এ আযান তখন চালু হয়নি। হযরত ওছমান (রাঃ) এটাকে সর্বত্র চালু করার প্রয়োজন মনে করেননি বা উন্নতকে বাধ্য করেননি। তাই সর্বদা সর্বত্র এই নিয়ম চালু করার পিছনে কোন যুক্তি নেই। তাছাড়া রাসূলুল্লাহ (ছাঃ)-এর আচরিত সুন্নাতের অনুসরণই সকল মুমিনের কাম্য।

**ডাক আযানঃ** আল্লামা ফাকেহানী বলেন, হযরত মু'আবিয়া (রাঃ)-এর সময়ে (৪২-৬০ হিঃ) এই আযান প্রথম বছরাতে এবং উমাইয়া গভর্নর হাজ্জাজ বিন ইউসুফ (৭৬-৯৬ হিঃ)-এর সময় প্রথম মক্কায় চালু হয় (মির'আত ২/৩০৭)। যা আজও চালু আছে। হযরত আলী (রাঃ)-এর (৩৫-৪০ হিঃ) রাজধানী কূফাতেও এই আযান চালু ছিল না (তাকসীরে জালালায়েন পৃঃ ৪৬০ টীকা ১৯; কুরতুবী ১৮/৫৮)। ইবনু হাজার আসক্বালানী বলেন, উমাইয়া খলীফা হেশাম বিন আবদুল মালেক (১০৫-২৫ হিঃ) সর্বপ্রথম ওছমানী আযানকে 'যাওরা' বাজার থেকে এনে মদীনার মসজিদে চালু করেন (মিরক্বাত ৩/২৬৩)। যাকে এদেশে 'ডাক আযান' বলা হয়। ইবনুল হাজ্জ মালেকী বলেন, অতঃপর হেশাম খুৎবাকালীন মূল আযানকে মসজিদের মিনার থেকে নামিয়ে ইমামের সম্মুখে নিয়ে আসলেন' (আওনুল মা'বুদ ৪/৪৩৩-৩৪)। ফলে বর্তমানে খুৎবার প্রায় আধা ঘন্টা পূর্বে 'ডাক আযান' হচ্ছে মিনারে বা মাইকে। অতঃপর খুৎবার মূল আযান বা 'ছানী আযান' হচ্ছে

মসজিদের দরজার বাইরে অথবা ইমামের সম্মুখে। এইভাবে হাজ্জাজী ও হেশামী আযান সর্বত্র চালু হয়েছে। অথচ জুম'আর সুনাতী আযান ছিল একটি। যা খত্বীব মিম্বরে বসার পরে তাঁর সম্মুখ বরাবর দরজার বাইরে দাঁড়িয়ে দেওয়া হয় এবং যা রাসূলুল্লাহ (ছাঃ), আবুবকর, ওমর ও ওছমান (রাঃ)-এর খেলাফতের প্রথমার্ধ পর্যন্ত চালু ছিল। অতএব আমাদের উচিত সেই হারানো সুনাত যেন্দাকারী স্বল্প সংখ্যক লোকদের দলভুক্ত হওয়া, যাদেরকে আল্লাহর রাসূল (ছাঃ) জান্নাতের সুসংবাদ দিয়েছেন (আহমাদ, ইবনু মাস'উদ হ'তে। আলবানী, মিশকাত হা/১৭০-এর টীকা দ্রষ্টব্য)।

খুৎবাঃ জুম'আর জন্য দু'টি খুৎবা দেওয়া সুনাত, যার মাঝখানে বসতে হয় (আর-রওয়া ১/৩৪৫)। ইমাম মিম্বরে বসার সময় মুছল্লীদের উদ্দেশ্যে সালাম দিবেন। আবুবকর ও ওমর (রাঃ) এটি নিয়মিত করতেন। ইমাম আবু হানীফা ও ইমাম মালেক (রহঃ) প্রমুখ বিদ্বান মসজিদে প্রবেশকালে সালাম করাকেই যথেষ্ট বলেছেন। খত্বীব হাতে লাঠি নিবেন।<sup>৫৬</sup> নিতান্ত কষ্টদায়ক না হ'লে সর্বদা দাঁড়িয়ে খুৎবা দিবেন। ১ম খুৎবায় হাম্দ-ছানা ও কিরাআত ছাড়াও সকলকে নছীহত করবেন, অতঃপর বসবেন। দ্বিতীয় খুৎবায় হাম্দ ও দরুদ সহ সকল মুসলমানের জন্য দো'আ করবেন।\* প্রয়োজনে এই সময়ও নছীহত করা যাবে। ইমাম শাফেঈ (রহঃ) হাম্দ, দরুদ ও নছীহত তিনটি বিষয়কে খুৎবার জন্য 'ওয়াজিব' বলেছেন। এতদ্ব্যতীত সূরায়ে ক্বাফ-এর প্রথমংশ বা অন্য কিছু আয়াত তেলাওয়াত করা মুস্তাহাব (মির'আত ২/৩০৮, ৩১০)।

মাতৃভাষায় খুৎবা দানঃ খুৎবা অধিকাংশ মুছল্লীদের বোধগম্য ভাষায় হওয়া উচিত। কেননা খুৎবা অর্থ ভাষণ, যা শ্রোতাদের বোধগম্য ভাষায় হওয়াই স্বাভাবিক। আল্লাহ বলেন, 'وَمَا أَرْسَلْنَا مِنْ رَّسُولٍ إِلَّا بِلِسَانٍ قَوْمِهِ لِيُبَيِّنَ لَهُمْ' আমরা সকল রাসূলকেই তাদের স্বজাতির ভাষা-ভাষী করে প্রেরণ করেছি, যাতে তিনি তাদেরকে বুঝাতে সক্ষম হন' (ইবরাহীম ৪)। অতঃপর আমাদের রাসূলকে খাছ করে বলা হচ্ছে, 'وَأَنْزَلْنَا إِلَيْكَ الذِّكْرَ لِتُبَيِّنَ لِلنَّاسِ مَا نُزِّلَ إِلَيْهِمْ وَلَعَلَّهُمْ يَتَفَكَّرُونَ' এবং আমরা আপনার নিকটে 'যিকর' (কুরআন-হাদীছ) নাযিল করেছি, যাতে আপনি লোকেদের সম্মুখে ঐসব বিষয় বর্ণনা করেন, যা তাদের প্রতি নাযিল করা হয়েছে। যাতে তারা চিন্তা-গবেষণা করে' (নাহল ৪৪)। নবী আর আসবেন না। তাই রাসূলের 'ওয়াজিব' হিসাবে (তিরমিযী, আবুদাউদ, মিশকাত হা/২১২) প্রত্যেক আলেম ও খত্বীবের উচিত মুছল্লীদের নিজস্ব ভাষায় কুরআন ও ছহীহ হাদীছের বিধান সমূহ খুৎবায় ব্যাখ্যা করে গুনানো। হযরত জাবের (রাঃ) বর্ণিত হাদীছে জানা যায় যে, খুৎবার সময় রাসূলুল্লাহ (ছাঃ)-এর দু'চোখ উত্তেজনায় লাল হ'য়ে যেত। গলার স্বর উচ্চ হ'ত ও ক্রোধ ভীষণ হ'ত। যেন তিনি কোন সৈন্যদলকে হুঁশিয়ার করছেন' (মুসলিম, মিশকাত হা/১৪০৭; মির'আত ২/৩০৯)। নবাব হিন্দীক

৫৬. ইবনু মাজাহ, ফিকহুস সুনাহ ১/২৩০; আহমাদ, আবুদাউদ, নাযল ৪/২০১, ২১২ পৃঃ; ইরওয়া হা/৬১৬।

\* আহমাদ, তাবারাণী, ফিকহুস সুনাহ ১/২৩৪; মির'আত ২/৩০৮।

হাসান খান ভূপালী বলেন, শ্রোতা মণ্ডলীকে জান্নাতের প্রতি উৎসাহ ও জাহান্নামের ভয় প্রদর্শন করাই ছিল রাসূলুল্লাহ (ছাঃ)-এর খুৎবার নিয়মিত উদ্দেশ্য। এটাই হ'ল খুৎবার প্রকৃত রূহ এবং এজন্যই খুৎবার প্রচলন করা হয়েছে' (আর-রওয়াতুন নাদিইয়াহ ১/৩৪৫)।

বাংলাদেশে স্রেফ আরবী খুৎবা পাঠের যে প্রচলন রয়েছে, তা নিঃসন্দেহে খুৎবার উদ্দেশ্য বিরোধী এবং এটা বুঝতে পেরে বর্তমানে মূল খুৎবার পূর্বে মিস্বরে বসে মাতৃভাষায় বক্তব্য রাখার মাধ্যমে যে তৃতীয় আরেকটি খুৎবা চালু করা হয়েছে, তা নিঃসন্দেহে বিদ'আত। কেননা জুম'আর জন্য নির্ধারিত খুৎবা হ'ল দু'টি, তিনটি নয়। তাছাড়া মূল খুৎবার পূর্বের সময়টি মুছল্লীদের নফল ছালাতের সময়। তাদের ছালাতের সুযোগ নষ্ট করে বক্তৃতা করার অধিকার ইসলাম খতীব ছাহেবকে দেয়নি। অতএব সুন্নাতের উপরে আমল করতে চাইলে মূল খুৎবায় কুরআন ও ছহীহ হাদীছের ভিত্তিতে মুছল্লীদের উদ্দেশ্যে তাদের বোধগম্য ভাষায় নহীহত কথা বাঞ্ছনীয়। খুৎবার সময় কথা বলা নিষেধ। এমনকি অন্যকে 'চুপ কর' একথাও বলা চলবেনা (মুত্তাফাকু আলাইহ, মিশকাত হা/১৩৮৫)।

ক্বিরাআতঃ জুম'আর ছালাতে ইমাম প্রথম রাক'আতে সূরায়ে 'জুম'আ' অথবা সূরায়ে 'আ'লা' এবং দ্বিতীয় রাক'আতে সূরায়ে 'মুনা-ফিক্বুন' অথবা সূরায়ে 'গা-শিয়াহ' পড়বেন।<sup>৫৭</sup> অন্য সূরাও পড়া যাবে (মুয'যামিল ২০)। জুম'আর দিন ফজরের ১ম রাক'আতে রাসূলুল্লাহ (ছাঃ) সূরায়ে 'সাজদাহ' ও ২য় রাক'আতে সূরায়ে 'দাহর' পাঠ করতেন (মুত্তাফাকু আলাইহ, মিশকাত হা/৮৩৮ 'ছালাতে ক্বিরাআত' অনুচ্ছেদ)।

ফযীলতঃ জুম'আর দিন হ'ল সবচেয়ে সেরা দিন। এইদিন আদম (আঃ)-কে সৃষ্টি করা হয়। এইদিন তাঁকে জান্নাতে প্রবেশ করানো হয় ও এইদিনে বহিষ্কার করা হয়। এদিনেই তাঁর তওবা কবুল হয়। এদিনেই তাঁর মৃত্যু হয় এবং এদিনেই ক্বিয়ামত সংঘটিত হবে। এদিন রাসূলুল্লাহ (ছাঃ)-এর উপরে বেশী বেশী দরুদ পাঠ করতে হয়। এই দিন ইমামের মিস্বরে বসা হ'তে জামা'আতে ছালাত শেষে সালাম ফিরানো পর্যন্ত সময়ের মধ্যে<sup>৫৮</sup> এমন একটি সময় রয়েছে, যখন বান্দার যেকোন সঙ্গত দাবী আল্লাহ কবুল করেন। দো'আ কবুলের এই সময়টির মর্যাদা লায়লাতুল ক্বদরের ন্যায় বলে হাফেয ইবনুল ক্বাইয়িম (রহঃ) মন্তব্য করেন। তিনি বলেন, জুম'আর সমস্ত দিনটি ইবাদতের দিন। অন্য হাদীছের বক্তব্য অনুযায়ী ঐদিন আছর ছালাতের পর হ'তে সূর্যাস্ত পর্যন্ত দো'আ কবুলের সময় প্রলম্বিত। অতএব জুম'আর দিন দো'আ-দরুদ, তাসবীহ-তেলাওয়াত ও ইবাদতে কাটিয়ে দেওয়া উচিত (যাদুল মা'আদ ১/৩৮৬)। এই সময় খতীব স্বীয় খুৎবায় এবং ইমাম ও মুক্তাদীগণ স্ব স্ব সিজদায় ও শেষ বৈঠকে তাশাহুদ ও দরুদের পরে সালামের পূর্বে আল্লাহর নিকটে প্রাণ খুলে

৫৭. মুসলিম, মিশকাত হা/৮৩৯-৪০ 'ছালাতে ক্বিরাআত' অনুচ্ছেদ।

৫৮. মুসলিম, আবুদাউদ, মুওয়াত্তা, মিশকাত হা/১৩৫৬-৫৯ ও ৬১; তিরমিযী হা/৪৯০-৯১, শরহ আহমাদ মুহাম্মাদ শাকের (বৈরুত ছাপা) ২/৩৬১ ও ৬৩।

দো'আ করবেন। কেননা রাসূলুল্লাহ (ছাঃ) এই সময় বেশী বেশী দো'আ করতেন।<sup>৫৯</sup> তিনি বলেন, 'যে ব্যক্তি জুম'আর দিন গোসল করে সুগন্ধি মেখে মসজিদে এল ও সাধ্যমত নফল ছালাত আদায় করল। অতঃপর চুপচাপ ইমামের খুৎবা শ্রবণ করল ও জামা'আতে ছালাত আদায় করল, তার পরবর্তী জুম'আ পর্যন্ত এবং আরও তিনদিনের গোনাহ মার্ফ করা হয়' (বুখারী, মুসলিম, মিশকাত হা/১৩৮১-৮২)। তিনি আরও বলেন, 'জুম'আর দিন ফেরেশতারা মসজিদের দরজায় দাঁড়িয়ে থাকে এবং মুছল্লীদের নেকী লিখতে থাকে। সকাল সকাল যারা আসে, তারা উট কুরবানীর সমান নেকী পায়। তার পরবর্তীগণ গরু কুরবানীর, তার পরবর্তীগণ ছাগল কুরবানীর, তার পরবর্তীগণ মুরগী কুরবানীর ও তার পরবর্তীগণ ডিম কুরবানীর সমান নেকী পায়। অতঃপর খত্বীব দাঁড়িয়ে গেলে তারা দফতর গুটিয়ে ফেলে ও খুৎবা শুনতে থাকে' (মুত্তাঃ মিশকাত হা/১৩৮৪)।

দো'আ চাওয়াঃ মুছল্লীদের নিকটে বিশেষ কোন দো'আ চাইবার থাকলে খত্বীব বা ইমামের মাধ্যমে পূর্বেই সকলকে অবহিত করা উচিত। যাতে সবাই উক্ত মুছল্লীর আকাংখা অনুযায়ী আল্লাহর নিকটে দো'আ করতে পারে ও নিজেদের দো'আর নিয়তের মধ্যে তাকেও शामिल করতে পারে। কেননা সালাম ফিরানোর মাধ্যমে ছালাত শেষ হয়ে যায়। আর ছালাতের মধ্যেই দো'আ কবুল হয়। বিশেষ করে সিজদার হালতে। কিন্তু ছালাত শেষে পৃথকভাবে ইমাম মুক্তাদী সম্মিলিতভাবে দো'আ ও 'আমীন' 'আমীন' বলার প্রচলিত প্রথাটি রাসূলুল্লাহ (ছাঃ)-এর সুনাতের বরখেলাফ।

দো'আ কবুলের সময়কালঃ বিদ্বানগণ জুম'আর দিনে দো'আ কবুলের সঠিক সময়কাল নিয়ে মতভেদ করেছেন। এই মতভেদের ভিত্তি মূলতঃ আমর বিন আওফ (রাঃ) বর্ণিত তিরমিযীর হাদীছ, যা 'জামা'আতের শুরু থেকে সালাম ফিরানো পর্যন্ত' সময়কাল এবং অপরটি আবদুল্লাহ বিন সালাম (রাঃ) বর্ণিত সুনানের হাদীছ যেখানে ঐ সময়কালকে 'আছরের ছালাতের পর থেকে সূর্যাস্ত পর্যন্ত' বলা হয়েছে (তিরমিযী, তুহফাসহ হা/৪৮৮-৮৯)। এবিষয়ে বিদ্বানদের ৪৩টি মতভেদ উল্লেখিত হয়েছে (নায়ল ৪/১৭২-৭৬)।

তিরমিযীর ভাষ্যকার আহমাদ মুহাম্মাদ শাকির (রহঃ) বলেন, শেষোক্ত হাদীছের রাবী আবদুল্লাহ বিন সালাম (রাঃ) এখানে রাসূল (ছাঃ)-এর বক্তব্য **وَهُوَ يُصَلِّي** (ছালাতরত অবস্থা)-কে **يَنْتَظِرُ الصَّلَاةَ** (ছালাতের অপেক্ষারত) বলে ব্যাখ্যা করেছেন। এতেই বুঝা যায় যে, তিনি এটা সরাসরি রাসূল (ছাঃ) থেকে শুনেছেন বলে ধারণা করেননি। পক্ষান্তরে আমর বিন আওফ (রাঃ) বর্ণিত তিরমিযী ও ইবনু মাজাহর হাদীছটি মরফু, যা বুখারী ও তিরমিযী 'হাসান' বলেছেন। সেটি রাসূল (ছাঃ)-এর বক্তব্য **وَهُوَ يُصَلِّي** (ছালাতরত অবস্থা)-এর সঙ্গে সামঞ্জস্যশীল। আবু মুসা আশ'আরী (রাঃ) হ'তে ছহীহ মুসলিমে বর্ণিত অপর একটি হাদীছ একে শক্তিশালী



করে। যেখানে এই সময়কালকে **هِيَ مَا بَيْنَ أَنْ يَجْلِسَ الْإِمَامُ إِلَى أَنْ تُقْضَى الصَّلَاةُ** অর্থাৎ 'খতীব মিস্বরে বসা হ'তে সালাম ফিরানো পর্যন্ত' বলা হয়েছে (মুসলিম, মিশকাত হা/১৩৫৭-৫৮)। ইবনুল আরাবী বলেন, এই বক্তব্যটিই অধিকতর সঠিক। কেননা এ সময়ের সম্পূর্ণটাই ছালাতের অবস্থা। এতে হাদীছে বর্ণিত 'ছালাতরত অবস্থায়' বক্তব্যের সাথে শব্দগত ও অর্থগত উভয় দিক দিয়ে মিল হয় (পক্ষান্তরে আছরের ছালাতের পর হ'তে সূর্যাস্ত পর্যন্ত কোন ছালাতের সময় নয়)। বায়হাক্বী, ইবনুল আরাবী, কুরতুবী, নববী প্রমুখ এ বক্তব্য সমর্থন করেন (ঐ, শরহ তিরমিযী ২/৩৬৩-৬৪, হা/৪৯০-৯১)।

ঘুমের প্রতিকারঃ খুৎবা ও ছালাতের মধ্যবর্তী দো'আ কবুলের এই গুরুত্বপূর্ণ সময়ে অনেক মুছল্লী বিশেষ করে খুৎবার সময় ঘুমে ঢুলতে থাকেন। ফলে তারা খুৎবার কিছুই উপলব্ধি করতে পারেনা। এজন্য এর প্রতিকার হিসাবে রাসূলুল্লাহ (ছাঃ) এরশাদ করেন, তোমাদের কেউ যখন জুম'আর সময় ঘুমে ঢুলতে থাকে, তখন সে যেন তার স্থান পাল্টে নেয়' (তিরমিযী, মিশকাত হা/১৩৯৪)। এ বিষয়ে পরস্পরকে সাহায্য করা উচিত।

এহুতিয়াত্বী জুম'আঃ 'এহুতিয়াত্বী জুম'আ' বা 'আখেরী যোহর' নামে জুম'আর ছালাতের পরে পুনরায় যোহরের চার রাক'আত একই ওয়াক্তে পড়ার যে রেওয়াজ এদেশে চালু আছে, তা নিঃসন্দেহে বিদ'আত। গ্রামে জুম'আ হবে কি হবে না, এই সন্দেহে পড়ে কিছু লোক দু'টিই পড়ে থাকে। ভাবখানা এই যে, জুম'আ কবুল না হ'লে যোহর তো নিশ্চিত। আর যদি জুম'আ কবুল হয়, তাহ'লে যোহরটা নফল হবে ও বাড়তি নেকী পাওয়া যাবে। অথচ সন্দেহের ইবাদতে কোন নেকী হয় না। বরং স্থির সংকল্প বা নিয়ত হ'ল নেকী পাওয়ার আবশ্যিক পূর্বশর্ত (মুত্তাফাক্বু আলাইহ, মিশকাত হা/১)। এই সন্দেহবাদী ছালাত এখনি পরিত্যাজ্য (মুত্তাফাক্বু আলাইহ, আহমাদ প্রভৃতি, মিশকাত হা/২৭৬২, ৭৩ 'বুয়ু' অধ্যায়)। নইলে বিদ'আতী আমলের কারণে গোনাহগার হ'তে হবে।

আব্বাসীয় খলীফাদের আমলে শাসন ক্ষমতায় অধিষ্ঠিত ভ্রাত্ত ফের্কা মু'তায়িলাগণ এটি চালু করে। যা পরবর্তীকালের কিছু হানাফী আলেমের মাধ্যমে সুন্নীদের অনেকের মধ্যে চালু হয়ে যায়। অথচ জুম'আ আল্লাহ ফরয করেছেন। আর কোন ফরযে সন্দেহ করা কুফরীর শামিল। অতএব যারা জেনে বুঝে আখেরী যোহরে অভ্যস্ত, তাদের এখনি তওবা করা উচিত ও কেবলমাত্র জুম'আ আদায় করা কর্তব্য। খোদ হানাফী মাযহাবেও 'আখেরী যোহর' মাকরুহ ও নাজায়েয বলা হয়েছে।<sup>৬০</sup>

জুম'আর সুন্নাতঃ জুম'আর পূর্বে নির্দিষ্ট কোন সুন্নাত ছালাত নেই। মুছল্লী কেবল 'তাহুইয়াতুল মসজিদ' দু'রাক'আত পড়ে বসবে। সময় পেলে খুৎবার আগ পর্যন্ত যত খুশী নফল ছালাত আদায় করবে। জুম'আর ছালাতের পরে মসজিদে চার রাক'আত অথবা বাড়ীতে দু'রাক'আত সুন্নাত আদায় করবে। তবে মসজিদেও চার বা দুই কিংবা চার ও দুই মোট ছয় রাক'আত সুন্নাত ও নফল পড়া যায় (মুসলিম, মিশকাত হা/১১৬৬; মির'আত ২/১৪৮)।

## ৫. ঈদায়নের ছালাত (صلوة العيدين)

হুকুমঃ ঈদায়নের ছালাত ১ম হিজরী সনে চালু হয়। ঈদায়ন হ'ল মুসলিম উম্মাহর জন্য আল্লাহ নির্ধারিত বার্ষিক দু'টি আনন্দ উৎসবের দিন। ঈদায়নের উৎসব হবে পবিত্রতাময় ও ধর্মীয় ভাবগাম্ভীর্যে পরিপূর্ণ। প্রাক ইসলামী যুগে আরব দেশে অন্যদের অনুকরণে নববর্ষ ও অন্যান্য উৎসব পালনের রেওয়াজ ছিল। রাসূলুল্লাহ (ছাঃ) মদীনায় হিজরত করার পরে দেখলেন যে, মদীনাবাসীগণ বছরে দু'দিন খেলাধূলা ও আনন্দ-উৎসব করে। তখন তিনি তাদেরকে বলেন,

‘আল্লাহ قَدْ أَبْدَلَكُمْ اللَّهُ بِهِمَا خَيْرًا مِنْهَا، يَوْمُ الْأَضْحَى وَ يَوْمُ الْفِطْرِ তোমাদের ঐ দু'দিন উৎসবের বদলে দু'টি মহান উৎসবের দিন প্রদান করেছেন ‘ঈদুল আযহা ও ঈদুল ফিতর’ (আবুদাউদ, মিশকাত হা/১৪৩৯)। ঈদের দিন ছিয়াম পালন নিষিদ্ধ।<sup>৬১</sup>

গুরুত্বঃ ঈদায়নের ছালাত সূন্নাতে মুওয়াক্কাদাহ। ইহা সূর্যোদয়ের পরে সকাল সকাল খোলা ময়দানে গিয়ে পড়তে হয়। রাসূলুল্লাহ (ছাঃ) নিয়মিতভাবে ইহা আদায় করেছেন এবং নারী-পুরুষ সকল মুসলমানকে ঈদায়নের জামা'আতে হাযির হওয়ার নির্দেশ দিয়েছেন (ফিকহুস সুন্নাহ ১/২৩৬)।

নিয়মাবলীঃ ঈদায়নের ছালাতে আযান বা এক্বামত নেই। সকলকে নিয়ে ইমাম প্রথমে ছালাত আদায় করবেন ও পরে খুৎবা দিবেন। খুৎবার সময় হাতে লাঠি রাখা উচিত (আবুদাউদ, মির'আত হা/১৪৬০, ২/৩৪৩)। একটি খুৎবা দেওয়াই ছহীহ হাদীছ সম্মত। দুই খুৎবা সম্পর্কে কয়েকটি ‘যঈফ’ হাদীছ রয়েছে। ইমাম নবতী (রহঃ) বলেন, প্রচলিত দুই খুৎবার নিয়মটি মূলতঃ জুম'আর দুই খুৎবার উপরে ক্বিয়াস করেই চালু হয়েছে। খুৎবা শেষে বসে সম্মিলিতভাবে মুনাজাত করার রেওয়াজটিও হাদীছ সম্মত নয়। বরং এটাই প্রমাণিত যে, রাসূলুল্লাহ (ছাঃ) ঈদায়নের ছালাত শেষে দাঁড়িয়ে কেবলমাত্র একটি খুৎবা দিয়েছেন। যার মধ্যে আদেশ, নিষেধ, উপদেশ, দো'আ সবই ছিল।<sup>৬২</sup> ঈদায়নের জামা'আতে পুরুষদের পিছনে পর্দার মধ্যে মহিলাগণ প্রত্যেকে বড় চাদরে আবৃত হয়ে যোগদান করবেন। প্রয়োজনে একজনের চাদরে দু'জন আসবেন। খত্বীব ছাহেব নারী-পুরুষ সকলকে উদ্দেশ্য করে তাদের বোধগম্য ভাষায় কুরআন-হাদীছের ব্যাখ্যাসহ খুৎবা দিবেন। ঋতুবতী মহিলাগণ কেবল খুৎবা শ্রবণ করবেন ও দো'আয় শরীক হবেন। ওবায়দুল্লাহ মুবারকপুরী বলেন যে, উক্ত হাদীছের শেষে বর্ণিত دعوة المسلمين কথাটি ‘আম’। এর দ্বারা ইমামের খুৎবা, নছীহত ও দো'আ বুঝানো হয়েছে। কেননা ঈদায়নের ছালাতের পরে ইমাম ও মুক্তাদী সম্মিলিত দো'আর প্রমাণে রাসূলুল্লাহ (ছাঃ) থেকে কোন হাদীছ বা ছাহাবায়ে কেবলমাত্র থেকে কোন আমল বর্ণিত হয়নি।<sup>৬৩</sup>

৬১. মুত্তাফাকু আলাইহ, মিশকাত হা/২০৪৮।

৬২. মির'আত ২/৩৩০-৩৩১।

৬৩. মুত্তাফাকু আলাইহ, মিশকাত হা/১৪৩১; মির'আত ২/৩৩১ পৃঃ।

জ্ঞাতব্যঃ বৃষ্টি কিংবা ভীতির কারণে ময়দানে যাওয়া অসম্ভব বিবেচিত হ'লে মসজিদে ঈদের জামা'আত করা যাবে। রাসূলুল্লাহ (ছাঃ) মসজিদে নববীর পূর্ব দরজার বাইরে ৫০০ গজ দূরে 'বাৎহান' প্রান্তরে ঈদায়নের ছালাত আদায় করতেন এবং একবার মাত্র বৃষ্টির কারণে মসজিদে ছালাত আদায় করেছিলেন।<sup>৬৪</sup> কিন্তু বিনা কারণে বড় মসজিদের দোহাই দিয়ে ময়দান ছেড়ে মসজিদে ঈদের জামা'আত করা সুন্নাত বিরোধী কাজ। জামা'আত ছুটে গেলে দু'রাক'আত ছালাত আদায় করে নিবে। ঈদগাহে আসতে না পারলে বাড়ীতে মেয়েরা সহ সকলকে নিয়ে ঈদগাহের ন্যায় তাকবীর সহকারে জামা'আতের সাথে দু'রাক'আত ছালাত আদায় করবে।<sup>৬৫</sup> জুম'আ ও ঈদ একই দিনে হ'লে রাসূলুল্লাহ (ছাঃ) ইমাম হিসাবে দু'টিই পড়েছেন। অন্যদের মধ্যে যারা ঈদ পড়েছেন, তাদের জন্য জুম'আ অপরিহার্য করেননি। অবশ্য দু'টিই আদায় করা যে অধিক ছওয়াবের কারণ, এতে কোন সন্দেহ নেই।

অতিরিক্ত তাকবীরঃ ঈদায়নের ছালাতে অতিরিক্ত বারোটি তাকবীর দেওয়া সুন্নাত। যেমন কাছীর বিন আবদুল্লাহ (রাঃ) হ'তে বর্ণিত হয়েছে,

عن كثير بن عبد الله عن أبيه عن جده أن النبي صَلَّى اللهُ عَلَيْهِ وَسَلَّمَ كَبَّرَ فِي الْعِيدَيْنِ فِي الْأُولَى سَبْعًا قَبْلَ الْقِرَاءَةِ وَفِي الْآخِرَةِ خَمْسًا قَبْلَ الْقِرَاءَةِ

'রাসূলুল্লাহ (ছাঃ) ঈদায়নের প্রথম রাক'আতে কিরাআতের পূর্বে সাত তাকবীর ও দ্বিতীয় রাক'আতে কিরাআতের পূর্বে পাঁচ তাকবীর দিতেন'।<sup>৬৬</sup> ইমাম মালেক ও আহমাদ (রহঃ) তাকবীরে তাহরীমা সহ প্রথম রাক'আতে সাত তাকবীর বলেন। ইমাম শাফেঈ, আওয়াজ্জি, ইসহাক্কা, ইবনু হযম প্রমুখ বিদ্বান তাকবীরে তাহরীমা ব্যতীত সাত তাকবীর বলেন। ওবায়দুল্লাহ মুবারকপুরী বলেন, 'এটাই সর্বাধিক স্পষ্ট বরং নির্দিষ্ট যে, ওটা হ'ল তাকবীরে তাহরীমা ব্যতীত' (মির'আৎ ২/৩৩৮)। কেননা তাকবীরে তাহরীমা হ'ল ফরয, যা সকল ছালাতে প্রযোজ্য। আর এটি হ'ল সুন্নাত ও অতিরিক্ত, যা কেবল ঈদায়নে প্রযোজ্য। দ্বিতীয়তঃ কুফার গভর্ণর সাঈদ বিনুল 'আছ হযরত আবু মূসা আশ'আরীকে ঈদায়নের তাকবীর রাসূলুল্লাহ (ছাঃ) কিভাবে দিয়েছিলেন জিজ্ঞেস করেন (আবুদাউদ, মিশকাত হা/১৪৪৩)। তিনি নিশ্চয়ই সেখানে তাকবীরে তাহরীমা সম্পর্কে জিজ্ঞেস করেননি। তৃতীয়তঃ ইবনু আব্বাস (রাঃ) থেকে তাঁর নিজস্ব আমল হিসাবে ৭, ৯, ১১ ও ১৩ তাকবীরের 'আছার' ছহীহ সূত্রে বর্ণিত হয়েছে (ইরওয়া ৩/১১২)। যদি তাকবীরে তাহরীমা সহ (৮+৫) ১৩ তাকবীর গণনা করা হয়, তাহ'লে পূর্বোক্ত ছহীহ হাদীছ ও অত্র আছারে কোন বিরোধ থাকে না। বরং দু'টির উপরেই আমল করা যায়। চতুর্থতঃ ছাহাবীর আমলের উপরে রাসূল (ছাঃ)-এর আমল নিঃসন্দেহে অগ্রাধিকারযোগ্য। পঞ্চমতঃ শায়খ আলবানী (রহঃ) উক্ত তাকবীর সমূহকে ঈদায়নের সাথে খাছ 'অতিরিক্ত তাকবীর' হিসাবে গণ্য করেছেন (ঐ, ৩/১১৩)।

৬৪. মির'আৎ ২/৩২৭, ফিকহুস সুন্নাহ ১/২৩৭।

৬৫. বুখারী ফাৎহ সহ ২/৫৫০-৫১ পৃঃ।

৬৬. জামে' তিরমিযী (দিল্লীঃ ১৩০৮ হিঃ) ১/৭০ পৃঃ।

অতএব এগুলিকে অতিরিক্ত তাকবীর হিসাবেই গণ্য করা উচিত এবং তা হবে কিরাআতের পূর্বে, ছানার পূর্বে নয়। কেননা হাদীছে উক্ত তাকবীরগুলিকে কিরাআতের পূর্বে (قبل القراءة) বলা হয়েছে। ষষ্ঠতঃ ছানার পরে অতিরিক্ত তাকবীর গুলি দিলে ফরয তাকবীরে তাহরীমা থেকে এগুলিকে পৃথক করা সহজ হয়।

সপ্তমতঃ ইবনু মাসউদ (রাঃ) থেকে অতিরিক্ত প্রত্যেক তাকবীরের পরে হামদ, ছানা ও দরুদ পাঠ সম্পর্কে যে 'আছার' বর্ণিত হয়েছে (ইরওয়া ৩/১১৪), সেটি তাঁর নিজস্ব আমল। রাসূল (ছাঃ) ও অন্যান্য ছাহাবায়ে কেলাম থেকে এরূপ আমলের কোন নযীর নেই (মির'আৎ ২/৩৪২)।

কাছীর বিন আবদুল্লাহ বর্ণিত উপরোক্ত হাদীছ সম্পর্কে ইমাম তিরমিযী বলেন,

حديث جد كثير حديث حسن وهو احسن شيئى روي فى هذا الباب عن النبى (ص)

অর্থঃ হাদীছটির সনদ 'হাসান' এবং এটিই ঈদায়নের অতিরিক্ত তাকবীর সম্পর্কে বর্ণিত 'সর্বাধিক সুন্দর' রেওয়াজাত।<sup>৬৭</sup> তিনি আরও বলেন যে, আমি এ সম্পর্কে আমার উস্তায় ইমাম বুখারীকে জিজ্ঞেস করলে তিনি বলেন,

قال ابو عيسى سألت محمدا يعنى البخاري عن هذا الحديث فقال ليس فى

هذا الباب شيئ اصح من هذا وبه اتول، نقله البيهقي فى السنن الكبرى -

অর্থাৎ ঈদায়নের ছালাতের অতিরিক্ত তাকবীর সম্পর্কে এর চাইতে অধিক আর কোন ছহীহ রেওয়াজাত নেই এবং আমিও সে কথা বলি'<sup>৬৮</sup>

রাসূলুল্লাহ (ছাঃ) 'ছয় তাকবীরে' ঈদের ছালাত আদায় করেছেন- এই মর্মে ছহীহ বা যঈফ কোন স্পষ্ট মরফু হাদীছ নেই। 'জানাযার তাকবীরের ন্যায় চার তাকবীর' বলে মিশকাতে<sup>৬৯</sup> এবং 'নয় তাকবীর' বলে মুছান্নাফ ইবনে আবী শায়বাতে<sup>৭০</sup> যে হাদীছ এসেছে, সেটিও মূলতঃ ইবনু মাসউদের উক্তি। তিনি এটিকে রাসূল (ছাঃ)-এর দিকে সম্পর্কিত করেননি। উপরন্তু উক্ত রেওয়াজাতের সনদ সকলেই 'যঈফ' বলেছেন।<sup>৭১</sup> সুতরাং ইবনে মাসউদের সঠিক আমল কি ছিল, সে ব্যাপারেও সন্দেহ থেকে যায়। এ বিষয়ে ইমাম বায়হাক্বী বলেন,

هذا رأى من جهة عبد الله رضى الله عنه والحديث المسند مع ما عليه من

عمل المسلمين أولى أن يتبع وبالله التوفيق -

অর্থাৎ 'এটি আবদুল্লাহ বিন মাসউদের 'ব্যক্তিগত রায়' মাত্র। অতএব রাসূলুল্লাহ (ছাঃ) হ'তে বর্ণিত মরফু হাদীছ, যার উপরে মুসলমানদের আমল চালু আছে (অর্থাৎ বারো

৬৭. ঐ, ১/৭০ পৃঃ; আলবানী, ছহীহ তিরমিযী হা/৪৪২, ইবনু মাজাহ (বৈরুতঃ তাবি) হা/১২৭৯)।

৬৮. বায়হাক্বী, বৈরুত ছাপা, তাবি ৩/২৮৬; মির'আত হা/১৪৫৭, ২/৩৩৯।

৬৯. আবুদাউদ, মিশকাত হা/১৪৪৩। ৭০. বোয়াই ছাপাঃ ১৯৭৯, ২/১৭৩ পৃঃ।

৭১. বায়হাক্বী ৩/২৯০, নায়ল ৪/২৫৬, মির'আৎ ২/৩৪৩, আলবানী-মিশকাত হা/১৪৪৩।

তাকবীর) তার উপরে আমল করাই উত্তম' (বায়হাক্বী ৩/২৯১)।

চার খলীফা ও মদীনার শ্রেষ্ঠ সাত জন তাবেঈ ফক্বীহ সহ প্রায় সকল ছাহাবী, তাবেঈ, তিন ইমাম ও অন্যান্য শ্রেষ্ঠ ইমামগণ এবং ইমাম আবু হানীফার দুই প্রধান শিষ্য ইমাম আবু ইউসুফ ও মুহাম্মাদ (রহঃ) বারো তাকবীরের উপরে আমল করতেন। ভারতের দু'জন খ্যাতনামা হানাফী বিদ্বান আবদুল হাই লাক্কৌবী ও আনোয়ার শাহ কাশ্মীরী বারো তাকবীরকে সমর্থন করেছেন (মির'আৎ ২/৩৩৮, ৩৪১)।

**জ্ঞাতব্যঃ** 'জানাযার চার তাকবীরের ন্যায়' বলে ১ম রাক'আতে তাকবীরে তাহরীমাসহ কিরাআতের পূর্বে চার তাকবীর এবং ২য় রাক'আতে রুকুর তাকবীর সহ কিরাআতের পরে চার তাকবীর বলে 'তাবীল' করা হয়েছে। এর মধ্যে তাকবীরে তাহরীমা ও রুকুর মূল তাকবীর দু'টি বাদ দিলে অতিরিক্ত তিন তিন ছয়টি তাকবীর হয়। অথচ উক্ত হাদীছে কিরাআতের আগে বা পরে বলে কোন কথা নেই। অনুরূপভাবে মুছান্নাফে বর্ণিত 'নয় তাকবীর' থেকে তাকবীরে তাহরীমা এবং ১ম ও ২য় রাক'আতের রুকুর তাকবীর দু'টিসহ মোট তিনটি মূল তাকবীর বাদ দিলে অতিরিক্ত ছয়টি তাকবীর হয়। এভাবেই তাবীল করে ছয় তাকবীর করা হয়েছে। অথচ এ বিষয়ে ১২ তাকবীরের স্পষ্ট ছহীহ হাদীছের উপরে সকলে আমল করলে সূন্নী মুসলমানেরা অন্ততঃ বৎসরে দু'টি ঈদের খুশীর দিনে ঐক্যবদ্ধ হ'য়ে ছালাত ও ইবাদত করতে পারত। কিন্তু দ্বীনের দোহাই দিয়েই আমরা দ্বীনদারদের বিভক্ত করে রেখেছি। যদিও শরীয়তে এর কোন ভিত্তি নেই।

### ছালাতের পদ্ধতিঃ

১ম রাক'আতে তাকবীরে তাহরীমা ও ছানা পাঠের পর ধীর-স্থিরভাবে স্বল্প বিরতি সহ পরপর সাত তাকবীর দিবে। অতঃপর আউযুবিল্লাহ-বিসমিল্লাহ সহ ইমাম সরবে সূরায়ে ফাতিহা ও অন্য সূরা পড়বেন এবং মুক্তাদীগণ চুপে চুপে কেবল সূরায়ে ফাতিহা পড়বে। অনুরূপভাবে ২য় রাক'আতে দাঁড়িয়ে ধীর-স্থিরভাবে পরপর পাঁচ তাকবীর দিয়ে কেবল বিসমিল্লাহ সহ সূরায়ে ফাতিহা ও অন্য সূরা পড়বে।

এই সময় প্রথম রাক'আতে সূরায়ে ক্বাফ অথবা আ'লা এবং দ্বিতীয় রাক'আতে সূরায়ে ক্বামার অথবা গা-শিয়াহ পড়বে' (মুসলিম, মিশকাত হা/৮৪০-৪১)। প্রতি তাকবীরে হাত কাঁধ পর্যন্ত উঠাবে ও বুকো বাঁধবে। তাকবীর বলতে ভুলে গেলে বা গণনায় ভুল হ'লে তা পুনরায় বলতে হয় না বা 'সিজদায়ে সহো' লাগে না (মির'আত হা/১৪৫৭, ২/৩৪১ পৃঃ)।

### ৬. জানাযার ছালাত (صلوة الجنائزة)

**হুকুমঃ** জানাযার ছালাত 'ফরযে কেফায়াহ' (বুখারী, মুসলিম, ফিকহস সুন্নাহ ১/২৭১)। অর্থাৎ মুসলমানদের কেউ জানাযা পড়লে উক্ত ফরয আদায় হয়ে যাবে। না পড়লে সবাই দায়ী হবে। ছালাত হিসাবে অন্যান্য ছালাতের ন্যায় ওযু, ক্বিবলা, সতর ঢাকা ইত্যাদি ছালাতে জানাযার শর্তাবলীর অন্তর্ভুক্ত। তবে পার্থক্য এই যে, জানাযার

ছালাতের জন্য নির্দিষ্ট কোন ওয়াক্ত নেই। বরং দিনে-রাতে সকল সময় এমনকি (কারণ বিশিষ্ট ছালাত হিসাবে) নিষিদ্ধ তিন সময়েও পড়া যায় (ঐ)।

ওয়াজিব ও সুন্নাতঃ জানাযার ছালাতে ওয়াজিব হ'ল ছয়টিঃ (১) দাঁড়িয়ে ছালাত আদায় করা (২) চার তাকবীর দেওয়া (৩) সূরায়ে ফাতিহা পাঠ করা (৪) দরুদ পাঠ করা (৫) মাইয়েতের জন্য খালেছ অন্তরে দো'আ করা (৬) সালাম ফিরানো।

সুন্নাত হ'ল পাঁচটিঃ (১) জামা'আত সহকারে ছালাত আদায় করা (২) তিনটি কাতার হওয়া (৩) ইমাম হ'লে বা একাকী মুছল্লীর জন্য পুরুষের মাথা ও মেয়েদের কোমর বরাবর দাঁড়ানো (৪) হাদীছে বর্ণিত দো'আ সমূহ পাঠ করা (৫) ছালাত শেষে জানাযা উঠানো পর্যন্ত দাঁড়িয়ে থাকা (শারহুল মুনতাহা ২/৫৫-৬৭)। বাকী সবই মুস্তাহাব। যদি ভুলক্রমে তিন তাকবীর হয়ে যায়, তবে পুনরায় ইমাম চতুর্থ তাকবীর দিবেন। যদি মুক্তাদীর কোন তাকবীর ছুটে যায়, তবে শেষে তাকবীর দিয়ে সালাম ফিরাবে। আর যদি না করে তাতেও দোষ নেই' (ফিকহুস সুন্নাহ ১/২৭৭)।

ফযীলতঃ রাসূলুল্লাহ (ছাঃ) এরশাদ করেন 'যে ব্যক্তি ঈমানের সাথে ও ছওয়াবেবের আশায় কোন জানাযায় শরীক হ'ল এবং দাফন শেষে ফিরে এলো, সে ব্যক্তি দুই 'ক্বীরাত' সমপরিমান নেকী পেল। প্রতি 'ক্বীরাত' ওহোদ পাহাড়ের সমতুল্য। আর যে ব্যক্তি কেবলমাত্র জানাযা পড়ে ফিরে এলো, সে এক 'ক্বীরাত' পরিমাণ নেকী পেল'।<sup>৭২</sup>

কাতার দাঁড়ানোঃ মাইয়েতকে উত্তর মাথা করে ক্বিবলার দিকে সামনে রাখবে (তলখীহ পৃঃ ৬৪)। যদি মাইয়েত পুরুষ হন, তবে ইমাম মাইয়েতের মাথা বরাবর দাঁড়াবেন। আর যদি মহিলা হন, তবে মাইয়েতের কোমর বরাবর দাঁড়াবেন (জিরমিযী, আবুদাউদ, মিশকাত ১/৬৭৯)। মাইয়েত একত্রে একাধিক হ'লে এবং পুরুষ ও নারী হ'লে পুরুষের লাশ ইমামের কাছাকাছি সম্মুখে রাখবে। ততঃপর মহিলার লাশ থাকবে। যদি শিশু ও মহিলা হয়, তাহ'লে শিশুর লাশ প্রথমে ও পরে মহিলার লাশ থাকবে। ইমামের পিছনে তিনটি কাতার দেওয়া সুন্নাত। তবে মুক্তাদী একজন হ'লে তিনি ইমামের পিছনে দাঁড়াবেন। চারজন হ'লে ইমামের পিছনে দু'জন দু'জন করে দাঁড়াবেন (শারহুল মুনতাহা ২/৫৫)। ইমাম ব্যতীত একজন পুরুষ ও একজন মহিলা মুক্তাদী হ'লে ইমামের পিছনে পুরুষ ও তার পিছনে মহিলা দাঁড়াবেন। কোন লোক না পেলে একাকী জানাযা পড়বেন।<sup>৭৩</sup>

ইমামতিঃ মাইয়েত কাউকে অছিয়ত করে গেলে তিনিই জানাযা পড়াবেন। নইলে 'আমীর' বা তাঁর প্রতিনিধি অথবা মাইয়েতের কোন যোগ্য নিকটাত্মীয়, নতুবা স্থানীয় মসজিদের ইমাম বা অন্য কোন মুত্তাক্বী আলেম জানাযায় ইমামতি করবেন। মৃতব্যক্তি দু'জন ব্যক্তির নামেও অছিয়ত করে যেতে পারেন (শারহুল মুনতাহা ৩/৫৬-৫৭; বায়হাক্বী ৪/২৮-২৯)।

ছালাতের বিবরণঃ জানাযার ছালাতে চার তাকবীর দিবে।<sup>৭৪</sup> মনে মনে জানাযার নিয়ত করে সরবে ১ম তাকবীর দিয়ে কাঁধ পর্যন্ত দু'হাত উঠিয়ে পরে বুকে হাত

৭২. মুত্তাফাকু আলাইহ, মিশকাত হা/১৬৫১ 'জানাযার ছালাত' অনুচ্ছেদ।

৭৩. আলবানী, তালখীহু আহকামিল জানায়েয পৃঃ ৫০-৫২।

৭৪. মুত্তাফাকু আলাইহ, মিশকাত হা/১৬৫২।

বাঁধবে। নাভির নীচে হাত বাঁধার হাদীছ সর্বসম্মত ভাবে 'যঈফ' (তালখীছ পৃঃ ৫৪)। আনাস, ইবনে ওমর, ইবনে আক্বাস (রাঃ) প্রমুখ ছাহাবী সকল তাকবীরেই হাত উঠাতেন। অতঃপর আ'উযুবিল্লাহ-বিসমিল্লাহ সহ সূরায়ে ফাতিহা ও অন্য একটি সূরা পড়বে।<sup>৭৫</sup> তারপর ২য় তাকবীর দিবে ও দরুদ শরীফ পড়বে, যা আত্তাহিইয়াতু-র পরে পড়া হয়। তারপর ৩য় তাকবীর দিবে ও নিম্নোক্ত দো'আ সমূহ পড়বে। সবশেষে ৪র্থ তাকবীর দিয়ে প্রথমে ডাইনে ও পরে বামে সালাম ফিরাবে। ডাইনে একবার মাত্র সালাম ফিরানোও জায়েয আছে।<sup>৭৬</sup> জানাযার ছালাত সরবে ও নীরবে পড়া যায় (বুখারী, মুসলিম, মিশকাত হা/১৬৫৪ ও ৫৫ নাসাঈ হা/১৯৮৯ ও ৯১)। ইমাম সরবে পড়লে মুক্তাদীগণ আ'উযুবিল্লাহ-বিসমিল্লাহ সহ কেবল সূরায়ে ফাতিহা পড়বে এবং পরে দরুদ শরীফ ও অন্যান্য দো'আ সমূহ পড়বে।

জ্ঞাতব্যঃ ঋণগ্রস্ত, বায়তুল মাল বা অন্যের সম্পদ আত্মসাৎকারী ও আত্মহত্যাকারীর জানাযা আল্লাহর রাসূল (ছাঃ) নিজে পড়েননি, তবে অন্যকে পড়তে বলেন। খায়বার যুদ্ধে রাসূলুল্লাহ (ছাঃ)-এর সাথীদের মধ্যে একজন নিহত হ'লে তিনি বলেন, 'তোমরা তোমাদের সাথীর জানাযা পড়'। এতে তাদের মন খারাব হ'ল। পরে তার থলিতে ইহুদীদের একটি ছিদ্রযুক্ত ছোট পাথর পাওয়া গেল। যার মূল্য দুই দিরহামেরও কম'। অন্য হাদীছে এসেছে, মুমিনের নফস তার ঋণের সাথে লটকানো থাকে, যতক্ষণ না তা পরিশোধ করা হয়' (নাসাঈ হা/১৯৬১, ৬২, ৬৩; তিরমিধী, বুল্গল মারাম হা/৫০৬)।

উপরোক্ত ব্যক্তিগণ কবীরা গোনাহগার। কিন্তু ছালাত তরককারী ব্যক্তিকে হাদীছে 'কাফির' বলে আখ্যায়িত করা হয়েছে (দ্রঃ পৃঃ ১৮-২০)। তাহ'লে কিভাবে তার জানাযা পড়া যেতে পারে? আল্লাহ আমাদের হেদায়াত করুন- আমীন!

জানাযার দো'আঃ অনেকগুলি দো'আর মধ্যে নিম্নের দো'আটি সুপরিচিত।-

اللَّهُمَّ اغْفِرْ لِحَيِّنَا وَمَيِّتِنَا وَشَاهِدِنَا وَغَائِبِنَا وَصَغِيرِنَا وَكَبِيرِنَا وَذَكَرِنَا  
وَأُنثَانَا، اللَّهُمَّ مَنْ أَحْيَيْتَهُ مِنَّا فَأَحْيِهِ عَلَى الْإِسْلَامِ وَمَنْ تَوَفَّيْتَهُ  
مِنَّا فَتَوَفَّهُ عَلَى الْإِيمَانِ، اللَّهُمَّ لَا تَحْرِمْنَا أَجْرَهُ وَلَا تَفْتِنَّا بَعْدَهُ -

১. উচ্চারণঃ আল্লা-হুমাগ্ফির লিহাইয়েনা ওয়া মাইয়েতেনা ওয়া শা-হেদেনা ওয়া  
গা-য়েবেনা ওয়া ছাগীরেনা ওয়া কাবীরেনা ওয়া যাকারেনা ওয়া উন্ছা-না, আল্লা-হুমা  
মান আইয়াইতাহূ মিন্না ফাআহয়িহী 'আলাল ইসলা-মে, ওয়া মান তাওয়াফফায়তাহূ  
মিন্না ফাতাওয়াফফাহূ 'আলাল ঈমান। আল্লা-হুমা লা তাহরিম্না আজরাহূ ওয়া লা  
তাফতিন্না বা'দাহূ।

৭৫. বুখারী ১/১৭৮; নাসাঈ হা/১৯৮৯, ছহীহ নাসাঈ হা/১৮৭৮; নায়ল ৫/৬৭-৭১।

৭৬. তালখীছ পৃঃ ৪৪-৫৭; মুহান্নাফ ইবনু আবী শায়বা, ইরওয়া হা/৭৩৪, ৩/১৮১।

অনুবাদঃ 'হে আল্লাহ! আমাদের জীবিত ও মৃত এবং (এই জানাযায়) উপস্থিত-অনুপস্থিত আমাদের ছোট ও বড়, পুরুষ ও নারী সকলকে আপনি ক্ষমা করুন। যাকে আপনি বাঁচিয়ে রাখবেন, তাকে ইসলামের উপরে বাঁচিয়ে রাখুন এবং যাকে আপনি মারতে চান, তাকে ঈমানের হালতে মৃত্যু দান করুন। হে আল্লাহ! এই মাইয়েতের ভাল প্রতিদান হ'তে আপনি আমাদেরকে বঞ্চিত করবেন না এবং উহার পরে আমাদেরকে পরীক্ষায় ফেলবেন না'।<sup>৭৭</sup>

(২) আরেকটি গুরুত্বপূর্ণ দো'আ, যা প্রথমটির সাথে যোগ করে পড়া যায়। যেমন-

اللَّهُمَّ اغْفِرْ لَهُ وَارْحَمْهُ وَعَافِهِ وَاعْفُ عَنْهُ وَأَكْرِمْ نُزُلَهُ وَوَسِّعْ مَدْخَلَهُ،  
وَاغْسِلْهُ بِالْمَاءِ وَالنَّجْلِ وَالْبَرْدِ، وَنَقِّهِ مِنَ الْخَطَايَا كَمَا نَقَّيْتَ الثَّوْبَ  
الْبَيْضَ مِنَ الدَّنَسِ، وَأَبْدَلْهُ دَارًا خَيْرًا مِّنْ دَارِهِ وَأَهْلًا خَيْرًا مِّنْ أَهْلِهِ  
وَزَوْجًا خَيْرًا مِّنْ زَوْجِهِ، وَأَدْخِلْهُ الْجَنَّةَ وَأَعِذْهُ مِنْ عَذَابِ الْقَبْرِ وَمِنْ  
عَذَابِ النَّارِ، رواه مسلم -

২. উচ্চারণঃ আল্লা-হুয়াগ্ফির লা-হু ওয়ারহাম্হু ওয়া 'আ-ফিহি ওয়া'ফু 'আনহু ওয়া আকরিম নুযুলাহু ওয়া ওয়াস্‌সি' মাদখালাহু; ওয়াগ্‌সিল্‌হু বিলমা-এ ওয়াহ্‌হাল্‌জে ওয়াল বারাদে; ওয়া নাক্বুক্বিহি মিনাল খাত্বা-য়া কামা নাক্বুক্বায়তাহ্‌ ছাওবাল আবইয়াযা মিনাদ্ দানাসি; ওয়া আবদিলহ্‌ দা-রান খায়রাম মিন দা-রিহী ওয়া আহলান খায়রাম মিন আহলিহী ওয়া যাওজান খায়রাম মিন যাওজিহী; ওয়া আদখিল্‌হল জান্নাতা ওয়া আ'ইয্‌হ মিন 'আযা-বিল ক্বাবরে ওয়া মিন 'আযা-বিন ন্না-রে (মুসলিম, মিশকাত হা/১৬৫৫)।

অনুবাদঃ হে আল্লাহ! আপনি এই মাইয়েতকে ক্ষমা করুন। তাকে অনুগ্রহ করুন। তাকে নিরাপদে রাখুন এবং তার গোনাহ মাফ করুন। আপনি তাকে সম্মানজনক আতিথেয়তা প্রদান করুন। তার প্রবেশদ্বার প্রশস্ত করুন। আপনি তাকে পানি দ্বারা, বরফ দ্বারা ও শিশির দ্বারা ধৌত করুন এবং তাকে পাপ হ'তে এমনভাবে মুক্ত করুন, যেমনভাবে আপনি সাদা কাপড়কে ময়লা হ'তে ছাফ করে থাকেন। আপনি তাকে দুনিয়ার গৃহের বদলে উত্তম গৃহ দান করুন। তার দুনিয়ার পরিবারের চাইতে উত্তম পরিবার এবং দুনিয়ার জোড়ার চাইতে উত্তম জোড়া দান করুন। তাকে আপনি জান্নাতে দাখিল করুন এবং কবরের ও জাহান্নামের আযাব হ'তে মুক্তি দান করুন'।

(৩) মাইয়েত শিশু হ'লে ১নং দো'আ শেষে নিম্নোক্ত দো'আ পড়বে-

اللَّهُمَّ اجْعَلْهُ لَنَا سَلَفًا وَفَرَطًا وَذُخْرًا وَأَجْرًا رواه البخارى تعليقا -



**উচ্চারণঃ** আল্লা-হুযাজ্‌আলহু লানা সালাফাওঁ ওয়া ফারাত্বাওঁ ওয়া যুখ্‌রাওঁ ওয়া আজরান'। 'লানা'-এর সাথে 'ওয়া লে আবাওয়াইহে' (এবং তার পিতা-মাতার জন্য) যোগ করে বলা যেতে পারে (ফিকহুস সুন্নাহ ১/২৭৪)।

**অনুবাদঃ** 'হে আল্লাহ! আপনি এই শিশুকে আমাদের জন্য (এবং তার পিতা-মাতার জন্য) পূর্বগামী, অগ্রগামী এবং আখেরাতের পুঁজি ও পুরস্কার হিসাবে গণ্য করুন'! ৭৮

(৪) اللَّهُمَّ إِنَّ فُلَانَ بْنَ فُلَانَ فِي ذِمَّتِكَ وَحَبْلِ جِوَارِكَ، فَقِهِ مِنْ فِتْنَةِ الْقَبْرِ وَعَذَابِ النَّارِ، وَأَنْتَ أَهْلُ الْوَفَاءِ وَالْحَقِّ، اللَّهُمَّ اغْفِرْ لَهُ، وَارْحَمْهُ، إِنَّكَ أَنْتَ الْغَفُورُ الرَّحِيمُ -

**উচ্চারণঃ** আল্লা-হুযা ইন্না ফুলা-নাবনা ফুলা-নিন ফী যিযাতিকা ওয়া হাবলি জিওয়া-রিকা; ফাক্বিহী মিন ফিৎনাতিল ক্বাবরি ওয়া 'আযা-বিন্না-রি; ওয়া আন্তা আহলুল ওয়াফা-ই ওয়াল হাক্বিক্বি। আল্লা-হুযাগফিরলাহু ওয়ারহামহু, ইন্নাকা আন্তাল গাফুরুর রহীমু'। ৭৯

**অনুবাদঃ** হে আল্লাহ! অমুকের পুত্র অমুক আপনার যিম্মায় ও তত্ত্বাবধানে আবদ্ধ। অতএব আপনি তাকে কবর ও জাহান্নামের পরীক্ষা হ'তে রক্ষা করুন। আপনি ওয়াদা ও সত্যের মালিক। হে আল্লাহ! আপনি তাকে ক্ষমা করুন ও তাকে অনুগ্রহ করুন। নিশ্চয়ই আপনি ক্ষমাশীল ও দয়ালব। শাওকানী বলেন যে, নাম জানা থাকলে 'ফুলান'-এর স্থলে মাইয়েত ও তার পিতার নাম বলা যাবে' (নায়ল ৫/৭৪)। সে হিসাবে মাইয়েত মেয়ে হ'লে ইবনু-র স্থলে 'বিনতে' বলা যাবে। আর মেয়ের নাম জানা না থাকলে 'ফুলা-নাতা বিনতে ফুলা -নিন বলা যাবে।

**দো'আর আদবঃ** রাসূলুল্লাহ (ছাঃ) এরশাদ করেন, إِذَا صَلَّيْتُمْ عَلَى الْمَيِّتِ فَأَخْلَصُوا، 'যখন তোমরা জানাযার ছালাত আদায় করবে বা মৃতের জন্য দো'আ করবে, তখন তার জন্য খালেছ অন্তরে দো'আ করবে' (আবুদাউদ, ইবনু মাজাহ, মিশকাত হা/১৬৭৪)। অতএব মাইয়েত ভাল-মন্দ যাই-ই হোক না কেন, তার জন্য খোলা মনে দো'আ করতে হবে। কবুল করা বা না করার মালিক আল্লাহ। ছাহেবে আওন বলেন, অত্র হাদীছ দ্বারা প্রমাণিত হয় যে, মৃতের জন্য নির্দিষ্ট কোন দো'আ নেই। বরং যেকোন প্রার্থনা করা যেতে পারে। শাওকানীও সেকথা বলেন। তবে তিনি বলেন যে, হাদীছে বর্ণিত দো'আ সমূহ পাঠ করাই উত্তম। এই সময় সর্বনাম পরিবর্তনের প্রয়োজন নেই। কেননা 'মাইয়েত' আরবী শব্দটি উভয় লিঙ্গের জন্য ব্যবহৃত হয়। ৮০

৭৮. বুখারী তা'লীক ১/১৭৮; মিশকাত হা/১৬৯০।

৭৯. আবুদাউদ, ইবনু মাজাহ, মিশকাত হা/১৬৭৭, সনদ 'জাইয়িদ' বা উত্তম; নায়ল ৫/৭৪।

৮০. আওনুল মা'বুদ হা/৩১৮৪-এর ভাষ্য ৮/৪৯৬; নায়ল ৫/৭২, ৭৪।

## মৃত্যুকালীন সময় করণীয়

### (ক) তালক্বীন করানোঃ

‘তালক্বীন’ অর্থঃ কথা বুঝানো বা দ্রুত মুখস্ত করে নেওয়া। মৃত্যুর আলামত দেখা গেলে রোগীর শিয়রে বসে তাকে কালেমায়ে ত্বাইয়িবা ‘লা ইলা-হা ইল্লাল্লা-হু’ পড়ানো উচিত (মুসলিম, মিশকাত হা/১৬১৬)। যাতে সে দ্রুত মুখস্ত বা স্মরণ করে নেয়। তাওহীদের স্বীকৃতিবাচক এই কালেমাই তাকে জান্নাতে নিয়ে যেতে পারে। কেননা রাসূলুল্লাহ (ছাঃ) এরশাদ করেন, ‘যে ব্যক্তির সর্বশেষ বাক্য ‘লা ইলা-হা ইল্লাল্লা-হু’ (অর্থঃ নেই কোন হক মা’বুদ আল্লাহ ব্যতীত) হবে, সে ব্যক্তি জান্নাতে প্রবেশ করবে’ (আবুদাউদ, মিশকাত হা/১৬২১)। জমহূর বিদ্বানগণ কেবল লা ইলা-হা ইল্লাল্লা-হু পড়ার পক্ষে মত প্রকাশ করেছেন। কেননা হাদীছে কেবল এতটুকুই এসেছে (ফিকহুল মুনাহ ১/২৫৬)।

তালক্বীনের অর্থ মৃত্যুমুখী ব্যক্তিকে কেবল কালেমা শুনানো নয়। বরং তাকে কালেমা পড়ানোর চেষ্টা করা। হযরত আনাস (রাঃ) থেকে বর্ণিত আছে যে, রাসূলুল্লাহ (ছাঃ) জনৈক আনছার রোগীকে দেখতে গেলেন ও বললেন হে মামু! আপনি পড়ুন লা ইলা-হা ইল্লাল্লা-হু। তিনি বললেন যে, আমাকে এখতিয়ার দিন, আমি নিজেই পড়ি...। রাসূলুল্লাহ (ছাঃ) বললেন, হ্যাঁ’ (তালখীছ ১১)। কিন্তু কালেমা পড়ানোর জন্য চাপাচাপি করা উচিত নয়। তাতে মুখ দিয়ে বেফাস কথা বের হ’য়ে যেতে পারে। একবার বলানোর পরে দ্বিতীয়বার চেষ্টা না করা উচিত। যাতে এই কালেমাই তার শেষ বাক্য হয়। এই সময় তাকে ক্বিবলামুখী করার জন্য উত্তর দিকে মাথা করে বিছানা ঠিক করে দেওয়া বা শিয়রে বসে সূরা ইয়াসীন পাঠ করা সম্পর্কে কোন ছহীহ হাদীছ নেই। সাঈদ বিনুল মুসাইয়িব (রাঃ)-কে ক্বিবলামুখী করে বিছানা ঘুরিয়ে দিলে হুঁশ ফেরার পর তিনি পুনরায় পূর্বের ন্যায় শয়ন করেন এবং বলেন যে, মাইয়েত কি মুসলমান নয়? (তালখীছ পৃঃ ১১, ৯৬)। এই সময় মাইয়েতের শিয়রে বসে সূরা ইয়াসীন পাঠ করার হাদীছ ‘যঈফ’ (আহমাদ, আবুদাউদ, ইবনু মাজাহ, মিশকাত হা/১৬২২)।

(খ) মৃত্যু হওয়ার পরে উপস্থিত সকলে ‘ইন্না লিল্লা-হে ওয়া ইন্না ইলাইহে রা-জে’উন’ (অর্থঃ ‘আমরা সবাই আল্লাহর জন্য এবং আমরা সবাই তাঁর দিকে প্রত্যাবর্তনকারী’) পাঠ করবে এবং আল্লাহ-নির্ধারিত তাক্বদীরের উপরে ছবর করবে ও সন্তুষ্ট থাকবে। অতঃপর মাইয়েতের নিকটজন এই দো‘আ পড়বেঃ ‘আল্লা-হুমা আ-জিরনী ফী মুছীবাতি ওয়া আখলিফলী খায়রাম মিনহা’ (অর্থঃ ‘হে আল্লাহ! আমাকে আমার বিপদে ধৈর্য ধারণের পারিতোষিক দান কর এবং এর উত্তম প্রতিদান দাও’) (মুসলিম, মিশকাত হা/১৬১৮)।

(গ) এই সময় মৃতের চোখ দু’টি বন্ধ করে দিবে (মুসলিম, মিশকাত হা/১৬১৯)। সারা দেহ ও মুখমণ্ডল কাপড় দিয়ে ঢেকে দিবে (বুখারী, মুসলিম)। দ্রুত কাফন-দাফনের ব্যবস্থা করবে এবং মৃতের ঋণ পরিশোধের ব্যবস্থা নিবে, যদি তার সমস্ত মাল দিয়েও হয়। কিছু না থাকলে বা কেউ না থাকলে বা ঋণ মাফ না করলে রাষ্ট্র তার পক্ষ থেকে ঋণ পরিশোধ করবে (তালখীছ ১৩-১৪)।

(ঘ) এই সময় মৃতের মাগফেরাতের জন্য দো'আ করা ও তার সৎ গুণাবলী বর্ণনা করা উচিত। কেননা তাতে ফেরেশতাগণ 'আমীন' বলেন ও তার জন্য ওগুলি ওয়াজিব হ'য়ে যায়'। অন্য বর্ণনায় এসেছে, 'তার জন্য জান্নাত ওয়াজিব হ'য়ে যায়' (মুসলিম, মিশকাত হা/১৬১৭, ১৯; তালখীছ পৃঃ ১৩, ২৫)। একটি বর্ণনায় এসেছে যে, ৪, ৩ এমনকি ২ জন নেককার মুমিন ব্যক্তিও যদি মৃত ব্যক্তি সম্পর্কে উত্তম সাক্ষ্য দেয়, তাতেই তার জন্য জান্নাত ওয়াজিব হ'য়ে যায় (বুখারী, মিশকাত, হা/১৬৬৩)। অন্য এক বর্ণনায় এসেছে, 'কোন মুসলমান মারা গেলে তার নিকটতম প্রতিবেশীদের চারজন যদি তার সম্পর্কে সাক্ষ্য দেয় যে, তারা তার সম্পর্কে ভাল ব্যতীত কিছু জানে না, তাহ'লে আল্লাহ বলেন, আমি তোমাদের সাক্ষ্য কবুল করলাম এবং আমি তার ঐসব গোনাহ মাফ করে দিলাম, যেগুলি তোমরা জানো না' (তালখীছ পৃঃ ২৬)।

(ঙ) এই সময় বর্জনীয়ঃ

উচ্চৈঃস্বরে চীৎকার দিয়ে কান্নাকাটি করা। বাজারে, মিনারে (মাইকে) 'শোক সংবাদ' প্রচার করা। অতিরঞ্জিত শোক প্রকাশ ও বিলাপ ধ্বনি করা। মুখ ও বুক চাপড়ানো। মেয়েদের মাথার কাপড় ফেলা ও বুকের কাপড় ছেঁড়া ইত্যাদি' (মুত্তাফাকু আলাইহ, মিশকাত হা/১৭২৫-২৬; তালখীছ পৃঃ ১৯, ৯৮)। অধিক কান্নাকাটির ফলে কিয়ামতের দিন তার উপরে আযাব হ'তে পারে' (মুত্তাফাকু আলাইহ, মিশকাত হা/১৭৪০)। ছাহাবী হোযায়ফা (রাঃ) অছিয়ত করে বলেন, আমি মারা যাওয়ার পরে কাউকে সংবাদ দিয়ো না। আমার ভয় হয় এটা না'ঈ বা শোক সংবাদ হবে কি-না। কেননা রাসূলুল্লাহ (ছাঃ) এ থেকে নিষেধ করেছেন'। অন্যান্য ছাহাবী থেকেও এধরনের অছিয়ত বহু রয়েছে (তালখীছ ১০)। সেকারণ ইমাম নববী (রহঃ) বলেন, প্রত্যেকের উচিত এভাবে অছিয়ত করে যাওয়া, যেন তার মৃত্যুর পরে কোন প্রকার বিদ'আত না করা হয় (ঐ)।

## মৃত্যুর পরে করণীয়

(ক) মাইয়েতের গোসলঃ

মাইয়েতকে দ্রুত গোসল ও কাফন-দাফনের ব্যবস্থা নেওয়া সুন্নাত (বুখারী ১/১৭৬)। গোসলের সময় পর্দার ব্যবস্থা রাখতে হবে এবং পূর্ণ শালীনতা ও পরহেযগারীর সাথে কুলপাতা দেওয়া পানি বা সুগন্ধি সাবান দিয়ে সুন্দরভাবে গোসল করাবে। সুন্নাতী তরীকা মোতাবেক গোসল করাতে সক্ষম এমন নিকটাত্মীয় বা অন্য কেউ মাইয়েতকে গোসল করাবেন। পুরুষ পুরুষকে ও মহিলা মহিলা মাইয়েতকে গোসল দিবেন। তবে মহিলাগণ শিশুকে গোসল দিতে পারবেন (ফিকহুস সুন্নাহ ১/২৬৮)। স্বামী স্ত্রীকে বা স্ত্রী স্বামীকে বিনা দ্বিধায় গোসল করাবেন। রাসূলুল্লাহ (ছাঃ) স্বীয় স্ত্রী আয়েশা (রাঃ)-কে বলেছিলেন, যদি আমার পূর্বে তুমি মারা যাও, তাহ'লে আমি তোমাকে গোসল দেব, কাফন পরাব, জানাযা পড়াব ও দাফন করব' (ইবনু মাজাহ হা/১৪৬৫)। হযরত আবুবকর (রাঃ)-কে তাঁর স্ত্রী আসমা বিনতে উমাইস (রাঃ) এবং হযরত ফাতেমা (রাঃ)-কে

তার স্বামী হযরত আলী (রাঃ) গোসল দিয়েছিলেন (বায়হাক্বী ৩/৩৯৭; দারাকুত্নী হা/১৮৩৩ সনদ হাসান)। ধর্মযুদ্ধে নিহত শহীদকে গোসল দিতে হয় না (তালখীছ পৃঃ ২৮-৩৩)।

**পদ্ধতিঃ** 'বিসমিল্লাহ' বলে ডান দিক থেকে ওয়ূর অঙ্গ সমূহ প্রথমে ধৌত করবে। ধোয়ানোর সময় হাতে ভিজা ন্যাকড়া রাখবে। পূর্ণ পর্দার সাথে মাইয়েতের দেহ থেকে পরণের কাপড় খুলে নেবে। গোসলের সময় লজ্জাস্থানের দিকে তাকাবে না বা খালি হাতে স্পর্শ করবে না। তিনবার বা তিনের অধিক বেজোড় সংখ্যায় সমস্ত দেহে পানি ঢালবে। গোসল শেষে কোন সুগন্ধি বা কর্পূর লাগাবে। মাইয়েত মহিলা হ'লে চুল খুলে দেবে। অতঃপর তিনটি ভাগে ভাগ করে পিছনে ছড়িয়ে দেবে (তালখীছ ২৮-৩০)।

**গোসল দান কারীর নেকীঃ** মাইয়েতকে গোসলদানকারীর জন্য অশেষ নেকী রয়েছে দু'টি শর্তে। এক- যদি তিনি স্রেফ আল্লাহর সন্তুষ্টি লাভের উদ্দেশ্যে গোসল করান এবং গোসল করানোর বিনিময়ে কিছুই গ্রহণ না করেন (কাফ ১১০)। দুই- যদি তিনি মাইয়েতের কোন অপসন্দনীয় বিষয় গোপন রাখেন। রাসূলুল্লাহ (ছাঃ) এরশাদ করেন, যে ব্যক্তি কোন মুসলিম মাইয়েতকে গোসল করালো। অতঃপর তার গোপনীয়তাসমূহ গোপন রাখলো, আল্লাহ তার গোনাহ সমূহ ঢেকে রাখবেন এবং যে ব্যক্তি তাকে কাফন পরালো, আল্লাহ তাকে মোটা রেশমের কাপড় পরিধান করাবেন' ৮১

### (খ) কাফন :

সাদা, সুতী ও সাধারণ মানের পরিষ্কার কাপড় দিয়ে কাফন দিতে হবে। মাইয়েতের নিজস্ব সম্পদ থেকে কাফন দেওয়া কর্তব্য। তার ব্যবহৃত কাপড় দিয়েও কাফন দেওয়া যাবে। পুরুষ ও মহিলা সকল মাইয়েতের জন্য তিনটি কাপড় দিয়ে কাফন দিবে। একটি মাথা হ'তে পা ঢাকার মত বড় চাদর ও দু'টি ছোট কাপড়। অর্থাৎ লেফাফা বা বড় চাদর, তহবন্দ বা লুঙ্গি ও ক্বামীছ বা জামা। বাধ্যগত অবস্থায় একটি কাপড় দিয়ে কিংবা যতটুকু সম্ভব ততটুকু দিয়েই কাফন দিবে। শহীদকে তার পরিহিত পোষাকে এবং মুহরিমকে তার ইহরামের দু'টি কাপড়েই কাফন দিতে হবে। কাফনের কাপড়ের অভাব ঘটলে এক কাফনে একাধিক ব্যক্তিকে কাফন দেওয়া যাবে। কাফনের পরে তিনবার সুগন্ধি ছিটাবে। তবে মুহরিমের কাফনে সুগন্ধি ছিটানো যাবে না। ৮২ মাইয়েতের নিজস্ব সম্পদ না থাকলে কিংবা তাতে কাফনের ব্যবস্থা না হ'লে কেউ দান করবে অথবা বায়তুল মাল থেকে (বা সরকারী তহবিল থেকে) তার ব্যবস্থা করতে হবে (ফিকহস সুন্নাহ ১/২৭০)। মহিলাদের জন্য প্রচলিত পাঁচটি কাপড়ের হাদীছ 'যঈফ'(আলবানী, যঈফ আবুদাউদ হা/৩১৫৭)।

### (গ) জানাযাঃ

রাসূলুল্লাহ (ছাঃ) মসজিদের বাইরের নির্দিষ্ট স্থানে অধিকাংশ সময় জানাযা পড়াতেন (ফিকহস সুন্নাহ ১/২৮২)। তবে প্রয়োজনে মসজিদেও জায়েয আছে। সুহায়েল বিন বায়যা

৮১. ডাবারাণী, ছহীছুল জামে' হা/৬৪০৩, তালখীছ পৃঃ ৩১।

৮২. তালখীছ পৃঃ ৩৪-৩৭; বায়হাক্বী ৪/৭; মুত্তাফাকু আলাইহ, মির'আত হা/১৬৫২, বাযযার, ইবনু আদী, মির'আৎ ২/৪৬২ পৃঃ।

(রাঃ)-এর জানাযা আল্লাহর রাসূল (ছাঃ) মসজিদের মধ্যে পড়েছিলেন। হযরত আবুবকর ও ওমর (রাঃ)-এর জানাযা মসজিদের মধ্যে হয়েছিল (বায়হাকী ৪/৫২)। মেয়েরাও পর্দার মধ্যে জানাযায় শরীক হ'তে পারেন। আয়েশা (রাঃ) ও অন্যান্য উম্মাহাতুল মুমিনীন (রাঃ) মসজিদে নববীর মধ্যে সা'দ বিন আবী ওয়াক্ক্বাহ (রাঃ)-এর লাশ আনিয়ে নিজেরা জানাযা পড়েছিলেন (মুসলিম হা/১৭৩; মিশকাত হা/১৬৫৬; বায়হাকী ৪/৫১)। মহিলাগণ একাকী বা জামা'আত সহকারে জানাযা পড়তে পারেন (ফিকহুস সুন্নাহ ১/২৮২)। জানাযা না পেলে পরে যেকোন দিন কবরে গিয়ে একাকী বা জামা'আত সহকারে জানাযা পড়া যাবে (মুত্তা, মিশকাত হা/১৬৫৮-৫৯; বায়হাকী ৪/৪৪-৪৯)।

বর্তমান যুগে জানাযার পরপরই সকলে মিলে পুনরায় হাত তুলে দলবদ্ধভাবে দো'আ করছেন। কেউ একই দিনে বা দু'একদিন পরে আত্মীয়-স্বজন ডেকে দো'আর অনুষ্ঠান করছেন। এগুলি নিঃসন্দেহে বিদ'আত। জানা আবশ্যিক যে, জানাযার ছালাতই হ'ল মৃতের জন্য একমাত্র দো'আর অনুষ্ঠান। এটা ব্যতীত মুসলিম মাইয়েতের জন্য পৃথক কোন দো'আর অনুষ্ঠান ইসলামী শরীয়তে নেই।

**জ্ঞাতব্যঃ** (১) বাচ্চা যদি ভূমিষ্ট হওয়ার পরে ক্রন্দন করে বা হাঁচি দেয় বা এমন আচরণ করে যাতে তার জীবন ছিল বলে বুঝা যায়, অতঃপর মারা যায়। তবে তার জানাযা পড়তে হবে। 'ঐ বাচ্চা তার বাপ-মায়ের প্রতি ক্ষমা ও অনুগ্রহের জন্য আল্লাহর নিকটে দাবী করে' (আহমাদ, আবুদাউদ)। (২) যদি বাচ্চা চার মাসের আগেই গর্ভচ্যুত হয়, তাহ'লে তাকে গোসল বা জানাযা কিছুই করতে হবে না। বরং কাপড়ে জড়িয়ে দাফন করতে হবে। (৩) চার মাসের পরের কোন সন্তান যদি মৃত ভূমিষ্ট হয়, তবে তারও জানাযা করার প্রয়োজন নেই। কেননা হাদীছে বাচ্চার 'চীৎকার করার' কথা এসেছে (ফিকহুস সুন্নাহ ১/২৭৭)।

### মৃতের প্রতি আদবঃ

(১) মৃতের প্রতি সাধ্যমত সম্মান প্রদর্শন করতে হবে। হাদীছে 'মৃতের হাড়িড ভাঙ্গাকে জীবিতের হাড়িড ভাঙ্গার সাথে তুলনা করা হয়েছে (মুওয়াত্তা, আবুদাউদ, ইবনু মাজাহ, মিশকাত হা/১৭১৪)। অতএব যরুরী রাষ্ট্রীয় নির্দেশ ব্যতীত মৃতদেহ কাটাছেঁড়া বা পোষ্ট মর্টেম করা অন্যায়। আজকাল পোষ্ট মর্টেম-এর বিষয়টি অনেকটা সস্তা হয়ে যাচ্ছে। তারপরেও লাশের প্রতি সেখানে অসম্মান করা হয় বলে শোনা যায়। যা থেকে সংশ্লিষ্ট সকলকে অবশ্যই বিরত থাকা উচিত।

(২) মৃত মুসলিম ব্যক্তিকে গালি দেওয়া নিষেধ। রাসূলুল্লাহ (ছাঃ) এরশাদ করেন, 'لَا تَسُبُّوا الْأَمْوَاتَ فَإِنَّهُمْ قَدْ أَفْضَوْا إِلَى مَا قَدَّمُوا' 'তোমরা মৃতদের গালি দিয়ো না। কেননা তারা তাদের পূর্বে পেশকৃত অর্জনের প্রতি ধাবিত হয়েছে' (বুখারী, মিশকাত হা/১৬৬৪)। তবে ঐ ব্যক্তি যদি ফাসিকু ও বিদ'আতী হয়, তবে তা থেকে বেঁচে থাকার উদ্দেশ্যে আলোচনা করা যেতে পারে। নতুবা অহেতুক এসব আলোচনা থেকে

বিরত থাকতে হবে (ফিকহুস সুনান ১/৩০০)। কেননা সুন্দর মুসলমানের পরিচয় হ'ল অনর্থক বিষয় সমূহ হ'তে বিরত থাকা (ছহীহ ইবনু মাজাহ হা/৩২১১)। তাছাড়া 'সন্দেহ যুক্ত বিষয়াবলী থেকে নিঃসন্দেহ বিষয়ের দিকে ধাবিত হওয়ার' জন্য হাদীছে নির্দেশ এসেছে (তিরমিযী, আহমাদ, মিশকাত হা/২৭৭৩; আর-রওয়াতুন নাদিইয়াহ ১/৪৫২-৫৩)।

(৩) মৃতের জন্য সর্বোত্তম হাদিয়া হ'ল তার ইস্তেগফারের জন্য দো'আ করা, তার জন্য ছাদাক্বা করা ও তার পক্ষ হ'তে হজ্জ করা... (এজন্য উত্তরাধিকারীকে প্রথমে নিজের ফরয হজ্জ আদায় করতে হবে) (ফিকহুস সুনান ১/৩১০)। তবে জানাযাকালে ও কবরস্থানে ছাদাক্বা বিতরণ করা নাজায়েয (ঐ, ১/৩০৮)।

### (ঘ) জানাযা বহনঃ

জানাযা কাঁধে বহন করা সুন্নাত (মুত্তা, বুখারী, মিশকাত হা/১৬৪৬-৪৭)। মৃতের পরিবারের লোকেরা ও নিকটাত্মীয়গণ এর প্রথম হকদার। এ দায়িত্ব কেবল পুরুষদের, মেয়েদের নয়। জানাযার পিছে পিছে মেয়েদের যেতে নিষেধ করা হয়েছে। তবে এটা কঠোর ভাবে নিষিদ্ধ নয়। এই সময় সরবে কান্নাকাটি করা যাবে না। ধূপ-ধুনা ইত্যাদি অগ্নিযুক্ত সুগন্ধি বহন করা যাবে না। যিকর ও তেলাওয়াত বা অহেতুক কথাবার্তা বলা যাবে না। বরং মৃত্যুর চিন্তা করতে করতে চুপচাপ ভাবগম্ভীরভাবে মধ্যম গতিতে কবরের দিকে এগিয়ে যেতে হবে। চলা অবস্থায় বাস্তায় বসা যাবে না (মুত্তা, মিশকাত হা/১৬৪৮)। লাশের পিছনে কাছাকাছি চলাই উত্তম। তবে প্রয়োজনে আগে-পিছে ডাইনে-বামে চলা যাবে। কেউ গাড়ীতে গেলে তাকে পিছে পিছেই যেতে হবে (আবুদাউদ, মিশকাত হা/১৬৬৭)। কোন শ্রদ্ধেয় ব্যক্তি বা মুরব্বী আলেম জানাযায় যোগদানে সক্ষম না হ'লে লাশ তাঁর সামনে এনে রাখা যাবে। যাতে তিনি একাকী হ'লেও জানাযা পড়তে পারেন। যারা জানাযার পিছনে চলবেন, তাদের ওয়ূ অবস্থায় থাকা মুস্তাহাব।

বর্তমান যুগে জানাযার জন্য গাড়ীতে করে লাশ বহন করা হচ্ছে। এটি সুন্নাত বিরোধী কাজ। নিতান্ত বাধ্য না হ'লে একাজ থেকে যেকোন মূল্যে বিরত থাকা উচিত। এটা ইহুদী-নাছারাদের অনুকরণ মাত্র। রাসূলুল্লাহ (ছাঃ) বলেন, **اتبعوا الجنائز** 'তোমরা জানাযার অনুগমন কর। তা তোমাদের আখেরাতকে স্মরণ করিয়ে দেবে' (তলখীছ ৩৮-৪৩)। রাসূলুল্লাহ (ছাঃ) বলেন, জানাযার সাথে ফেরেশতাগণ পায়ে হেঁটে চলেন এবং জানাযা শেষে তারা চলে যান। একারণে আমি বাহনে সওয়ার হইনি। এখন তারা চলে গেছেন বিধায় সওয়ার হ'লাম' ৮৩

৮৩. আবুদাউদ, মিশকাত হা/১৬৭২-এর টীকা নং ৪, ছাওবান (রাঃ) হ'তে বর্ণিত। জাবের বিন সামুরাহ (রাঃ) হ'তে অন্য বর্ণনাও এসেছে; মুসলিম, মিশকাত হা/১৬৬৬।

(ঙ) গায়েবানা জানাযাঃ

গায়েবানা জানাযা জায়েয আছে (যুত্তা, মিশকাত হা/১৬৫২)। তবে সকলের জন্য ঢালাওভাবে এটা জায়েয নয় বলে ইমাম খাত্তাবী, ইবনু আদিল বার, হাফেয য়ায়লাঈ, ইমাম ইবনু তায়মিয়াহ, হাফেয ইবনুল ক্বাইয়িম, শায়খ আলবানী প্রমুখ বিদ্বান মতপ্রকাশ করেছেন। তাঁদের বক্তব্য সংক্ষেপে নিম্নরূপঃ

গায়েবানা জানাযার জন্য হাবশার (আবিসিনিয়া) বাদশাহ নাজ্জাশীর গায়েবানা জানাযা আদায়ের ঘটনাই হ'ল একমাত্র বিশুদ্ধ দলীল। নাজ্জাশী খৃষ্টানদের বাদশাহ ছিলেন। কিন্তু গোপনে মুসলমান ছিলেন। সেকারণ তার মৃত্যুসংবাদ পেয়ে রাসূলুল্লাহ (ছাঃ) ছাহাবীদের নিয়ে জামা'আত সহকারে গায়েবানা জানাযা আদায় করেন এবং বলেন, صَلُّوا عَلَىٰ أَخِي لَكُمْ مَاتَ بَغَيْرِ رُضِيكُمْ 'তোমরা তোমাদের ভাইয়ের জানাযা পড়। যিনি তোমাদের দেশ ব্যতীত অন্য দেশে মৃত্যুবরণ করেছেন (আহমাদ ৩/৪০০, ইবনু মাজাহ হা/১৫৩৭; উভয়ের সনদ ছহীহ)। আবুদাউদ নাজ্জাশী বিষয়ক হাদীছের বর্ণনায় অধ্যায় রচনা

করেছেন, 'باب فى الصلاة على المسلم يموت فى بلاد الشرك' মুশরিক দেশে মৃত্যুবরণকারী মুসলিমের উপরে জানাযা' অনুচ্ছেদ। এতে বুঝা যায় যে, মুশরিক বা অমুসলিম দেশে মৃত্যু হওয়ার কারণে যদি কোন মুসলমানের জানাযা হয়নি বলে নিশ্চিত ধারণা হয়, তাহ'লে সেক্ষেত্রে ঐ মুসলমান ভাই বা বোনের জন্য গায়েবানা জানাযা পড়া যায়।

এ সম্পর্কে দ্বিতীয় দলীল হিসাবে মু'আবিয়া বিন মু'আবিয়া লায়ছী আল-মুযানী (রাঃ)-এর গায়েবানা জানাযা পড়ার কথা বলা হয়। মদীনায় তাঁর মৃত্যু হ'লে তাবুকের যুদ্ধে অবস্থানকালে জিব্রীল (আঃ) মারফত এই সংবাদ পেয়ে রাসূলুল্লাহ (ছাঃ) তাঁর গায়েবানা জানাযা পড়েন (বায়হাক্বী ৪/৫০)। ইবনু আদিল বার ও ইবনু হাজার প্রমুখ বলেন যে, হাদীছটি 'ছহীহ' নয়। দ্বিতীয়তঃ এ হাদীছে বলা হয়েছে যে, জিব্রীল (আঃ) স্বীয় পাখার ঝাপটায় সব পর্দা উঠিয়ে দেন ও জানাযা উঁচু করে ধরেন। তাতে রাসূলুল্লাহ (ছাঃ) জানাযা দেখতে পান (حتى نظر إليه وصلى عليه)। ফলে সেটা আর গায়েবানা থাকে না। সেকারণ ইবনু হাজার আসক্বালানী বলেন যে, এই হাদীছ দ্বারা গায়েবানা জানাযার দলীল গ্রহণ বাতিল যোগ্য'।

ইবনু আদিল বার বলেন, যদি গায়েবানা জানাযা জায়েয হ'ত, তাহ'লে রাসূলুল্লাহ (ছাঃ) নিশ্চয়ই নিজের ছাহাবীদের গায়েবানা জানাযা আদায় করতেন (যাদের জানাযায় তিনি শরীক হ'তে পারেননি)। অনুরূপ প্রাচ্য ও পাশ্চাত্যের মুসলমানেরা তাদের প্রিয় চার খলীফার গায়েবানা জানাযা পড়ত। কিন্তু এরূপ কথা কারু থেকেই কখনো বর্ণিত হয়নি' (আল-জাওহরুন নাক্বী ৪/৫১)। = দ্রঃ ছালাতুর রাসূল (মুহাক্কাক্ব) পৃঃ ৪৮৭-৮৯।

পরিশেষে বলা যায় যে, গায়েবানা জানাযা নিঃসন্দেহে জায়েয ঐ সব ক্ষেত্রে, যাদের জানাযা হয়নি বলে জানা যায়। কিন্তু যাদের জানাযা হয়েছে বলে নিশ্চিত হওয়া যায়,

সেক্ষেত্রে রাসূলুল্লাহ (ছাঃ) ও ছাহাবায়ে কেরামের সুনাত অনুযায়ী গায়েবানা জানাযা না পড়ায় দোষ নেই। বিশেষ করে আজকাল যেখানে গায়েবানা জানাযা নোংরা রাজনীতির হাতিয়ারে পরিণত হয়েছে। সেক্ষেত্রে আরও বেশী হুঁশিয়ার হওয়া কর্তব্য।

### (চ) দাফনঃ

কবর উত্তর-দক্ষিণে লম্বা, গভীর, প্রশস্ত, সুন্দর ও বিঘত খানেক উঁচু হওয়া বাঞ্ছনীয়। অধিক উঁচু করা নাজায়েয। 'লাহুদ' ও 'শাক্ব' দু'ধরনের কবর জায়েয আছে। যাকে এদেশে যথাক্রমে 'পাশখুলি' ও 'বাক্ব কবর' বলা হয়। তবে 'লাহুদ' উত্তম। মাইয়েতকে কবরে নামানোর দায়িত্ব পুরুষদের। মাইয়েতের উত্তরাধিকারীদের মধ্যে নিকটবর্তীগণ ও সর্বাধিক প্রিয় ব্যক্তিগণ এই দায়িত্ব পালন করবেন, যিনি পূর্বরাতে (বা দাফনের পূর্বে) স্ত্রী সহবাস করেননি। পায়ের দিক দিয়ে মোর্দা কবরে নামাবে। অসুবিধা হ'লে যেভাবে সুবিধা সেভাবে নামাবে। মোর্দাকে একটু ডানকাতে ক্লেবলামুখী করে শোয়াবে। কবরে শোয়ানোর সময় 'বিসমিল্লা-হি ওয়া 'আলা মিল্লাতে রাসূলিল্লা-হি' বলবে। 'মিল্লাতে'-এর স্থলে 'সুনাতে' বলা যাবে। কবর বন্ধ করার পরে উপস্থিত সকলে তিন মুঠি করে মাটি কবরের মাথার দিক থেকে পায়ের দিকে ছড়িয়ে দেবে (তলখীছ ৫৮-৬৫)। এই সময় কাফনের কাপড়ের গিরাগুলি খুলে দেবে (ফিকহস সুনাহ ১/২৯০)।

দাফন চলাকালীন সময়ে কবরের নিকটে বসে কবর আযাব, জাহান্নামের ভয় প্রদর্শন ও জান্নাতের সুসংবাদের উপরে কুরআন ও ছহীহ হাদীছ থেকে আলোচনা করবে। এই সময় প্রত্যেকে দু'তিনবার করে নিম্নের দো'আটি পড়বে।- আল্লা-হুম্মা ইন্নী আ'উযু বিকা মিন 'আযা-বিল ক্বাবরি' (হে আল্লাহ! আমি আপনার নিকটে কবরের আযাব হ'তে পানাহ চাই) (তলখীছ ৬৫)। দাফনের পরে মাইয়েতের 'তাছবীত' অর্থাৎ মুনকার নাকীর -এর সওয়ালের জওয়াব দানের সময় যেন তিনি দৃঢ় থাকতে পারেন, সেজন্য ব্যক্তিগতভাবে সকলের দো'আ করা উচিত। যেমন 'আল্লা-হুম্মাগফির লাহু ওয়া ছাব্বিতহু' ইত্যাদি। অর্থঃ হে আল্লাহ! আপনি তাকে ক্ষমা করুন ও তাকে দৃঢ় রাখুন' (আবুদাউদ, হাকেম, হিছনুল মুসলিম, দো'আ নং ১৬৪)। পূর্বে বর্ণিত জানাযার ২নং দো'আটিও পড়া যায়।

কিন্তু দাফনের পরে একজনের নেতৃত্বে সকলে সম্মিলিত ভাবে হাত উঠিয়ে দো'আ করা ও সকলের সরবে 'আমীন' 'আমীন' বলার প্রচলিত প্রথার কোন ছহীহ ভিত্তি নেই।

**জ্ঞাতব্যঃ** (১) কবর উঁচু করা, পাকা ও চুনকাম করা, সমাধি নির্মাণ করা, গায়ে নাম লেখা, কবরের উপরে বসা, কবরের দিকে ফিরে ছালাত আদায় করা নিষেধ (মুসলিম, মিশকাত হা/১৬৯৬-৯৯; তিরমিযী, মিশকাত হা/১৭০৯)। এতদ্ব্যতীত কবর যেয়ারত কারিনী মহিলাদের এবং কবরে মসজিদ নির্মাণ ও কবরে বাতি দানকারীদের বিরুদ্ধে রাসূলুল্লাহ (ছাঃ) লা'নত করেছেন (আহমাদ, নাসাঈ, তিরমিযী, আবুদাউদ; তিরমিযী হাদীছটিকে 'হাসান' বলেছেন, ফিকহ ১/২৯৫-৯৬)। তিনি কবরের নিকটে গরু-ছাগল-মোরগ ইত্যাদি যবেহ করতে নিষেধ করেছেন। জাহেলী যুগে দানশীল ও নেককার ব্যক্তিদের কবরের পাশে এগুলি করা হ'ত (আবুদাউদ)। অমনিভাবে তিনি কবরে গেলাফ চড়ানো বা কবর ঢেকে রাখতে কঠোরভাবে তিনি নিষেধ



করেছেন (বুখারী, মুসলিম, ফিকহুস সুন্নাহ ১/২৯৫-৯৬)।

(২) রাসূলুল্লাহ (ছাঃ) এরশাদ করেন, **لَا تَجْعَلْ قَبْرِي وَتَنًا يُعْبَدُ** তোমরা আমার কবরকে ইবাদতের স্থানে পরিণত কর না। আল্লাহ সবচাইতে বেশী ক্রুদ্ধ হন ঐ জাতির উপরে, যারা তাদের নবীর কবরকে সিজদাহর স্থানে পরিণত করে (যুওয়াল্লা, মিশকাত হা/৭৫০)।

(৩) সাগর বক্ষে মৃত্যুবরণ করলে এবং স্থলভাগ না পাওয়া গেলে গোসল, কাফন ও জানাযা শেষে কবরে শোয়ানোর দো'আ পড়ে সাগরে ভাসিয়ে দেবে (বায়হাক্বী ৪/৭)।

(৪) কবরে যতদিন মুমিনের লাশের কোন অংশ বাকী থাকবে, ততদিন তাকে সম্মান করতে হবে। সেখানে পুনরায় কবর দেওয়া যাবে না। যদি লাশ নিশ্চিহ্ন হয়ে যায় ও মাটি হ'য়ে যায়, তাহ'লে সেখানে পুনরায় দাফন করা যাবে ও সাধারণ মাটির ন্যায় সেখানে সবকিছু করা যাবে। কিন্তু তাই বলে যেকোন সাধারণ অজুহাতে কবরের সম্মান হানিকর কোন কিছু নির্মাণ থেকে বিরত থাকা কর্তব্য (ফিকহুস সুন্নাহ ১/৩০১; তালখীছ ৯১)।

(৫) যদি কবর খুঁড়তে গিয়ে মৃতের হাড় পাওয়া যায়, তাহ'লে কবর খনন বন্ধ করবে। কিন্তু যদি খনন শেষে পাওয়া যায়, তবে হাড়টিকে কবরের একপাশে রেখেই সেখানে নতুন লাশের কবর দিবে। কেননা এক কবরে একাধিক লাশ দাফন করা জায়েয আছে (ঐ, ১/৩০১)। (৬) যদি বিনা জানাযায় কারু দাফন হ'য়ে যায়, তাহ'লে কবরকে সামনে করে পরে তার জানাযার ছালাত আদায় করা যাবে (ঐ)। (৭) যদি কোন গর্ভবতী মহিলা মারা যান এবং তার পেটে জীবন্ত বাচ্চা আছে বলে অভিজ্ঞ ডাক্তার নিশ্চিত হন, তাহ'লে পেট কেটে বাচ্চা বের করে আনা জায়েয আছে। (ঐ, ১/৩০০)। (৮) শারঈ ওয়র বশতঃ যরুরী কারণে কবর পুনঃখনন, লাশ উঠানো ও স্থানান্তর করা জায়েয আছে (ঐ, ১/৩০১-২)।

### কবরে প্রচলিত শিরক সমূহঃ

(১) কবরে সিজদা করা (২) সেদিকে ফিরে ছালাত আদায় করা (৩) সেখানে মসজিদ নির্মাণ করা (৪) কবরবাসীর নিকটে কিছু কামনা করা (৫) তার অসীলায় মুক্তি প্রার্থনা করা (৬) তাকে খুশী করার জন্য কবরে নযর-নেয়ায ও টাকা-পয়সা দেওয়া (৭) সেখানে মানত করা (৮) ছাগল-মোরগ হাজত দেওয়া (৯) সেখানে ওরস ইত্যাদি করা (১০) মাযারে নযর-নেয়ায না দিলে মৃত পীরের বদ দো'আয় ধ্বংস হ'য়ে যাবে, এই ধারণা পোষণ করা (১১) সেখানে নযর-মানত করলে পরীক্ষায় বা মামলায় বা কোন বিপদে মুক্তি পাওয়া যাবে বলে বিশ্বাস করা (১২) খুশীর কোন কাজে মৃত পীরের মাযারে গুক্রিয়া স্বরূপ পয়সা না দিলে পীরের বদ দো'আ লাগবে, এমন ধারণা করা (১৩) নদী-সাগরের মালিকানা খিযর (আঃ)-এর মনে করে সাগরে বা নদীতে হাদিয়া স্বরূপ টাকা-পয়সা নিষ্ক্ষেপ করা (১৪) মৃত পীরের পোষা কুমীর, কচ্ছপ, গজাল মাছ, কবুতর ইত্যাদিকে বিশেষ মর্যাদাপূর্ণ ও ক্ষমতামালী মনে করা ইত্যাদি। আল্লাহ

إِنَّهُ مَنْ يُشْرِكْ بِاللَّهِ فَقَدْ حَرَّمَ اللَّهُ عَلَيْهِ الْجَنَّةَ وَمَأْوَاهُ النَّارُ ط বলেন, 'যে ব্যক্তি আল্লাহর সাথে শিরক করল, আল্লাহ তার উপরে জান্নাতকে হারাম করে দেন এবং তার ঠিকানা হয় জাহান্নাম। আখেরাতে সীমা লংঘনকারীদের কোন সাহায্যকারী থাকবে না' (মায়েদাহ ৭২)। إِنَّ اللَّهَ لَا يَغْفِرُ أَنْ يُشْرَكَ بِهِ وَيَغْفِرُ مَا دُونَ ذَلِكَ لِمَنْ يَشَاءُ করেন না। এতদ্ব্যতীত বান্দার যেকোন গোনাহ তিনি মাফ করে থাকেন' (নিসা ৪৮, ১১৬)।

### মৃত্যুর পরে প্রচলিত বিদ'আত সমূহঃ

১. মাইয়েতের শিয়রে বসে কুরআন তেলাওয়াত করা (তালখীছ ৯৭)
২. মাইয়েতের নখ কাটা ও গুণ্ডাঙ্গের লোম ছাফ করা (৯৭)
৩. কাঠি দিয়ে (বা নির্দিষ্ট সংখ্যক নিম্ন কাঠি দিয়ে) দাঁত খিলাল করানো (৯৭)
৪. নাক-কান-গুণ্ডাঙ্গ প্রভৃতি স্থানে তুলা ভরা (৯৭)
৫. দাফন না করা পর্যন্ত পরিবারের লোকদের না খেয়ে থাকা (৯৭, ৯৯)
৬. কবরস্থানে এই সময় ছাদাক্বা বিলি করা (১০৩)
৭. চীৎকার দিয়ে কান্নাকাটি করা, বুক চাপড়ানো, কাপড় ছেঁড়া, মাথা ন্যাড়া করা, দাড়ি-পৌফ না মুগুনো ইত্যাদি (১৮, ৯৭)
৮. তিন দিনের অধিক (সপ্তাহ, মাস, ছয় মাস ব্যাপী) শোক পালন করা (৭৩) (কেবল স্ত্রী ব্যতীত। কেননা তিনি ৪ মাস ১০ দিন ইদ্দত পালন করবেন)
৯. কাফির, মুশরিক, মুনাফিকদের জন্য দো'আ করা (৪৮)
১০. শোক দিবস পালন করা, শোকসভা করা ও এজন্য খানাপিনার আয়োজন করা ইত্যাদি (৭৩-৭৪)
১১. মসজিদের মিনারে বা বাজারে 'শোক সংবাদ' প্রচার করা (১৯, ৯৮)
১২. কবরের উপরে খাদ্য-পানীয় রেখে দেওয়া যাতে লোকেরা তা নিয়ে যায় (১০৩)
১৩. মৃতের ঘরে তিনরাত (বা ৪০ রাত) ব্যাপী আলো জ্বলে রাখা (৯৮)
১৪. কাফনের কাপড়ের উপরে দো'আ-কালেমা ইত্যাদি লেখা (৯৯)
১৫. এই ধারণা করা যে, মাইয়েত জান্নাতী হ'লে ওয়নে হালকা হয় ও দ্রুত কবরের দিকে যেতে চায় (৯৯)
১৬. মাইয়েতকে নেককার লোকদের গোরস্থানে দাফনের জন্য নিয়ে যাওয়া (১০২)
১৭. জানাযার পিছে পিছে উচ্চৈঃস্বরে যিকর বা তেলাওয়াত করতে করতে চলা (১০০)
১৮. জানাযা গুরুর প্রাক্কালে মাইয়েত কেমন ছিলেন বলে লোকদের জিজ্ঞেস করা (ঐ)
১৯. জানাযার ছালাতের আগে বা দাফনের পরে তার শোকগাঁথা বর্ণনা করা (ঐ)
২০. জুতা পাক থাকা সত্ত্বেও জানাযার ছালাতে জুতা খুলে দাঁড়ানো (১০১)
২১. কবরে মাইয়েতের উপরে গোলাপ পানি ছিটানো (১০২)
২২. কবরের উপরে মাথার দিক থেকে পায়ের দিকে ও পায়ের দিক থেকে মাথার দিকে পানি ছিটানো। অতঃপর অবশিষ্ট পানিটুকু কবরের মাঝখানে ঢালা (১০৩)
২৩. তিন মুঠি মাটি দেওয়ার সময় প্রথম মুঠিতে 'মিনহা খালাক্বনা-কুম' দ্বিতীয় মুঠিতে 'ওয়া ফীহা নু'ঈদুকুম' এবং তৃতীয় মুঠিতে 'ওয়া মিনহা নুখরিজুকুম তা-রাতান উখরা' বলা' (মূলতঃ এটি কুরআনের সূরায়ে ত্বা-হা ৫৫ নং আয়াত)।
২৪. কবরে মাথার দিকে দাঁড়িয়ে সূরায়ে ফাতিহা ও পায়ের দিকে দাঁড়িয়ে সূরায়ে বাক্বারাহ পড়া (১০২)

২৫. সূরায়ে ফাতিহা, ক্বদর, কাফেরুণ, নহর, ইখলাছ, ফালাক্ব ও নাস এই সাতটি সূরা পাঠ করে দাফনের সময় বিশেষ দো'আ পড়া (১০২) ২৬. কবরের কাছে বসে কুরআন তেলাওয়াত ও খতম করা (১০৪) ২৭. কবরের উপরে শামিয়ানা টাঙানো (১০৪) ২৮. প্রতি জুম'আয় কিংবা সোমবার ও বৃহস্পতিবারে পিতা-মাতার কবর যেয়ারত করা। ২৯. এতদ্ব্যতীত আশূরা, শবেবরাত, রামাযান ও দুই ঈদে বিশেষভাবে কবর যেয়ারত করা। ৩০. কবরের সামনে হাত জোড় করে দাঁড়ানো ও সূরায়ে ফাতিহা ১ বার, ইখলাছ ১১ বার বা ইয়াসীন ১ বার পড়া (১০৫) ৩১. কুরআন পাঠকারীকে উত্তম খানা ও টাকা-পয়সা দেওয়া বা এ বিষয়ে অস্থিত করে যাওয়া (১০৪, ১০৬) ৩২. কবরকে সুন্দর করা (১০৭) ৩৩. কবরে রুমাল, কাপড় ইত্যাদি বরকত মনে করে নিক্ষেপ করা। ৩৪. কবরে চুম্বন করা (১০৮) ৩৫. কবরের গায়ে মৃতের নাম ও মৃত্যুর তারিখ লেখা (১০৯)। ৩৬. কবরের গায়ে বরকত মনে করে পেট ও পিঠ ঠেকানো ইত্যাদি (১০৮) ৩৭. ত্রিশ পারা কুরআন (বা সূরা ইয়াসীন বা লাখ কালেমা) পড়ে বখশে দেওয়া। যাকে এদেশের 'কুলখানি' বলে। ৩৮. ১ম, ৩য়, ৭ম (বা ১০ম দিনে) বা ৪০ দিনে চেহলাম বা চল্লিশার অনুষ্ঠান করা। ৩৯. খানার অনুষ্ঠান করা (১০৩,) ৪০. মৃত্যুবর্ষিকী পালন করা, (১০৪, ১০৬)। ৪১. ছালাত, কিরাআত ও অন্যান্য ইবাদত সমূহের নেকী মৃতদের জন্য হাদিয়া দেওয়া (১০৬)। যাকে এদেশে ঈছালে ছওয়াব বা ছওয়াব রেসানী বা বখশে দেওয়া বলা হয়। ৪২. আমল সমূহের ছওয়াব রাসূলুল্লাহ (ছাঃ)-এর নামে (বা অন্যান্য নেককার মৃত ব্যক্তিদের নামে) বখশে দেওয়া (১০৬)। ৪৩. ধারণা করা যে, নেককার লোকদের কবরে গিয়ে দো'আ করলে তা কবুল হয় (১০৬)।

এতদ্ব্যতীত ৪৪. মৃত্যুর সাথে সাথে স্বামী-স্ত্রীর সম্পর্ক ছিল হ'য়ে গেছে বলে ধারণা করা। ৪৫. জানাযার সময় স্ত্রীর নিকট থেকে মোহরানা মাফ করিয়ে নেওয়ার চেষ্টা করা। ৪৬. ঐ সময় মৃতের ক্বাযা ছালাত সমূহের বা উমরী ক্বাযার কাফফারা স্বরূপ টাকা আদায় করা। ৪৭. মৃত্যুর পরপরই ফকীর-মিসকীনদের মধ্যে চাউল ও টাকা-পয়সা বিতরণ করা। ৪৮. লাশ কবরে নিয়ে যাওয়ার সময় রাস্তায় তিনবার নামানো। ৪৯. কবরে মাথার কাছে 'মক্কার মাটি' নামক আরবীতে 'আল্লাহ' লেখা মাটির ঢেলা রাখা। ৫০. মাইয়েতের কপালে আতর দিয়ে 'আল্লাহ' লেখা। ৫১. কবরে মোমবাতি, আগরবাতি ইত্যাদি দেওয়া। ৫২. পাঁচ ওয়াক্ত ছালাতের সময় বদনায় পানি দিয়ে যাওয়া এই নিয়তে যে, মৃতের রুহ এসে ওযু করে ছালাত আদায় করে যাবে। ৫৩. মৃতের ঘরে ৪০ দিন যাবৎ বিশেষ লৌহজাত দ্রব্য রাখা। ৫৪. মৃত্যুর ২০দিন পর রুটি বিলি করা ও ৪০ দিন পর বড় ধরনের 'খানা'র অনুষ্ঠান করা। ৫৫. মৃতের বিছানা ও খাট ইত্যাদি ৭দিন পর্যন্ত একইভাবে রাখা। ৫৬. মৃতের রুহের মাগফিরাতের জন্য বাড়ীতে মীলাদ দেওয়া বা ওয়ায মাহফিল করা। ৫৭. নববর্ষ, শবেবরাত ইত্যাদিতে কোন বুয়র্গ ব্যক্তিকে ডেকে কবর যিয়ারত করিয়ে নেওয়া ও তাকে বিশেষ সম্মানী প্রদান করা। ৫৮. শবেবরাতে ঘরবাড়ী পরিষ্কার-পরিচ্ছন্ন করে মৃত স্বামীর রুহের আগমন অপেক্ষায় তার পরিত্যক্ত কক্ষে বা অন্যত্র সারা রাত জেগে বসে থাকা ও ইবাদত-বন্দেগী করা। ৫৯. ঈছালে ছওয়াবে

অনুষ্ঠান করা। ৬০. নিজের কোন একটি বা একাধিক সমস্যা সমাধানের নিয়তে কবরের গায়ে বা পাশের কোন গাছের ডালে বিশেষ ধরনের সুতা বা ইটখণ্ড ঝুলিয়ে রাখা। ৬১. মাযার থেকে ফিরে আসার সময় কবরের দিকে মুখ করে বেরিয়ে আসা। ৬২. কবরের উপরে একটি বা চার কোনে চারটি কাঁচা খেজুরের ডাল পোতা বা কোন ফল বা ফুলের গাছ লাগানো এই ধারণা করে যে, এর প্রভাবে কবর আযাব হাল্কা হবে।

এতদ্ব্যতীত কবরকে উপলক্ষ্য করে উপমহাদেশে হাযারো রকমের শিরক ও বিদ'আতী আক্বীদা ও রসম-রেওয়াজ চালু আছে। কবরগুলির নাম হয়েছে 'স্মাযার' অর্থাৎ 'যিয়ারতের স্থান' এবং সেগুলি এখন রীতিমত তীর্থ স্থানে পরিণত হয়েছে। অথচ রাসূলুল্লাহ (ছাঃ) নির্দেশ দিয়ে গেছেন, لَا تَجْعَلُوا قَبْرِي عَيْدًا 'তোমরা আমার কবরকে ঈদ অর্থাৎ মেলার স্থানে পরিণত করো না (নাসাঈ, আবুদাউদ, মিশকাত হা/৯২৬)। অতএব এসব শেরেকী কাজ থেকে বিরত হওয়া প্রত্যেক মুমিনের কর্তব্য। আল্লাহ আমাদের হেফাযত করুন।- আমীন!!

জানা আবশ্যিক যে, রাসূল (ছাঃ) দু'টি কবরের উপরে যে খেজুরের ডাল পুঁতেছিলেন, সেটা ছিল তাঁর জন্য 'খাছ'। তাঁর বা কোন ছাহাবীর পক্ষ থেকে পরবর্তীতে এমন কোন আমল করার নযীর নেই বুরাইদা (রাঃ) ব্যতীত। কেননা তিনি এটার জন্য অছিয়ত করেছিলেন। অতএব এটা স্পষ্ট যে, কেবলমাত্র নেক আমলের কারণেই কবর আযাব মাফ হ'তে পারে। যেমন আবদুর রহমান (রাঃ)-এর কবরের উপরে তাঁবু খাটানো দেখে ইবনু ওমর (রাঃ) বলেন ওটাকে হটিয়ে ফেল হে বৎস! কেননা ওটা তার আমলের উপরে ছায়া করছে' বা বাধা সৃষ্টি করছে (ফিকহুস সুনাহ ১/২৯৯)।

আল্লাহ বলেন, قُلْ هَلْ نُنَبِّئُكُمْ بِالْأَخْسَرِينَ أَعْمَالًا، الَّذِينَ ضَلَّ سَبِيلُهُمْ فِي الْحَيَاةِ الدُّنْيَا وَهُمْ يَحْسَبُونَ أَنَّهُمْ يُحْسِنُونَ صُنْعًا - 'আপনি বলে দিন আমি কি তোমাদেরকে ক্ষতিগ্রস্ত আমলকারীদের সম্পর্কে খবর দিব? দুনিয়ার জীবনে যাদের সমস্ত আমল বরবাদ হয়েছে। অথচ তারা ভাবে যে, তারা সুন্দর আমল করে যাচ্ছে' (কাহফ ১০৩-৪)। রাসূলুল্লাহ (ছাঃ) বলেন, مَنْ أَحْدَثَ فِي أَمْرِنَا هَذَا مَا لَيْسَ مِنْهُ 'যে ব্যক্তি আমাদের শরীয়তে এমন কিছু নতুন সৃষ্টি করল, যা তার মধ্যে নেই, তা প্রত্যাখ্যাত' (মুত্তাফাকু আলাইহ, মিশকাত হা/১৪০)।

### প্রতিবেশীদের কর্তব্যঃ

মৃত্যুর পরে মৃতের প্রতিবেশী ও নিকটাত্মীয়দের কর্তব্য হ'ল, মৃতের পরিবারের লোকদেরকে (কমপক্ষে) একটি দিন ও রাত পেট ভরে খাওয়ানো। জা'ফর বিন আবু ত্বালিব (রাঃ) শহীদ হ'লে আল্লাহর রাসূল (ছাঃ) তার প্রতিবেশীদেরকে এই নির্দেশ দিয়েছিলেন। এতদ্ব্যতীত বন্ধু-বান্ধব ও সকল হিতাকাংখীর কর্তব্য হ'ল মৃতের

ছালাতুর রাসূল (ছাঃ) ১৩০

উত্তরাধিকারীদের সান্ত্বনা প্রদান করা ও তার বাচ্চাদের মাথায় সহানুভূতির হাত বুলানো (তালখীছ ৭৪)। রাসূলুল্লাহ (ছাঃ) তাদেরকে তিন দিনের বেশী কান্নাকাটি করতে নিষেধ করেন (ঐ, ৭৩)।

রাসূলুল্লাহ (ছাঃ) মৃতের বাড়ীতে গিয়ে তাদেরকে বিভিন্নভাবে সান্ত্বনা দিতেন। নিজের সন্তানহারা কন্যাকে দেওয়া সর্বোত্তম সান্ত্বনাবাক্য হিসাবে বর্ণিত হাদীছটি নিম্নরূপঃ

إِنَّ لِلَّهِ مَا أَخَذَ وَ لِلَّهِ مَا أُعْطِيَ وَ كُلُّ شَيْءٍ عِنْدَهُ إِلَى أَجَلٍ مُّسَمًّى فَلْتَصْبِرْ وَ لَتَحْتَسِبْ

উচ্চারণঃ ইন্না লিল্লা-হি মা আখাযা ওয়া লিল্লা-হি মা আ'ত্বা; ওয়া কুল্লু শাইইন' ইনদাহু ইলা আজালিম মুসাম্মা; ফাল্ তাছবির ওয়াল তাহ্ তাসিব।

অনুবাদঃ নিশ্চয়ই সেটা আল্লাহর জন্য, যেটা তিনি নিয়েছেন এবং সেটা ও আল্লাহর জন্য যেটা তিনি দিয়েছেন। প্রত্যেক বস্তু তাঁর নিকটে রয়েছে একটি নির্দিষ্ট সময়কালের জন্য। অতএব তুমি ছবর কর ও ছওয়াবের আকাংখা কর'। ইমাম নববী (রহঃ) বলেন, সান্ত্বনা দেওয়ার জন্য এটিই সর্বোত্তম হাদীছ (তালখীছ ৭১)।

ফযীলতঃ রাসূলুল্লাহ (ছাঃ) এরশাদ করেন, যে ব্যক্তি তার কোন মুমিন ভাইয়ের বিপদে সান্ত্বনা প্রদান করল, আল্লাহ তাকে কিয়ামতের দিন সবুজ রেশমের ঈর্ষনীয় জোড়া পরিধান করাবেন' (তালখীছ ৭০)।

## কবর যিয়ারত (زيارة القبور)

কবর যিয়ারত করা সুন্নাত। এর দ্বারা মৃত্যু ও আখেরাতের স্মরণ হয়। কবর আযাবের ভীতি সঞ্চারিত হয়। হৃদয় বিগলিত হয়। চক্ষু অশ্রুসিক্ত হয়। অন্যায় থেকে তওবা এবং নেকীর প্রতি আগ্রহ সৃষ্টি হয়। পরকালীন মুক্তির প্রেরণা সৃষ্টি হয়। উপরোক্ত উদ্দেশ্যেই কেবল কবর যিয়ারতের অনুমতি দেওয়া হয়েছে। নইলে প্রথমে কবর যিয়ারত নিষিদ্ধ ছিল। নারী-পুরুষ সবার জন্য এই অনুমতি রয়েছে। তবে ঐসব নারীদের জন্য লা'নত করা হয়েছে, যারা কবর যিয়ারতের সময় সরবে কান্নাকাটি ও বিলাপ ধ্বনি করে।

যিয়ারতের সময় এমন কাজ করা নিষেধ, যা করলে আল্লাহ ক্রুদ্ধ হন। যেমনঃ কবরবাসীর নিকটে কিছু কামনা করা, সেখানে বসা, ছালাত আদায় বা সিজদা করা, তার অসীলায় মুক্তি প্রার্থনা করা, সেখানে দান-ছাদাক্বা ও মানত করা, গরু-ছাগল-মোরগ ইত্যাদি 'হাজত' দেওয়া বা কুরবানী করা প্রভৃতি।

উপরোক্ত শিরকী আক্বীদা ও আমল থেকে মুক্ত মন নিয়ে স্রেফ আখেরাতকে স্মরণ করার উদ্দেশ্যে কবর যিয়ারত করতে হবে। নইলে ঐ যিয়ারত গোনাহের কারণ হবে। তাছাড়া স্রেফ যিয়ারতের উদ্দেশ্যে ও নেকীর জন্য কা'বা গৃহ, বায়তুল মুক্বাদ্দাস ও মসজিদে নববী ব্যতীত আর কোথাও সফর করা নিষিদ্ধ (মুত্তা, মিশকাত হা/৬৯৩)।

তাই শুধুমাত্র রাসূল (ছাঃ)-এর কবর যিয়ারতের উদ্দেশ্যে মদীনায় যাওয়া নাজায়েয। তবে মসজিদে নববীতে ছালাত আদায়ের নেকী হাছিলের উদ্দেশ্যে কেউ মদীনায় গেলে তিনি রাসূল (ছাঃ)-এর কবর যিয়ারত করতে পারেন।

বর্তমানে ওরসের নামে এবং মৃত পীরের অসীলায় পরকালীন মুক্তির নেশায় মানুষ যেভাবে বিভিন্ন মাযারে ছুটছে, তাদের সাবধান হওয়া উচিত যে, এর মাধ্যমে তারা দুনিয়া ও আখেরাত দু'টিই হারাচ্ছেন। কেননা আল্লাহ ও রাসূল (ছাঃ)-এর আদেশের বিরোধিতা করলে স্রেফ আল্লাহর গযব লাভ হয় ও তাঁর রহমত থেকে বঞ্চিত হ'তে হয়।

যিয়ারতের আদবঃ এই সময় নিজের মৃত্যু ও আখেরাতকে স্মরণ করবে এবং কবরবাসীদের উদ্দেশ্যে খালেছ মনে নিম্নোক্ত দো'আ সমূহ পাঠ করবে। দো'আর সময় দু'হাত উঠানো যাবে। বাকী গোরস্থানে দীর্ঘক্ষণ ধরে দো'আ করার সময় রাসূলুল্লাহ (ছাঃ) তিন বার হাত উঠিয়েছিলেন (তালখীছ ৮৩)। এই সময় স্রেফ দো'আ ব্যতীত ছালাত, কুরআন তেলাওয়াত, যিকর-আযকার, দান-ছাদাকা কিছুই করা জায়েয নয়।

১ম দো'আঃ এটি রাসূলুল্লাহ (ছাঃ) আয়েশা (রাঃ)-কে শিক্ষা দিয়েছিলেন।-

السَّلَامُ عَلَى أَهْلِ الدِّيَارِ مِنَ الْمُؤْمِنِينَ وَالْمُسْلِمِينَ، وَيَرْحَمُ اللَّهُ  
الْمُسْتَقْدِمِينَ مِنَّا وَالْمُسْتَأْخِرِينَ، وَإِنَّا إِن شَاءَ اللَّهُ بِكُمْ لِلأَحْقُونَ -

উচ্চারণঃ আসসালা-মু 'আলা আহলিদ দিয়া-রি মিনাল মু'মিনীনা ওয়াল মুসলিমীনা;  
ওয়া ইয়ারহামুল্লা-হুল মুস্তাক্বদিমীনা মিনা ওয়াল মুস্তা'খিরীনা; ওয়া ইন্না ইনশা-আল্লা-হু  
বিকুম লা লা-হেকুনা।

অনুবাদঃ মুমিন ও মুসলিম কবরবাসীদের উপরে শান্তি বর্ষিত হোক! আমাদের অগ্রবর্তী ও পরবর্তীদের উপরে আল্লাহ রহম করুন! আল্লাহ চাহে তো আমরা অবশ্যই আপনাদের সাথে মিলিত হ'তে যাচ্ছি' (মুসলিম, মিশকাত হা/১৭৬৭)।

২য় দো'আঃ এটি রাসূলুল্লাহ (ছাঃ) অন্যদেরকে শিক্ষা দিয়েছেন।-

السَّلَامُ عَلَى أَهْلِ الدِّيَارِ مِنَ الْمُؤْمِنِينَ وَالْمُسْلِمِينَ، وَإِنَّا إِن شَاءَ اللَّهُ  
بِكُمْ لِلأَحْقُونَ، نَسْأَلُ اللَّهَ لَنَا وَلَكُمْ العَافِيَةَ -

উচ্চারণঃ আসসালা-মু 'আলায়কুম আহলাদ দিয়া-রি মিনাল মু'মিনীনা ওয়াল  
মুসলিমীনা; ওয়া ইন্না ইনশা-আল্লা-হু বিকুম লা লা-হেকুনা; নাসআলুল্লা-হা লানা ওয়া  
লাকুমুল 'আ-ফিয়াতা'।

অনুবাদঃ মুমিন ও মুসলিম কবরবাসীগণ! আপনাদের উপরে শান্তি বর্ষিত হোক!  
আল্লাহ চাহে তো আমরা অবশ্যই আপনাদের সাথে মিলিত হ'তে যাচ্ছি। আমাদের ও  
আপনাদের জন্য আমরা আল্লাহর নিকটে মঙ্গল কামনা করছি' (মুসলিম, মিশকাত হা/১৭৬৪)।

তিরমিযী বর্ণিত 'ইয়া আহলাল কুবুরে! ইয়াগফিরুল্লা-হু লানা ওয়া লাকুম' প্রসিদ্ধ

হাদীছটি 'যঈফ' (মিশকাত হা/১৭৬৫)।

জ্ঞাতব্যঃ কাফির বাপ-মায়ের কবর যিয়ারত করা যাবে। ক্রন্দন করা যাবে। কেননা এর মাধ্যমে মৃত্যুকে স্মরণ করা হয়। কিন্তু সেখানে গিয়ে সালাম করা যাবে না। তাদের জন্য আল্লাহর নিকটে ক্ষমা প্রার্থনা করা যাবে না। রাসূলুল্লাহ (ছাঃ)-কে তাঁর মায়ের কবর যিয়ারতের জন্য অতটুকুই মাত্র অনুমতি দেওয়া হয়েছিল (মুসলিম, মিশকাত হা/১৭৬৩)।

## ৭. ছালাতুয়্ যুহা বা চাশতের ছালাত (صلوة الضحى)

'যুহা' শব্দের অর্থ সূর্যের উজ্জ্বল্য, যা সূর্য স্পষ্টভাবে প্রকাশিত হওয়ার পর থেকে শুরু হয়। এই ছালাত প্রথম প্রহরের পর হ'তে দ্বিপ্রহরের পূর্বেই পড়া হয় বলে একে 'ছালাতুয়্ যুহা' বলা হয়।

ফযীলতঃ বোরাযদা (রাঃ) বলেন, রাসূলুল্লাহ (ছাঃ) বলেছেন, মানুষের শরীরে ৩৬০টি জোড় আছে। অতএব মানুষের কর্তব্য হ'ল প্রত্যেক জোড়ের জন্য একটি করে ছাদকা করা। ছাহাবীগণ বললেন, কার শক্তি আছে এই কাজ করার, হে আল্লাহর রাসূল? তিনি বললেন, চাশতের দু'রাক'আত ছালাতই এ জন্য যথেষ্ট।<sup>৮৪</sup> চাশতের ছালাতের রাক'আত সংখ্যা ২, ৪, ৮, ১২ পর্যন্ত পাওয়া যায়। মক্কা বিজয়ের দিন আল্লাহর রাসূল (ছাঃ) ৮ রাক'আত পড়েছিলেন।<sup>৮৫</sup> প্রতি দু'রাক'আত অন্তর সালাম ফিরাতে হয়।

## ৮. সূর্য বা চন্দ্র গ্রহণের ছালাত (صلوة الكسوف والخسوف)

সূর্য ও চন্দ্রগ্রহণ আল্লাহর অপার কুদরতের অন্যতম নিদর্শন। এই গ্রহণ শুরু হ'লে আল্লাহর প্রতি গভীর আনুগত্য ও ভীতি সহকারে এর ক্ষতি থেকে বাঁচা ও কল্যাণ থেকে উপকৃত হবার প্রার্থনা করার উদ্দেশ্যে জামা'আত সহ দু'রাক'আত ছালাত আদায় করতে হয় এবং শেষে খুৎবা দিতে হয়।<sup>৮৬</sup> এই ছালাতের বিশেষ পদ্ধতি রয়েছে। যাতে দু'রাক'আত ছালাতে ১০টি রুকু হয়। তবে ৪টি রুকুর হাদীছটি সর্বাধিক বিশ্বদ্ধ।<sup>৮৭</sup>

পদ্ধতিঃ আব্দুল্লাহ ইবনে আব্বাস (রাঃ) বলেন, রাসূলুল্লাহ (ছাঃ)-এর যুগে একদা সূর্য গ্রহণ হলে আল্লাহর রাসূল (ছাঃ) ছালাত আদায় করেন এবং লোকেরাও তাঁর সাথে ছালাত আদায় করে। প্রথমে তিনি ছালাতে দাঁড়ালেন এবং সূরা বাক্বারাহর মত দীর্ঘ কিরাআত করলেন। অতঃপর দীর্ঘ রুকু (১) করলেন। তারপর মাথা তুলে কিরাআত করতে লাগলেন। তবে প্রথম কিরাআতের চেয়ে কিছু কম কিরাআত করে রুকুতে (২) গেলেন। এবারের রুকু প্রথম রুকুর চেয়ে কিছুটা কম হ'ল। তারপর তিনি রুকু থেকে মাথা তুলে সিজদা করলেন। অতঃপর সিজদা শেষে লম্বা

৮৪. আব্দুদাউদ, মুসলিম, মিশকাত হা/১৩১৫, ১৩১১।

৮৬. বুখারী, মুসলিম, মিশকাত হা/১৪৮০।

৮৫. মুত্তাফাকু আলাইহ, মিশকাত হা/১৩০৯।

৮৭. যাদুল মা'আদ ১ম খণ্ড ১২৪ পৃঃ।

ক্বিরাআত করলেন। তবে প্রথমে তুলনায় কিছুটা ছোট। এরপর তিনি লম্বা রুকু (৩) করলেন, যা প্রথম রুকুর চেয়ে কম ছিল। রুকু থেকে মাথা তুলে পুনরায় ক্বিরাআত করলেন। যা প্রথমে তুলনায় ছোট ছিল। অতঃপর তিনি রুকু (৪) করলেন ও মাথা তুলে সিজদায় গেলেন। পরিশেষে সালাম ফিরালেন।

ইতিমধ্যে সূর্য উজ্জ্বল হ'য়ে গেল। অতঃপর ছালাত শেষে দাঁড়িয়ে তিনি খুৎবা দিলেন এই বলে যে, সূর্য ও চন্দ্র আল্লাহর নিদর্শন সমূহের মধ্যে দু'টি বিশেষ নিদর্শন। কারু মৃত্যু ও জন্মের কারণে এই গ্রহণ হয় না। যখন তোমরা ঐ গ্রহণ দেখবে, তখন তোমরা আল্লাহর স্মরণ (যিকর) করবে।<sup>৮৮</sup>

বিজ্ঞানের যুক্তিঃ সূর্য ও চন্দ্র গ্রহণের সময় চন্দ্র, সূর্য ও পৃথিবী একই সরল রেখায় অবস্থান করে। ফলে সূর্য ও চন্দ্রের আকর্ষণ শক্তি বেশী মাত্রায় পৃথিবীর উপরে পড়ে। এই টানে অন্য কোন গ্রহ থেকে পাথর বা কোন মহাজাগতিক বস্তু পৃথিবীর দিকে ধেয়ে আসলে পৃথিবী ধ্বংসের একটা কারণও হ'তে পারে। ১৯০৮ সালের ৩০শে জুন ১২ মেগাটন টিএনটি-এর ক্ষমতা সম্পন্ন ১৫০ ফুট দৈর্ঘ্যের একটি বিশালাকার জ্বলন্ত পাথর (মিটিওরাইট) রাশিয়ার সাইবেরিয়ার জঙ্গলে পতিত হয়ে ৪০ মাইল ব্যাস সম্পন্ন ধ্বংসগোলক সৃষ্টি করেছিল। আগুনের লেলিহান শিখায় লক্ষ লক্ষ গাছপালা পুড়ে ছাই হয়ে গিয়েছিল।<sup>৮৯</sup>

'কুসূফ' ও 'খুসূফ'-এর ছালাত আদায়ের মাধ্যমে সূর্য ও চন্দ্র গ্রহণের ক্ষতিকর প্রভাব হ'তে আল্লাহর নিকটে পানাহ চাওয়া হয়। সঙ্গে সঙ্গে আল্লাহর এই সব সৃষ্টিকে ভয় না করে বরং এগুলিকে জয় করার প্রতি বান্দাকে উদ্বুদ্ধ করা হয়।

## ৯. ইস্তিস্কা (صلاة الإستسقاء)

ইস্তিস্কা অর্থঃ পানি চাওয়া। শারঈ পরিভাষায় ব্যাপক খরা ও অনাবৃষ্টির সময় বিশেষ পদ্ধতিতে ছালাতের মাধ্যমে আল্লাহর নিকটে পানি প্রার্থনা করাকে 'ছালাতুল ইস্তিস্কা' বলা হয়।

পদ্ধতিঃ জীর্ণ ও পরিচ্ছন্ন কাপড় পরে চাদর গায়ে দিয়ে বিনয়-নম্রচিত্তে সূর্যোদয়ের সাথে সাথে ময়দান অভিমুখে রওয়ানা হবে। সাথে ইমামের জন্য মিস্বর নিতে পারবে। ইমাম মিস্বরে বসে তাকবীর বলবেন ও আল্লাহর প্রশংসা করবেন এবং লোকদের ইস্তিস্কার গুরুত্ব সম্পর্কে ঈমান বর্ধক সামান্য কিছু উপদেশ দিবেন (বুল্গল মারাম হা/৫০৩)। অতঃপর নিম্নের দো'আ পাঠ করবেন-

الْحَمْدُ لِلَّهِ رَبِّ الْعَالَمِينَ، الرَّحْمَنُ الرَّحِيمُ، مَا لَكَ يَوْمَ الدِّينِ، لَا إِلَهَ إِلَّا اللَّهُ يَفْعَلُ مَا يُرِيدُ - اللَّهُمَّ أَنْتَ اللَّهُ لَا إِلَهَ إِلَّا أَنْتَ، أَنْتَ الْغَنِيُّ وَنَحْنُ



الْفُقَرَاءُ، أَنْزَلَ عَلَيْنَا الْغَيْثَ، وَاجْعَلْ مَا أَنْزَلْتَ عَلَيْنَا قُوَّةً وَبَلَاغًا إِلَى حِينٍ -

১. উচ্চারণঃ আলহামদুলিল্লা-হি রব্বিল 'আ-লামীন, আররহমা-নির রহীম, মা-লিকি ইয়াওমিদ্দীন। লা ইলা-হা ইল্লাল্লা-হু ইয়াফ'আলু মা ইউরীদু। আল্লা-হুমা আনতাল্লা-হু লা ইলা-হা ইল্লা আনতা। আনতাল গানিইয়ু ওয়া নাহনুল ফুক্বারা-উ। আনব্বিল 'আলায়নাল গায়ছা ওয়াজ'আল মা আনব্বালতা 'আলায়না কুউওয়াতাঁও ওয়া বালা-গান ইলা হীন।

অনুবাদঃ সকল প্রশংসা বিশ্বপালক আল্লাহর জন্য। যিনি করুণাময় ও কুপানিধান। যিনি বিচার দিবসের মালিক। আল্লাহ ব্যতীত কোন (হক) মা'বুদ নেই। তিনি যা ইচ্ছা তাই-ই করেন। হে প্রভু! আপনি আল্লাহ। আপনি ব্যতীত কোন প্রকৃত উপাস্য নেই। আপনি মুখাপেক্ষীহীন ও আমরা সবাই মুখাপেক্ষী। আমাদের উপরে আপনি বৃষ্টি বর্ষণ করুন! যে বৃষ্টি বর্ষণ করবেন, তা যেন আমাদের জন্য শক্তির কারণ হয় এবং দীর্ঘদিন যাবত অভীষ্ট হাছিলে সহায়ক হয়' (আবুদাউদ, বুলুগল মারাম হা/৫০৩)।

নিম্নের দো'আ সমূহও পড়া যাবে। যেমন-

اللَّهُمَّ اسْقِ عِبَادَكَ وَبَهِيمَتَكَ وَأَنْشُرْ رَحْمَتَكَ وَأَحْيِ بِلَدَكَ الْمَيِّتَ -

২. উচ্চারণঃ আল্লা-হুমা স্কি 'ইবা-দাকা ওয়া বাহীমাতাকা ওয়ানশুর রাহমাতাকা ওয়াহইয়ে বালাদাকাল মাইয়েতা।

অর্থঃ হে আল্লাহ! আপনি পান করান আপনার বান্দাদেরকে ও জীবজন্তুদেরকে এবং আপনার রহমত ছড়িয়ে দিন ও আপনার মৃত জনপদকে পুনর্জীবিত করুন' ৯০

اللَّهُمَّ اسْقِنَا غَيْثًا مُغِيثًا مَرِيئًا مَرِيئًا نَافِعًا غَيْرَ ضَارٍّ عَاجِلًا غَيْرَ آجِلٍ -

৩. উচ্চারণঃ আল্লা-হুমা সকেনা গায়ছাম মুগীছাম মারীআম মারী'আ, না-ফে'আন গায়রা যা-রিন 'আ-জেলান গায়রা আ-জেলিন।

অর্থঃ হে আল্লাহ! আপনি আমাদেরকে এমন বৃষ্টির পানি পান করান, যা চাহিদা পূরণকারী, পিপাসা নিবারণকারী ও শস্য উৎপাদনকারী। যা ক্ষতিকর নয় বরং উপকারী এবং যা দেরীতে নয় বরং দ্রুত আগমনকারী। ৯১

দো'আর সময় দু'হাত (উপুড় অবস্থায়) সোজা ভাবে খাড়া রাখবে। যেন বগল খুলে যায়। অতঃপর ঐ অবস্থায় ক্বিবলামুখী হবে ও চাদর এপাশ-ওপাশ করবে। অর্থাৎ চাদরের ডান কিনারা ধরে বাম কাঁধে ও বাম কিনারা ধরে ডান কাঁধে রাখবে।

অতঃপর ইমাম মিশ্বর থেকে অবতরণ করবেন ও সবাইকে নিয়ে দু'রাক'আত ছালাত আদায় করবেন।<sup>৯২</sup>

এই সময় বৃষ্টি দেখলে বলবে, **اللَّهُمَّ صَيِّبًا نَافِعًا** 'আল্লা-হুম্মা ছাইয়েবান না-ফে'আন' হে আল্লাহ উপকারী বৃষ্টি বর্ষণ করুন'।<sup>৯৩</sup> বৃষ্টিতে চাদর ভিজিয়ে আল্লাহর বিশেষ রহমত মনে করে আগ্রহের সাথে তা বরণ করে নিতে হবে।<sup>৯৪</sup>

### অন্যান্য জ্ঞাতব্যঃ

১. ইস্তিস্কার ছালাত প্রথমে পড়ে পরে দো'আ ও অন্যান্য বিষয় সম্পন্ন করা যাবে' (মুত্তাফাকু আলাইহ)। ২. ছালাতে কিরা'আত সরবে হবে (ঐ) ৩. দো'আর সময় ঐ সময় হাত মাথা বরাবর উঁচু হবে (আবুদাউদ প্রভৃতি) ৪. হাত উপুড়ভাবে থাকবে (মুসলিম) ৫. জুম'আর খুৎবা অবস্থায় খত্বীব ছাহেব মুজাদীদের নিয়ে সমবেত ভাবে দু'হাত উঠিয়ে আল্লাহর নিকটে বৃষ্টি প্রার্থনা করতে পারেন।<sup>৯৫</sup> ৬. জীবিত কোন মুত্তাকী পরহেযগার ব্যক্তির মাধ্যমে আল্লাহর নিকটে বৃষ্টি প্রার্থনা করা যাবে। রাসূল (ছাঃ) বা অন্য কোন মৃত ব্যক্তির 'ওয়াসীলা' দিয়ে নয় (বুখারী)। ৭. ইস্তিস্কার ছালাত জামা'আতবদ্ধ ভাবে পড়তে হয় (মুত্তাফাকু আলাইহ)। ৮. ইস্তিস্কার খুৎবা সাধারণ খুৎবার মত নয়। এটির অধিকাংশ কেবল আকুতিভরা দো'আ আর দো'আ।<sup>৯৬</sup>

### ১০. প্রয়োজন পূরণের ছালাত (صلاة الحاجة):

সঙ্গত কোন প্রয়োজন পূরণের জন্য বান্দা স্বীয় প্রভুর নিকটে নিম্নের তরীকায় ছালাতের মাধ্যমে সাহায্য প্রার্থনা করবে। ইমাম আহমাদ ছহীহ সনদে আবুদারদা (রাঃ) হ'তে বর্ণনা করেন যে, রাসূলুল্লাহ (ছাঃ) এরশাদ করেন,

من توضأ فأسبغ الوضوء ثم صلى ركعتين يتمها أعطاه الله ما سأل معجلاً  
او مؤخراً رواه احمد-

'যে ব্যক্তি ভালভাবে ওয়ূ করল। অতঃপর পূর্ণভাবে দু'রাক'আত ছালাত আদায় করল। আল্লাহ তাকে দান করবেন যা সে প্রার্থনা করবে, দ্রুত অথবা দেরীতে'।<sup>৯৭</sup>

### ১১. তাওবার ছালাত (صلاة التوبة):

আবুবকর (রাঃ) হ'তে বর্ণিত তিনি বলেন, আমি রাসূলুল্লাহ (ছাঃ)-কে বলতে শুনেছি যে, কোন লোক যদি গোনাহ করে। অতঃপর উঠে দাঁড়ায় ও দু'রাক'আত ছালাত

৯২. আবুদাউদ, সনদ 'জাইয়িদ', বুলুগল মারাম হা/৫০৩; ঐ, মিশকাত হা/১৫০৮; আলবানী বলেন

সনদ হাসান; ঐ হাশিয়া। মুসলিম-এর বর্ণনায় এসেছে **فأشار بظهر كفيه الى السماء**

অর্থাৎ দো'আর সময় তিনি হাত উপুড় করে আসমানের দিকে ইশারা করেন'। ভাষ্যকার হুফিউর রহমান মুবারকপুরী বলেন, এটি স্বাভাবিক দো'আর বিপরীত নিয়ম। যা অন্যান্য দো'আয় করা হ'য়ে থাকে (বুলুগল মারাম হা/৫১০-এর ব্যাখ্যা)।

৯৩. বুখারী, মিশকাত হা/১৫০০।

৯৪. মুসলিম, মিশকাত হা/১৫০১।

৯৫. বুখারী ১/১৪০ 'ইস্তিস্কা' অনুচ্ছেদ। ৯৬. বুলুগল মারাম হা/৫০০) = বর্ণিত সকল সূত্রের জন্য দ্রষ্টব্যঃ মিশকাত 'ইস্তিস্কা' অনুচ্ছেদ।

৯৭. মুসনাদে আহমাদ, ফিকহুস সুন্নাহ ১/১৫৯।

আদায় করে। অতঃপর আল্লাহর নিকটে ক্ষমা প্রার্থনা করে। আল্লাহ তাকে ক্ষমা করে দেন।<sup>৯৮</sup> তাবারাণী কাবীর হাসান সনদে আবুদারদা (রাঃ) হ'তে বর্ণনা করেন যে, উক্ত ছালাত দুই বা চার রাক'আত ফরয কিংবা নফল পূর্ণ ওয়ু ও সুন্দর রুকু-সিজদা সহকারে হ'তে হবে (ঐ)।

তাওবার জন্য নিম্নের দো'আটি বিশেষভাবে সিজদায় ও শেষ বৈঠকে সালাম ফিরানোর পূর্বে পাঠ করা উচিত।-

أَسْتَغْفِرُ اللَّهَ الَّذِي لَا إِلَهَ إِلَّا هُوَ الْحَيُّ الْقَيُّومُ وَأَتُوبُ إِلَيْهِ

উচ্চারণঃ আস্তাগফিরুল্লা-হাল্লাযী লা ইলা-হা ইল্লা হুওয়াল হাইয়ুল ক্বাইয়ুমু ওয়া আতুবু ইলাইহে।

অনুবাদঃ 'আমি ক্ষমা প্রার্থনা করছি সেই আল্লাহর নিকটে যিনি ব্যতীত কোন উপাস্য নেই। যিনি চিরঞ্জীব ও সবকিছুর ধারক এবং তাঁর দিকেই আমি ফিরে যাচ্ছি বা তওবা করছি'।<sup>৯৯</sup> 'সাইয়েদুল ইস্তেগফার' দো'আটিও যোগ করা ভাল।

## ১২. কল্যাণ ইঙ্গিত প্রার্থনার ছালাত (صلوة الاستخارة):

কিংকর্তব্য বিমূঢ় অবস্থায় কোন কাজটি করা মঙ্গলজনক হবে, সে বিষয়ে আল্লাহর নিকট থেকে ইঙ্গিত পাওয়ার জন্য বিশেষভাবে যে ছালাত আদায় করা হয়, তাকে 'ছালাতুল ইস্তেখা-রাহ' বলা হয়। এর মাধ্যমে বান্দা স্বীয় প্রভুর নিকটে কোন কাজটি করা তার জন্য উত্তম ও কল্যাণকর হবে, সেটা জানার জন্য প্রার্থনা করে। কোন বিষয়ে স্থির সিদ্ধান্ত না করে এবং কোন দিকে ঝোক না রেখে বরং নিরপেক্ষ ও সাদা মনে ইস্তেখারার ছালাত আদায় করবে। অতঃপর যদিকে মন টানবে, সেভাবেই কাজ করবে। এ জন্য দু'রাক'আত ছালাত দিন বা রাতে যেকোন সময়ে পড়া যায়।

ফরয ছালাতের জন্য নির্ধারিত সূনাত সমূহে কিংবা তাহুইয়াতুল মসজিদ দু'রাক'আত ছালাতে বা পৃথকভাবে দু'রাক'আত নফল ছালাতে ইস্তেখা-রাহর দো'আ পাঠের মাধ্যমে এই ছালাত আদায় করা যেতে পারে। সূরায়ে ফাতিহার পরে যেকোন সূরা পাঠ করবে। অতঃপর হামদ ও দরুদ পাঠ করবে। যেমন- আলহামদুলিল্লা-হি রক্বিল 'আ-লামীন, ওয়াহু ছালা-তু ওয়াস সালা-মু 'আলা রাসূলিলিহিল কারীম'। অতঃপর নিম্নোক্ত দো'আ পাঠ করবে,

اللَّهُمَّ إِنِّي أَسْتَخِيرُكَ بِعِلْمِكَ، وَأَسْتَقْدِرُكَ بِقُدْرَتِكَ، وَأَسْأَلُكَ مِنْ فَضْلِكَ الْعَظِيمِ، فَإِنَّكَ تَقْدِرُ وَلَا أَقْدِرُ، وَتَعْلَمُ وَلَا أَعْلَمُ، وَأَنْتَ عَلَّامُ الْغُيُوبِ، اللَّهُمَّ إِنْ كُنْتَ تَعْلَمُ أَنَّ هَذَا الْأَمْرَ خَيْرٌ لِي فِي دِينِي وَمَعَاشِي وَعَاقِبَةِ أَمْرِي

৯৮. আবুদাউদ, নাসাঈ, ইবনু মাজাহ, বায়হাক্বী, তিরমিযী, হাদীছ হাসান; ফিকহুস সুন্নাহ ১/১৫৯।

৯৯. মিশকাত হা/২৩৫৩ 'ইস্তেগফার ও তওবা' অনুচ্ছেদ; আলবানী, হুহীহ তিরমিযী হা/২৮৩১, হুহীহ আবুদাউদ হা/১৩৪৩।

أُوقَالَ: فِي عَاجِلِ أَمْرِي وَأَجَلِهِ - فَأَقْدَرَهُ لِي وَيَسَّرَهُ لِي ثُمَّ بَارَكْ لِي فِيهِ،  
وَأِنْ كُنْتُ تَعْلَمُ أَنَّ هَذَا الْأَمْرَ شَرُّ لِي فِي دِينِي وَمَعَاشِي وَعَاقِبَةِ أَمْرِي -  
أُوقَالَ: فِي عَاجِلِ أَمْرِي وَأَجَلِهِ - فَأَصْرَفَهُ عَنِّي وَأَصْرَفَنِي عَنْهُ وَأَقْدَرَ لِي  
الْخَيْرَ حَيْثُ كَانَ ثُمَّ أَرْضِنِي بِهِ، قَالَ: (وَ يُسَمَّى حَاجَتَهُ) -

উচ্চারণঃ আল্লা-হুয়া ইন্নী আস্তাখীরুকা বি'ইলমিকা ওয়া আস্তাকুদিরুকা বি  
কুদরাতিকা, ওয়া আসআলুকা বিফায়লিকাল 'আযীমি। ফাইন্নাকা তাকুদিরু ওয়া লা  
আকুদিরু, ওয়া তা'লামু ওয়া লা আ'লামু, ওয়া আন্তা 'আল্লা-মুল ওয়ুবি। আল্লা-হুয়া  
ইন কুন্তা তা'লামু আন্না হা-যাল আমরা খায়রুন লী ফী দ্বীনী ওয়া মা'আ-শী, ওয়া  
'আ-ক্বিবাতি আমরী আও 'আ-জিলি আমরী ওয়া আ-জিলিহী, ফাকুদিরহু লী ওয়া  
ইয়াসসিরহু লী; ছুয়া বা-রিক লী ফীহি। ওয়া ইন কুন্তা তা'লামু আন্না হা-যাল আমরা  
শার্কুন লী ফী দ্বীনী ওয়া মা'আ-শী ওয়া 'আ-ক্বিবাতি আমরী আও 'আ-জিলি আমরী  
ওয়া আ-জিলিহী, ফাহরিফহু 'আন্নী ওয়াহরিফনী 'আনহু, ওয়াকুদির লিয়াল খায়রা  
হায়ছু কা-না, ছুয়া আরযিনী বিহী।

অনুবাদঃ হে আল্লাহ! আমি তোমার নিকট তোমারই জ্ঞানের সাহায্যে কল্যাণ বিষয়টি  
প্রার্থনা করছি এবং তোমার শক্তির মাধ্যমে (সেটা অর্জন করার) শক্তি প্রার্থনা করছি।  
আমি তোমার মহান অনুগ্রহ ভিক্ষা চাইছি। কেননা তুমিই ক্ষমতা রাখ। আমি ক্ষমতা  
রাখিনা। তুমিই জানো, আমি জানিনা। তুমিই যে অদৃশ্য বিষয় সমূহের মহাজ্ঞানী।

হে আল্লাহ! যদি তুমি জানো যে, এ কাজটি আমার জন্য উত্তম হবে আমার দ্বীনের  
জন্য, আমার জীবিকার জন্য ও আমার পরিণাম ফলের জন্য অথবা আমার ইহকাল ও  
পরকালের জন্য, তাহ'লে ওটা আমার জন্য নির্ধারিত করে দাও এবং সহজ করে  
দাও। অতঃপর ওতে আমার জন্য বরকত দান কর।

আর যদি তুমি জানো যে, এ কাজটি আমার জন্য মন্দ হবে আমার দ্বীনের জন্য,  
আমার জীবিকার জন্য ও আমার পরিণাম ফলের জন্য অথবা আমার ইহকাল ও  
পরকালের জন্য, তাহ'লে এটা আমার থেকে ফিরিয়ে নাও এবং আমাকেও ওটা থেকে  
ফিরিয়ে রাখ। অতঃপর আমার জন্য মঙ্গল নির্ধারণ কর, যেখানে তা আছে এবং  
আমাকে তা দ্বারা সন্তুষ্ট কর'।<sup>১০০</sup>

এখানে হা-যাল আমরা বা 'এই কাজ' বলার সময় কাজের নাম উল্লেখ করা যায় বলে  
রাবী বর্ণনা করেন। যা উপরোক্ত হাদীছের শেষে বর্ণিত হয়েছে।

ইস্তেখা-রাহুর দো'আটি ক্বিরাআতের পরে ও রুকুর পূর্বে পাঠ করার জন্য আল্লামা  
সাইয়িদ সাবিকু বলেছেন।<sup>১০১</sup>

১০০. বুখারী, মিশকাত হা/১৩২৩ 'নফল ছালাত' অনুচ্ছেদ।

১০১. ফিকহুস সুন্নাহ ১/১৫৮।

তবে যেহেতু রাসূলুল্লাহ (ছাঃ) শেষ বৈঠকে আত্তাহিইয়াতু ও সালাম ফিরানোর মধ্যবর্তী সময়ে বেশী বেশী প্রার্থনা করতেন (মুসলিম হা/৭৭১)। এমনকি জুতার ফিতা হারিয়ে গেলেও তা চাওয়ার' হুকুম এসেছে (তিরমিযী, মিশকাত হা/২২৫১), সেহেতু ইস্তেখা-রাহর উক্ত দো'আ রুকুর পূর্বে হোক, সিজদাতে গিয়ে হোক বা শেষ বৈঠকে সালাম ফিরানোর পূর্বে হোক সর্বাবস্থায় ছালাতের মধ্যে পাঠ করা বাঞ্ছনীয়। কেননা 'ছালাতের মধ্যে মুছল্লী তার প্রভুর সাথে নিরিবিলি কথা বলে' (আহমাদ, মিশকাত হা/৮৬)।

হাদীছের বর্ণনার দিকে লক্ষ্য করে দু'রাক'আত ছালাত শেষে সালাম ফিরানোর পরে অন্যান্য দো'আর ন্যায় ইস্তেখা-রাহর দো'আ পাঠ করার জন্য ইমাম শাওকানী মন্তব্য করেছেন এবং এ বিষয়ে কোন মতভেদ নেই বলেছেন। একটি বিষয়ের জন্য একবার ব্যতীত একাধিকবার 'ছালাতুল ইস্তেখা-রাহ' আদায়ের কথা স্পষ্টভাবে কোন ছহীহ হাদীছ দ্বারা প্রমাণিত নয়। তবে আল্লাহর রাসূল (ছাঃ) কখনো দো'আ করলে একই সময়ে তিনবার করে দো'আ করতেন- এই ছহীহ হাদীছের উপরে ভিত্তি করে ইস্তেখা-রাহর দো'আ পাঠের উদ্দেশ্যে অত্র ছালাত ইস্তেসকার ছালাতের ন্যায় একাধিকবার পড়া যায় বলে ইমাম শাওকানী মন্তব্য করেছেন।

ইমাম নববী বলেন, উক্ত দো'আ পাঠের সময় হৃদয়কে যাবতীয় ঝাঁক প্রবণতা হ'তে খালি করে নিতে হবে এবং সম্পূর্ণরূপে আল্লাহর উপরে তাওয়াক্কুল করতে হবে। নইলে ঐ ব্যক্তি আল্লাহর নিকটে কল্যাণপ্রার্থী না হয়ে নিজের প্রবৃত্তির পূজারী হিসাবে গণ্য হবে।<sup>১০২</sup>

### (১৩) ছালাতুল তাসবীহঃ (صلوة التسبيح)

এ সম্পর্কে কোন ছহীহ হাদীছ বর্ণিত হয়নি। বরং কেউ এ সম্পর্কিত ইবনু আব্বাস (রাঃ) বর্ণিত হাদীছকে 'মুরসাল' কেউ 'মওকূফ' কেউ 'যঈফ' কেউ 'মওয়ূ' বা জাল বলেছেন। যদিও শায়খ আলবানী (রহঃ) উক্ত হাদীছের যঈফ সূত্র সমূহ পরস্পরকে শক্তিশালী করে মনে করে তাকে স্বীয় ছহীহ আবুদাউদে (হা/১১৫২) সংকলন করেছেন এবং ইবনু হাজার আসক্বালানী 'হাসান' স্তরে উন্নীত বলেছেন। তবুও এরূপ বিতর্কিত, সন্দেহযুক্ত ও দুর্বল ভিত্তির উপরে কোন ইবাদত বিশেষ করে ছালাত প্রতিষ্ঠা করা যায় না বিধায় 'দারুল ইফতা' বিষয়টি থেকে দূরে থাকার সিদ্ধান্ত গ্রহণ করে।<sup>১০৩</sup>

১০২. নায়ল ৩/৩৫৪-৫৬, 'ইস্তেখা-রাহর ছালাত' অনুচ্ছেদ।

১০৩. দ্রঃ ইবনু হাজার আসক্বালানীর বিস্তারিত আলোচনা; আলবানী, মিশকাত পরিশিষ্ট, ৩ নং হাদীছ ৩/১৭৭৯-৮২ পৃঃ; আবুদাউদ, ইবনু মাজাহ, মিশকাত হা/১৩২৮ হাশিয়া; বায়হাক্বী ৩/৫২; আব্দুল্লাহ ইবনু আহমাদ, মাসায়েলু ইমাম আহমাদ মাসআলা নং ৪১৩, ২/২৯৫ পৃঃ।

## যকরী দো'আ সমূহ (الأدعية الضرورية)

দো'আর ফযীলতঃ হযরত আবু সাঈদ খুদরী (রাঃ) হ'তে বর্ণিত রাসূলুল্লাহ (ছাঃ) এরশাদ করেন, মুসলমান যখন অন্য কোন মুসলমানের জন্য দো'আ করে, যার মধ্যে কোনরূপ গোনাহ বা আত্মীয়তা ছিন্ন করার কথা থাকেনা, আল্লাহ পাক উক্ত দো'আর বিনিময়ে তাকে তিনটির যেকোন একটি দান করে থাকেন। ১-তার দো'আ দ্রুত কবুল করেন অথবা ২-তার প্রতিদান আখেরাতে প্রদান করার জন্য রেখে দেন অথবা ৩-তার থেকে অনুরূপ আরেকটি কষ্ট দূর করে দেন। একথা শুনে ছাহাবীগণ বললেন, তাহ'লে আমরা বেশী বেশী দো'আ করব। রাসূলুল্লাহ (ছাঃ) বললেন, আল্লাহ আরও বেশী দো'আ কবুলকারী' (আহমাদ, মিশকাত হা/২২৫৯ 'দো'আ সমূহ' অধ্যায়; ছহীহ, তানক্বীহ ২/৬৯)। অত্র হাদীছে বর্ণিত উপরোক্ত শর্তটির সাথে অন্যান্য ছহীহ হাদীছে বর্ণিত আরও তিনটি শর্ত রয়েছে। যথাঃ দো'আকারীর খাদ্য, পানীয় ও পোষাক পবিত্র হওয়া (অর্থাৎ হারাম না হওয়া) এবং দো'আ কবুল হওয়ার জন্য ব্যস্ত না হওয়া' (তানক্বীহ\*)।

১. শুভ কাজের শুরুঃ (ক) খানাপিনাসহ সকল শুভ কাজের শুরুতে বলবে- 'বিসমিল্লা-হ'। অর্থঃ 'আল্লাহর নামে শুরু করছি' (যুভা, মুসলিম, মিশকাত হা/৪১৫৯, ৬১; আবুদাউদ, মিশকাত হা/৪২০২)। (খ) শেষে বলবে- 'আলহামদুলিল্লা-হ' অর্থঃ 'যাবতীয় প্রশংসা আল্লাহর জন্য' (বুখারী, মুসলিম, মিশকাত হা/৪১৯৯, ৪২০০)।

২. বিস্ময়কর কিছু দেখলে বা শুনলে বলবে- 'সুবহা-নাল্লা-হ'। অর্থঃ 'মহা পবিত্র তুমি হে আল্লাহ'! ৩. দুঃখজনক কিছু দেখলে, ঘটলে বা শুনলে বলবে- 'ইন্না লিল্লা-হে ওয়া ইন্না ইলাইহে রা-জে'উন'। অর্থঃ 'আমরা সবাই আল্লাহর জন্য এবং আমরা সবাই তাঁর দিকেই প্রত্যাবর্তনকারী'।

### ৪. সালাম বিষয়কঃ

রাসূলুল্লাহ (ছাঃ) বলেন, তোমরা বেশী বেশী করে সালাম কর। চেনা-অচেনা সবাইকে সালাম কর। আরোহী পায়ে হাঁটা লোককে সালাম দিবে, পায়ে হাঁটা লোক বসা লোককে সালাম দিবে। কম সংখ্যক লোক অধিক সংখ্যক লোককে সালাম দিবে। ছোটরা বড়দের সালাম দিবে। দলের পক্ষ থেকে একজন সালাম বা সালামের জবাব দিলে চলবে (বুখারী, মুসলিম প্রভৃতি, মিশকাত হা/ ৪৬৩১, ২৯, ৩২, ৩৩, ৪৮)। কোন মজলিসে গিয়ে বসার সময় ও উঠে আসার সময় সালাম দিবে (তিরমিযী, আবুদাউদ, মিশকাত হা/ ৪৬৬০)। তিনি বলেন, আল্লাহর নিকটে সর্বোত্তম ঐ ব্যক্তি, যিনি প্রথমে সালাম দেন' (আহমাদ, তিরমিযী, মিশকাত হা/ ৪৬৪৬)।

(ক) 'আসসালা-মু আলায়কুম ওয়া রাহমাতুল্লা-হ'। অর্থঃ 'আপনার বা আপনাদের উপর শান্তি ও আল্লাহর অনুগ্রহ বর্ষিত হোক। (খ) জওয়াবে বলবে- 'ওয়া আলাইকুমুস সালা-মু ওয়া রাহমাতুল্লা-হি ওয়া বারাকা-তুহু'। অর্থঃ 'আপনার বা আপনাদের উপরেও শান্তি এবং আল্লাহর অনুগ্রহ ও দয়া সমূহ বর্ষিত হোক'।

\* আহমাদ হাসান দেহলভী, তানক্বীহর রুওয়াত ফী তাখরীজি আহাদীছিল মিশকাত (লাহোরঃ দারুদ দা'ওয়াতিস সালাফিইয়াহ ১৯৮৩)।

‘আসলাসা-মু আলায়কুম’ বললে ১০ নেকী, ওয়া ‘রাহমাতুল্লাহ’ যোগ করলে ২০ নেকী এবং ‘ওয়া বারাকাতুহু’ যোগ করলে ৩০ নেকী পাবে, ‘ওয়া মাগফিরাতুহু’ যোগ করলে ৪০ নেকী হবে। এমনিভাবে ফযীলত বাড়তে থাকবে (আবুদাউদ, মিশকাত হা/৪৬৪৪-৪৫)। (গ) শ্রেষ্ঠ সেই ব্যক্তি যিনি প্রথমে সালাম দিবেন (তিরমিযী, আবুদাউদ, মিশকাত হা/৪৬৪৬)।

(ঘ) যদি কেউ কাউকে সালাম পাঠায়, তবে জওয়াবে বলবে- ‘আলাইকা ওয়া আলাইহিস সালামু’ অর্থঃ ‘আপনার ও অমুকের উপরে শান্তি বর্ষিত হউক’। প্রকাশ থাকে যে, জাহেলী যুগে ‘আন-ইম ছাবা-হান’ **أَنْعَمُ صَبَاحًا** বা ‘সুপ্রভাত’ (Good Morning) বলা হ’ত। ইসলাম আসার পরে উক্ত প্রথা নিষিদ্ধ করে সালামের প্রচলন হয়। রাসূলুল্লাহ (ছাঃ) মুসলিম-অমুসলিম মিলিত মজলিস এবং মহিলা ও শিশুদেরকে সালাম দিতেন। (ঙ) অমুসলিমরা সালাম দিলে উত্তরে বলবে ‘ওয়া আলাইকুম’।

মুছাফাহাঃ অর্থ পরস্পরের হাতের তালু মিলানো। মুছাফাহার সময় একে অপরের ডান হাতের তালুর সাথে করমর্দন করতে হয়। ছাহাবায়ে কেলাম পরস্পরে মুছাফাহা করতেন (বুখারী, মিশকাত হা/৪৬৭৭)।

৫. কারো গৃহে প্রবেশকালে দরজার বাইরে থেকে অনধিক তিনবার ‘সালাম’ করবে। অনুমতি না পেলে ফিরে যাবে (মুত্তাফাকু আলাইহ, মিশকাত হা/৪৬৬৭)। এই সময় নিজের নাম বলা উত্তম (মুত্তাফাকু আলাইহ, মিশকাত হা/৪৬৬৮)। গৃহবাসীকে এবং অন্যদেরকে পরস্পরে সালাম করবে এই বলে-

৬. টয়লেট বা বাথরুমে প্রবেশকালে দো‘আঃ

بِسْمِ اللّٰهِ اَللّٰهُمَّ اِنِّىْ اَعُوْذُبِكَ مِنَ الْخُبْثِ وَالْخَبَائِثِ -

(ক) ‘বিসমিল্লাহি আল্লা-হুমা ইন্নী আ-উযুবিকা মিনাল খুবছে ওয়াল খাবা-ইছ। অনুবাদঃ ‘আল্লাহর নামে প্রবেশ করছি হে আল্লাহ! আমি পুরুষ ও স্ত্রী জিন হ’তে আপনার আশ্রয় প্রার্থনা করছি’ (ইবনু মাজাহ হা/২৯৭, মুত্তাফাকু আলাইহ, মিশকাত হা/৩৩৭)। (খ) হাজত শেষে বেরিয়ে আসার সময় বলবে- **غُفْرَانَكَ** ‘গুফরা-নাকম’। অর্থঃ ‘হে আল্লাহ! আপনার ক্ষমা চাই’ (তিরমিযী, ইবনু মাজাহ, মিশকাত হা/৩৫৯)।

৭. ঘর হ’তে বের হওয়াকালীন দো‘আঃ

بِسْمِ اللّٰهِ تَوَكَّلْتُ عَلَى اللّٰهِ وَاَحْوَلُ وَلَا قُوَّةَ اِلَّا بِاللّٰهِ -

উচ্চারণঃ বিসমিল্লা-হি তাওয়াক্কাল্তু ‘আলাল্লা-হি ওয়া লা হাওলা ওয়া লা কুউওয়াতা ইল্লা বিল্লা-হ’। অনুবাদঃ ‘আল্লাহর নামে (বের হচ্ছি), তাঁর উপরে ভরসা করছি। নেই কোন ক্ষমতা নেই কোন শক্তি আল্লাহ ব্যতীত’ (আবুদাউদ, তিরমিযী, মিশকাত হা/২৪৪৩)।

## ৮. খানাপিনার আদব ও দো'আঃ

(ক) রাসূলুল্লাহ (ছাঃ) বলেন, তুমি খাওয়ার শুরুতে 'বিসমিল্লাহ' বল। ডান হাত দিয়ে খাও ও নিকট থেকে খাও (মুত্তাফাকু আলাইহ, মিশকাত হা/৪১৫৯)। বাম হাতে খাবে না বা পান করবে না। কেননা শয়তান বাম হাতে খায় ও পান করে (মুসলিম, মিশকাত হা/৪১৬৩)।

(খ) খাদ্য পড়ে গেলে সেটা থেকে ময়লা দূর করে খাও। শয়তানের জন্য রেখে দিয়োনা। খাওয়া শেষে হাত ধোয়ার পূর্বে ভালভাবে প্লেট ও আঙ্গুল চেটে খাও। কেননা কোন্ খাদ্যে বরকত আছে, তোমরা তা জানোনা' (মুসলিম, মিশকাত হা/৪১৬৫-৬৭)।

(গ) রাসূলুল্লাহ (ছাঃ) ভাঙের মুখে মুখ লাগিয়ে এবং দাঁড়িয়ে পানি পান করতে নিষেধ করেছেন (মুত্তাফাকু আলাইহ, মুসলিম হা/৪২৬৪, ৪২৬৬)। তবে তিনি যমযমের পানি এবং ওয়ূ শেষে পাত্রে অবশিষ্ট পানি দাঁড়িয়ে পান করেছেন (মুত্তাফাকু আলাইহ, বুখারী হা/৪২৬৮, ৪২৬৯)। পানির পাত্রের মধ্যে শ্বাস ফেলবে না। বরং তিনবার বাইরে শ্বাস ফেলবে (ও ঘীরে পানি পান করবে)

(আবু দাউদ, ইবনু মাজাহ, মিশকাত হা/ ৪২৭৭; মুত্তাফাকু আলাইহ, মিশকাত হা/৪২৬৩)। (ঘ) খাদ্য পরিবেশনের সময় ডান দিক থেকে শুরু করবে (মুত্তাফাকু আলাইহ, হা/৪২৭৩)। (ঙ) এক মুমিনের খানা দুই মুমিনে খায়। দুই মুমিনের খানা চার মুমিনে এবং চার মুমিনের খানা আট মুমিনে খায় (মুসলিম, মিশকাত হা/৪১৭৮)। কেননা মুমিন এক পেটে খায় ও কাফের সাত পেটে খায় (বুখারী, মিশকাত হা/৪১৭৩)। কাত হয়ে বা ঠেস দিয়ে খেতে নেই (বুখারী, মিশকাত হা/৪১৬৮)। (চ) খাওয়ার সময়

'বিসমিল্লাহ' না বললে শয়তান তার সাথে খেতে থাকে (মুসলিম, মিশকাত হা/৪১৬০)। (ছ) খাওয়ার শুরুতে 'বিসমিল্লাহ' বলতে ভুলে গেলে (শেষ হওয়ার আগেই) বলবে, بِسْمِ اللّٰهِ اَوْ لَهٗ

وَ اٰخِرُهٗ 'বিসমিল্লা-হি আউওয়ালাহু ওয়া আ-খিরাহু' (আবুদাউদ, হা/৪২০২)। (জ) খাওয়া ও পানি পান শেষে বলবে, 'আলহামদুলিল্লাহ' (মুসলিম হা/৪২০০; তিরমিযী, আল-আযকার পৃঃ ৯০)। এবং

'আল্লা-হুম্মা বা-রিক লানা ফীহি ওয়া আত্বু 'ইমনা খায়রাম মিনহু' (তিরমিযী, আবুদাউদ হা/৪২৮৩; আহমাদ-এর বর্ণনায় আছে 'আবদিলনা'। =আহমাদ, আল-আযকার, সনদ হুইহ পৃঃ ৯১) / আরও দো'আ আছে।

(ঝ) খাওয়া শেষে দস্তারখানা উঠানোর সময় বলবে, الْحَمْدُ لِلّٰهِ حَمْدًا كَثِيرًا طَيِّبًا  
আলহামদু লিল্লা-হি হামদান কাছীরান ত্বাইয়িবাম মুবা-রাকান ফীহি (বুখারী হা/৪১৯৯)। (ঞ) রাসূলুল্লাহ (ছাঃ) মিষ্টি ও মধু পসন্দ করতেন (বুখারী হা/৪১৮২)।

৯. মেসবানের জন্য দো'আঃ وَ أَفْطَرَ عِنْدَكُمْ الصَّائِمُونَ وَأَكَلَ طَعَامَكُمْ الْأَبْرَارُ وَ  
উচ্চারণঃ আফত্বারা ইনদাকুমুছ হা-য়েমুন, ওয়া আকাল  
ত্বা'আ-মাকুমুল আবরা-রু, ওয়া ছাল্লাত আলায়কুমুল মালা-য়েকাহ (আহমাদ, শারহুস  
সুন্নাহ হা/৪২৪৯)। অথবা اللَّهُمَّ بَارِكْ لَهُمْ فِيْمَا رَزَقْتَهُمْ وَ اغْفِرْ لَهُمْ وَ اَرْحَمْهُمْ



আল্লা-হুমা বা-রিক লাহম ফীমা রাযাক্বতাহম ওয়াগফির লাহম ওয়ারহামহম (মুসলিম, আযকার পৃঃ ৯২)। ৯. নতুন গন্তব্য স্থল কিংবা অন্য কোন ভীতিকর স্থানে নামার পরে পড়বে- **أَعُوذُ بِكَلِمَاتِ اللَّهِ التَّامَّاتِ مِنْ شَرِّ مَا خَلَقَ** 'আ'উযু বিকালিমা-তিল্লা-হিত তাগ্মা-তি মিন শারি মা খালাক্বা' (মুসলিম, মুহাম্মাদ আশ-শায়বানী, আল-আযকার পৃঃ ৯২)।

অনুবাদঃ 'আমি আল্লাহর পরিপূর্ণ কালেমা সমূহের মাধ্যমে তাঁর সৃষ্টির বাবতীয় অনিষ্টকারিতা হ'তে পানাহ চাচ্ছি'।

১০. শত্রুর ভয় থাকলে পড়বে- **اللَّهُمَّ إِنَّا نَجْعُكَ فِي نُحُورِهِمْ وَنَعُوذُ بِكَ مِنْ شُرُورِهِمْ** -

উচ্চারণ 'আল্লা-হুমা ইন্বা নাজ 'আলুকা ফী নুহুরিহিম ওয়া না 'উযুবিকা মিন শুরুরিহিম'।  
অনুবাদঃ 'হে আল্লাহ! আমরা আপনাকে শত্রুদের মুকাবিলায় পেশ করছি এবং তাদের অনিষ্ট সমূহ হ'তে আপনার পানাহ চাচ্ছি' (আহমাদ, আবুদাউদ, মিশকাত হা/২৪৪১ 'দো'আ সমূহ' অধ্যায়; আবুদাউদ, আল-আযকার পৃঃ ১০৮)।

১১. ছালাতে ধোকা থেকে বাঁচার উপায়ঃ

শয়তান ছালাতের মধ্যে ঢুকে ছালাত ও কিরাআতের মধ্যে গোলমাল সৃষ্টি করে। রাসূলুল্লাহ (ছাঃ) বলেন, এরা হ'ল 'খিনযাব'। যখন তুমি এদের অস্তিত্ব বুঝতে পারবে, তখন শয়তান থেকে আল্লাহর পানাহ চেয়ে আ'উযুবল্লা-হি মিনাশ শায়ত্বা-নির রজীম পড়বে এবং বাম দিকে তিনবার থুক মারবে। রাবী ওহমান বিন আবুল 'আছ বলেন, এরূপ করাতে আল্লাহ আমার থেকে ঐ শয়তানকে দূরে সরিয়ে দেন (মুসলিম, মিশকাত হা/৭৭)।

১২. সাইয়িদুল ইস্তিগ্ফার বা ক্ষমা প্রার্থনার শ্রেষ্ঠ দো'আঃ

রাসূলুল্লাহ (ছাঃ) বলেন, যে ব্যক্তি দৃঢ় বিশ্বাসের সাথে এই দো'আ পাঠ করবে, দিবসে পাঠ করে রাতে মারা গেলে কিংবা রাতে পাঠ করে দিবসে মারা গেলে, সে জান্নাতী হবে' (বুখারী)।

**اللَّهُمَّ أَنْتَ رَبِّي لَا إِلَهَ إِلَّا أَنْتَ خَلَقْتَنِي وَأَنَا عَبْدُكَ وَأَنَا عَلَى عَهْدِكَ وَوَعْدِكَ مَا اسْتَطَعْتُ، أَعُوذُ بِكَ مِنْ شَرِّ مَا صَنَعْتُ، أَبُوءُ لَكَ بِنِعْمَتِكَ عَلَيَّ وَأَبُوءُ بِذَنْبِي فَاغْفِرْ لِي، فَإِنَّهُ لَا يَغْفِرُ الذُّنُوبَ إِلَّا أَنْتَ -**

উচ্চারণঃ আল্লা-হুমা আনতা রব্বী লা ইলা-হা ইল্লা আনতা খালাক্বতানী, ওয়া আনা 'আব্দুকা ওয়া আনা 'আলা 'আহ্দিকা ওয়া ওয়া'দিকা মাস্তাত্বা'তু। আ'উযুবিকা মিন শারি মা ছানা'তু। আবুউ লাকা বিনি'মাতিকা 'আলাইয়া, ওয়া আবুউ বিযাঈ, ফাগফিরলী। ফাইন্বাহু লা ইয়াগ্ফিরুয যুনুবা ইল্লা আনতা।

অনুবাদঃ হে আল্লাহ! তুমি আমার প্রভু। তুমি ব্যতীত কোন উপাস্য নেই। তুমি আমাকে সৃষ্টি করেছ এবং আমি তোমার দাস। আমি তোমার নিকটে কৃত অঙ্গীকার ও ওয়াদার উপরে সাধ্যমত কায়েম আছি। আমি আমার কৃতকর্ম গুলির মন্দসমূহ থেকে তোমার পানাহ চাচ্ছি। আমার উপরে তোমার অনুগ্রহ সমূহ স্বীকার করছি এবং আমি আমার গোনাহ স্বীকার করছি। অতএব তুমি আমাকে ক্ষমা কর। কেননা তুমি ব্যতীত ক্ষমা করার কেউ নেই' (বুখারী, মিশকাত হা/২৩৩৫ 'ইস্তিগফার ও তওবা' অনুচ্ছেদ)।

### ১৩. নতুন চাঁদ দেখার দো'আঃ

اللَّهُ أَكْبَرُ، اللَّهُمَّ أَهْلُهُ عَلَيْنَا بِالْإِيمَانِ وَالْإِسْلَامِ وَالْتَّوْفِيقِ لِمَا تُحِبُّ وَتَرْضَى، رَبُّنَا وَرَبُّكَ اللَّهُ-

উচ্চারণঃ আল্লা-হু আকবর। আল্লা-হুমা আহিল্লাহু 'আলায়না বিল আমনে ওয়াল ঈমা-নি ওয়াস সালা-মাতি ওয়াল ইসলা-মি ওয়াত তাওফীক্বি লিমা তুহিব্বু ওয়া তারযা। রাব্বুনা ওয়া রাব্বুকাল্লা-হু।

অনুবাদঃ আল্লাহ সবার চাইতে বড়। হে আল্লাহ! আপনি আমাদের উপরে চাঁদকে উদিত করুন শান্তি ও ঈমানের সহিত, নিরাপত্তা ও ইসলামের সহিত এবং ঐসকল কাজের তাওফীকের সহিত যে সকল কাজ আপনি ভালবাসেন ও পসন্দ করে থাকেন। (হে চন্দ্র!) আমাদের ও তোমার প্রভু আল্লাহ' (দারেমী সনদ হাসান, আল-আযকার পৃঃ ৮২)।

### ১৪. ঝড়ের সময়কার দো'আঃ

اللَّهُمَّ إِنِّي أَسْأَلُكَ خَيْرَهَا وَخَيْرَ مَا فِيهَا وَخَيْرَ مَا أُرْسِلَتْ بِهِ وَأَعُوذُ بِكَ مِنْ شَرِّهَا وَمِنْ شَرِّ مَا أُرْسِلَتْ بِهِ-

উচ্চারণঃ আল্লা-হুমা ইন্নী আসআলুক্বা খায়রাহা ওয়া খায়রা মা ফীহা ওয়া খায়রা মা উরসিলাত বিহী, ওয়া আ'উযুবিকা মিন শারিহা ওয়া মিন শারি মা উরসিলাত বিহী'।

অনুবাদঃ হে আল্লাহ! আমি আপনার নিকটে উহার মঙ্গল, উহার মধ্যকার মঙ্গল ও যা নিয়ে ওটি প্রেরিত হয়েছে, তার মঙ্গল সমূহ প্রার্থনা করছি এবং আমি আপনার আশ্রয় প্রার্থনা করছি উহার অকল্যাণ হ'তে এবং যা নিয়ে ওটি প্রেরিত হয়েছে তার অকল্যাণ সমূহ হ'তে' (মুসলিম; আল-আযকার পৃঃ ৭৮)। ছহীহ ইবনু হিব্বানের অন্য

বর্ণনায় এসেছে, اللَّهُمَّ لَقْحًا لَا عَقِيمًا আল্লা-হুমা লাক্বহান লা 'আক্বীমান 'হে আল্লাহ! মঙ্গলপূর্ণ কর মঙ্গলশূন্য নয়' (হাদীছ ছহীহ, ঐ পৃঃ ৭৯।)।

### ১৫. বজ্রের আওয়ায শুনে দো'আঃ

سُبْحَانَ الَّذِي يُسَبِّحُ الرَّعْدُ بِحَمْدِهِ وَالْمَلَائِكَةُ مِنْ خِيفَتِهِ

উচ্চারণঃ সুবহা-নাল্লাযী ইয়ুসাব্বিহুর রা'দু বিহামদিহী ওয়াল মালা-ইকাতু মিন খীফাতিহী'।

অনুবাদঃ মহা পবিত্র সেই সত্তা যাঁর গুণগান করে বজ্র ও ফেরেশতামণ্ডলী সভয়ে' (রো'দ ১৩; বুখারী, ঐ পৃঃ ৭৯) ।

### ১৬. রোগী পরিচর্যার দো'আঃ

রোগীর মাথায় ডান হাত রেখে বা দেহে ডান হাত বুলিয়ে নিম্নের দো'আ পড়বে-

أَذْهَبِ الْبَأْسَ رَبُّ النَّاسِ إِشْفِ أَنْتَ الشَّافِي لَا شِفَاءَ إِلَّا شِفَاؤُكَ شِفَاءً لَا يُغَادِرُ سَقَمًا -

উচ্চারণঃ আযহিবিল বা'সা রব্বান্না-সি, ইশ্ফি আনতাশ শা-ফী, লা শিফা-আ ইল্লা শিফা-উকা শিফা-আন লা ইয়ুগা-দিরু সাক্বামান ।

অনুবাদঃ কষ্ট দূর কর হে মানুষের প্রতিপালক! আরোগ্য দার কর । তুমিই আরোগ্য দানকারী । কোন আরোগ্য নেই তোমার দেওয়া আরোগ্য ব্যতীত । যে আরোগ্য ধোকা দেয়না কোন রোগীকে (মুত্তাফাকু আলাইহ, মিশকাত হা/১৫৩০) ।

### ১৭. নতুন কাপড় পরিধানকালে দো'আঃ

الْحَمْدُ لِلَّهِ الَّذِي كَسَانِي هَذَا وَرَزَقَنِيهِ مِنْ غَيْرِ حَوْلٍ مِنِّي وَلَا قُوَّةَ

উচ্চারণঃ আল-হামদু লিল্লা-হিল্লাযী কাসা-নী হা-যা ওয়া রাক্বানীহে মিন গায়রে হাওলিম মিনী ওয়ালা কুউওয়াতিন ।

অনুবাদঃ যাবতীয় প্রশংসা আল্লাহর জন্য । যিনি আমার কোন ক্ষমতা ও শক্তি ছাড়াই আমাকে এই কাপড় পরিধান করিয়েছেন ও এই খাদ্য দান করেছেন' (ইবনুস সুন্নী, সনদ হাসান, আযকার পৃঃ ১০৬) ।

### ১৮. দুঃখ ও সংকট কালে দো'আঃ

يَا حَيُّ يَا قَيُّوْمُ بِرَحْمَتِكَ أَسْتَغِيْثُ

উচ্চারণঃ ইয়া হাইয়ু ইয়া ক্বাইয়ুমু বিরাহমাতিকা আস্তাগীছু । অনুবাদঃ 'হে চিরঞ্জীব! সবকিছুর ধারক! আমি তোমার রহমতের আশ্রয় প্রার্থনা করি' (৭ বার) (তিরমিযী সনদ হাসান; হুহীহ আন-কানিমৎ তাইযিব) ।

### ১৯. মজলিস শেষের দো'আঃ

سُبْحَانَكَ اللَّهُمَّ وَبِحَمْدِكَ أَشْهَدُ أَنْ لَا إِلَهَ إِلَّا أَنْتَ ، أَسْتَغْفِرُكَ وَ أَتُوبُ إِلَيْكَ -

উচ্চারণঃ সুবহা-নাকাল্লা-হুম্মা ওয়া বিহাম্দিকা, আশহাদু আন্ লা ইলা-হা ইল্লা আন্তা, আস্তাগ্ফিরুক্বা ওয়া আতুবু ইলাইকা' ।

অনুবাদঃ 'মহা পবিত্র আপনি হে আল্লাহ! আপনার প্রশংসার সাথে আমি সাক্ষ্য দিচ্ছি যে, আপনি ব্যতীত কোন উপাস্য নেই । আমি আপনার নিকটে ক্ষমা প্রার্থনা করছি এবং আপনার দিকেই ফিরে যাচ্ছি বা তওবা করছি' ।

এই দো'আ পড়লে তার মজলিস চলাকালীন অনর্থক কথাসমূহের গোনাহ মাফ করে দেওয়া হয় । নাসাঈ শরীফের বর্ণনায় এসেছে যে, এই দো'আ উক্ত গোনাহের কাফফারা হয়ে যায় । ।

হে আল্লাহ! এ বই পড়ে যত মুমিন নর-নারী আমল করবেন, তোমার রাসূল (ছাঃ) -এর ওয়াদা মোতাবেক এ দীন লেখকের আমলনামায় তা পূর্ণ রূপে যুক্ত কর এবং এর অসীলায় লেখক ও তার পিতামাতাকে কবর ও হাশরে মুক্তি দান কর- আমীন!!

سبحان ربك رب العزة عما يصفون و سلام على المرسلين والحمد لله رب العالمين، وصلى  
الله تعالى على نبينا محمد وآله و صحبه أجمعين ومن تبعهم بإحسان إلى يوم الدين -

## হাদীছ ফাউন্ডেশন বাংলাদেশ-এর লক্ষ্য ও উদ্দেশ্য

- মুহাম্মদহীনের মাসলাক অনুসরণে কুরআন ও হাদীছের সটিকা অনুবাদ ও ব্যাখ্যা প্রকাশ।
- দৈনন্দিন মাসায়েল ও ব্যবহারবিধির উপরে খণ্ডকারে পুস্তিকা প্রকাশ।
- আক্বীদা ও আমল বিষয়ক বিভিন্ন যরুরী পুস্তকের বঙ্গানুবাদ ও অন্যান্য মৌলিক গ্রন্থ প্রকাশ।

[www.i-onlinemedia.net](http://www.i-onlinemedia.net)



হাদীছ ফাউন্ডেশন বাংলাদেশ